



MAHUBIRI KATIKA INJILI YA MATHAYO (I)

**NI LINI MKRISTO
ANAEWEZA KUWA NA
MAZUNGUMZO
YA KARIBU NA BWANA?**

PAUL C. JONG

Kwa Watu wa Yesu Kristo, Mfalme wa Wafalme

Mtume Mathayo anatumieza kuwa Neno la Yesu lilielezwa kwa kila mtu katika ulimwengu huu, hii ni kwa sababu Mathayo alimwona Yesu kuwa ni Mfalme wa wafalme. Kwa sasa, Wakristo katika ulimwengu mzima ambao wamezaliwa tena upya kwa kuamini katika injili ya maji na Roho wanatamani sana kuula mkate wa uzima. Lakini ni vigumu kwa wao kuwa na ushirikiano nasi katika injili ya kweli, kwa sababu wapo mbali sana na sisi.

Kwa hiyo ili kutimiza mahitaji ya kiroho ya watu hawa wa Yesu Kristo, Mfalme wa wafalme, basi mahubiri katika kitabu hiki yameandaliwa kama mkate mpya wa uzima ili kuboresha ukuaji wao wa kiroho. Mwandishi anatangaza kuwa wale waliokwishapokea ondoleo la dhambi zao kwa kuamini katika Neno la Yesu Kristo, Mfalme wa wafalme, ni lazima wajilishe Neno lake halisi ili waweze kuilinda imani yao na kuyaimarisha maisha yao ya kiroho.

Kitabu hiki kitawapatia mkate wa kweli wa uzima kwenu nyote ambao mmefanyika kuwa watu wa ufalme wa Mfalme kwa imani. Kwa kupitia Kanisa na watumishi wake, Mungu ataendelea kukupatia mkate huu wa uzima. Baraka za Mungu na ziwe juu yao wote waliozaliwa upya kwa maji na kwa Roho, na ambao wanatamani kuwa na ushirika wa kweli wa kiroho pamoja nasi katika Yesu Kristo milele yote.



NIENIKRISTO ANAWEZAKUMANA NAZINGUNZO YAKIRIBU NABWANA?



Hephzibah

**NI LINI MKRISTO
ANAWENZA KUWA NA
MAZUNGUMZO
YA KARIBU NA BWANA?**

PAUL C. JONG



Hephzibah Publishing House

**A Ministry of THE NEW LIFE MISSION
SEOUL, KOREA**

Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Ni lini Mkristo anaweza kuwa na mazungumzo ya karibu na Bwana?

MAHUBIRI KATIKA INJILI YA MATHAYO (I)

Hakimiliki © 2009 na Kampuni ya Uchapaji ya Hephzibah

Haki zote zimehifadhiwa. Hairuhusiwi kunakiri kubadili sehemu ya kitabu hiki kwa njia yoyote ile ikiwa ni pamoja na kunakiri, kurekodi, au kukidurufu bila ya ridhaa ya maandishi toka kwa mmiliki wa kitabu hiki.

Nukuu za Maandiko ya Biblia zinatoka katika Tafsiri ya Ushirikiano wa Makanisa – Kenya (Nairobi) na Tanzania (Dodoma)

ISBN 978-89-282-0254-6

Jalada limebuniwa na Min-soo Kim

Vielelezo vimetolewa na Young-ae Kim

Kimechapishwa nchini Korea

Hephzibah Publishing House

A Ministry of THE NEW LIFE MISSION

Seoul, Korea

♣ Website: <https://www.nlmission.com>
<https://www.bjnewlife.org>
<https://www.nlmbookcafe.com>

♣ E-mail: newlife@bjnewlife.org

Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

YALIYOMO

Dibaji ----- 9

SURA YA 1

Ukoo wa Yesu Kristo
(Mathayo 1:1-6) ----- 15

Hebu Tumshukuru Bwana Wetu Yesu
Aliyekuja Kutuokoa
(Mathayo 1:18-25) ----- 23

Yesu Aliyetungwa Mimba Kwa Uwezo wa
Roho Mtakatifu
(Mathayo 1:18-25) ----- 38

SURA YA 2

Ni Wapi Tunapoweza Kukutana na Bwana Kwa Usahihi?
(Mathayo 2:1-12) ----- 61

SURA YA 3

Ineza Injili ya Kweli Na Matendo ya Haki ya Yesu
(Mathayo 3:1-17) ----- 75

Yesu Aliyekuja Ili Kuzitoweshea Mbali Dhambi Zako
(Mathayo 3:13-17) ----- 86

SURA YA 4

Kumwogopa Mungu na Kuntumikia Mungu ni Baraka (Mathayo 4:1-11)-----	125
--	-----

SURA YA 5

Hotuba Mlimani (Mathayo 5:1-16)-----	143
---	-----

SURA YA 6

Fundisho la Bwana Juu ya Maombi (1) (Mathayo 6:1-15)-----	169
--	-----

Fundisho la Bwana Juu ya Maombi (2) (Mathayo 6:5-15) -----	196
---	-----

Ishi Kwa Moyo Wako Wote Katika Bwana (Mathayo 6:21-23) -----	218
---	-----

Usihofu Kuhusu Maisha Yako, Bali Mwamini Mungu Peke Yake (Mathayo 6:25-34) -----	228
--	-----


Yatosha Kwa Siku Maovu Yake (Mathayo 6:34) -----	249
---	-----

SURA YA 7

Ni Lazima Tuingie Kwa Kupitia Mlango Mwembamba Kwa Kuamini Katika Nguvu ya Injili (Mathayo 7:13-14) -----	261
Tutafanya Nini Ikiwa Tutaachwa na Bwana Siku ya Mwisho? (Mathayo 7:21-23) -----	269
Imani Inayoweza Kuyafanya Mapenzi ya Mungu Baba (Mathayo 7:20-27) -----	279
Tunaweza Kuingia Mbinguni Pale Tu Tunapoyafahamu Mapenzi ya Baba Na Kuyaamini (Mathayo 7:21-27) -----	304
Jihadharini na Manabii wa Uongo Ambao Lengo Lao ni Kupata Fedha Zenu Tu (Mathayo 7:13-27) -----	313

SURA YA 8

Uponyaji wa Wakoma wa Kiroho (Mathayo 8:1-4) -----	335
“Sema Neno Tu” (Mathayo 8:5-10) -----	360
Kwanza Mfuate Bwana (Mathayo 8:18-22) -----	376



Dibaji

Katika mataifa mengi watu wengi wanapokea ondoleo la dhambi. Kama matokeo ya jambo hilo, tunahitaji watu wa kuwaongoza na kuwapatia mwongozo katika safari yao na Bwana Yesu Kristo. Ni lazima tuwaongoze wale ambao wamepokea ondoleo la dhambi zao zote katika Kanisa. Ninaamini kwa uthabiti kuwa viongozi wengi watainuka katika kila nchi ulimwenguni. Ninatamani kama ningewatuma watenda kazi wenzangu wote kwenda katika ulimwengu kama wajumbe wa Mungu, yaani kama wamissionari. Hata hivyo, kama wangelitumwa kwenda katika mataifa yote, ni nani ambaye angeliunga mkono hapa injili ya haki kama vile vifundo vya kinara cha taa? Hivyo, mimi ninatumaini na kuomba kuwa watenda kazi wa Mungu watainuka katika kila taifa ambako mtumishi mmoja mmoja atainuka ndani ya nchi yake.

Chapisho hili ni kitabu changu cha kwanza juu ya mfululizo wa ukuaji wa kiroho kwa ajili ya viongozi wa baadaye waliokombolewa. Kadri ninavyomtumikia Bwana, ninaamini kuwa watu wa Mungu watainuka. Huku nikiwatarajia viongozi wa baadaye, nimeandaa mahubiri haya katika kanda ambayo sasa ninawakabidhini. Mahubiri haya ambayo yamehaririwa na kutafsiriwa kwa madhumuni kuwafunza viongozi wa baadaye yatakupatia ujumbe unaoitunza nafsi katika moyo wako.

Ninaamini kwa hakika kuwa mahubiri haya yatakuwa ni chakula cha kiroho kwa watu wote. Hii ni kwa sababu ni vigumu kwetu sote kuwa na ushirika wa ana kwa ana na watumishi wa Mungu na waamini wengine toka katika mataifa

mengine, ninaamini kuwa kwa kushirikiana katika kitabu hiki ninaweza kuwa na ushirika wa kiroho pamoja nao, yaani wale ambao wamekwisha kuamini katika injili ya maji na Roho. Sote tunashukuru kuwa Mungu alitufanya sisi kuwa watumishi wake kwa kutulisha Chakula cha Uzima.

Hadi sasa tumekwisha chapisha vitabu 10 kwa lugha ya Kiingereza. Na tumeona kuwa wengi waliovisoma vitabu hivyo wanashukuru kwa kupokea ondoleo la dhambi kwa kuamini katika injili ya maji na Roho. Sasa, kwa kupitia mahubiri kwa ajili ya ukuaji wao wa kiroho, basi nitaweza tena kushuhudia kuwa injili ya maji na Roho ndiyo ukweli pekee unaotoa uzima. Nina hakika kuwa baadaye watakuja kutambua kuwa maandiko yote yamejazwa na ukweli wa injili ya maji na Roho. Na hatimaye watu wote ulimwenguni watafikia hatua ya kufahamu kwa kina kuwa injili ya maji na Roho ndio ukweli pekee. Watakapokuwa wameufahamu ukweli na kutupilia mbali imani zao zenye msingi wa kihisia, basi mioyo yao itajazwa na injili ya maji na Roho ambayo ndiyo njia pekee kwenda katika ukombozi wa kudumu. Hivyo, watu katika ulimwengu mzima wataishi kama Wafuasi wa Kristo. Sasa, tutafanyika kuwa ni vyombo ambavyo vinaziokoa nafsi nyingi zilizopotea na tutaifanya kazi yake kwa ajili ya kondoo waliopotea katika mataifa yote hali tukiwa na imani katika nguvu ya injili ya maji na Roho.

Kama kila mmea unavyochanua na kisha kuzaa matunda, basi mimi ninaamini kuwa nguvu ya injili ya kweli haiwabariki wale wanaoiamini tu bali pia inawaruhusu wao kuyaongoza maisha yao na kuishi kama watumishi wa Mungu. Watabarikiwa kimwili na kiroho. Sasa, watumishi wa Mungu katika mataifa yote watapanda mbegu ya injili ya maji na Roho na kisha kuwaokoa watu wengi wasio na idadi toka katika dhambi zao. Kadri tunavyoihubiri injili ya maji na Roho, basi

tutaendelea kushinda. Tutazaa matunda zaidi kwa ajili ya Ufalme wa Mungu kama waamini katika injili hii ya kweli ya maji na Roho. Tunaishi katika kipindi cha mavuno na tutakuwa na mavuno makubwa ya matunda ya wokovu. Na sasa, tutaliamini Neno lake, tutamshukuru Mungu, na kisha kumtukuza Yeye.

Ikiwa Mungu ataruhusu, basi tutayafanya mambo haya na mengine mengi zaidi. Na ninaamini kuwa Mungu atambariki kila mmoja wetu. Mungu na atupatie baraka nyingi za kiroho na za kimwili—baraka za imani takatifu ya Mbinguni na manono ya nchi—kwa kila mtu anayeamini katika injili ya maji na Roho. ☒

Paul C. Jong

SURA YA

1



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Ukoo wa Yesu Kristo

< Mathayo 1:1-6 >

“Kitabu cha ukoo wa Yesu Kristo, mwana wa Daudi, mwana wa Ibrahimu. Ibrahimu alimzaa Isaka; Isaka akamzaa Yakobo; Yakobo akamzaa Yuda na ndugu zake; Yuda akamzaa Peresi na Zera kwa Tamari; Peresi akamzaa Esromu; Esromu akamzaa Aramu; Aramu akamzaa Aminadabu; Aminadabu akamzaa Nashoni; Nashoni akamzaa Salmoni; Salmoni akamzaa Boasi kwa Rahabu; Boasi akamzaa Obedi kwa Ruthu; Obedi akamzaa Yese; Yese akamza mfalme Daudi. Daudi akamzaa Sulemani kwa yule mke wa Uria.”

Ili tuweze kuwa sehemu ya ukoo wa Yesu Kristo, tunahitaji kuamini katika wokovu wake. Kwa maneno mengine, kuamini katika wokovu wake ndiyo njia pekee inayoweza kutufanya kuwa sehemu ya ukoo wa Yesu.

Mungu Baba hakuwatuma malaika ili kutuokoa sisi, bali alimtumwa Mwanawe pekee. Mungu Baba alimtuma Yesu Kristo ili kutuokoa toka katika dhambi. Mungu alifanya agano kuwa kila mtu anayemwamini Yesu, ambaye ni Mwana wa Mungu na Mwokozi wetu atasamehewa dhambi zake zote mara moja na milele. Katika mazingira kama hayo, Mathayo 1:1 inasema, *“Kitabu cha ukoo wa Yesu Kristo, mwana wa Daudi, mwana wa Ibrahimu.”* Maneno haya, *“Ukoo wa Yesu Kristo”* yana maanisha ulimwengu wa kiroho kuhusu jinsi tunavyoweza kufanyika watoto wa Mungu kwa kufahamu na kuamini katika Yesu Kristo, na kisha kukombolewa toka katika

nguvu za giza.

Kifungu hiki kinaelezea yale ambayo yanahitajika ili mwenye dhambi aweze kuokolewa toka katika dhambi zake na kufanyika kuwa mtoto wa Mungu. Kwa maneno mengine, ili kufanyika kuwa mtoto wa Mungu, ni lazima mtu awe na imani sawa na ile ambayo Ibrahimu alikuwa nayo. Je, ni imani ipi inayohitajika ili kuweza kuingia katika Ufalme wa Mungu? Tunahitaji kuliadini Neno la Mungu kikamilifu kama Ibrahimu alivyofanya. Nini kilichosababisha imani ya Ibrahimu kumpendeza Mungu? Ibrahimu aliliadini Neno la Mungu kwa ukamilifu wake wote na alitarajia yale ambayo hayawezekani kwa mujibu wa fikra za kibinadamu. Ibrahimu aliliadini agano la Mungu kama Mungu alivyosema, jambo ambalo lilikuwa ni kinyume na mawazo ya kibinadamu. Na hivyo ndivyo imani yake ilivyokuwa. Pamoja na kuwa mke wa Ibrahimu alikuwa amepitisha umri wa kuzaa na kwamba ilikuwa ni vigumu kwake kupata mimba, bado Ibrahimu aliliadini agano la Mungu kuwa uzao wake utakuwa mwingi kama nyota za angani. Hivyo akamhesabia kuwa ana haki na akapendezwa naye. Hivi ndiyo Ibrahimu alivyoweza kufanyika kuwa baba wa wenye haki kwa imani.

Wewe na mimi leo hii tunamwangalia Ibrahimu kama baba wa waadini wote kwa kuwa aliadini sawasawa kwa yale ambayo Mungu aliyasema. Vivyo hivyo, ili tuweze kuingia katika Ufalme wa Yesu, sisi nasi tunahitaji kuwa na aina ya imani ambayo Ibrahimu alikuwa nayo. Hii ndiyo njia pekee kwa wenye dhambi kupokea ondoleo la dhambi na kufanyika watu wenye haki. Tunafikia hatua ya kuingia katika Ufalme wa Mungu na kupokea wokovu wake kwa kumpokea Yesu kama Bwana na Mwokozi wetu.

Tunawezaje kumwamini Yesu kuwa ni Mwokozi wetu ili tuweze kuwa sehemu ya ukoo wa Yesu Kristo? Kwa maneno

mengine, tunaaminije katika wokovu wake kwa ajili ya wenye dhambi? Tunahitaji kuamini katika Injili ya maji na Roho kama tulivyopewa.

Mungu Baba yetu alimtuma Mwanawe Yesu kuja katika ulimwengu huu kuwa Mwokozi wa ulimwengu ili kuzichukulia mbali dhambi zote za ulimwengu. Hivyo, ni lazima tukiri kuwa Yesu alizichukua dhambi zote za wenye dhambi kwa njia ya kubatizwa na Yohana Mbatizaji katika Mto Yordani. Na imani ya kweli ni ile inayoamini kuwa Yesu alisulubiwa, akamwaga damu yake pale Msalabani, akafufuka tena toka kwa wafu, na akawaokoa wote wanaomwamini kikamilifu. *“Yesu akajibu akamwambia, Kubali hivi sasa; kwa kuwa ndivyo itupasavyo kuitimiza haki yote. Basi akamkubali. Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwona Roho wa Mungu akishuka kama hua, akija juu yake”* (Mathayo 3:15-16).

Kifungu hiki ndio ukweli wa jinsi Yesu alivyozechukua dhambi za ulimwengu kwa ubatizo wake. Mungu Baba yetu alimtuma Bwana Yesu kwa wenye dhambi na akamfanya kuzibeba dhambi zetu zote katika mwili wake pale alipobatizwa na Yohana Mbatizaji ili kuisafisha mioyo yetu iwe myeupe kama theluji na kisha kutufungulia mlango wa Ufalme wa Mungu. Tunaweza kufanyika kuwa wenye haki kwa kulipokea Neno lake katika mioyo yetu na kisha kuwa sehemu ya familia ya Mungu. Kila anayeamini katika kazi ambayo Yesu ameifanya anaweza kubadilika toka katika kuwa mwenye dhambi na kuwa mtu asiye na dhambi. Njia pekee ya kufanyika sehemu ya familia ya Mungu ni kuamini katika injili ya maji na Roho.

Ili mwenye dhambi aweze kufanyika mtoto wa Mungu, anahitaji kuwa na imani inayoamini kuwa Yesu ni Mwokozi wa wenye dhambi. Katika maandiko, “Mwana wa Daudi” maana yake ni kuwa Yesu ni mwana wa Yuda. Katika Agano

la Kale, Mungu alifanya agano kuwa atawatoa wafalme toka katika kabila ya Yuda, mwana wa Yakobo (Mwanzo 49:10). Daudi alikuwa ni mtu anayetoka katika kabila la Yuda ambalo Agano la Kale limezungumzia. Yesu pia alizaliwa toka katika kabila la Yuda kama Mfalme. Kama Ibrahimu alivyofanya, sisi nasi tunafanyika kuwa sehemu ya ukoo wa kifalme kwa kuamini katika Neno la Mungu. Tunafanyika kuwa watoto wa Mungu kiroho. Mtu yeyote ambaye amefanyika kuwa ukoo wa Yesu Kristo kwa imani basi mtu huyo amekwishafanyika mtoto wa Mungu. Ibrahimu alimzaa Isaka, Isaka akamzaa Yakobo, Yakobo akamzaa Yuda na kaka zake, na kisha wakaendelea kuzaa uzao wao. Watu wanaoliamini Neno la Mungu wanaendelea kuzaa watoto wa Mungu.

Wale wote waliofanyika kuwa sehemu ya ukoo wa Yesu kwa imani ndio wale ambao waliipokea rehema ya Mungu na ambao hawakuwa na kitu chochote cha kujivunia. Walikuwa ni wanyenyekevu na wadhaifu, bali waliamini katika Neno la Mungu. Hivyo, wakafanyika kuwa familia moja pamoja na Mfalme halisi.

Kadri tunapofanyika sehemu ya ukoo wa Yesu kwa imani, basi tunapaswa kufahamu kuwa—katika ukoo wa Yesu Kristo, kulikuwa na kahaba aliyeitwa Rahabu pamoja na mwanamke aliyeitwa Ruthu toka katika kabila la Wamoabu, ambao walikuwa ni wamataifa. Sasa inawezekanaje basi kwa kahaba kuwa sehemu ya ukoo wa Yesu? Rahabu aliweza kuingia katika Ufalme wa Mungu kwa imani aliyokuwa nayo juuya Mungu. Mungu anatueleza kuwa njia pekee kwa mwenye dhambi kufanyika mtoto wa Mungu ni kwa kuliadini Neno lake. Hii ina maanisha kuwa imani ya kweli si kuishi maisha mazuri kwa kufanya matendo mema, bali ni kuliadini Neno la Mungu. Iliwezekanaje kwa kahaba kuishi kwa mujibu wa mapenzi ya Mungu? Hata hivyo, Mungu alizisamehe hata dhambi za yule

kahaba ambaye alikuwa ametenda dhambi nyingi. Hata kahaba anaweza kufanyika kuwa mtoto wa Mungu kwa kuwa na imani katika ukweli wa wokovu wa Mungu. Hii ina manisha kuwa kila mwenye dhambi katika ulimwengu huu anaweza kufanyika mtoto wa Mungu.

Biblia inatueleza juu ya imani inayomwamini Mungu na Neno lake. Katika Mathayo sura ya 1, Biblia inazungumzia tena juu ya imani ya Tamari. Tamari ni nani? Yeye alikuwa ni mkwe wa Yuda ambaye alilala kimapenzi na baba mkwe wake. Tunapoyatazama maadili haya tunajiuliza maswali mengi, inawezekanaje kwa mwanamke aliyelala kimapenzi na baba yake mkwe kuwa sehemu ya ukoo mtakatifu wa Yesu? Hata hivyo, Tamari alikubaliwa kwa sababu ya imani yake ambayo iliamini katika agano toka kwa baba yake mkwe. Hivyo Tamari akafanyika kuwa sehemu ya ukoo mtakatifu wa Yesu kwa imani yake iliyokuwa ikiamini katika Neno ambalo baba yake mkwe alilisema.

Kulikuwa na desturi katika Israeli zama hizo kuwa ikiwa mtoto wa kwanza amekufa, basi mtoto wa pili alipewa yule mke wa mtoto wa kwanza. Ikiwa mtoto mkubwa atakuwa hana uzao baada ya kufa, basi baba mkwe alikuwa na jukumu la kumuoza mke wa mtoto wa kwanza kwa mtoto wake wa pili wa kiume. Tamari aliolewa kwa mtoto wa kwanza wa Yuda. Lakini mtoto wa kwanza alikuwa ni mwovu mbele za macho ya Bwana, na Bwana akamuua. Hivyo kwa mujibu wa desturi ya Israeli, Yuda alimruhusu mtoto wake wa pili kumuoa Tamari. Hata hivyo, mtoto yule wa pili alijua kuwa hatakuwa na urithi katika uzao ule hivyo akamwagia mbegu za uzazi nje, na kwa sababu hiyo Mungu akamuua. Baba mkwe alipaswa kumpatia Tamari mtoto mwingine wa tatu, hata hivyo mtoto yule alikuwa bado ni mdogo. Tamari alisubilia kupewa mtoto wa kiume wa tatu ili awe mumewe. Hata hivyo, baba mkwe

hakumpa kijana wake wa tatu kuwa mumewe, basi Tamari akapanga mbinu.

Basi ikafikia siku ya kuwakata kondoo manyoya. Basi Tamari akatoa nguo zake za kijane na kisha akajifunika kwa shela kisha akakaa mahali pa wazi. Malaya waliokuwapo Israeli walipaswa kuvifunika vichwa vyao kwa shela. Basi Yuda aliopokuwa akienda kuwakata kondoo zake manyoya akamwona Tamari na akataka kuwa naye kimapenzi. Basi akampatia muhuri wa pete yake, na kamba yake, na fimbo yake kama rehani kisha akalala naye. Yuda hakufahamu kuwa huyu alikuwa ni mkwe wake. Baada ya miezi michache baadaye, Tamari akaonekana kuwa ni mja mzito. Basi akaahesabiwa kuwa ni mzinzi kwa kuwa alikuwa bado ni mjane. Katika Israeli wakati huo mzinzi yeyote alipaswa kuadhibiwa kwa kupigwa mawe hadi kifo au kuchomwa moto. Yuda alipanga kumpiga mawe hadi kifo. Lakini Tamari akasema kwa wakati huo, “Mimi nina mimba ya mtu mwenye fimbo hii na pete hii ya muhuri.” Vitu hivyo vilikuwa ni rehani ambayo Yuda alimpatia malaya. Hivyo, Yuda alivikubali na kisha Tamari akaendeleza mstari wa familia, yaani ukoo.

Hii inaonyesha kuwa Mungu anawabariki watu wanaoamini katika Neno lake la Agano na kisha kuishi kwa kulifuata Neno hilo. Kwa hiyo, yeyote anayefanyika kuwa sehemu ya ukoo wa Yesu anafanya hivyo kwa kuliadini Neno la Mungu. Kama ilivyoandikwa katika kifungu, “*Yuda akamzaa Peresi na Zera kwa Tamari,*” Tamari alizaa mapacha wawili na hivyo akauendeleza ukoo wa Yesu kwa imani yake katika agano la Mungu na Yuda. Hakuna Mwisraeli ambaye alimsema vibaya Tamari kwa kusema “umefanya vibaya.” Bali walimsifia Tamari kwa imani yake na kusema kuwa ilikuwa ni imani iliyobarikiwa. Vivyo hivyo, Mungu anaipokea imani ya wale wanaoamini katika Neno la Mungu. Tamari angeliweza

kuwa sehemu ya ukoo wa Yesu kwa sababu aliamini katika agano la Mungu. Ikiwa tunaliamini Neno la Mungu, basi tunaweza kufanyika kuwa watoto wake pia.

Hatufanywi kuwa wenye haki kwa matendo mema. Kila mwenye dhambi anaweza kuwa mwenye haki kwa kuamini katika injili ya haki ya Mungu na kisha kuwa familia moja na Mungu. Biblia inatueleza kuwa hatufanywi kuwa watoto wa Mungu kwa sababu ya tabia zetu za utakatifu. Bali tunafanyika kuwa watoto wa Mungu kwa imani yetu katika Neno la Mungu la agano. Tunafanyika kuwa watoto wa Mungu na kisha kuingia ulimwengu Yesu kwa imani yetu inayoyaamini Maneno ya Mungu. Tunafanyika kuwa watoto wa Mungu kwa kupitia imani yetu katika Neno la Mungu. Ni lazima tufahamu na kuamini kuwa tunafanywa kuwa wenye haki na wasio na dhambi kwa kumwamini Yesu.

Biblia inatueleza kuwa imani inayoyaamini maandiko kama yalivyo ni imani ambayo inaamini katika haki ya Mungu. Ili tuweze kuwa wenye haki tunapompokea Yesu, basi tunapaswa kuamini katika injili ya maji na Roho. Neno “Kutakaswa” linatumika mara kwa mara katika dini za ulimwenguni. Hata hivyo, Yesu anatueleza kuwa hakuna hata mmoja aliyewahi kuingia katika Ufalme wa Mungu kwa kujitakasa yeye mwenyewe. Hebu tuyachunguze Maandiko. Ibrahimu alimtoa mke wake kana kwamba ni dada yake kwa kuhofia usalama wake. Isaka pia akafanya vivyo kwa mke wake. Kama si kwa imani yao, basi Tamari na Rahabu pia ni mifano ya watu ambao hawakupaswa kuingizwa katika orodha ya ukoo wa Yesu. Katika Ukristo, kutakaswa maana yake ni kufanywa mtakatifu hatua kwa hatua. Hata hivyo, Tamari alifanya tendo la ndoa na baba yake mkwe, Rahabu alikuwa ni kahaba na Ruthu alikuwa ni mtu wa mataifa. Kwa mtazamo wa kibinadamu, hakuna kati ya wanawake hawa aliyepaswa kuwa

sehemu ya ukoo wa Yesu. Hata hivyo, sababu iliyowafanya wakaitwa kuwa ni wenye haki na kuwa sehemu ya ukoo wa Yesu ni kwa sababu ya imani yao kamilifu katika agano la Mungu. Hii ndiyo aina ya imani inayoweza kutuongoza sisi kuitwa watoto wa Mungu. Kwa kupitia Neno la haki ya Mungu tumefikia hatua ya kuifahamu injili ya maji na Roho kwa imani inayoamini kuwa Yesu ni Mwokozi wetu. Kwa maneno mengine, ni kweli kuwa sisi tulifanywa tusio na dhambi si wala kwa asilimia 0.0001% ya matendo yetu mema. Sisi tulifanyika kuwa watu wasio na dhambi kwa kumwamini Yesu kuwa ni Mwokozi, ambaye ni Mwana wa Mungu, na Neno la Mungu lililoandikwa, yaani injili ya maji na Roho.

Tulifanyika kuwa watoto wa Mungu kwa kumpokea Yesu kuwa ni Bwana na Mwokozi. Mungu, Mfalme wetu anatueleza kuwa wale walio na Roho Mtakatifu ndio watu wake. Mungu anaitua watu kama sisi ambao tuna imani katika injili ya maji na Roho kuwa ni “watoto Wangu, waliozaliwa tena upya.” Katika Biblia, watoto wa Mungu wenye haki ni tofauti na watu wa kawaida ambao bado hawajaokolewa toka katika dhambi zao. Wale walioipokea na kuiamini injili ya maji na Roho ni tofauti kabisa na watu wengine ambao bado hawajapokea ondoleo la dhambi zao. Sisi tumesamehewa dhambi zetu zote kwa kuwa tunamwamini Yesu, ambaye ni Mwokozi wetu, kuwa ni Mwokozi mkuu katika mioyo yetu. Tunafahamu kuwa tumekwishapokea ondoleo la dhambi zetu zote kwa kuwa tunaamini kuwa Bwana alikuja hapa ulimwenguni na akabatizwa na Yohana Mbatizaji katika Mto Yordani na kisha akaimwaga damu yake kwa kufa Msalabani. Hivyo, sisi tulifanyika kuwa watoto wa Mungu kwa kupitia Mwana wa Mungu na kuuamini ukweli huo.

Halleluya! Tunamshukuru Mungu ambaye ametupatia injili hii ya maji na Roho, ambayo ni haki ya Mungu. ☒

Hebu Tumshukuru Bwana Wetu Yesu Aliyekuja Kutuokoa

< Mathayo 1:18-25 >

“Kuzaliwa kwake Yesu Kristo kulikuwa hivi. Mariamu mama yake alipokuwa ameposwa na Yusufu, kabla hawajakaribiana, alionekana ana mimba kwa uweza wa Roho Mtakatifu. Naye Yusufu, mumewe, kwa vile alivyokuwa mtu wa haki, asitake kumwaibisha, aliazimu kumwacha kwa siri. Basi alipokuwa akifiri hayo, tazama, malaika wa Bwana alimtokea katika ndoto, akisema, Yusufu, mwana wa Daudi, usihofu kumchukua Mariamu mkeo, maana mimba yake ni kwa uweza wa Roho Mtakatifu. Naye atazaa mwana, nawe utamwita jina lake Yesu, maana, yeye ndiye atakayewaokoa watu wake na dhambi zao. Hayo yote yamekuwa, ili litimie neno lililonenwa na Bwana kwa ujumbe wa nabii akisema, Tazama, bikira atachukua mimba, Naye atazaa mwana; Nao watamwita jina lake Imanueli; Yaani, Mungu pamoja nasi. Naye Yusufu alipoamka katika usingizi, alifanya kama malaika wa Bwana alivyomwagiza; akamchukua mkewe; asimjue kamwe hata alipomzaa mwanawe; akamwita jina laye YESU.”

Tunaikaribisha Krismasi. Inaonekana kuwa utakuwa ni usiku wenye ukimya na usiku mtakatifu kwa mwaka huu. Mji

umekuwa na hali ya ukimya. Ni vigumu kuona taa za Krismasi na mapambo kwa kuwa tunakutana na mabadiliko ya kiuchumi. Hali hii inaweza kuwa ni sura ya uchumi mbaya katika nyakati hizi. Hii inatukumbusha jinsi tunavyopaswa kuitunza imani yetu tunapoikaribia Krismasi nyingine mwaka huu. Hebu tuangalie kifungu cha maandiko cha Agano Jipya toka kitabu cha Mathayo.

Aya ya 21 inasema, *“Naye atazaa mwana, nawe utamwita jina lake Yesu, maana, yeye ndiye atakayewaokoa watu wake na dhambi zao.”* Bwana wetu alizaliwa katika ulimwengu huu kwa kupitia bikira na akaitwa Yesu. Jina “Yesu” maana yake ni kuwa ndiye atakayewaokoa watu wake toka katika dhambi zao.

Sisi, ambao tumekwisha kutana na Yesu tunafuraha sana tunapoikaribisha Krismasi. Hata hivyo, Krismasi si kitu hadi pale tunapokuwa tukiifahamu maana ya siku hii. Ikiwa hatuipokei Krismasi katika Bwana, je, Krismasi hii itakuwa na maana gani? Ikiwa tutaipokea Krismasi katika Bwana, basi tunaweza kuuona upendo wa Bwana kwetu kuwa ni mwingi. Krismasi ina maanisha Mungu, Mfalme wa wafalme, aliyeuumba ulimwengu amemtuma Mwana wake pekee kuja ulimwenguni ili kuwaokoa watu wake toka katika dhambi zao. Tunapokuwa ndani ya Mungu, basi Krismasi inakuwa ni siku ya furaha zaidi na siku ya shukrani.

Hii ndiyo sababu tumeipanga siku ya Krismasi kwa ajili ya kumshukuru Mungu. Kwa kweli, hii siyo tarehe hasa ambayo inatajwa katika Biblia. Baadhi ya watu wanadai kuwa hii ilikuwa ni siku ya kumwabudu mungu jua. Hata hivyo, hatupaswi kuishusha maana ya Krismasi. Baadhi ya watu wanasema kuwa tarehe ya Krismasi tuliyo nayo si ya kweli kuhusiana na kuzaliwa kwa Yesu. Bila kujali suala la tarehe halisi, sisi tunapaswa kuisherehekea Krismasi ili kukumbuka kuwa ni kwa nini Yesu alikuja hapa ulimwenguni.

Tunapoisherehekea Krismasi tunapaswa kufikiria kwa kina juu ya Bwana kuhusiana na upendo wake na wokovu tuliupokea toka kwake. Tunapaswa kusherekea kuja kwa Bwana na kumshukuru Yeye kwa kuamini kuwa ametuokoa toka katika dhambi zetu zote. Hivyo, ili tuweze kuisherehekea kwa kweli Krismasi tunapaswa kuelewa maana ya Krismasi.

Sasa tupo katika ibada ya Jumapili. Ni saa 5:12 asubuhi. Jana kulikuwa na muda kama huu wa saa 5:12 asubuhi, na kesho kutakuwa na saa 5:12 asubuhi. Hali itaendelea hivi hadi Bwana atakaporudi tena. Ulimwengu utaendelea kuwapo hadi Mungu atakapouhitimisha. Hata hivyo, kama hatuifahamu maana nzuri ya Krismasi katika Bwana, basi hii ibada tuliyonayo itakuwa na maana gani kwetu? Tarehe 25 Desemba saa 5:12 asubuhi haina maana yoyote, ni kama saa nyingine zinavyopita katika mwaka mzima. Kadri tunapouelekea mwisho wa mwaka, tunapaswa kuichunguza imani yetu katika Bwana. Nina maanisha kuwa tunapaswa kukumbuka upendo ambao Yesu ametupatia na wokovu ambao tumepokea. Kila kitu katika ulimwengu huu, hata maisha yenyewe, pamoja na muda unaopita vinakuwa havina maana ikiwa vitakuwa havina Yesu.

Kwa upande mwingine, Krismasi ina maana nyingi sana hasa pale tunapoipokea katika Bwana. Sisi tuliokolewa toka katika dhambi zetu kwa kuwa Yesu alikuja kutuokoa. Ikiwa Yesu asingalikuja kutuokoa, basi tuna hakika kuwa tungekuwa tumepangiwa kuangukia katika maangamizi, lakini Yesu alibatizwa na kusulubiwa kwa ajili yetu. Yesu alikuja hapa ulimwenguni kwa kupitia Bikira Mariamu ili kuwaokoa watu wake toka katika dhambi zao. Hivyo, sisi kama Wakristo, basi Krismasi ni siku takatifu sana.

Hivyo, kuzaliwa kwa Bwana wetu kuna umuhimu sana kwetu hasa tunapoitazama siku hiyo katika Bwana, ambaye

anautawala ulimwengu wote tangu mwanzo hadi mwisho. Hivyo, tunapaswa kuiona kazi ya upendo wake wa kweli kwa kupitia injili ya maji na Roho. Ulimwengu huu upo kwa sababu Mungu ndiye aliyeuumba. Mungu alisema kuwa atauangamiza ulimwengu huu kama alivyowahi kufanya hapo kabla. Tunaweza kuona mwisho wa dunia umekaribia. Kama tunavyoweza kuona na kutambua kuwa “Aah, hii ni kazi ya Mungu!”, yaani wakati tunapoutazama mzunguko wa majira ya mwaka, masika, kiangazi, vuli, na kipupwe; basi tunaweza kuona ni kana kwamba Mungu anaumba ulimwengu mpya kadri anavyotuokoa toka katika dhambi zetu zote.

Mungu ametuonyesha Uumbaji wake ili tufahamu kuwa ulimwengu huu unazunguka kwa kuwa Mwenye uwezo ana mamlaka juu ya ulimwengu huu. Wanadamu wanaamini pale wanapooni kwa macho yao yao kwa kibinadamu. Tunapokuwa ndani ya Mungu ndipo tunapoweza kufahamu vizuri jinsi anavyofanya kazi. Hata hivyo, tunapoyaangalia majira manne katika Bwana, basi tunaweza kuona majaliwa ya Mungu vizuri zaidi. Tunapoyaangalia maisha yetu katika Mungu, basi tunaweza kuyaona maisha yetu vizuri. Tunapoyaangalia maisha yetu katika Bwana tunaona kuwa watu wa kawaida wanaishi kati ya miaka 70 au 80 hali wakiwa na maisha ya shida hadi wanapokufa. Sisi tulipangiwa kuishi kwa shida hadi tutakapokufa. Tunaweza kuona kuwa Bwana wetu alikuja hapa ulimwenguni, alibatizwa, akasulubiwa, na kisha akafufuka ili kutuokoa sisi ambao tulikuwa tumepangiwa kwenda katika maangamizi kwa sababu ya dhambi zetu. Katika Kristo, sisi sote tuliokolewa toka katika dhambi zetu zote kwa injili ya maji na Roho, na kisha tukawekwa huru toka katika maangamizi na laana. Hivyo, tunapaswa kuviangalia vitu vyote katika macho ya imani katika Kristo.

Baadhi ya watu wana mashaka ikiwa Bikira Mariam

angeliweza kuwa na mtoto hali akiwa bado ni bikira. Kusema kweli, kuna hata baadhi ya wachungaji ambao wana mashaka kuwa Yesu alizaliwa na Bikira Mariamu. Wanapokuwa wakihubiri na kujifanya kusherehekea kitendo cha Yesu kufanyika mwili, lakini ukweli unabaki kuwa hata wao hawaamini kuwa Yesu alitungwa mimba kwa njia ya muujiza na kisha kuzaliwa na Bikira Mariamu. Watu wa jinsi hiyo wanauonyesha ujinga wao kwa namna hiyo. Tunaposhindwa kuyaona matendo ya Mungu kwa kupitia macho ya imani katika Bwana, basi kwa hakika hatutaweza kuliadini tendo lolote kati ya hayo. Kifungu cha maandiko kinatueleza kuwa Yesu alizaliwa baada ya kuwa ametungwa mimba kwa uweza wa Roho Mtakatifu, na hata kabla hajazaliwa Mungu alitamka kuwa mtoto atakayezaliwa aitwe Yesu. Haya yote yalitendeka ili kutimiza yale yaliyosemwa.

Kwa zaidi ya miaka 700 Mungu alitabiri kuzaliwa kwa Yesu kwa kupitia nabii Isaya kuwa *“Tazama bikira atachukua mimba, atazaa mtoto mwanamume, naye atamwita jila lake Immanueli.”* (Isaya 7:14). Huu ulikuwa ni unabii kuwa Mungu atakuja katika ulimwengu huu katika mwili wa mwanadamu ili kuwaokoa wanadamu. Tunapouangalia unabii huo katika Bwana, basi tunaweza kuona kuwa hii ni kazi ya Mungu, yaani kazi ya kuwaokoa watu toka katika dhambi zao. Hali iko hivyo ili tuweze kuona na kuamini kuwa Mungu aliwaumba wanadamu na kisha ametuokoa sisi toka katika dhambi zetu.

Ni vigumu sana kuamini ikiwa tutayaangalia mambo haya kwa macho ya kibinadamu na kisha kujaribu kufahamu kwa kutumia ufahamu wa kibinadamu. Kama matokeo ya kuamini kwa ufahamu wa kibinadamu, baadhi ya watu wanasema kuwa si kwamba Mungu anaufurahia uumbaji wa wanadamu tu, bali anaufurahia pia mateso ya wanadamu ambayo yametokana na kula matunda ya mti wa ujuzi wa mema na mabaya. Hivyo

wakati fulani baadhi ya watu wanasema hivyo: Mungu anafurahia uumbaji wake wa wanadamu. Na pia anafikiri kuwa ni jambo la kufurahisha kuwaona wanadamu wakiteseka kutokana na kula matunda ya mti wa ujuzi wa mema na mabaya. Lakini, ndugu Wakristo, ule ukweli kuwa dunia na sayari nyingine zinazunguka katika mzingo wake, na kwamba dunia ina hali muafaka kwa mwanadamu kuishi, na kwamba kuna usiku na mchana, na mambo mengine yote ya kimaumbo na miujiza hali kukiwa na usahihi ambao sayansi ya sasa haiwezi kufahamu basi kunawafanya wanasayansi kushindwa kutueleza kuwa kuna Mungu mwema.

Wakati Bwana alipokuja hapa ulimwenguni alitungwa mimba kwa uweza wa Roho Mtakatifu, alizaliwa, na akafanyika kuwa “Immanueli” ili kulitimiza agano lake. Kwa maneno mengine, Mungu aliupanga wokovu wake kabla hata ya uumbaji wa ulimwengu, na kisha akatuahidia sisi wanadamu na kuutimiza kama alivyokuwa amepanga. Ule ukweli pekee kuwa alizaliwa kwa kupitia bikira ni baraka kubwa kwetu na tunamshukuru Mungu kwa ajili hiyo.

Tunapoyaweka matumaini yetu katika Yesu, basi hatupaswi kuwa na mtazamo wenye mashaka. Tunapokuwa na mashaka, basi kila kitu kinakuwa na mashaka. Hii ni kwa sababu tunapokuwa tumepofushwa na dhambi zetu na tukawa na mashaka na imani yetu inapokosa ukamilifu, basi kwa hakika hatuwezi kuyaona matendo mazuri ya Mungu katika ukamilifu wake. Lakini tunapomwamini Mungu kikamilifu, basi macho yetu yatafunguliwa na Roho Mtakatifu na kisha tutaweza kumpokea Yesu ili tuweze kuokolewa toka katika dhambi zetu. Sisi tunaoamini katika haki ya Mungu, tuliokolewa toka katika dhambi zetu kwa kumwamini Yesu Kristo kwa sababu tuliyaangalia matendo na kazi zake katika haki ya Mungu. Sisi tulipata faida kwa sababu tuliyaangalia

matendo hayo katika haki ya Mungu. Lakini wale wasioamini katika haki ya Mungu hawawezi kuipokea Krismasi ikiwa na maana yoyote kwao.

Yesu alikuja katika ulimwengu huu kama Immanueli ili kuwa pamoja nasi. Alitungwa mimba kwa uwezo wa Roho Mtakatifu na kisha akazaliwa kama mtoto Yesu. Kisha alizichukulia mbali dhambi zote za wanadamu kwa kubatizwa alipokuwa na umri wa miaka 30, alisulubiwa huku akibeba dhambi zote za ulimwengu, akafufuka tena toka kwa wafu na kufanyika kuwa Mungu Immanueli, ambaye atakuja tena. Na ni huyu Bwana wetu ambaye ndiye aliyetungwa mimba kwa uwezo wa Roho Mtakatifu, akazaliwa kama mtoto Yesu na kukua ili kuzichukua dhambi zetu kwa kubatizwa, na kisha akatuokoa kwa damu yake Msalabani, na ni huyu Bwana ndiye anakaa na kutenda kazi katika mioyo yetu sasa kama Roho Mtakatifu. Na huyu Roho Mtakatifu anayekaa katika mioyo yetu ya kiimani inayoamini katika haki ya Mungu, anatupatia neema ya wokovu, amani, na baraka, na anatufanya tuuamini ukweli kuwa Yesu amekuja kama Mwokozi wetu wa milele.

Tarehe 25 Desemba ni siku ambayo tunakumbuka kuzaliwa kwa Bwana wetu Yesu na kisha tunasherehekea na kutoa shukrani zetu kwa Mungu. Tunamshukuru Mungu kwa kuweza kuisherehekea siku hii. Kama kusingekuwa na Krismasi katika siku ya Desemba 25 basi ulimwengu ungelikuwa ni mahali penye upweke. Kisha wanadamu wangeishi kwa huzuni na mshaka pasipokuwa na Yesu. Kusingekuwa na kitu chochote cha furaha. Mwanadamu anapokea tumaini jipya kwa sababu ya ukweli mmoja kwamba Mwokozi wa wanadamu, Mwokozi wa wenye dhambi, Mwokozi wa wanadamu wanaoelekea katika maangamizi alikuja hapa ulimwenguni. Bila kujalisha jinsi hali ilivyokuwa mbaya hapo kabla, kwa sasa tuna tumaini kuhusiana na maisha

yajayo katika Bwana.

Ikiwa Yesu angelikuwa hajaja hapa duniani, je tungekuwa na tumaini gani? Je, watu walioitwa “wenye busara” na “watakatifu” kama vile Sokrato, Sakyamuni, na Konfusiasi wangelitufanyia nini? Zaidi ya mafundisho ya kimaadili, watu hawa hawakutupatia chochote kingine. Ni nani katika ulimwengu huu ambaye hataki kuishi maisha mema? Watu kama hao wasingeliweza kutupatia wokovu toka katika dhambi zetu, hukumu, na maangamizi.

Yesu ndiye pekee ambaye ametuokoa wewe na mimi toka katika dhambi zetu zote: Yesu alikuja hapa ulimwenguni ili kuzitoweshea mbali dhambi zetu kwa ubatizo wake na kusulubiwa kwake Msalabani. Ni wale tu wanaoamini katika injili ya maji na Roho, ambayo ni haki ya Mungu, ndio wanaoweza kuokolewa toka katika dhambi zao. Wale wasioamini katika haki ya Mungu hawawezi kuzaliwa tena upya. Kutokana na mtazamo huo, sisi tunapokea ondoleo la kweli la dhambi kwa kuamini kuwa Bwana ni Mfalme wa wafalme, na kwa imani kuwa Yesu alikuja hapa ulimwenguni, akabatizwa na kufa Msalabani na kisha akafufuka toka kwa wafu na kufanyika kuwa Mwokozi. Sisi tuna maisha mapya na tumefanyika kuwa watu wa Mungu ambao tunaweza kuingia Mbinguni kwa sababu Bwana amekuja hapa ulimwenguni ili kutuokoa.

Historia ya mwanadamu inaonyesha kuwa wanadamu wanaelekea katika maangamizi pale wanapotafunana na kumezana. Hadi sasa, tuna historia ya kutafunana, kuchomana, na kuuana. Dhambi ya kuuana sisi kwa sisi ilipelekwa kwa Bwana katika Mto Yordani wakati ambapo mtu mkuu katika historia ya wanadamu alipokuwa akimbatiza Yesu, na tuliokolewa mara moja wakati Yesu aliposulubiwa kwa ajili ya dhambi zetu. Lakini Yesu alikuja hapa ulimwenguni, na kisha

akazichukua dhambi zote za wenye dhambi katika mwili wake, yaani dhambi za wale wote waliokuwa wakitafunana na kuuana wakati alipobatizwa katika Mto Yordani na mtu mkuu kuwahi kutokea katika historia ya mwanadamu, na kisha akatuokoa toka katika dhambi zetu zote mara moja kwa kujitoa mwenyewe na kufa Msalabani. Ni lazima tuamini ukweli huu mara moja. Hivi ndivyo Bwana anvyotupatia tumaini la wokovu.

Hatupaswi kuikana imani yetu inayomwamini na kumtumaini Yesu Kristo toka katika maisha yetu binafsi au katika historia nzima ya mwanadamu. Pasipo Yesu kusingekuwa na historia ya mwanadamu. Pasipo Yesu kusingekuwa na thamani na maadili ya kifamilia katika ulimwengu. Pasipo Yesu kusingekuwa na imani ya kweli au wokovu wa kweli. Bila shaka unaweza kusema, “Unasema hayo kwa kuwa wewe ni mhubiri.” Hata hivyo, sisemi hivi ati kwa sababu mimi ni mhubiri. Nitapenda kukupatia mfano mmoja. Nimesema kuwa pasipo Yesu kusingekuwa na historia ya mwanadamu. Hebu tuchunguze ikiwa hili nililolisema ni kweli au la.

Hapo zamani, Uingereza ilizishinda nchi nyingi, lakini kuna msemu unaosema “Jua halitui kamwe katika Dola ya Uingereza.” Hakukuwa na masaa ya nyakati za mchana huko Uingereza ambapo jua lilitua. Wakati jua lilipokuwa likitua katika nchi fulani ambayo ilikuwa ni koloni la Uingereza, basi jua hilo hilo lilikuwa likichomoza katika nchi nyingine ambayo ilikuwa ni koloni la uingereza pia. Kwa hiyo, ndipo ukapatikana msemu kuwa jua halitui katika Dola la Uingereza. Hivi ndivyo Uingereza yenye nguvu ilivyokuwa katika ulimwengu na kuteka maeneo mengi ulimwenguni. Huko Uingereza kulikuwa na walokole wengi katika nyakati hizo. Walokole walioamini katika Yesu kama Bwana na Mwokozi

wao waliitoroka Uingereza na kwenda kuishi Marekani. Walokole hao hawakuweza kuishi katika nchi ambayo iliwatesa kwa sababu ya imani yao. Kwa hiyo Walokole walipoondoka Uingereza, hata ile heshima ya kwamba jua halitui katika Uingereza ilitoweka. Ule umashuhuri na nguvu waliyokuwa nayo ulimwenguni ilitowekea mbali na heshima pekee iliyobakia leo ni kuwa Uingereza ni nchi ya watu wastraabu.

Wale walokole waliokwenda Marekani walieneza injili katika maeneo mengine yote ya ulimwenguni. Kadri mambo haya yalivyotokea, Marekani iliinuka na kuwa taifa kubwa lenye nguvu duniani. Je, unadhani ni jambo lenye fumbo? Wamarekani waliihubiri injili Korea. Sasa hivi uchumi wa Korea umeinuka juu na sasa tunaitwa “Nyoka-zimwi wa Asia.” Kwa kweli alama ya Nyoka-zimwi si alama nzuri kiroho. Hata hivyo, kwa wasioamini, Nyoka-zimwi ni alama kubwa sana wanayoweza hata kuitumikia kama mungu wao. Na hii ndio sababu maendeleo ya kiuchumi ya Korea yanatajwa kama “Nyoka-zimwi wa Asia” au “Chui wa Asia.”

Tunapoiangalia historia ya ulimwengu, tunaweza kuona kuwa nchi ambazo zinamtumikia Yesu na kuieneza injili kwa kiasi fulani zimekuwa na mwamko wa kiuchumi. Wakati nchi zinapoachana na Yesu, na kisha kuwatesa waamini, basi hata uchumi wao baadaye unakufa. Kwa sehemu kubwa mafanikio ya nchi yanategemea katika kuieneza injili katika nchi husika.

Kama tunavyoweza kuona, Yesu ndiye kiini cha historia ya ulimwengu. Katika historia ya mwanadamu, Yesu ndiye Bwana aliyebarikiwa na Mwokozi. Ulimwengu huu hauwezi kubarikiwa pasipo kuwa na Yesu. Yesu yupo hai na anatawala ulimwengu wote na anatawala maisha yangu na yako, na anatupatia amani katika mioyo yetu. Ni lazima tumwangelie Yesu, tumwabudu Yeye, na tumshukuru kwa neema yake kuu.

Kadri tunavyoyaishi maisha yetu hapa ulimwenguni, basi tunapaswa kuyaangalia mambo yote katika Bwana, na kisha tuishi kwa imani katika Bwana. Katika Bwana ninasema! Katika ulimwengu huu, tunapaswa kuliangalia tukio la historia ya mwanadamu na hata kule kubadilika kwa hali ya kiuchumi katika mtazamo wa kiimani. Tunaweza kuona kila kitu vizuri ikiwa tu tutayaangalia mambo yote katika mtazamo wa Yesu Kristo. Na hii ndiyo njia pekee ya kuweza kuokolewa toka katika dhambi zetu.

Je, Yesu Kristo ni nani kwetu? Ni Mfalme wa wafalme. Tunapaswa kuwa na shukrani kwa sababu Mfalme amekuja katika ulimwengu huu ili kuwaokoa watu wake. Mfalme wako amekuja ili kukuokoa toka katika dhambi zako. Je, unamshukuru yeye aliyekuja katika mwili wa hali ya chini kama ulivyo wewe mwanadamu?

Mtu anaweza kusema, “Je, ni kitu gani cha kukishukuru? Katika siku kama ya leo, itakuwa ni vema kula keki za mchele na supu, kupata kinywaji, na kulewa. Ikiwa mtu atanialeka kwa ajili ya kinywaji na kisha kulipia, basi bila shaka ninaweza kumshukuru... lakini kuna nini pale cha kushukuru?” Hii ni kwa sababu mwanadamu anaangali mambo kwa macho ya kibinadamu. Ndugu zangu Wakristo, furaha ya kweli haipo katika mambo ya madogo, bali tunapaswa kushukuru na kukiri kuwa Bwana alikuja kama Mfalme na akakuokoa toka katika dhambi zako. Mfalme alikuja na alituokoa. Na hicho ndio kinachopasa kutufanya tuwe na shukrani. Tunapaswa kuwa na shukrani kutokana na ukweli kua Mfalme wa wafalme alikuja kutuokoa, na kwamba ni kweli kuwa ametuokoa. Kwa macho ya kibinadamu tunaweza kuwa na shukrani ikiwa mtu fulani ametupatia fedha au vitu vyenye thamani ya kifedha ambavyo vinaweza kuyalipia madeni yetu yote katika maisha, lakini ukweli ni kuwa tunapaswa kuwa na shukrani kutokana na

ukweli kuwa Mfalme wa wafalme alikuja kutuokoa sisi ambao tulikuwa tumepangiwa kwenda kuzimu. Ndugu zangu Wakristo, je, hivi ndivyo ilivyo au la?—Kwa kweli ndivyo ilivyo.

Kwa kweli tunashukuru sana tunapojiangalia sisi wenyewe katika Bwana. Ninaihubiri injili kwa kuangalia kila kitu katika Bwana, na kisha ninaziamini baraka za Bwana kwa shukrani. Kwa kuwa ninaangalia kila kitu katika Bwana, basi mimi ninashukuru sana na kuridhika hata kama sina kitu. Ninapoangalia katika Bwana kuwa Bwana likuja kuniokoa, basi ninaridhika na kuwa na shukrani. Ikiwa hatuyaangalia mambo katika au jambo hili katika Bwana, halafu tukaangalia kwa macho ya kibinadamu, basi hakuna kitu kitakachotufanya turidhike. Tunapaswa kuutazama wokovu ambao Bwana ametupatia na kisha kushukuru katika Bwana. Tunapaswa kuyaangalia mambo yote katika Bwana. Tunahitaji kujadiliana na wengine kuhusiana na imani yetu, tunapaswa kuichunguza historia kwa imani; tunapaswa kukikabili kila kitu kwa imani. Tunapaswa kuwaona watu wengine katika Bwana, tunapaswa kuiangalia historia ya ulimwengu katika Bwana, na tunapaswa kuangalia kila kitu katika Bwana. Tunapoukabili ulimwengu kwa imani, basi tunakuwa na amani yakweli na baraka katika mioyo yetu. Tunapofanya hivyo, basi kunakuwa na maisha ya kweli, amani, na baraka katika Bwana. Hii ndiyo sababu tuna shukrani.

Wakati wowote tunapoyatazama mambo katika Bwana, basi tunaweza kuwa waaminifu katika amri inayosema “Furahini siku zote, ombeni bila kukoma, shukuruni kwa kila jambo.” Tunaposhindwa kuona chochote katika Bwana, basi hatuwezi kufanya lolote zaidi ya “kulia kila siku, kulia pasipo kukoma, na kulia katika kila kitu.” Wewe na mimi tunapaswa kuyaangalia mambo yote katika Bwana. Tunapoipokea

Krismasi, tunahitaji kuwa na shukrani kwamba Mfalme wa wafalme alikuja kukuokoa na ametuokoa, na kwamba amezisafishilia mbali dhambi zote za wanadamu. Tunahitaji kuipokea Krismasi hii hali tukiwa na imani ya jinsi hiyo na shukrani.

Ndugu zangu Wakristo, je, hatupaswi kuwa na shukrani kwa hili au la? Kwa kweli tunashukuru. Je, hii ni hadithi au ni ukweli? Ni ukweli. Maandiko yanasema, *“Hayo yote yamekuwa, ili litimie neno lililonenwa na Bwana kwa ujumbe wa nabii akisema, Tazama, bikira atachukua mimba, Naye atazaa mwana; Nao watamwita jila lake Imanueli; Yaani, Mungu pamoja nasi”* (Mathayo 1:22-23).

Je, inawezekana mwanamke ambaye hajaolewa akazaa mtoto katika dunia hii? Ni sawa, mwanamke ambaye bado hajazaliwa anaweza kuwa na mtoto kabla ya ndoa. Wanawake wengi wamepata watoto nje ya ndoa. Hii inaweza kuthibitshwa tunapotembelea katika vituo vya watoto yatima. Kuna watoto wengi ambao wameachwa katika vituo vya watoto yatima na mama zao ambao bado hawajaolewa. Baadhi ya familia katika mataifa ya nje wamekuwa wakiwarithi baadhi ya watoto hawa toka katika vituo hivyo vya watoto yatima nje ya ndoa. Ni kweli kuwa kuna mazingira ambapo wanawake ambao bado hawajaolewa wana watoto. Hata hivyo, hiyo ni tofauti na kitendo cha bikira kuzaa mtoto.

Hakuna bikira yoyote duniani ambaye ameweza kuwa na mtoto pasipo kukutana na mwanamume. Bila shaka unaweza kusema, “Je, haiwezekani akawepo bikira huyo ikiwa atakuwa amepandikiziwa uzazi kisayansi?” Mwanamke ni mwanadamu aliye na tumbo la uzazi, kwa maneno mengine, mtu mwenye tumbo la uzazi ndiye anayelitwa mwanamke. Mwanamke mwenye tumbo la uzazi ndiye anayeweza kuzaa mtoto. Lakini mwanamume anahitajika sana ili mwanamke aweze kuzaa

mtoto, kwa kuwa ni mwanamume tu ndiye aliye na mbegu za uzazi kwa ajili ya tumbo la uzazi la mwanamke. Mariamu alikuwa ni mwanamke aliyekuwa na tumbo la uzazi. Hata hivyo, Mariamu alipata mimba kwa uwezo wa Roho Mtakatifu. Haya yalitabiriwa zaidi ya miaka 700 iliyopita juu ya kuzaliwa kwa Yesu, *“Tazama bikira atachukua mimba, atazaa mtoto mwanamume, naye atamwita jila lake Immanueli.”* Malaika Gabriel alimtokea na kuutoa ujumbe huo toka kwa Mungu kwamba Mariamu atapata mimba na kuwa na mtoto Yesu.

Malaika alisema, “Ee mwanamke uliyebarikiwa, neema ya Mungu itakuwa pamoja nawe. Utamzaa mtu mkuu.” Kisha Mariamu akauliza, “mimi sijamjua mtu kamwe nawezaje kupata mtoto?”

“Jamaa yako Elizabeti amechukua mimba ya mtoto mwanamume katika uzee wake.” Ule ukweli kuwa mke wa Zakaria alipata mtoto katika uzee wake, na ule ukweli kuwa bikira alipata mimba na kuzaa mtoto vilifanyika kwa utimilifu wa unabii maalum wa Mungu.

Kisha Mariamu akasema, “Tazama, mimi ni mjakazi wa Bwana!; na iwe kwangu kama ulivyosema,” na kisha akapokea ujumbe ambao malaika aliuleta, na kisha mtoto akakua ndani ya tumbo lake la uzazi. Na huyu mtoto ni Yesu Kristo. Kwa kuwa huu si uongo, bali ni kweli, basi tunashukuru na wale wanaoamini hivi wamebarikiwa. Sisi tulio katika Kristo, hatuwezi kumshukuru Mungu vya kutosha kwa kule kutupatia Mwana wake.

Hata hivyo, kwa wale ambao hawaamini katika ukweli huu, Krismasi kwao si kitu bali ni kama siku ya kutoa zaka za Krismasi ili kuikamilisha bajeti ya Kanisa. Siku hiyo mamilioni ya dola yatawekwa katika bajeti kwa kupitia “matoleo maalumu ya Krismasi” kwa kivuli cha Krismasi. Baadhi ya watu wanatangaza majina yao kama watu waliotoa

sadaka maalum, lakini ukweli ni kuwa Mungu hafurahishwi na hilo. Tunapaswa kumshukuru Mungu kuwa kusanyiko letu la kiibada si kusanyiko la wajifanyao, bali ni kusanyiko la kusherehekea kuzaliwa kwa Yesu na kumshukuru Mungu.

Tunamshukuru Bwana kwa kuja kutuokoa toka katika maangamizi na dhambi na kwa kutuokoa toka katika dhambi zetu zote. Katika siku za mwaka tunazozitumia, Krismasi ni siku ambayo tunaisherehekea kupokea habari njema za baraka katika injili ya maji na Roho. Tunapaswa kuwa na shukrani kwa kuamini katika injili ya maji na Roho na katika wokovu wa Bwana kwa mioyo yetu yote. Pia tunapaswa kuamini na kuamua kila kitu kwa imani na kwa macho ambayo yanayoona kwa kupitia Bwana na kisha kumfuata Bwana kwa imani katika miaka inayokuja.

Je, unamshukuru Mungu? Kwa kweli Bwana wetu ametupatia neema kuu ya kushangaza. Sasa, Mungu yupo pamoja nasi, tuna shukuru sana kiasi kwamba tunashindwa hata namna ya kuanza kumshukuru. Tunamtolea Mungu utukufu. ☒

Yesu Aliyetungwa Mimba Kwa Uwezo wa Roho Mtakatifu

< Mathayo 1:18-25 >

“Kuzaliwa kwake Yesu Kristo kulikuwa hivi. Mariamu mama yake alipokuwa ameposwa na Yusufu, kabla hawajaribiana, alionekana ana mimba kwa uwezo wa Roho Mtakatifu. Naye Yusufu, mumewe, kwa vile alivyokuwa mtu wa haki, asitake kumwaibisha aliazimu kumwacha kwa siri. Basi alipokuwa akifiri hayo, tazama, malaika wa Bwana alimtokea katika ndoto, akisema, Yusufu, mwana wa Daudi, usihofu kumchukua Mariamu mkeo, maana mimba yake ni kwa uwezo wa Roho Mtakatifu. Naye atazaa mwana, nawe utamwita jina lake Yesu, maana, yeye ndiye atakayewaokoa watu wake na dhambi zao. Hayo yote yamekuwa ili litimie neno lililonenwa na Bwana kwa ujumbe wa nabii akisema, Tazama, bikira atachukua mimba, Naye atazaa mwana; Nao watamwita jina lake Imanueli; Yaani, Mungu pamoja nasi. Naye Yusufu alipoamka katika usingizi, alifanya kama malaika wa Bwana alivyomwagiza; akamchukua mkewe; asimjue kamwe hata alipomzaa mwanawe; akamwita jina lake YESU.”

Mathayo sura ya 1 inaeleza juu ya uzazi wa Yesu kwa kina. Kwa kufuata ufahamu wa kibinadamu ni haiwezekani

kwa bikira ambaye hajakutana kimwili na mwanamume kuweza kupata mtoto. Mimba inawezekana tu pale kunapotokea tendo la ndoa kati ya mwanamke na mwanamume. Hivyo, aina hii ya uzazi kwa uwezo wa Roho Mtakatifu imekuwa ni fumbo kumbwa kwa miaka yote. Hata hivyo, jambo hili liliwezekana kwa Mungu.

Tunaweza kulifahamu fumbo hili ikiwa tu tutachunguza kuwa ni kwa nini Yesu alizaliwa. Sababu ya kuzaliwa kwa Yesu Kristo, ambaye kwa asili yake yeye ni Mungu, ni kwamba alizaliwa katika umbo la kibinadamu kwa kupitia Bikira Mariamu ili kuwaokoa toka katika dhambi zao zote. Kwa maneno mengine, ili kuwaokoa wenye dhambi toka katika dhambi zao, Mungu mwenyewe alilazimika kuja kama Mwokozi. Ili kuwaokoa wenye dhambi ilihitajia yeye asiye na dhambi ili awe dhabihu kwa ajili ya dhambi zetu (1 Yohana 2:2), na huyo asiye na dhambi alikuwa ni Yesu Kristo, ambaye ni Mungu mwenyewe.

Kitendo cha bikira yoyote ambaye amechumbiwa kupata mtoto kabla ya ndoa ni jambo baya ambalo hukemewa na jamii nzima kama tendo lenye kuashiria tabia na mwenendo mbaya. Tendo hili pia linaweza kuwa ni dhambi ambayo inastahili adhabu ya kifo hasa miongoni mwa Wayahudi wa wakati huo. Sheria ya Israeli iliamuru kuwa yeyote ambaye alifanya uzinzi alipaswa kupigwa mawe hadi kufa. Kutokana na kifungu cha maandiko cha leo inaonyesha kuwa Mariamu na Yusufu walikuwa wamekubaliana kuoana. Yusufu na Mariamu wote wawili walikuwa na hofu ya Mungu. Hivyo kutokana na jambo kubwa lililowatokea wao wawili walijifunza kuufuata mpango wa Mungu kwa imani hali wakiwa na imani inayomhofu Mungu.

Maandiko yanaandika wazi juu ya tukio hili katika Isaya 7:14 *“Kwa hiyo Bwana mwenyewe atawapa ishara. Tazama, bikira atachukua mimba, atazaa mtoto mwanamume, naye*

atamwita jina lake Imanueli.” Na pia Isaya 9:6 inasema, “*Maana kwa ajili yetu mtoto amezaliwa, Tumepewa mtoto mwanamume; Na uweza wa kifalme utakuwa begani mwake; Naye ataitwa jina lake, Mshauri wa ajabu, Mungu mwenye nguvu, Baba wa milele, Mfalme wa amani.*” Na jambo hili lilitimilizwa.

Pia Mika 5:2 inasema, “*Bali wewe, Bethlehemu Efrata, Uliye mdogo kuwa miongoni mwa elfu za Yuda; Kutoka kwako wewe atanitokea mmoja atakayekuwa mtawala katika Israeli; Ambaye matokeo yake yamekuwa tangu zamani za kale, tangu milele.*” Kifungu hikili kilitabiri juu ya kuzaliwa kwa Yesu kwa usahihi kabisa.

Kitabu cha Mika na Isaya ni unabii ambao uliandikwa na nabii Mika na Isaya kwa kuwa maneno ya Mungu yalikuwa ndani yao na walikuwa wamevuviwa na Roho Mtakatifu. Kwa kupitia unabii wa Mungu manabii hao walifahamu juu ya kuzaliwa kwa Yesu Kristo ambaye angelikuja kuzaliwa miaka 700 baadaye tangu wakati walipoishi wao, na ndio maana waliweza kuandika unabii huo.

Ukiacha vifungu hivi vya maandiko kuna maeneo mengi sana katika Biblia ambayo yanatabiri juu ya kuzaliwa kwa Yesu moja kwa moja. Kwa kweli hili ni jambo la kushangaza. Kuzaliwa kwa Yesu kulikuwa ni fumbo gumu na lisilowezekana labda liwe limeundwa na Mungu mwenyewe na kufanywa na Mungu mwenyewe. Hii ina thibitisha kuwa Mungu Baba alikuwa amepanga kuzaliwa kwa Yesu tangu milele, yaani tangu mwanzo kabla hata dunia haijaumbwa (Mithali 8:23).

Biblia imeundwa na vitabu 39 vya Agano la Kale na vitabu 27 vya Agano Jipya na kufanya idadi ya vitabu 66. Agano la Kale limeundwa na vitabu vya Torati na vitabu vya Unabii, wakati Agano Jipya linatupatia Injili, Nyaraka, na Ufunuo. Kwa sehemu kubwa Agano la Kale limeandikwa kwa Kiebrania na Kiaramu na Agano Jipya limeandikwa kwa Kiyunani. Nguvu ya

lugha ya Kiebrania ni ule usahihi wake wa maana na nguvu ya lugha ya Kiyunani ni ule upana wake wa misamiati.

Biblia iliandikwa kwa zaidi ya miaka 1600 katika karne nyingi zilizopita kwa takribani na waandishi arobaini katika maeneo mbalimbali. Na kwa sababu hiyo kuna wakati maandiko haya yanaonekana kuwa na utata katika umoja wake kwa mtazamo wa jumla. Hata hivyo, maandiko haya hayakuandikwa kwa akili ya mwanadamu yeyote, bali maandiko hayo yaliandikwa kwa uvuvio wa Roho Mtakatifu. Kwa hiyo, unabii wote wa kuzaliwa kwa Yesu unakubaliana kabisa na matukio yote yaliyotokea katika historia.

2 Timotheo 3:15-17 inaeleza kuwa, *“Na ya kuwa tangu utoto umeyajua maandiko matakatifu, ambayo yaweza kukuhekimisha hata upate wokovu kwa imani iliyo katika Kristo Yesu. Kila andiko, lenye pumzi ya Mungu lafaa kwa mafundisho, na kwa kuwaonya watu makosa yao, na kwa kuwaongoza, na kwa kuwaadibisha katika haki; ili mtu wa Mungu awe kamili, amekamilishwa apate kutenda kila tendo jema.”* Kifungu hiki kinathibitisha wazi kuwa Biblia ipo sahihi na kwamba mwandishi wake ni Mungu mwenyewe. Na kwa hiyo tunapaswa kufahamu kuwa vitabu vyote katika Biblia, yaani vitabu 66 vya Agano la Kale na Agano Jipya katika Biblia ni unabii unaohusu kuzaliwa na kazi ya Yesu Kristo.

Luka 24:27 inasema, *“Akaanza kutoka Musa na manabii wote, akawaeleza katika maandiko yote mambo yaliyomhusu yeye mwenyewe,”* na aya ya 44 inaeleza kuwa, *“Kisha akawaambia, Hayo ndiyo maneno yangu niliyowaambia nilipokuwa nikali pamoja nanyi, ya kwamba ni lazima yatimizwe yote niliyoandikiwa katika Torati ya Musa, na katika Manabii na Zaburi.”* Vifungu hivi vinaweka wazi kuwa Yesu Kristo ndiye kiongozi mkuu ambaye Biblia ilimzungumzia.

Sasa ni kwa nini Yesu alizaliwa, yeye ambaye ametabiriwa

na kushuhudiwa katika kipindi cha karne zote kwa kupitia mwili wa Bikira Mariam kama mwanadamu? Lengo na maana ya kuzaliwa kwake vinaonekana kwa wazi katika jina lake “Yesu”. Kama vile tunavyoweka maana katika jina hasa pale tunapovipatia vitu majina, basi hata jina Yesu lina maana, na maana yake ni kuwa “Yeye atakayewaokoa watu wake toka katika dhambi zao.” Kwa hiyo ule ukweli kuwa Yesu alipewa jina hilo ni ishara inayoonyesha dhahiri dhumuni la kuzaliwa kwake.

Muumbaji mwenye nguvu alikuja hapa ulimwenguni katika hali ya kibinadamu na ya chini. Hii inaonyesha ile neema kuu ambayo Mungu anayo juu yetu. Yesu alikuja hapa duniani kwa sababu anatupenda sana.

Yohana 3:16 inasema, *“Kwa maana jinsi hii Mungu aliupenda ulimwengu, hata akamtoa Mwanawe pekee, ili kila mtu amwaminiye asipotee, bali awe na uzima wa milele.”* Kifungu hiki kinatueleza kuwa kila mtu anayemwamini Yesu anaweza kuingia Mbinguni.

Hakuna mtu yeyote katika ulimwengu huu anayeweza kumtoa mwanawe pekee ili awe sadaka kwa ajili ya mwenye dhambi. Ikiwa hali iko hivyo kwa wanadamu, basi ni dhahiri kuwa kile kitendo cha Muumba kuzaliwa katika mwili wa kibinadamu kwa ajili ya wanadamu ambao ni kama wadudu, kinatuonyesha jinsi Mungu Utatu Mtakatifu anavyoupenda ulimwengu huu. Kwa hiyo, ikiwa mtu ataukataa upendo wake usio na masharti, basi mtu huyo anapaswa kuhukumiwa adhabu kutokana na ugumu wake wa moyo.

Yohana 8:24 inasema, *“Kwa hiyo naliwaambieni ya kwamba mtakufa katika dhambi zenu; kwa sababu msiposadiki ya kuwa mimi ndiye, mtakufa katika dhambi zenu.”*

Kifungu kinasema, “Ikiwa hamniamini kuwa mimi Ndiye” sentensi hii ina maanisha nini? Hii ina maanisha kuwa “ikiwa huamini kuwa Mungu alimtuma mwanaye pekee Yesu

Kristo.” Sababu iliyomfanya Yesu kuja hapa ulimwenguni ni kuwaokoa wenye dhambi toka katika dhambi zao zote kama ilivyoandikwa katika Mathayo sura ya 1.

Kazi ya Agano la Kale na Agano Jipya ni kazi ya Roho Mtakatifu. Roho Mtakatifu ni halisi na yupo hai. Kama ilivyo halisia kuwa Yesu alikuja hapa ulimwenguni, akazichukua dhambi zote za ulimwengu, akasulubiwa Msalabani na akafufuka siku ya tatu, basi ni vema utambue kuwa Roho Mtakatifu ni nafsi nyingine na roho halisi ya Mungu Mtakatifu kama ilivyo kwa Yesu. Roho ya Mungu, Roho Mtakatifu ni Mungu mwenyewe.

Nilikwishataja hapo kabla kuwa kazi ya Biblia ni kazi ya Roho Mtakatifu. Mwanzo 1:2 inasema, *“Nayo nchi ilikuwa ukiwa, tena utupu, na giza lilikuwa juu ya uso wa vilindi vya maji; Roho ya Mungu ikatulika juu ya uso wa maji.”* Katika kifungu hiki, Roho wa Mungu ndiye Roho Mtakatifu. Kwa kweli Roho Mtakatifu yupo hai kama Mungu Baba na Yesu walivyo hai. Roho Mtakatifu pia anatajwa katika kifungu cha leo cha maandiko ambacho tumekisoma: *“Mariamu mama yake alipokuwa ameposwa na Yusufu, kabla hawajaribiana, alionekana ana mimba kwa uwezo wa Roho Mtakatifu.”* Kifungu hiki cha maandiko kinatueleza kuwa Yesu alitungwa mimba kwa uwezo wa Roho Mtakatifu kwa Bikira Mariamu.

Kwa hiyo, kusema kweli, Mungu Baba, Yesu Mwana, na Roho Mtakatifu ni Mungu mmoja kwetu. Ili Yesu aweze kuja hapa ulimwenguni kama Mwokozi, kulikuwa na ushirikiano kati ya Mungu Baba na Roho Mtakatifu ambao walimfanya Yesu aweze kuja na kuwa Mwokozi. Hata hivyo, kuna baadhi ya watu ambao wanakiona kuwa ni vigumu sana kukiamini kifungu hiki na wanataka ushahidi unaoelezea hivyo huku wakisema kuwa jambo hilo ni upuuzi. Ninaweza kuwapatia watu kama hao ushahidi wa Utatu kwa kina toka katika

Maandiko, yaani juu ya Mungu Baba, Yesu Mwana, na Roho Mtakatifu. Kama ambavyo wewe unaishi, basi ni vema ufahamu kuwa Yesu, Roho Mtakatifu, na Mungu Baba pia wanaishi. Kama tulivyo wanadamu, halafu kama vile tulivyo na tofauti zetu, basi jukumu la kila nafsi ya utatu katika Utatu ni tofauti lakini Mungu ni mmoja. Ninakueleza wazi kuwa Roho Mtakatifu ni Roho ya kimungu.

Roho Mtakatifu ambaye ni Roho wa Mungu ni nafsi hai na yenye tabia yake inayojitegemea. Yesu, ambaye ni Mwokozi wa wanadamu aliweza kuja kwa kupitia Mariamu kutokana na kazi ya Mungu Utatu. Kwa hiyo, tunafahamu kuwa katika kazi ya wokovu, Baba, Mwana, na Roho Mtakatifu walifanya kazi pamoja. Hii ndiyo sababu mara kabla hapaa kwenda Mbinguni, Yesu aliwaamuru wanafunzi wake *“basi, endeni, mkawafanye mataifa yote kuwa wanafunzi, mkiwabatiza kwa jina la Baba, na Mwana, na Roho Mtakatifu”* (Mathayo 28:19). Kazi ya Mungu ambayo iliumba ulimwengu na kazi zote ambazo Mungu amezifanya hazikufanywa na Mungu Baba peke yake, au na Mwanawe pekee Yesu Kristo peke yake, bali kazi hizo zote zilifanywa na Mungu Baba, Yesu Mwana, na Roho Mtakatifu pamoja huku wakishauriana kuhusu kazi zote na kuzifanya kazi zote.

Sisi tuliokolewa toka katika dhambi zetu kwa kuamini kile ambacho Mwokozi amekifanya kwa ajili yetu. Kama Yesu alivyo halisi, basi hata Roho Mtakatifu ni uwepo mwingine halisi wa Mungu. Hivyo, kazi zote katika ulimwengu huu ni kazi za Mungu Utatu. Kwa kweli, si kwamba Roho Mtakatifu anakaa katika mioyo ya sisi tunaoamini katika injili ya maji na Roho tu, Roho Mtakatifu anatumfundisha juu ya ile kweli ana anatuongoza katika njia ya uzima.

Hebu tuangalie Yohana sura ya 14. Yohana 14:25-26 inasema, *“Hayo ndiyo niliyowaambia wakati nilipokuwa*

nikikaa kwenu. Lakini huyo Msaidizi, huyo Roho Mtakatifu, ambaye baba atampeleka kwa jina langu, atawafundisha yote, na kuwakumbusha yote niliyowaambia.”

Hii ndiyo sababu Biblia inamtaja Roho Mtakatifu kuwa ni Msaidizi. Roho Mtakatifu ambaye Baba atamtuma “atawafundisha mambo yote na atawakumbusha mambo yote niliyowaambia.” Msaidizi Roho Mtakatifu anatufundisha ukweli kuhusu mambo yote kama vile yale yanayompendeza Mungu Baba na pia kuyafahamu mapenzi yake. Pia anayetukumbusha yale ambayo Bwana alitufundisha ni Roho Mtakatifu. Hii ndiyo sababu Biblia inatueleza kuwa “*Nanyi, mafuta yale mliyoyapata kwake yanakaa ndani yenu, wala hamna haja ya mtu kuwafundisha; lakini kama mafuta yake yanavyowafundisha habari za mambo yote, tena ni kweli wala si uongo, na kama yalivyowafundisha kaeni ndani yake*” (1 Yohana 2:27). Hii ina maanisha kuwa Roho Mtakatifu anatufundisha kuhusu Mungu wakati anapokuwa anakaa katika mioyo yetu. Hii ndiyo sababu Roho Mtakatifu ni Msaidizi.

Maandiko yanamwelezea Yesu Kristo kwa kina pamoja na kazi za Roho Mtakatifu. Vitabu vyote vya Agano Jipya kama vile Injili nne, Matendo, Nyaraka za Paulo, Nyaraka za Yakobo, Petro na Yohana, na hata Ufunuo yote ni mafundisho ya Yesu. Katika kile kipindi cha Injili nne, Bwana mwenyewe alitufundisha. Baada ya kile kipindi cha Injili kupita, Yesu alipaa kwenda Mbinguni. Yesu aliahidi kuwa atamtuma Roho Mtakatifu katika siku ya Pentekoste na tangu hapo kipindi hiki kimekuwa ni kipindi cha Roho Mtakatifu.

Hiki ni kipindi cha Roho Mtakatifu. Kipindi hiki ambacho mimi na wewe tunaishi ni kipindi ambacho Roho Mtakatifu anafanya kazi. Kipindi hiki ambacho mimi na wewe tunaishi ni kipindi cha Roho Mtakatifu, na Roho Mtakatifu anakaa ndani yetu, na anatufanya tuweze kuieneza injili. Roho Mtakatifu

anatusaidia kuifahamu Kweli, anazikemea dhambi zetu, anatuongoza kuyafuata mapenzi ya Mungu vizuri na anatupatia yale ambayo tunapungukiwa ndani yetu. Pia anatusaidia kutambua yale yaliyo na makosa na anatukumbusha juu ya Neno.

Injili ya maji na Roho ni injili ya Roho Mtakatifu. Hii ina manisha kuwa Roho Mtakatifu anafanya kazi pamoja na injili ya maji na Roho. Kwa nini Roho Mtakatifu anafanya kazi hiyo? Hii ni kwa sababu hiki ni kipindi cha Roho Mtakatifu. Yesu Kristo alizaliwa katika ulimwengu huu na kisha akazichukua dhambi zetu kwa ubatizo wake, akaipokea hukumu, akapaa kwenda Mbinguni, na siku moja atarudi. Roho Mtakatifu anafanya kazi pamoja na Neno la Mungu lililoandikwa hadi pale Yesu atakaporudi.

Roho Mtakatifu ni Mungu anayefanya kazi kwa kupitia Neno la Mungu. Wakati Mariamu alipoupokea ujumbe wa Mungu, basi hapo ndipo Roho Mtakatifu alipofanya kazi ili aweze kumpata mtoto Yesu. Roho Mtakatifu alitoa uwezo wa kumwezesha mtoto Yesu kuzaliwa kwa sababu Marimu alikuwa amelikubali Neno la Mungu lililosema, “Tazama, mimi ni mjakazi wa Bwana; na iwe kwangu kama ulivosema.” Kwa hiyo, Roho Mtakatifu anafanya kazi kwa kupitia yale ambayo yalitabiriwa.

Mathayo 1:22-23 inasema, *“Hayo yote yamekuwa; ili litimie neno lililonenwa na Bwana kwa ujumbe wa nabii akisema, Tazama, bikira atachukua mimba, Naye atazaa mwana; Nao watamwita jina lake Imanueli; Yaani, Mungu pamoja nasi.”* Ni lazima tufahamu kuwa Roho Mtakatifu anafanya kazi ndani ya wale wanaoamini katika Neno la Mungu lililoandikwa.

Katika injili ya Luka, Biblia inatueleza kuwa malaika Gabriel ambaye alijionyesha kwa Elizabeti pia alikwenda kujionyesha kwa Mariamu na kumwambia, *“Umebarikiwa*

kuliko wanawake wote! Huyo mtoto atakuwa mkuu!” Yeye aliye mkuu maana yake ni Mwokozi. Kisha Mariamu akaogopa na kumuuliza yule malaika, *“Litakuwaje neno hili, maana sijui mume?”* Malaika Gabrieli akamwambia *“Tena, tazama, jamaa yako Elizabeti naye amechukua mimba ya mtoto mwanamume katika uzee wake; na mwezi huu ni wa sita kwake yeye aliyetwa tasa.”* Kisha Mariamu akayapokea maneno ya Mungu ambayo malaika alikuwa amempatia kwa kusema, *“Tazama, mimi ni mjakazi wa Bwana; na iwe kwangu kama ulivosema.”* Kisha malaika akaondoka kwake, kisha baadaye Yesu akazaliwa toka kwa Mariamu. Huu ni mfano mzuri wa jinsi Roho Mtakatifu anavyofanya kazi.

Katika kipindi hiki, Roho Mtakatifu bado yupo ulimwenguni hali akifanya kazi ndani ya mioyo yetu. Je, Roho Mtakatifu anafanyaje kazi? Tunapoliamini Neno la Mungu lililoandikwa, basi Roho Mtakatifu atafanya kazi kwa kupitia maneno ya Mungu. Tunapoieneza Injili kwa wale ambao bado hawajampokea Yesu, basi Roho Mtakatifu atakuwa ndiye anayefanya kazi ndani yao. Wakati wewe na mimi tunapoieneza injili na Neno la Mungu, basi Roho Mtakatifu aliye ndani yetu anafanya kazi ndani ya wale ambao hawajazaliwa tena upya. Wakati injili inapoenezwa, basi Roho Mtakatifu anafanya kazi ndani yao huku akiwasaidia kuifahamu Injili. Wakati watu wanaposikia na kuwaza hivyo, basi Roho Mtakatifu anawafundisha Neno la Mungu kuwa lina maanisha nini, na Roho huyo Mtakatifu atafanya kazi ndani yao ili waweze kuielewa injili. Kwa kuwa kama matokeo ya kazi hizo za Roho Mtakatifu, basi watu wanapokea ondoleo la dhambi. Kwa kuwa Mungu anatupatia ufahamu kwa kupitia Neno lake, basi ni wazi kuwa Roho Mtakatifu anafanya kazi kwakupitia Maandiko yaliyoandikwa.

Wokovu wetu ulipangwa na Mungu katika Yesu Kristo

kabla ya uumbaji, na Yesu Kristo, ambaye ni Mwana alikuja katika ulimwengu huu na akautimiza wokovu kwa kupitia maji yake ya ubatizo na kwa kuimwaga damu yake Msalabani. Na Roho Mtakatifu anatumia uwezo wa kumwacha ambao tumeupokea ambao ulikuwa umepangwa na Mungu Baba na kutekelezwa na Mwana. Roho Mtakatifu kama Msaidizi, anatusaidia kuwa na imani yenye nguvu huku akisema “Mnaamini kiusahihi, endeleeni kuamini hivyo, hiyo ni sahihi.”

Kwa hiyo, Roho Mtakatifu ni Msaidizi na Mwalimu kwa kila mmoja wetu. Hii ndiyo sababu kipindi cha Roho Mtakatifu ni kipindi cha Agano Jipya, na kipindi cha Agano Jipya ni kipindi cha Roho Mtakatifu. Kwa hiyo ni lazima tufahamu kuwa tunaishi katika kipindi cha Roho Mtakatifu.

Ni kweli kuwa Mariamu alipata mimba kwa uwezo wa Roho Mtakatifu kwa kuwa alikuwa ameyakubali maneno ya Mungu ambayo alimpatia, na kutokana na kazi ya Roho Mtakatifu, mtoto Yesu alizaliwa hapa ulimwenguni. Tunamshukuru Mungu ambaye alitupatia wokovu huu. Kazi za Roho Mtakatifu zinatuwezesha sisi kuweza kuokolewa.

Kutungwa mimba kwa uwezo wa Roho Mtakatifu maana yake ni kuwa wokovu tulionao unatoka kwa Mungu. Wokovu huo hautekelezwi na waanzilishi wakuu wa dini bali kazi hii inafanywa na Mungu Baba, Mwana, na Roho Mtakatifu ili kutufanya sisi kuwa watoto wake. Hivi ndivyo tulivyookolewa toka katika dhambi zetu na kupokea ondoleo la dhambi. Na hii ni kutokana na ukweli kuwa tuliokolewa kwa sababu ya kazi na matendo ya Roho Mtakatifu. Na hii ndiyo sababu tuna shukrani nyingi.

Tukiongea kwa ujumla, kwa kweli tunamfahamu Yesu vizuri sana, lakini hatufahamu mengi kuhusu Roho Mtakatifu. Hata hivyo, katika hali halisi, Yeye anayekaa ndani yetu ni Roho Mtakatifu. Kama inavyosemwa kuwa Yesu yumo ndani

ya Roho Mtakatifu na Roho Mtakatifu yumo ndani ya Yesu Kristo, Mwana katika Baba, na Baba katika Mwana, Yesu ndiye aliyezisafisha dhambi zetu kabla ya kupaa kwenda Mbinguni, na sasa Roho Mtakatifu ndiye anayekaa ndani yetu kwa imani yetu. Kwa kweli Yesu Kristo alikuja hapa ulimwengunu, akazitoweshea mbali dhambi zako zote na zangu, na akapaa kwenda Mbinguni, na sasa ile imani inayoamini katika Yesu Kristo na Neno la Mungu, na Roho Mtakatifu inakaa ndani ya mioyo yetu. Wewe na mimi tupo chini ya uongozi wa Roho Mtakatifu.

Hivyo ni lazima tumfahamu Roho Mtakatifu vizuri. Ikiwa wewe na mimi tutamfanya Roho Mtakatifu anayekaa ndani yetu kutoridhika, basi ni vema tufahamu kuwa jambo kama hilo halimpendezi Mungu. Tunapompendeza Roho Mtakatifu anayekaa ndani yako na ndani yangu kadri tunavyoyafuata maelekezo yake, basi tufahamu kuwa sisi tutakuwa na furaha na Mungu pia atafurahishwa. Kwa hiyo, kama vile imani yetu inayomwamini Yesu Kristo inavyotakiwa kutobadilika ndani ya mioyo yetu, basi vivyo hivyo tunapaswa kumtambua Roho Mtakatifu anayekaa ndani yetu. Tunapomtambua Roho Mtakatifu, basi hapo tunaweza kuwa na mahusiani mazuri na Mungu. Na ni hadi tutakapotambua uwepo wa Roho Mtakatifu ndani yetu ndipo huyo Roho Mtakatifu atakapofanya kazi ndani yetu na atatuombea kwa Mungu kwa niaba yetu, atatusaidia kuyafahamu mapenzi ya Mungu, na atatuongoza katika njia ya haki. Lakini kama tusipomridhisha Roho Mtakatifu, basi Roho Mtakatifu atakuwa katika hali mbaya na atasema, “Sasa fanya kila unachotaka kukifanya, hebu jitunze wewe mwenyewe,” na hapo ndipo tutakapojiona kama tumeachwa na Mungu na tutafadhaika na kuchanganyikiwa na kujiona kuwa tumetengwa na Mungu kwa umbali wa maili 9000. Hivyo, ni lazima tumfahamu Roho Mtakatifu vizuri ambaye anaishi ndani yetu.

Yesu ametuokoa kwa kupitia kazi za Roho Mtakatifu na Roho Mtakatifu bado anafanya kazi ndani yetu ili kutuongoza.

Je, unalifahamu jambo hili? —Ndiyo.— Sababu inayofanya ulifahamu hili ni kwa sababu umepokea ondoleo la dhambi, na sasa Roho Mtakatifu anakaa ndani yenu. Wale ambao bado hawajaokolewa na ambao hawana Roho Mtakatifu katika mioyo yao hawawezi kulifahamu Neno la Mungu na ndio hao wanaosema kuwa Neno halieleweki. Hakuna kitu chenye kueleweka na chenye ufahamu wa hali ya juu kama Biblia ambayo iliandikwa hali ikivuviwa na Roho Mtakatifu. Utanguzi, ujumbe mzima, na hitimisho vyote viko wazi katika Biblia. Hata hivyo, wale ambao bado hawajazaliwa tena upya hawezi kuona umakini na usahihi wa Biblia. Kwa hiyo, Yesu anawaona watu kama hao kuwa ni vipofu huku akisema, *“Je! Aliye kipofu aweza kuongoza kipofu? Hawatatumbukia shimoni wote wawili?” (Luka 6:39).*

Wakati fulani nilikutana na mchungaji. Siku moja yule mchungaji akanieleza, “Ikiwa utanieleza kwa ufahamu wa kibinadamu jinsi Yesu alivyoweza kuzaliwa toka katika mwili wa bikira, basi hapo ndipo nitakapoliamini Neno la Mungu kama lilivyo.” Kama watheologia wengi walivyo na aina hii ya imani, basi ndivyo hata huyu mchungaji alivyokuwa na imani hiyo. Kwa kweli mimi nilimshangaa kwa yale maneno yake. Hapo nikamuuliza.

“Wewe ni mchungaji?”

“Ndiyo, mimi ni mchungaji na pia ni mkurugenzi asasi ya Kikristo ya wanafunzi katika chuo kikuu.”

“Mkurugenzi? Kazi ya mkurugenzi ni ipi?”

“Kazi ya mkurugenzi ni kuwasaidia wanafunzi kuufahamu Ukristo ili waweze kuwa na imani.”

“Wewe kama mkurugenzi huuamini juu ya kuzaliwa kwa Yesu? Huamini kuwa Yesu alitungwa mimba kwa uwezo wa

Roho Mtakatifu katika Bikira Mariamu, akazaliwa katika ulimwengu huu, na akatuokoa toka katika dhambi zetu?”

“Hapana, siamini hivyo.”

“Sasa unapaswa kwanza kujionea aibu wewe mwenyewe. Pili huwezi kujiita kuwa ni mchungaji ambaye unawachunga kondoo. Wewe ni mchungaji wa taaluma tu ambaye unafanya hivyo ili kujikimu kimaisha.”

Yule mchungaji akasema, kuku anaweza kutaga yai pasipo kupandishwa na jogoo, lakini kuzaa mtoto pasipo mwanamume haiwezekani.

Nikamwambia, “Hii ndiyo sababu ninasema kuwa wewe si mchungaji halisi bali unafanya hivyo ili uweze kujikimu. Unawezaje kuwaongoza wanafunzi kwenda kwa Yesu wakati hata hulifahamu na kuliadini jambo hili la uzazi wa Yesu? Upaswa kuiacha hiyo asasi ya Kikristo ya wanafunzi ambayo unaiongoza. Maana ni wazi kuwa hutaweza kuwaongoza kwenda kwa Yesu. Wewe unaziharibu nafsi zao.”

Kwa kweli lilikuwa ni jambo linalopaswa kuombolezewa kabisa kumuona mtu anayejiita kuwa ni mchungaji huku hafahamu juu ya uzazi wa Yesu kwa uwezo wa Roho Mtakatifu. Kusema kweli, ikiwa Roho Mtakatifu haishi ndani yako, basi haiwezekani kwako kuufahamu juu ya kuzaliwa kwa Yesu kama kulivyoandikwa katika Biblia. Unafahamu vipi kuhusu kuzaliwa kwa Yesu? Siku hizi kuna kitu kimoja kinaitwa utungishaji wa mimba kitaaluma, hata hivyo utungishaji huu wa mimba unahitaji mtu awe na mbegu za kiume na yai la kike ili mimba iweze kutungwa. Sasa inawezekanaje basi kuzaliwa kwa mbegu au yai tu? Hata hivyo, kuzaliwa kwa Yesu kuliwezekana kwa sababu ilikuwa ni kazi ya Mungu.

Lile tukio la kwamba mtoto Yesu atazaliwa kwa kupitia Bikira Mariamu kwa kazi ya Roho Mtakatifu lilitabiriwa zaidi ya miaka 700 kabla ya Yesu kuzaliwa. Kwa nini kulikuwa ni kifungu

kama hiki katika Isaya, *“Tazama, bikira atachukua mimba, atazaa mtoto mwanamume, naye atamwita jina lake Imanueli.”* Wakati Mungu anapotaka kutufanya sisi tuufahamu mpango wake wa kushanga, basi mara nyingi anajifunua kwa kupitia tukio maalum ambalo haliwezekani kwa nguvu za kibinadamu.

Kulikuwa na wakati ambapo Waisralie walichukuliwa na maadui na watu wote katika Israeli walipelekewa utumwani wakiwa kama mateka. Ilikuwa ni vigumu sana kuweza kulikomboa taifa lao toka mikonini mwa maaudi. Hata hivyo, Mungu aliahidi kuwa nchi ya Israeli itarudishwa tena upya baada ya miaka 70. Hakuna aliyeamini hilo, lakini muujiza ulitokea katika mikono ya Mungu.

Vivyo hivyo, muujiza wa kushangaza kwa kupitia nabii Isaya *“Tazama, bikira atachukua mimba, atazaa mtoto mwanamume, naye atamwita jina lake Imanueli”* ulitokea. Kwa kweli kwa ufahamu wa kibinadamu jambo hilo haliwezekani, lakini Mungu aliahidi kuwa atalifanya jambo hilo liwezekane na Mungu alifanya hivyo. Je, Mungu anafanyaje kazi kwa nguvu zake kutuokoa wewe na mimi? Kama alivyowatuma manabii wake kutoa unabii, basi Mungu abado anawatuma malaika zake watumishi kutoa ujumbe na anamwokoa yeyote yule anayeamini ujumbe huo. Kwa hiyo, wokovu wangu na wako ni matokeo ya kazi ya Roho Mtakatifu.

Sisi tumeokolewa kwa kazi za Mungu Utatu—Mungu Baba, Yesu Mwana, na Roho Mtakatifu. Kwa hiyo hata sasa Mungu anamtuma Roho Mtakatifu kwa kila mtu anayelipokea Neno lake na awanafanya kuwa watoto wa Mungu. Wakati tulipookolewa, je, tulipokea Roho Mtakatifu ati kwa sababu mtu fulani amepiga kelele, *“Poke moto huu”* au *“Pokea huyu Roho Mtakatifu”*? Hapana, haikuwa hivyo. Kwa kawaida Roho Mtakatifu anafanya kazi kwa kupitia Neno la Mungu lililoandikwa. Hapo haijalishi kuwa tunalisoma Neno sisi

wenyewe au mtu mwingine anatuhubiria Neno hilo, mana ikiwa tunaliamini Neno, basi Roho Mtakatifu anafanya kazi ndani yetu ili kutusaidia kulifahamu Neno na kutupa uhakika. Hivyo Roho Mtakatifu analitimiza Neno ndani yetu kama lilivyoandikwa. Hii ndiyo sababu Mungu anatoa Roho Mtakatifu kama karama kwa wale wote wanaoliamini Neno lake.

Wewe na mimi tumepokea wokovu wa kweli na wa kushangaza kwa kupitia kazi ya Roho Mtakatifu. Kule kusema kuwa Bikira Mariamu alipata mimba ya mtoto Yesu kwa imani yake katika Neno, na kwamba umeokolewa kwa kuiamini Injili ya maji na Roho na kwamba Yesu alikuja kukaa ndani yako kama Roho Mtakatifu, basi mambo hayo yote yanatokana na kanuni moja. Ikiwa unaliamini Neno la Mungu, basi ni hakika kuwa utapokea ondoleo la dhambi zako na kisha kufanyika kuwa mtoto wa Mungu. Unapofanyika kuwa mtoto wa Mungu, basi Roho Mtakatifu anakaa ndani yako.

Yesu Kristo ni Mwana wa Mungu aliyekuja kwa Roho Mtakatifu. Yesu, ambaye ni Mwana wa Mungu hakuwa na dhambi. Yesu anafanya kazi ndani yetu kwa namna ileile ilivyoandikwa katika maandiko. Wakati Mariamu alipoupokea ujumbe toka kwa malaika, basi Neno alifanyika mwili na akazaliwa kama Mtoto Yesu. Hivi ndivyo Neno linavyotenda kazi. Na hivi ndivyo Yesu alivyofanyika kuwa Mwokozi wetu.

Kama tunavyosema “kazi ya Roho Mtakatifu,” mtu anaweza kufikiri Roho Mtakatifu alijitokeza kwa Mariamu na kumwambia “Sasa nitafanya kazi ndani yako tangu sasa na kuendelea,” na kisha huyo Roho Mtakatifu akafanya kazi kama miujiza fulani. Kwa kweli haikutokea hivyo. Pia Mungu hakutenda hivyo. Wakati Mungu anapolituma Neno lake, basi ikiwa tutalipokea Neno la Mungu, basi Roho Mtakatifu atafanya kazi ndani yetu pamoja na Neno la Mungu, na kama matokeo ya jambo hilo Neno la Mungu litatimizwa ndani yetu

kadri tunavyozidi kuamini. Kanuni iyo hiyo inatumika pia katika kuzaliwa kwa Yesu na kule kuzaliwa kwetu upya. Na hii ndiyo sababu jambo kama hili lilitokea wakati ulipopokea ondoleo la dhambi zako. Na hivyo ndivyo ilivyotendeka wakati nilipozaliwa tena upya. Tunapolipokea na kuliamini Neno la Mungu, basi ni hakika kuwa dhambi zetu zinatoweshwa mbali na Roho Mtakatifu anatuthibitishia hilo.

Hivi ndivyo Yesu na Roho Mtakatifu wanavyofanya kazi. Je, hili si jambo la kushangaza? Mariamu aliyapokea maneno ya Mungu na kwa sababu hiyo mtoto Yesu alizaliwa. Nini kilitokea wakati wewe na mimi tulipolipokea Neno la wokovu kwa kupitia ubatizo wa Yesu na damu yake Msalabani? Je, nafsi zetu zilizaliwa tena upya kama wenye haki au la? Ni wazi kuwa nafsi zetu zilizawaliwa tena upya. Je, kulikuwa na Roho Mtakatifu ndani ya Yesu au la? Roho Mtakatifu alikuwepo ndani ya Yesu. Roho Mtakatifu alikuwemo ndani ya Yesu tangu kuzaliwa kwake. Je, Roho Mtakatifu yupo ndani yetu sisi ambao tumezaliwa tena upya kwa injili ya maji na Roho? Ni kweli kuwa Roho Mtakatifu yupo ndani yetu. Huo ni muujiza ule ule. Ni neno lile lile.

Je, unalifahamu Neno la kuwa Yesu alizaliwa kutokana na kazi ya Roho Mtakatifu? —Ndiyo.— Kwa kweli ni kazi ile ile ya kushangaza. Kwa hiyo, wakati tunapopokea ondoleo la dhambi kwa kumpokea Yesu, huo hauwi mwisho wa kazi ya Mungu ndani yetu. Roho Mtakatifu ambaye anafanya kazi hasa ndani yetu anatumia, na anatumia kama Mwalimu. Kwa hiyo, Roho Mtakatifu aliye ndani yetu ndiye anayetawala ndani yetu huku akitufundisha na kutuongoza.

Kwa hiyo, hatupo peke yetu. Mungu, Roho Mtakatifu yupo pamoja nanyi wakati wote. Mpo pamoja na Mungu. Vivyo hivyo, Roho Mtakatifu anatusaidia pia katika udhaifu wetu na tunapokuwa katika shida au magumu. Kadhalika Roho

naye hutusaidia udhaifu wetu, kwa maana hatujui kuomba jinsi itupasavyo, lakini Roho mwenyewe hutuomba kwa kuugua kusikoweza kutamkwa (Warumi 8:26). Ikiwa hatufahamu cha kufanya, basi Roho Mtakatifu ndiye anayetufundisha la kufanya, “Kwamba hivi sivyo, bali hivi ndivyo.” Roho Mtakatifu anatukumbusha juu ya Neno la Mungu na anatumfariji. Tunapokuwa katika huzuni, Roho Mtakatifu anaishikilia mioyo yetu na kutumfariji. Hivi ndivyo tunavyoweza wakati wote kuwa.

Kwa kweli wewe na mimi tumepokea wokovu wa kweli wa kushanga. Baba, Mwana, na Roho Mtakatifu waliumba ulimwengu huu ili kwamba mimi na wewe tuweze kuupokea wokovu huu na kufanyik akuwa watoto wa Mungu. Ni lazima tumfahamu jambo hili.

Kwa nini Mungu aliumba ulimwengu? Mungu aliumba ulimwengu ili kwamba watu kama wewe na mimi, yaani wale ambao wamepokea ondoleo la dhambi waweze kuwa mabwana wa eneo mahali hapa. Na hii ndiyo sababu kuwa wokovu wetu ulipangwa hata kabla ya uumbaji. Ilikuwa imepangwa tangu milelel yote kuwa wewe na mimi tutaokolewa toka katika dhambi zetu leo hii. Sio tu kwamba tumeokolewa toka katiak dhambi zetu, bali tumefanyika pia kuwa watoto wa Mungu ambao wana Roho Mtakatifu kutokana na majaliwa ya Mungu yaliyokuwa yamepangwa kabla ya uumbaji. Kwa hiyo, kusema kweli sisi tunaishi kama wana na mabinti za mfalme, tunaishi kama watoto wa Mungu katika Ufalme wa Mungu. Pamoja na kuwa tunaweza tusiwe wana na mabinti za wafalme unapokuwa tukiishi katika ulimwengu huu, ukweli unabakia kuwa sisi ni watoto wa Mungu na wana na mabinti wa mfalme katika Ufalme wa Mungu. Sisi ni watu wa maana sana. Sisi ni watu wa muhimu sana ambao tumepokea kwa kweli wokovu wa kushangaza.

Hii ndiyo sababu kuwa Krismasi ina maana sana na inashangaza. Wakati mtoto Yesu alipozaliwa mara baada ya

kuwa ametungwa mimba kwa uwezo wa Roho Mtakatifu, yaani wakati ule Mariamu alipokuwa na mimba ya mtoto Yesu kwa kuyapokea maneno ya Mungu, na kisha Yesu Kristo akazaliwa baada ya miezi kumi, basi hapo ndipo kazi ya wokovu ilipoanza. Hii ndiyo sababu tunakumbuka na kusherehekea Krismasi. Tunaimba “Furaha kwa ulimwengu, Bwana amekuja” katika ile siku ambayo Bwana alizaliwa kwa kupitia Bikira Mariam ambaye aliyapokea maneno ya Mungu ambayo yalitumwa kwake toka kwa Mungu. Tunasherehekea siku ambapo kazi hii ya kushangaza ilifanyika.

Tukisema kwa usahihi, Yesu hakuzaliwa katika siku za majira ya baridi ya mgando, bali alizaliwa katika wakati wa joto ambapo walinzi walikuwa wakilinda kundi lao la kondoo usiku kwa zamu. Badala ya kujadiliana juu ya tarehe maalum sisi tumeamu kuiteua siku moja ambapo ulimwengu mzima utasherehekea kwa pamoja siku ambayo wokovu wa ulimwengu ulifunguliwa baada ya Yesu kuchukuliwa mimba kwa uwezo wa Roho Mtakatifu, na kuukumbuka wokovu ambao tumeupokea katika mioyo yetu. Kitu cha maana si siku kama siku, bali ni ule ukweli kuwa Yesu alikuja hapa ulimwenguni, na kwamba Mariamu aliyapokea maneno ya Mungu kiasi kuwa mtoto Yesu aliweza kuzaliwa.

Sisi tunatafakari juu ya wokovu huu wa kushangaza kwa mara nyingine tena tunapoisherehekea siku hii. Ni lazima tujifunge ili kuwa wale wanaomfurahisha Roho Mtakatifu kadri tunavyokumbuka wokovu tulioupokea kwa kazi ya Roho Mtakatifu na kwamba huyo Roho Mtakatifu anakaa ndani yetu. Wakristo wapendwa, sisi ni watu ambao tumebarikiwa kwa baraka za kushangaza. Mariamu alihesabika kuwa ni mbarikiwa lakini wewe na mimi ni wabarikiwa pia. Ni kweli? —Ndiyo.—

Je, Krismasi ni siku ambayo tunaupamba mji kwa rangi

nyekundu tukiwa na marafiki wa kiume na marafiki wa kike, wenye dhambi, pamoja na familia? Je, au huu ni usiku mtulivu, usiku mtakatifu ambao tumeutumia kufanya matendo ya haki huku tukikumbuka na kusherehekea kwamba Bwana amekuja kutuokoa? Hii ni siku ya matendo ya haki. Ninawaeleza mapema. Ninakueleza hivi kutokana na hofu yangu kuwa inawezekana kuwa yupo hapa mtu mmoja ambaye anaelewa vibaya siku ya Krismasi na anajisikia vibaya kwa kuwa hajaenda kufanya sherehe huko nje. Ninasema hivi kwa sababu anaweza akawepo mtu anayefikiri kuwa “kwa nini sijaenda huko nje kunywa pombe kama wengine wanavyofanya huko ulimwenguni badala yake nipo hapa nikiisherehekea Krismasi kwa ukimya?” Njia pekee ya kuisherehekea Krismasi ni kuisherehekea kwa ukimya huku ukitafakari juu ya maana ya siku hiyo, au kwa kufanya baadhi ya matendo ya haki. Hakutaweza kuwa na siku ya kukumbukwa zaidi ikiwa tutaihubiri injili katika siku hii ya Krismasi, ambapo matokeo yake ni kuwa watu baadhi wanaweza kupokea ondoleo la dhambi. Kama ambavyo mtoto Yesu alizaliwa baada ya Mariamu kulipokea Neno la Mungu, basi mwenye dhambi anaweza kufanyika mwenye haki na kuzaliwa tena upya kama mtoto Yesu katika ulimwengu huu kwa kulipokea Neno la injili ambalo tumelithubiri. Je, kunaweza kuwa na maana nyingine nzuri kuhusu Krismasi zaidi ya hii? Ninaamini kuwa umeipata aina hii ya Krismasi ya haki, na bila shaka ni Krismasi yenye maana sana.

Pia ninawaomba muangalie jirani yenu ikiwa kuna mtu mwenye huzuni au maumivu katika Krismasi hii. Krismasi ni siku takatifu ambayo ulimwengu mzima unasherehekea. Hata hivyo, ni lazima tukumbuke na kuamini kuwa siku hii inaweza kuwa ni siku ya huzuni sana kwa baadhi ya watu na kwa sababu hiyo tujitahidi kuifanya siku hii kuwa ni Krismasi inayowanufaisha wengine.

Krismasi ni siku ya furaha na ya kushukuru. Kwangu mimi, ninatumaini kuwa uchapishaji wa vitabu vya injiri ufanyike haraka ili kwamba niweze kuvisambaza wakati wa Krismasi. Nimesikia kuwa kitabu changu cha kwanza kitapelewa Marekani kesho, ninatamani kuwa kitabu hicho kiweze kuwekwa katika tovuti ya Amazon.com mapema ili kwamba watu wengi waweze kukisoma kitabu hicho mapema hapo mwakani. Kwa kuwa kuna vitabu ambavyo vinachapishwa kwa lugha ya Kichina, ninatumaini kuwa uchapishaji utafanyika mapema ili kwamba tuweze kusambaza vitabu hivyo huko Hong Kong na China mwaka ujao. Kama Mariamu alivyoweza kutunga mimba ya Yesu kwa uwezo wa Roho Mtakatifu kwa kuyapokea Maneno ya Mungu, basi ninatamani kuwa Wachina waweze kumpokea Yesu na kupokea ondoleo la dhambi pia. Je, hilo si ndio tumaini lenu pia? —Ndiyo—.


Ninatumaini kuwa mmekuwa na Krismasi njema na kwamba mtaishiriki Krismasi pamoja na wenye haki wengine.

Tunamshukuru Mungu kwa wokovu wetu na kwa ulinzi wake anaotupatia. Mara nyingi tunaona ajali nyingi katika siku msimu huu wa Krismasi, nasi tunamshukuru Mungu sana kwa kutulinda na ajali hizo. Kuna ajali nyingi za barabarani kutokana na watu kulewa na kisha kuendesha pamoja na uhalifu kutoka kwa vijana wadogo kwa ajili ya kutafuta fedha za kuweza kutimiza bajeti zao za starehe. Sisi tunapaswa kuwa waangalifu katika kipindi hiki cha mapumziko cha Krismasi.

Ninatumaini kuwa utaendelea kuomba moja kwa moja kwa ajili ya ulinzi wa Mungu, kwa ajili ya kuieneza injili, kwa ajili ya Ufalme wa Mungu, kwa ajili ya usalama wako, kwa usalam wa Kanisa la Mungu, na kwa ajili ya usalama wa watumishi wa Mungu na Wakristo wapendwa, na pia kwa ajili ya wokovu kwa nafsi nyingi. ☒

SURA YA

2



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Ni Wapi Tunapoweza Kukutana na Bwana Kwa Usahihi?

< Mathayo 2:1-12 >

“Yesu alipozaliwa katika Bethlehemu ya Uyahudi zamani za mfalme Herode, tazama mamajusi wa mashariki walifika Yerusalemu, wakisema, Yuko wapi yeye aliyezaliwa mfalme wa Wayahudi? Kwa maana tuliiona nyota yake mashariki, nasi tumekuja kumsujudia. Basi mfalme Herode aliposikia hayo, alifadhaika, na Yerusalemu pia pamoja naye. Akakusanya wakuu wa makuhani wote na waandishi wa watu, akatafuta habari kwao, Kristo azaliwa wapi? Nao wakamwambia, Katika Bethlehemu ya Uyahudi; kwa maana ndivyo ilivyoandikwa na nabii:

**‘Nawe Bethlehemu, katika nchi ya Yuda,
Hu mdogo kamwe katika majumbe wa Yuda;
Kwa maana kwako atatoka mtawala
Atakayewachunga watu wangu Israeli’**

Kisha Herode akawaita wale mamajusi faraghani, akapata kwao hakika ya muda tangu ilipoonekana ile nyota. Akawapeleka Bethlehemu, akasema, Shikeni njia, mkaulize sana mambo ya mtoto; na mkiisha kumwaona, nileteeni habari, ili mimi nami niende nimsujudie. Nao waliposikia maneno ya mfalme, walishika njia; na tazama, ile nyota waliyoiona mashariki ikawatangulia hata ikaenda ikasimama juu ya mahali alipokuwapo mtoto. Nao

walipoiona ile nyota, walifurahi furaha kubwa mno. Wakaingia nyumbani, wakamwona mtoto pamoja na Mariamu mamaye, wakaanguka wakamsujudia; nao walipokwisha kufungua hazina zao, wakamtolea tunu; dhahabu na uvumba na manemane. Nao wakisha kuonywa na Mungu katika ndoto wasimrudie Herode, wakaenda zao kwa njia nyingine.”

Kuna watu wengi wanaoishi katika ulimwengu huu. Kati ya watu hawa wapo wale wanaofikiria kuwa Yesu ni Bwana wao kwa maneno nadharia tu. Huko Marekani, Asia, na Ulaya, na katika sehemu nyingine za dunia watu wengi wanapenda kupokea wokovu toka katika dhambi zao kwa kumwamini Yesu Kristo. Kama ilivyo katika Mathayo sura ya 2, hatupaswi kuchanganyikiwa kama wale mamajusi waliokuwa wakienda kumwona mtoto Yesu huku wakiongozwa na nyota, lakini walichanganyikiwa wakati waliposimama pale Yerusalemu. Hata sasa, kuna watu ambao wanajaribu kwa nguvu zao zote kukutana na Yesu ili waweze kupokea wokovu, lakini wanashindwa kukutana na Mwokozi. Sababu inayowafanya washindwe ni kwa sababu wanataka kuonana na Yesu kwa mujibu wa mawazo yao binafsi.

Wakristo ulimwenguni kote wanapaswa kukutana na Yesu kwa hakika, Yeye aliyekuja kwa maji na kwa Roho na kisha waokolewe toka katika dhambi zao ili waweze kufanyika watu wa Mungu. Hata hivyo, ni wazi kuwa hali haiko hivi. Sababu inayofanya hali isiwe hivyo ni kwa sababu watu hawa hawalifuati Neno la Mungu, bali wanayafuata mawazo yao binafsi. Imani za watu wengi katika ulimwengu wa sasa zipo katika hali ya mkanganyiko. Watu wengi katika ulimwengu huu hawakutani na Mfalme wa wafalme kwa sababu wana

mawazo kuwa “Mfalme atazaliwa Yerusalemu.”

Hata hivyo, ilimpasa Yesu kuja hapa ulimwenguni kama mtu wa hali ya chini ili kuwaokoa wenye dhambi. Hivyo, ni kawaida kuwa watu hawapokei wokovu wanapojaribu kukutana na Yesu na kuokolewa toka katika dhambi zao kwa kutegemea mawazo yao binafsi. Hata sasa, kuna watu wengi wanaoangukia katika kutokuelewa kwa kudhani kuwa ‘itakuwa ni rahisi kukutana na Yesu Kristo ikiwa nitakwenda katika kanisa lile kubwa, na kwa hiyo kama nitakwenda katika lile kanisa kubwa, basi nitalisikia Neno la Mungu lililo sahihi’. Lakini Ukweli wa Neno la Mungu haujalishi kuwa unausikia katika kanisa kubwa au kanisa dogo. Wakati watu wanapohubiri kwa mujibu wa mawazo yao binafsi, basi mahubiri hayo yanawazuia wenye dhambi toka katika kuisikia injili ya kweli na kisha kuokolewa toka katika dhambi zao na kupokea Roho Mtakatifu.

Jana ilikuwa ni Mkesha wa Krismasi, na leo hii ni Krismasi. Tunapoyafikiria mahubiri ya Krismasi katika siku hizi mbili zilizopita, basi mahubiri hayo yananifanya nivunjike moyo kwamba hata sasa kuna watu wengi hawajakutana na Yesu Kristo pamoja na kuwa wanamwamini yeye. Pia hali hii inatukumbusha sisi tena kuwa hakuna anayeweza kukutana na Bwana kwa mujibu wa mawazo yake binafsi.

Wakati wa Krismasi, baadhi ya makanisa huwa wanatengeneza mfano wa umbile la mtoto Yesu akiwa amefunikwa mavazi na akiwa amelazwa katika hori la kulishia ng’ombe. Pia kuna baadhi ya makanisa ambayo huwa yanapendelea kutoa zaka maalum katika ile siku ambayo Yesu alizaliwa. Baadhi ya makanisa hufanya mambo mema wakiwa na nia ya kuwasaidia maskini. Hata hivyo, lakini sababu iliyomfanya mtoto Yesu akazaliwa ilikuwa ni kwa ajili ya kuwaokoa wanadamu wote toka katika dhambi za mioyo yao

na kisha kuwafanya watu wa Mungu.

Biblia inatueleza kuwa wale mamajusi walikutana na magumu mengi kwa sababu waliyafuata mawazo yao binafsi. Na jambo hili lilisababisha watoto wengi wadogo kuuawa. Ingawa mahali ambapo Yesu angelizaliwa palikuwa ni Bethlehemu kama nabii alivyotabiri, basi kutokana na mawazo yao binafsi walidhani kuwa atazaliwa Yerusalemu, na matokeo yake yalikuwa ni vurugu na vifo vya watoto wengi. Hata sasa, kwa kuna watu wengi ambao wanamwamini Yesu kuwa ni Mwokozi wao kwa mujibu wa mawazo yao binafsi, basi watu hao hawawezi kukutana na Yesu Kristo aliyekuja kwa injili ya maji na Roho. Watu wanahitaji kufahamu kuwa hawawezi kuonana kikamilifu na Yesu Kristo, ambaye ni Mfalme wa wafalme kwa sababu ya mawazo yao binafsi.

Wakristo wengi siku hizi wanafikiri kuwa wanaweza kuponywa toka katika magonjwa yao au kuwa matajiri wakati wanapomwamini Yesu. Lakini haya ni mawazo yao binafsi tu. Wakati mtu anapomwamini Yesu huku akiwa na mitazamo yake ya kimwili, basi mtu huyo hawezi kupokea wokovu au kumpokea Roho Mtakatifu. Watu hawapokei Roho Mtakatifu kwa sababu wanamwamini Yesu kuwa ni Mwokozi kwa mujibu wa mawazo yao binafsi.

Watu wengi wanajisikia kuridhika wanapoamini katika kanisa kubwa, huku wakisikiliza kinanda cha ogani na kwaya kubwa. Hata hivyo, ni lazima tukubali kuwa imani kuwa tunaweza kukutana na Mungu ikiwa tutaamini katika kanisa kubwa ni imani potofu itokayo katika mawazo yetu ya kidunia yasiyo na maana. Hivyo, ni lazima tukubali kuwa hatuwezi kukutana na Yesu Kristo, ambaye alileta injili ya maji na Roho kwa mujibu kwa mawazo ya kibinadamu. Ni jambo la kuombolezea kuona kuwa katika ulimwengu mzima kuna watu wengi wanaofurahia kuzaliwa kwa Yesu Kristo kwa starehe za

kidunia pasipo kuifahamu injili ya maji na Roho.

Tunapotembelea vitivo vya chuo fulani, mara nyingi tunawaona wanafunzi vijana wakiwa wanaimba na kumwabudu Mungu kwa magitaa. Kwa kweli lile tukio la kumwabudu Mungu ni zuri. Hata hivyo, kadri unavyozidi kusikiliza nyimba zao za sifa, basi ndivyo unavyoweza kuihisi ile kiu iliyomo katika nafsi zao. Unaweza kuhisi kuwa nafsi zao zina kiu sana kwa sababu pamoja na kuwa wanamsifu Mungu kwa midomo yao, ukweli unabaki kuwa hawajaweza kukutana na Mungu wa ukweli halisi. Hata hivyo, nia yao ya kutaka kuonana na Bwana pasipo injili ya maji na Roho si chochote kile bali ni nia tupu. Ingawa wanasema kuwa wanamwamini Mungu, wao wanamtafuta Mungu kama wenye dhambi kwa kuwa hawajaipata injili ya maji na Roho. Hii ina maanisha kuwa wenye dhambi ambao hawajazaliwa tena upya leo hii katika makanisa ya Kikristo wanaimba nyimbo zilizojaa kiu ya kukutana na Mungu.

Hata hivyo, watu wanaoamini katika injili ya maji na Roho wanaabudu hali ibada zao zikiwa zimejaa shukrani kwa kuwa wamekutana na Bwana ambaye amezitoweshea mbali dhambi zao na kuwaokoa. Wenye haki wanatoa ibada ya shukrani kwa wokovu walioupokea toka kwa Mungu. Lakini wenye dhambi hawezi kufanya ibada ya shukrani kwa kuwa wanajaribu kumwabudu Mungu pasipo kuwa na ufahamu wa injili ya maji na Roho. Wenye dhambi hawawezi kukutana na Mwokozi Yesu Kristo kwa sababu wanajaribu kukutana naye pasipo kuwa na injili ya maji na Roho.

Tunapoziangalia hali za sasa za makanisa ya Kikristo, hatuwezi kufanya lolote zaidi ya kukubaliana na maelezo ya ulimwengu kuwa siku hizi makanisa ya Kikristo yanaendeshwa kama makampuni mengine ya kidunia. Hii ina maanisha kuwa makanisa hayafanyi kazi yao ya msingi. Siku hizi, lengo la

makanisa ya Kikristo ni kupanga bajeti kwa kipindi cha fedha cha mwaka mzima kwa kupitia zaka za Krismasi na zaka za shukrani.

Ni lazima tuisitize juu ya kuieneza injili ya maji na Roho kwa kuwa kanisa la Mungu lina jukumu la kutoa uzima wa kweli kwa ulimwengu. Lakini, kusema kweli, makanisa mengi yamesemwa na watu wengi kwa kuwa lengo lao ni kufuata tamaa za kidunia. Pia wanaziua nafsi ambazo hazikupaswa kuuawa na injili za uongo (Ezekieli 13:19). Hata hivyo, tatizo ni kwamba viongozi wa makanisa ya Kikristo hawaelewi kiwango cha tatizo la ufisadi wa kiroho katika makanisa yao.

Ndugu zangu Wakristo, ni kitu gani kilitokea wakati wale mamajusi walipoacha kuifuata nyota na kisha wakayafuata mawazo yao binafsi? Kulitokea mkanganyiko mkubwa. Wale mamajusi walishindwa kukutana na Yesu kwa mara ya kwanza katika safari yao kwa sababu waliyafuta mawazo yao binafsi, lakini mwishowe waliyageuza mawazo yao na kumtafuta Yesu kwa kuzingatia Neno la Mungu na hatimaye waliweza kukutana na Yesu Mwokozi kwa usahihi.

Katika Biblia, mamajusi waliweza kukutana na Yesu kwa usahihi kwa sababu waliwauliza waandishi na makuhani, na kisha wakafuata unabii ulioandikwa katika Biblia na kisha wakaenda Bethlehemu. Sababu iliyowafanya mamajusi wawezi kukutana na Yesu ni kwa sababu waliyafuata maneno ya Mungu yaliyoandikwa katika Biblia. Hii ni sawa na kukutana na Mwokozi kiroho kwa kuifahamu injili ya maji na Roho na kisha kuamini. Kama wangeudharau unabii wa Mungu ulioandikwa, basi wale mamajusi wasingeweza kukutana na Yesu hata kama wangejaribu kiasi gani. Sisi sote tunaweza kusamehewa dhambi zetu zote na kisha kumtolea Yesu imani ya kweli pale tu tutakapoyashikilia maneno ya Mungu ambayo yameandikwa na kisha kuamini katika injili ya maji na Roho.

Wale mamajusi waliweza kuitoa imani yao kwa mtoto Yesu kwa zawadi tatu.

Tunapaswa kufahamu kuwa mtu yeyote ambaye amezaliwa tena upya ana lile Neno la imani linaloamini katika injili ya maji na Roho toka kwa Mungu. Sisi sote ni lazima tutambue kuwa tunaweza kukutana na Yesu kwa usahihi na ukamilifu pale tunapoipokea injili ya Mungu ya maji na Roho katika mioyo yetu. Sisi sote tumefanyika kuwa makuhani wa kweli katika katika roho, ambao tunaweza kumpokea Yesu katika mioyo yetu na kisha kumwomba Mwokozi kwa imani inayoliamini Neno la Mungu lililoandikwa. Sisi tuliweza kukutana na Yesu, tuliweza kumwabudu, na kisha kupokea mwongozo wake kwa kupitia injili ya milele ya maji na Roho. Lile tukio la mamajusi la kuweza kukutana na Yesu linatufundisha kuwa iliwezekana kwa sababu ya imani ilioliyamini Neno la unabii lililoandikwa.

Kile kilichoandikwa katika Mathayo 2:6 ni utimilifu wa unabii ulioandikwa katika Agano la Kale katika kitabu cha Mika 5:2: *“Bali wewe, Bethlehemu Efrata, Uliye mdogo kuwa miongoni mwa elfu za Yuda; Kutoka kwako wewe atanitokea mmoja atakayekuwa mtawala katika Israeli; Ambaye matokeo yake yamekuwa tangu zamani za kale, tangu milele.”* Kwa kupitia nabii Mika Mungu alikuwa ameahidi kuwa Yesu Kristo, ambaye ni Mfalme wa wafalme atazaliwa Bethlehemu.

Bethlehemu maana yake ni ‘nyumba ya mkate,’ na ulikuwa ni mji mdogo sana katika Israeli. Mjii huu ulikuwa ndio mji wa Daudi. Kama Mungu alivyomwahidi Yuda, ambaye alikuwa ni miongoni mwa watoto kumi na mbili wa Yakobo katika kitabu cha Mwanzo kuwa “kiti cha ufalme kitaendelezwa katika nyumba yako ewe Yuda”, na jambo hilo lilitokea kama Mungu alivyotabiri. Hivyo, kwa kufuata ule unabii ambao Mungu aliuotoa kwa Yuda, Bwana wetu

alizaliwa katika mji wa Bethlehemu. Bwana wetu alizaliwa hasa katika ulimwengu huu katika mwili wa mwanadamu kama Mfalme wa wafalme. Basi, Bwana wetu alizaliwa katika mji wa Bethlehemu kama Mungu alivyoahidi na kutabiri kwa kupitia manabii na kama ilivyoandikwa katika maandiko.

Bwana wetu anatuonyesha sisi jinsi anavyofanya kazi kwa kupitia Neno lake lililoandikwa. Bwana wetu anazungumza nasi kwa Kweli, na kisha anayatimiza maneno yake kama alivyoosema. Hivyo, wakati tunapoamini na kumfuata Mungu, basi ni muhimu sana kuyakana mawazo yetu binafsi. Kwa kuwa inawezekana kabisa kufikiria mabaya kwa mawazo yetu binafsi kadri tunapomfuata Bwana, basi tunapaswa kila wakati kuyakana mawazo yetu binafsi na kisha tuendeleo kumfuata Mungu kwa imani inayoamini katika Neno la Mungu lililoandikwa.

Wale mamajusi, hali wakiongozwa na nyota tena hatimaye waliweza kufika Bethlehemu na kukutana na mtoto Yesu. Ikiwa tunataka kila mtu katika ulimwengu huu akutane na Yesu, basi tunapaswa kulieneza Neno la Mungu lililoandikwa. Tunaweza kukutana na Yesu pale tu tunapoliamini na kulifuata Neno la Mungu lililoandikwa. Kwa kweli haiwezekani kumfahamu na kukutana na Yesu kama Mwokozi kwa kutegemea mawazo yetu binafsi badala ya Neno la Mungu lililoandikwa.

Tunapoamini na kulifuata Neno la Mungu lililoandikwa, basi tunafikia hatu ya kumfahamu kuwa Yesu alizaliwa kwa ajili yetu, alibatizwa na Yohana Mbatizaji ili kuzichukua dhambi zote za wanadamu, akazibeba dhambi zote za ulimwengu katika mwili wake, akamwaga damu yake na kufa Msalabani, kisha akafufuka na kuutimiza wokovu kwa ajili yetu wakati ule alipofufuka. Hii ndiyo njia pekee inayoweza kutufanya tukutane na Yesu, Mfalme wa wafalme. Hii ndiyo sababu

tunapaswa kumwamini Yesu kwa kupitia Neno la Mungu lililoandikwa na kwa kupitia injili ya maji na Roho ili tuweze kukutana na Mwokozi Yesu. Ni lazima tukumbuke kuwa hatuwezi kukutana na Yesu Mwokozi bila kupitia Neno la Mungu lililoandikwa.

Zawadi zote tatu, dhahabu, uvumba, na manemane zilikuwa na thamani. Manemane ina maanisha Neno la Mungu lisilobadilika, kama tusipokuwa na Neno la Mungu, ambalo ni Kweli, basi hatuwezi kumwamini Yesu na kuipokea injili ya maji na Roho. Ikiwa mamajusi wangelitoa zawadi mbili tu yaani dhahabu na uvumba, basi wangukuwa si kitu na wangukuwa ni kama watu wa kidini. Imani ya jinsi hiyo ingelikuwa ni imani potofu inayotoka katika mawazo ya kibinadamu, na isingekuwa imani sahihi mbele za macho ya Mungu. Ni lazima tukumbuke kuwa sisi sote tunapaswa kutoa zawadi tatu kwa Bwana. Ikiwa tunataka kukutana na Yesu, basi ni lazima kwanza tuipokee injili ya maji na Roho, tupokee ondoleo la dhambi, na kisha tumfuate yeye kwa imani.

Wakati mamajusi walipomkuta Yesu kule Bethlehemu baada ya kuwa wamelifuata Neno lililoandikwa, walimkuta akiwa amelazwa katika hori la kulishia ng'ombe. Hapo ndipo walipoweza kuinama na kusujudia mbele za mtoto Yesu, wakatoa zawadi zao, na kisha wakazikiri imani zao. Kama Petro alivyokiri, *“Wewe ni Kristo, Mwana wa Mungu aliye hai”*, wale mamajusi wangelikuwa kukiri namna hiyo. Ikiwa wale mamajusi wasingelilitegemea Neno lililoandikwa, kisha wakaenda katika viunga vya Yerusalemu huku wakimtafuta Yesu, basi kwa hakika wasingeliweza kukutana na Bwana. Hata hivyo, walipokwenda mahali ambapo palikuwa pameandikwa, hapo ndipo walipomkuta mtoto Yesu amelazwa pale. Vivyo hivyo, katika siku hizi, kila mtu anayetaka kuzaliwa tena upya anapaswa kulifuata Neno la Mungu

lililoandikwa na kisha azaliwe tena upya kwa kuamini katika injili ya maji na Roho.

Bila kujalisha wewe ni nani, mtu yeyote anahitaji kuliadini Neno la Mungu lililoandikwa kama lilivyo ndipo aweza kumwona mtoto Yesu. Na ni lazima tuachane na imani inayoamini katika mawazo yetu binafsi, bali tunapaswa kumrudia Mwokozi kwa kumwamini Yesu ambaye ametuokoa toka katika dhambi zetu zote kwa kupitia Neno lililoandikwa na injili ya maji na Roho. Wakristo ulimwenguni wanapaswa kuifahamu injili hii maji na Roho na kisha wamrudie Mungu. Hivi ndivyo tunavyoweza kukutana na Yesu Mwokozi. Hivyo ndivyo tunavyoweza kuzaliwa tena upya, kupokea wokovu na kufanyika watu wa Mungu. Ni lazima tulirudie Neno na kukutana na Bwana. Hiyo ndiyo njia pekee ya kutoa imani yetu sahihi kwa Mungu na kisha kukubaliwa.

Watu wote ulimwenguni ambao bado hawajakutana na Yesu Kristo ni lazima wamrudie Mungu kwa kuamini katika injili ya maji na Roho. Ni lazima tulirudie Neno la Mungu na kukutana na Yesu Kristo katika Kweli. Tunapoliamini na kulifuata Neno la Mungu kama lilivyo, basi tunafanyika kuwa waamini wenye imani sahihi. Kusema kweli, watu wote ulimwenguni wanapaswa kuirudia injili ya maji na Roho. Badala ya kuitafuta ile imani inayoitwa othodoksi au makanisa makubwa, basi sisi tunapaswa kuipokea injili ya maji na Roho kwa kupitia Neno la Mungu lililoandikwa.

Pamoja na kuwa ulimwengu mzima unafahamu kuwa Yesu alikuja, bado kuna watu wengi ambao hawajakutana na Yesu Kristo kuwa ni Mwokozi wao. Watu hawa bado wanamtafuta Bwana katika maeneo ya kidunia. Hata hivyo, wanapaswa kwenda Bethlehemu. Watakapokwenda katika mji mdogo wa Bethlehemu, basi pale ndio watakapomwona Yesu. Hawezi kumwona Yesu mahali pengine popote. Mtoto Yesu


hayupo katika majumba ya kifalme. Ndugu zangu Wakristo, je mnaelewa? Mtoto Yesu haishi kamwe na Mfalme Herode. Tunapaswa kwenda Bethlehemu ili kuweza kuonana na Yesu. Hii ina maanisha kuwa ili kuweza kuoanan na Yesu, basi tunapaswa kuingia katika nyumba ya mkate, kwa maneno mengine, ni katika kanisa ambako Neno la Mungu linakaa. Ni lazima twende katika kanisa la Mungu ili kuupata mkate, chakula, maji, na watumishi wa Mungu. Hivyo, Bethlehemu ya leo ni kanisa la waliozaliwa tena upya.

Wanadamu wote wanaweza kuokolewa kwa hakika toka katika dhambi zao zote kwa imani yao katika wokovu wa Mungu toka katika Ukweli wa injili ya maji na Roho. Hata hivyo, kuna watu wengi ambao wanatangatanga katika mkanganyiko hali wakijaribu kukutana na Yesu kwa kupitia mawazo yao binafsi kama mamajusi walivyofanya. Baadhi ya watu wanamtafuta Yesu kwa miaka 50 na bado kuna wengine wanamtafuta Yesu hata baada ya miaka 70.

Tuna ule wajibu wa kuwavuta wale wote ambao bado hawajakutana na mtoto Yesu, Mwokozi na kisha kuwapatia injili ya maji na Roho ili kwamba na wao waweze kukutana na Mwokozi Yesu. Ni lazima tuyafungue macho yetu ya imani sana ili kwamba tuone kwa upana zaidi. Sisi ni makuhani ambao tunapaswa kuieneza injili ya maji na Roho kwa kila mtu katika sehemu zote ulimwenguni. ☒

SURA YA

3



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Ieneza Injili ya Kweli Na Matendo ya Haki ya Yesu

< Mathayo 3:1-17 >

“Siku zile aliondokea Yohana Mbatizaji akihubiri katika nyika ya Uyahudi, na kusema, Tubuni; kwa maana ufalme wa mbinguni umekaribia. Kwa sababu huyo ndiye aliyenenwa na nabii Isaya akisema:

‘Sauti ya mtu aliaye nyikani,
‘Itengenezeni njia ya Bwana;
Yanyoosheni mapito yake.’”

Naye Yohana mwenyewe alikuwa na vazi lake la singa za ngamia, na mshipi wa ngozi kiunoni mwake; na chakula chake kilikuwa nzige na asali ya mwitu. Ndipo walipomwendea Yerusalemu, na Uyahudi wote, na nchi zote za kandokando ya Yordani; naye akawabatiza katika mto wa Yordani huku wakiziungama dhambi zao. Hata alipoona wengi miongoni mwa Mafarisayo na Masadukayo wakiujia ubatizo wake, aliwaambia, Enyi wazao wa nyoka, ni nani aliyewaonya ninyi kuikimbia hasira itakayokuja? Basi zaeni matunda yapasayo toba; wala msiwaze mioyoni mwenu kwamba, Tunaye baba, ndiye Ibrahimu; kwa maana nawaambia ya kwamba Mungu aweza katika mawe haya kumwinulia Ibrahimu watoto. Na shoka limekwisha kuwekwa penye mashina ya miti; basi kila mti usiozaa matunda mazuri hukatwa na kutupwa motoni. Kweli mimi nawabatiza kwa maji kwa ajili ya toba; bali yeye ajaye nyuma yangu ana nguvu kuliko mimi, wala sistahili hata kuvichukua viatu vyake; yeye atawabatiza kwa Roho

Mtakatifu na kwa moto. Ambaye pepeto lake li mkononi mwake, naye atausafisha sana uwanda wake; na kukusanya ngano yake ghalani, bali makapi atayateketeza kwa moto usiozimika. Wakati huo Yesu akaja kutoka Galilaya mpaka Yordani kwa Yohana ili abatizwe. Lakini Yohana alitaka kumzuia, akisema, Mimi nahitaji kubatizwa na wewe, nawe waja kwangu? Yesu akajibu akamwambia, Kubali hivi sasa; kwa kuwa ndivyo itupasavyo kuitimiza haki yote. Basi akamkubali. Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwona Roho wa Mungu akishuka kama hua, akija juu yake; na tazama, sauti kutoka mbinguni ikisema, Huyu ni Mwanangu, mpendwa wangu, ninayependezwa naye.”

Katika Biblia, bila shaka Yohana Mbatizaji alikuwa ni mtu wa muhimu sana. Yohana Mbatizaji aliwatangazia toba watu wa Israeli. Ni lazima tuikumbuke kiusahihi kazi ya Yesu na Yohana Mbatizaji. Yesu aliyekuja katika ulimwengu huu aliwaokoa wanadamu hali akiheshimu mapenzi ya Mungu pamoja na Yohana Mbatizaji. Yohana Mbatizaji na Yesu walikuja hapa ulimwenguni na wakayatimiza matendo ya haki.

Yohana Mbatizaji aliwahimiza watu wa Israeli kumrudia Mungu. Katika Mathayo 3:7 tunaweza kuona kuwa Yohana Mbatizaji aliwakemea kwa ujasiri Mafarisayo na Masadukayo alipowaona wakija kwake alipokuwa akibatiza kwa kusema: *“Enyi wazao wa nyoka, ni nani aliyewaonya ninyi kuikimbia hasira itakayokuja?”*. Kama nabii, huyu Yohana Mbatizaji aliwakemea watu wa Israeli kwa ukali akisema: *“Tubuni enyi wazao wa nyoka!”* Yohana Mbatizaji alikuwa ni nabii aliyeyafanya matendo ya haki mbele za macho ya Mungu na alikuwa ni nabii wa mwisho katika kipindi cha Agano la Kale.

Baadhi ya watu wanashangaa ni jinsi gani Yohana Mbatizaji akiwa nabii wa Mungu aliweza kutamka maneno ya kutisha kama “Wazao wa nyoka.” Hata hivyo, Biblia inatueleza kuwa hilo lilikuwa ni tendo la haki mbele za Mungu. Manabii wote wanapaswa kuwa ni watu wanaoweza kuyatangaza matendo ya haki ya Mungu. Na pale alitokea mtu mwingine aliyatimiza matendo ya haki pamoja na Yohana Mbatizaji. Na mtu huyo alikuwa ni Yesu.

Katika Biblia Masadukayo ni wanasiasa. Wao ni wanasiasa wa ulimwengu. Wanaweka mkazo zaidi katika siasa ya ulimwengu huu kuliko kumtegemea Mungu. Hata hivyo, Mafarisayo walikuwa ni viongozi wa dini wahafidhina. Kwa wakati huo huo walidai kuwa walikuwa wakiliamini Neno la Mungu kama lilivyokuwa, lakini walimkana Yesu.

Mungu alikatishwa sana tamaa alipowaona watu hawa. Je mbele ya macho ya Mungu watu hawa ni waovu au la? Ukweli ni kuwa Mafarisayo na Masadukayo ni watu waovu mbele ya macho ya Mungu.

Mafarisayo hawakumwamini Yesu kuwa ni Masihi. Na hii ndiyo sababu kwamba ilikuwa sahihi kwa Yohana Mbatizaji kuwaita wazao wa nyoka. Yohana Mbatizaji hakuwa na maelewano na viongozi wa kidini wa wakati huo. Wala hakuweka maelewano na Mafarisayo na Masadukayo, bali alijaribu kuwageuza kwa kuwakemea kama wazao wa nyoka. Yohana Mbatizaji aliwafundisha watu ambao walikuwa wakirudi kwa Mungu kuwa kutubu hakukuwa ni jambo linalojitosheleza sana bali walihitaji kuwa na matunda ya toba yao, na kwamba walipaswa kugeuka toka katika maovu. Kwa mfano, walipaswa kurudi na kwenda kulipa fedha zote ambazo walizipata kwa kuwanyonya wengine. Kisha ndipo warudi kwake kwa ubatizo na kisha kumrudia.

Tunapoyasikiliza madai yake, tunaweza kuona pasipo

shaka kuwa alikuwa ni mtumishi aliyekuwa ametumwa na Mungu. Kipindi kile ambacho Yohana Mbatizaji alionekana kilikuwa ni kipindi ambacho Yesu Kristo alikuwa ameanza huduma yake ya wazi. Matangazo na mahubiri ya Yohana Mbatizaji yalikuwa na lengo la kuisaidia kazi ya Yesu. Katika kipindi kile kulikuwa hakuna mtumishi wa Mungu kwa takribani miaka 400 wa kuwasaidia watu wa Israeli. Hivyo kuonekana kwa Yohana Mbatizaji kulikuwa ni fursa kwa watu wa Israeli kuyasikia mapenzi ya Mungu na sauti ya Mungu.

Yohana Mbatizaji alipaza sauti akisema: “Enyi wazao wa nyoka, tubuni na kumrudia Mungu. Geukeni toka katika kuamini sanamu. Mnapaswa kuachana na miungu migeni na kumrudia Mungu ili kuiepuka hukumu.” Kwa kweli ilikuwa ni baraka kuu kwa watu wa Israeli kumpata Mtumishi wa Mungu ambaye aliwakemea na kuwashauri kwa jinsi hiyo. Taifa zima la Israeli lilitikisika kwa sauti ya Yohana Mbatizaji. Ukatokea muujiza ambapo Makuhani wakuu, Masadukayo, na Mafarisayo kumjia Yohana Mbatizaji wakitubu na kumrudia Mungu.

Yohana Mbatizaji anashuhudia juu ya uwezo wa Yesu Kristo, “*Kweli mimi nawabatiza kwa maji kwa ajili ya toba; bali yeye ajaye nyuma yangu ana nguvu kuliko mimi, wala sistahili hata kuvichukua viatu vyake; yeye atawabatiza kwa Roho Mtakatifu na kwa moto. Ambaye pepeto lake li mkononi mwake, naye atausafisha sana uwanda wake; na kukusanya ngano yake ghalani, bali makapi atayateketeza kwa moto usiozimika.*” (Mathayo 3:11-12). Yohana anashuhudia kuwa yeye anafanya kazi ya kuwageuza watu kwa Mungu kwa kuwakemea, lakini yeye ajaye nyuma yake atawabatiza kwa Roho Mtakatifu na moto.

Yohana Mbatizaji alisema kuwa watu ambao walizaliwa upya kwa kumwamini Yesu watakusanywa kama ngano huko

Mbinguni na wale ambao hawajazaliwa tena upya watatenganishwa kwa ungo kama vile makapi na kisha watachomwa kwa moto usiozimika.

Ni lazima tufahamu kuwa Yohana Mbatizaji alitoa wito wa toba kwa Mungu, na kwamba Yesu Kristo alipokuja hapa ulimwenguni aliupokea ubatizo toka kwa Yohana Mbatizaji. Kwa mujibu wa injili ya Luka, Yesu alibatizwa akiwa na umri wa miaka thelathini (Luka 3:23). Ni kwa nini Yesu alitaka kubatizwa akiwa na umri wa miaka thelathini? Sababu iliyomfanya abatizwe akiwa na umri wa miaka ‘thelathini’ ni kwa sababu ni wakati ambapo mtu aliweza kuyachukua majukumu yake kama Kuhani Mkuu. Katika Agano la Kale Mungu alisema kuwa wana wa Makuhani wakuu watakuwa na uwezo wa kuyachukua majukumu ya ukuhani mkuu watakapofikia umri wa miaka 30 (Hesabu 4:35). Vivyo hivyo, Yesu alibatizwa na Yohana Mbatizaji alipofikia umri wa miaka 30.

Sababu iliyomfanya Yesu kuupokea ubatizo toka kwa Yohana Mbatizaji ilikuwa ni kuitimiza haki yote ya Mungu. Yesu alibatizwa na Yohana Mbatizaji ili kuzichukua katika mwili wake dhambi za kila mtu katika ulimwengu.

Hata hivyo, watu wanachanganyikiwa na hawafahamu kuwa ni kwa nini Yesu alibatizwa na Yohana Mbatizaji. Ubatizo wa Yesu toka kwa Yohana Mbatizaji ni siri iliyofunuliwa katika Biblia. Watu wengi hawaifahamu siri ya ubatizo na wanaelewa vibaya juu ya ubatizo wa Yesu. Wengi wanafikiri kuwa ubatizo wa Yesu ulikuwa na lengo la kutoa mfano na kuonyesha unyenyekevu.

Ni lazima tufahamu kuwa Yesu alikuja hapa ulimwenguni na alibatizwa ili kumwokoza kila mtu katika ulimwengu huu toka katika dhambi zake. Yesu angaliweza kulitimiza tendo la haki la kuzichukua dhambi za ulimwengu huu kwa kubatizwa na Yohana Mbatizaji wakati alipokuja katika ulimwengu huu.

Tendo hilo la haki ni kuwa Yesu alizichukua dhambi zote za ulimwengu mara moja na kwa wote kwa kubatizwa na Yohana Mbatizaji. Ubatizo wa Yesu ulikuwa na lengo la kuitimiza haki yote ya Mungu na ulikuwa ni mapenzi ya Mungu ambayo yalimpendeza Mungu. Bwana wetu alikuja hapa ulimwenguni ili kutuokoa toka katika dhambi zetu zote. Alibatizwa ili kuzibeba dhambi zako na zangu mara moja na kwa wote kwa ubatizo wake na kisha aliimwaga damu yake kwa ajili yetu. Bwana alizichukua dhambi zote za ulimwengu mara moja na kwa wote.

Katika Mathayo 3:15, "*haki yote*" ina maanisha ni Yesu kuzichukua dhambi zote za ulimwengu kwa kubatizwa na Yohana na kuimwaga damu yake Msalabani. Kwa wakati ule, Yesu alichukua dhambi zote za ulimwengu, yaani dhambi zetu zote. Hii ni bahati njema ilioje lakini tunashukuru kwa kiasi gani?

Wapendwa Wakristo, je, katika ulimwengu huu tunafanya dhambi au la? Ukweli ni kuwa tunafanya dhambi. Je, tunafanya dhambi chache hapa na pale? Au je tunafanya dhambi sana? Mnafanya dhambi nyingi sana katika ulimwengu huu, na dhambi zako zimejumuishwa katika dhambi zote za ulimwengu. Yesu alizichukua dhambi zote za ulimwengu mara moja na kwa wote kwa kubatizwa na Yohana Mbatizaji, na kisha akamwaga damu yake hadi kifo pale Msalabani mara moja na kwa wote na kwa hali hiyo alizisafishilia mbali dhambi na hukumu.

Ikiwa Yesu asingalizichukua dhambi zako na zangu zote mara moja na kwa wote ingeliwezekanaje kwa wewe na mimi kuwa miongoni mwao wasio na dhambi? Ukweli huu ni haki ambayo Bwana wetu aliitimiza kwa kubatizwa na kwa kuimwaga damu yake alipokuja hapa ulimwenguni. Yesu ni Mwokozi aliyekuja hapa ulimwenguni kama Mwana wa

Mungu na akazishughulikia dhambi za ulimwengu na hukumu ya dhambi kwa ajili yetu.

Tunachopaswa Kukumbuka

Tunapoipokea Krismasi mwaka huu ni lazima tukumbuke kuwa Yohana Mbatizaji na Yesu waliitimiza haki ya Mungu ambayo hakuna hata mmoja ambaye angeliweza kufanya hivyo. Tunapoipokea Krismasi tunapaswa kufikiri: ‘ninawezaje kujiunga katika kazi ya haki tunapoipokea Krismasi, yaani tunapomsherehekea Bwana wetu aliyeitimiza haki hiyo?’ kuliko kufikiri ‘ninawezaje kupata furaha? Ninawezaje kutengeneza kumbukumbu nzuri?’ Kwa hakika tunaweza kuikumbuka kazi ya Yohana Mbatizaji na Yesu. Sisi pia tunapaswa kuwa miongoni mwa wale wanaofikiria juu ya Yesu na Yohana Mbatizaji ambao wameitimiza haki yote katika Krismasi hii. Tunapaswa kuyatoa maisha yetu katika kuieneza haki hiyo ya Mungu. Baada ya kupokea ondoleo la dhambi kwa kuamini katika injili hii ya maji na Roho, basi tunapaswa kuendelea kuishi maisha ambayo yanaieneza injili hii.

Je, tutakuwa ni watu gani ikiwa hatutajitoa katika kuieneza huduma hii ya haki ambayo inaieneza injili ya maji na Roho? Tunawezaje kumtegemea Mungu kutupatia baraka zake ikiwa hatushiriki katika huduma hii ya haki? Kwa kuwa tunafahamu kuwa Yesu ametuokoa kwa kuzichukua dhambi zote za mwanadamu katika mwili basi tunapaswa kushiriki katika huduma hii ya haki. Je, si muhimu kuieneza injili hii ya maji na Roho ulimwenguni kote? Je, tunaweza kufanya matendo ya haki kwa mujibu wa mwili? Je, tunaweza kukwepa kufanya dhambi kwa kujaribu kutozifanya? Je, inawezekanaje kwa sisi ambao tuna mapungufu kuishi maisha ya haki baada

ya kupokea ondoleo la dhambi? Je, haiwezekani kumfanya Yesu kuichukua hukumu ya dhambi kwa ajili yetu kwa kuieneza injili hii ya maji na Roho ambayo imetuokoa toka katika dhambi za ulimwengu kwa kupitia Yesu ambaye alikuja hapa ulimwenguni, akazichukua dhambi zote kwenda Msalabani, akamwaga damu na kufa ili aweza kuichukua hukumu kwa ajili yetu? Je, ni kitu gani ambacho kinaweza kuwa ni kazi njema ambacho mimi na wewe tunakifanya katika ulimwengu huu? Je, Mungu anaweza kufurahishwa na tabia yetu njema na matendo mema yanayokumbukwa?

Kazi ya haki zaidi kwetu katika ulimwengu huu ni kuieneza injili ya maji na Roho. Jambo la haki ni kuitoa mioyo yetu yote na nguvu zetu katika kuieneza injili ya maji na Roho. Hata kama unahaiba ilioje, kwa kweli Mungu atafurahishwa zaidi pale tu utakapokuwa ukishiriki katika kazi ya kuieneza injili ya maji na Roho.

Wakati Yesu alipokuwa akibatizwa alisema: *“Kwa kuwa ndivyo itupasavyo kuitimiza haki yote. Basi akamkubali.”* (Mathayo 3:15), Je, maneno haya yana maanisha nini? Haya ni maneno ya ushuhuda ambayo yanatueleza kuwa Yesu alizichukua katika mwili wake dhambi zote za ulimwengu ambazo tumezifanya kwa ubatizo ambao aliupokea toka kwa Yohana Mbatizaji. Wakati Yesu alipobatizwa na Yohana Mbatizaji, dhambi zote za ulimwengu zilipitishwa kwa Yesu mara moja na kwa wote. Yesu alizipokea dhambi zote za ulimwengu ambazo ni dhambi zangu na zako kwa kupitia ubatizo wake mara moja na kwa wote. Hivyo ndivyo mwili wa Yesu ulivyoweza kuzichukua dhambi zote za ulimwengu, na hivi ndivyo ilivyowezekana kwake kukabiliana na hukumu kwa mikono yake na miguu kusulubiwa Msalabani. Hata hivyo, hii haimaanishi kuwa nafsi yake ilikuwa na dhambi. Ni lazima uupokee wokovu wako kwa kuamini kuwa Yesu alikuja hapa

ulimwengu na kuitimiza haki ya Mungu, na kwamba Yohana Mbatizaji alishiriki katika huduma hii kubwa kwa kuzipitisha dhambi kwa Yesu kwa kumwekea mikono yake.

Yohana Mbatizaji alifanya mambo mawili kama mtumishi wa Mungu ambaye ni mwakilishi mkuu miongoni mwa wale wote waliozaliwa na mwanamke.

Jambo la kwanza alilolifanya lilikuwa ni kueleza bayana maovu ya kila mtu. Yohana aliwapigia kelele watu akiwaonya wamgeukie Mungu huku akisema, “Kuitumikia miungu mingine zaidi ya Mungu ni dhambi.” Jambo la pili ni kuwa alimbatiza Yesu ili kuzipitisha dhambi za kila mtu katika ulimwengu huu juu ya Yesu. Hii ni haki ya Mungu ambayo ilikuwepo kwa ajili yako na mimi. Na hii ndiyo ile haki ambayo Bwana alikuja kuitimiza katika ulimwengu.

Yesu alikuja katika ulimwengu huu ili kuzipokea dhambi zako na zangu na kisha kuzichukua kwake. Na kisha aliupokea ubatizo ili kuzichukua dhambi za kila mtu katika ulimwengu huu, dhambi zako, dhambi za watoto wako, dhambi za wazazi wako, dhambi za wazazi wako waliokutangulia, dhambi za kila mtu aliyetokana na Adamu kadri ulimwengu huu uishivyo hadi siku ya mwisho ingawa hatujui ni lini utakuwa ndio mwisho wa ulimwengu kuwepo. Yesu aliupokea ubatizo ili kuzitoweshea mbali dhambi zetu na kisha kutusaifisha toka katika dhambi zetu.

Neno ‘kubatiza’ lina maanisha “kusafisha kwa kuzamisha au kuzamisha kidogo, kuosha, kusafisha kwa maji, tendo la mtu kujiosha au kuoga.” Hivyo, Yesu alibatizwa ili kuzichukua dhambi zote za ulimwengu. Yesu alizisafisha dhambi zetu kwa kuzipokea dhambi kwa kupitia Yohana Mbatizaji. Kama vile nguo zako zinavyosafishwa unapoziosha kwa maji, kama vile uchafu wako unavyosafishika unapooga kwa maji, basi vivyo hivyo Yesu aliziosha dhambi zetu kwa kuupokea ubatizo

ambao alizichukua dhambi zote za mioyo yetu kwa kupitia Yohana Mbatizaji.

Ndugu zangu Wakristo, je, unaamini katika injili ya maji na Roho? —Ndio.— Je, unaamini kuwa Yesu alikuja hapa ulimwenguni, alibatizwa na akafa Msalabani ili kuitimiza haki ya Mungu?

Tunapoipokea Krismasi ni lazima tumkumbuke Yesu Bwana wetu aliyeitimiza haki ya Mungu kwa ajili yetu. Imesemwa kuwa, *“Basi, mlapo au mnywapo, au mtendapo neno lolote, fanyeni yote kwa utukufu wa Mungu” (1 Wakorintho 10:31)*. Tunapoipokea Krismasi tunapaswa kutafakari juu ya yale yaliyo ya haki, jinsi tunavyoweza kuishi maisha ya haki na kisha kuamini kwa uthabiti. Wewe na mimi tunahitaji kuiweka imani yetu katika Yesu Kristo katika ulimwengu huu na kisha kumrudia Mungu siku moja. Tunapaswa kuishi maisha haya tuliyonayo kwa kuifanya kazi ya haki. Je, ni kazi ya aina gani ambayo tunahitaji kuifanya mbele za Mungu? Ni lazima tufikirie juu ya haki mara moja. Kabla hatujafikiria ikiwa tunapaswa kuishi kwa ajili ya haki ya Mungu au la tunapaswa kwanza kufikiri kuwa hiyo haki ya Mungu ni kitu gani?

Ninamshukuru Mungu sana ninapoipokea Krismasi hii. Na ninatamani ikiwa utafanya “jambo la haki.” Je, ni jambo lipi la haki unaloweza kulifanya mbele za Mungu? Je, tunaweza kulifanya jambo la haki kwa kufanya vema kwa kupitia miili yetu? Naomba usifikirie kamwe jambo hilo. Kujaribu kufanya mambo ya haki kwa mwili ni kama mnara uliojengwa juu ya mchanga ambao utavunjika mara moja. Hata kama ungelikuwa mwema maisha yako yote, ikiwa utafanya kosa moja tu basi yale mema yote ya kibinadamu yatakuwa yamefutika.

Haki ya kweli ni kuieneza kila siku injili ya maji na Roho ambayo kwa hiyo Mungu amezifutilia mbali dhambi zetu zote. Kushiriki katika kuieneza injili ni kushiriki katika kazi ya

Mungu. Wewe na mimi tunaishi kwa ajili ya dhumuni la kazi hii. Ikiwa unafanya kazi katika kampuni au ikiwa una biashara yako binafsi, basi ni haki kwako kujitoa wewe mwenyewe kwa ajili ya injili hii ya maji na Roho. Ikiwa huwezi kufanya hivyo wewe mwenyewe, basi ni haki kwa kupitia maombi na vitu vidogo unavyovitoa. Chochote utakachokifanya, iwe ni kula au kunywa, basi ufahamu kuwa kuishi kwa kuieneza injili hii ndiyo haki.

Wapendwa Wakristo, pamoja na kuwa hatukupita katika Biblia aya kwa aya, kimsingi ninyi ni wale ambao mmekwisha yasikia maneno haya. Ninaamini kuwa mnayaamini maneno haya kuwa ni Ukweli. Je, unaamini kuwa Yesu alikuja hapa ulimwenguni na akaitimiza haki yote? Je, unaamini kuwa Bwana ameitiza kazi kubwa kuliko zote ambayo inazifutulia mbali dhambi zote za kwako na zangu? —Ndio.—

Ni bahati njema kuwa Yesu alizichukua dhambi zote katika mwili wake, nasi tunashukuru kuwa Yesu aliitimiza ‘haki yote.’ Ingelikuwa ni jambo la maombolezo kiasi gani ikiwa angelizichukua dhambi za wengine kisha akaziacha dhambi za wengine? Hata hivyo, haijalishi ni dhambi kiasi gani ulitenda, Yesu amezichukua dhambi hizo zote. Uwe ni imani thabiti. Ninatumaini kuwa unampendeza Mungu kwa imani yako na kwamba unatenda matendo mema kwa imani yako. Ninaamini kuwa unaishi ka imani. Ninaamini unakwenda mbinguni kwa imani yako. Ninaamini kuwa wewe ni mtu usiye na dhambi kwa imani yako. Ninaamini kuwa wewe ni mtu unayempokea Roho Mtakatifu kwa kuamini katika injili ya kweli ya maji na Roho.

Kwa kweli ninamshukuru Mungu tena na tena kwa sababu ninaamini katika injili ya maji na Roho. Wapendwa Wakristo, je, unaamini katika injili ya maji na Roho? —Ndio.— Ninatumaini kuwa ninyi nyote ni wale ambao mnaamini kwa kweli katika injili ya kweli tunapoipokea Krismasi. Halleluya! ☐

Yesu Aliyekuja Ili Kuzitoweshea Mbali Dhambi Zako

< Mathayo 3:13-17 >

“Wakati huo Yesu akaja kutoka Galiliaya mpaka Yordani kwa Yohana ili abatizwe. Lakini Yohana alitaka kmzuia, akisema, Mimi nahitaji kubatizwa na wewe, nawe waja kwangu? Yesu akajibu akamwambia, Kubali hivi sasa; kwa kuwa ndivyo itupasavyo kuitimiza haki yote. Basi akamkubali. Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwona Roho wa Mungu akishuka kama hua, akija juu yake; na tazama, sauti kutoka mbinguni ikisema, Huyu ni Mwanangu, mpendwa wangu, ninayependezwa naye.”

Pamoja na kuwa kuna Wakristo wengi siku hizi wanaoda kuwa wanamwamini Yesu kuwa ni Mwokozi wao, ukweli ni kuwa kuna Wakristo wengi ambao hawafahamu kuwa Yesu ni Bwana ambye ametuokoa toka katika dhambi zetu zote kwa kupitia injili ya maji na Roho. Hivyo ni muhimu sana kuwathibitishia watu hao kwa uhakika kwa kupitia injili ya maji na Roho kwamba ni kweli kuwa Yesu ni Mwokozi. Kwa kuwa wote wanazaliwa kama wenye dhambi, basi ili watu hao waweze kuoshelewa mbali dhambi zao, basi watu wote wanapaswa kuamini katika injili ya maji na Roho. Kwa maneno mengine, ili waweze kuzaliwa tena upya, basi watu

hao wanapaswa kuamini katika injili ya maji na Roho, na ni pale tu watakapoamini hivyo ndipo wanapoweza kuonana na Bwana. Kupokea au kutopokea ondoleo la dhambi pamoja na kuzaliwa tena upya kunategemea ikiwa tunamwamini au hatumwamini Yesu kwa usahihi.

Jambo la muhimu sana kwetu sisi ili kuufikia ukweli wa ondoleo la dhambi ni kumfahamu na kumwamini Bwana ni nani na kukifahamu kile ambacho amekifanya. Wakati Yesu alipowauliza wanafunzi wake, *“Ninyi mwanisema mimi kuwa ni nani?”* Petro alijibu kwa kusema, *“Wewe ni Kristo, Mwana wa Mungu aliye hai.”* Kitendo cha Petro kuikiri imani hii ya kweli kulitokana na ukweli kuwa Mungu alikuwa amemfunulia Petro kuufikia ufahamu wa jinsi hiyo.

Sisi nasi tunapaswa kwa sasa kuufikia ufahamu sahihi wa injili ya maji na Roho, na kama vile Petro, tunapaswa kufanya ukiri wa kweli wa imani kwa Bwana wetu. Tunachopaswa kukikamata hapa ni kuke kufahamu na kuamini kwamba ubatizo wa Yesu na damu yake aliyoimwaga Msalabani vilikuwa ni sadaka ambazo Bwana wetu alizifanya ili kuzibeba dhambi zetu na kisha kuhukumiwa adhabu kwa sababu ya dhambi hizo. Tunapoamini hivyo, basi tunaweza kukombolewa kikamilifu toka katika dhambi zetu zote.

Neno la Mungu limegawanyika katika sehemu mbili: Agano la Kale na Agano Jipya. Agano Jipya ni utimilifu wa unabii ulioahidiwa katika Agano la Kale. Pia ni maelezo ya tangazo la unabii juu ya ujio wa ulimwengu mpya utakaokuja ambao Bwana aliuhadi kwa wanafunzi wake. Ulimwengu huu mpya utatimilizwa hivi karibuni kwetu sisi na Yesu Kristo. Agano la Kale pia ni Neno la kweli ambalo lina maelezo juu ya unabii wokovu wa mwanadamu, kwamba Mwana wa Mungu atakuja hapa duniani, na kwamba kama vile mikono ilivyowekwa juu ya mwanasadaka wa sadaka ya kuteketezwa

wa Agano la Kale na kisha damu yake kumwagwa, basi vivyo hivyo Yesu atazichukua katika mwili wake dhambi zote za ulimwengu mara moja na kwa wote kwa kubatizwa na Yohana Mbatizaji na kisha kuimwaga damu yake na kufa Msalabani, na kwa sababu hiyo atawaokoa wenye dhambi wote wa hapa ulimwenguni toka katika dhambi zao. Bwana wetu amejifunua kwetu kuwa yeye ni Mwokozi ambaye ataitimiza ahadi hii, na kwa kweli ameitimiza ahadi hii kwa kupitia utaratibu wa sadaka ya kuteketezwa uliodhihirishwa katika Hema Takatifu la Kukutania. Kwa lugha nyingine, Agano la Kale lote limetimizwa kikamilifu kwa kupitia Agano Jipya na Bwana wetu Yesu Kristo.

Yesu ametupatia injili ya kweli ya maji na Roho ili kwamba tunapomwamini Yeye kama Mwokozi wetu, basi sisi sote tutaweza kufahamu na kuamini kiusahihi kwamba Mwokozi aliyetabiriwa katika Agano la Kale si mwingine bali ni Bwana wetu Yesu Kristo.

Utaratibu wa sadaka ya kuteketezwa wa Agano la Kale ulikuwa ni mawe ya kuvukia ya ufunuo wa Mungu ili kuweza kuufikia ukweli wote wa wokovu wake, na ukweli huo unatuwezesha sisi kupokea ondoleo la dhambi zetu kwa kufahamu na kuamini katika injili ya maji na Roho. Yesu ametuwezesha sisi kutambua kuwa ni kwa nini alipaswa kubatizwa na Yohana Mbatizaji, na kwamba ni kwa jinsi gani kutokana na ubatizo wake alipaswa kuimwaga damu yake na kufa Msalabani. Ni mpaka hapo tutakapoufikia uelewa sahihi wa injili hii ya kweli ndipo tunapoweza kuokolewa kwa kweli na kisha kufanyika watu wa Mungu mwenyewe. Ukweli wa injili ya maji na Roho ambao Yesu ametupatia ndio unaotuwezesha kuelewa kwa usahihi na kuamini katika huduma yake ya wazi ya wokovu.

Hizi ni Huduma za Maji na Roho Ambazo Yesu Amezitimiza Alipokuja Hapa Duniani

Neno la msingi la Agano Jipya ni hili: Kwa kuja hapa duniani, Yesu alizichukua katima mwili wake dhambi zote za ulimwengu kwa kupitia ubatizo wake alioupokea toka kwa Yohana Mbatizaji, na kwa sababu hiyo Yesu aliulipa mshahara wote wa dhambi kwa damu yake. Uhai au kifo cha nafsi yako vinategemea ikiwa unafahamu kiusahihi na kuamini katika injili ya maji na Roho. Na kwa kweli, vitabu vyote 39 vya Agano la Kale na vitabu 27 vya Agano Jipya vinaelezea kwa kina juu ya ukweli huu wa injili ya maji na Roho.

Mnyama wa sadaka ya kuteketezwa ambaye alitolewa katika Hema Takatifu la Kukutania la Agano la Kale kwa ajili ya dhambi za watu wa Israeli aliweza kuzioshelea mbali dhambi zao kwa kuwa walikuwa wameiweka mikono yao juu ya kichwa cha mnyama yule na kisha wakaitoa damu yake na nyama yake kama sadaka kwa Mungu. Ni kwa kuufikia ufahamu mzuri wa utaratibu wa sadaka ya kuteketezwa wa Agano la Kale kwa kulinganisha na ubatizo wa Yesu na damu ya Yesu iliyomwagwa katika Agano Jipya ndipo tunapoweza nasi kulifahamu ondoleo la dhambi kwa usahihi na kuliadini. Kwa maneno mengine, kama vile mwanakondoo wa sadaka ya kuteketezwa au mbuzi alivyoyapokea maovu ya wenye dhambi kwa kule kuwekewa mikono yao au kwa kuwekewa mikono na Kuhani Mkuu, basi vivyo hivyo, Yesu, kwa kubatizwa na Yohana Mbatizaji aliweza kuzipokea dhambi zote za ulimwengu na kisha akaimwaga damu yake na kufa Msalabani.

Hata kama hatuzifahamu habari zote za kina za Biblia, lakini tunapoupata ufahamu wa wazi na sahihi juu ya ubatizo na damu iliyomwagika ya Yesu katika Agano Jipya hali ikilinganishwa na utaratibu wa sadaka ya kuteketezwa wa

Agano la Kale, basi ni hakika kuwa tunaweza kupokea ondoleo la dhambi kwa imani. Ni lazima tuamini katika injili ya maji na Roho ili tuweze kupokea ondoleo la dhambi lililotolewa na Mungu.

Yesu aliiandika injili ya maji na Roho inayoweza kuzioshelea mbali dhambi zetu kama Neno la Mungu lililoandikwa. Yesu amewapatia ukuhani waamini wa injili ya maji na Roho ili kwamba kila mtu katika ulimwengu huu aweze kuzioshelea mbali dhambi zake kwa imani. Katika Agano la Kale, unabii huu uliahidiwa kwa ukoo wa Lawi tu. Ukoo huu wa Lawi ulipewa jukumu la kuomba ambako kuliziondolea mbali dhambi za Waisraeli na kuitimiza haki ya Mungu ya upendo. Kwa hiyo, sisi waamini wa injili ya maji na Roho tunapaswa kuufahamu utaratibu wa sadaka ya kuteketezwa ya Agano la Kale na kisha kuufikia ufahamu wa kina juu ya ubatizo wa Yesu na kusulubiwa kwake katika kuutimiza ukuhani huu kikamilifu mbele za Mungu katika kipindi hiki cha Agano Jipya.

Sasa ni takribani miaka 2018 tangu Yesu Kristo alipozaliwa katika dunia hii. Huyu Yesu alikuja hapa duniani kama Mwokozi, na kwa kuupokea ubatizo toka kwa Yohana Mbatizaji na kwa kusulubiwa na kuimwaga damu yake, Yesu amezioshelea mbali milele dhambi zetu zote. Kwa hiyo, ni sahihi kabisa kuwa mwaka aliozaliwa Yesu unapaswa kuwa ni msingi wa meza ya kumbukumbu za koo mbalimbali katika historia ya ulimwengu. Hiyo inaonyesha kuwa mwanzo wa kila kitu ni Yesu Kristo, kwa kuwa kadri tunavyofahamu ni wazi kuwa Yesu Kristo ni Mungu mwenyewe aliyeumba ulimwengu na Mwokozi aliyemitoweshea mbali dhambi zetu zote kwa maji na damu yake, na pia Yesu anasimama kama mhimili wa katikati wa historia ya ulimwengu.

Je, Kifungu cha Leo cha Maandiko Kinatueleza Juu ya Kuzipitisha Dhambi Zetu?

Katika kifungu cha leo cha maandiko kimeandikwa hivi, *“Wakati huo Yesu akaja kutoka Galiliaya mpaka Yordani kwa Yohana ili abatizwe. Lakini Yohana alitaka kmzuia, akisema, Mimi nahitaji kubatizwa na wewe, nawe waja kwangu? Yesu akajibu akamwambia, Kubali hivi sasa; kwa kuwa ndivyo itupasavyo kuitimiza haki yote. Basi akamkubali. Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwona Roho wa Mungu akishuka kama hua, akija juu yake; na tazama, sauti kutoka mbinguni ikisema, Huyu ni Mwanangu, mpendwa wangu, ninayependezwa naye.”*

Sisi sote ni wazawa wa Adamu, ambao tumezaliwa tukiwa zile aina kumi na mbili za dhambi tangu siku ile tulipozaliwa katika ulimwengu huu, na kwa sababu hiyo sisi sote hatukuwa na chaguo zaidi ya kuuawa kwa sababu ya dhambi zetu na kuhukumiwa kwa sababu ya dhambi hizo mbele za Mungu (Marko 7:21-23). Kutokana na dhambi zetu, hatukuweza kukwepa bali tuliishi maisha ya mabaya na kisha kufa pasipo tumaini, na pia sisi sote tulikuwa tumefungwa ili kutupwa katika moto wa kutisha wa jehanamu. Hata hivyo, Yesu alizaliwa hapa duniani wakati tulipokuwa katika ncha ya kuelekea maangamizi ya milele. Alizaliwa katika mwonekano wa mtu wa chini ili kutukomboza sisi wanadamu toka katika dhambi zote za ulimwengu. Bwana alikuja hapa duniani na akafanyika mwili wa mwanadamu ili kutukomboza watu kama wewe na mimi toka katika dhambi zetu za milele hapa ulimwenguni.

Wakati Bwana wetu alipofikisha umri wa miaka 30 alizibeba dhambi za ulimwengu kwa kubatizwa na Yohana

Mbatizaji katika Mto Yordani. Kwa wakati huo Yohana Mbatizaji alikuwa akitoa ubatizo wake wa toba kwa Waisraeli wengi ubatizo ambao uliwafanya wengi wao kumgeukia Mungu. Lakini ubatizo ambao Yohana Mbatizaji alimpatia Yesu ulikuwa na lengo la kuitimiza haki ya Mungu. Ulikuwa ni ubatizo ambao ulitolewa ili kuzipitisha dhambi zote za ulimwengu huu katika mwili wa Yesu Kristo ambaye ni Mwanakondoo wa Mungu.

Yohana Mbatizaji alikuwa ni mwakilishi wa wanadamu (Mathayo 11:11). Pia alikuwa ni nabii wa mwisho katika Agano la Kale, kuhani halisi wa kibiblia aliyezaliwa toka katika nyumba ya Kuhani Mkuu, na ambaye alihudumu kama kuhani wa mwisho wa enzi za Agano la Kale (Luka 1:1-21). Kwa hiyo, sisi sote kabla ya kujaribu kuifahamu huduma ya Yesu basi tunapaswa kwanza kuifahamu huduma ya Yohana Mbatizaji pasipo shaka. Ukweli ni kuwa Yesu Kristo alizipokea dhambi za ulimwengu kwa kupitia ubatizo wake alioupokea toka kwa Yohana Mbatizaji. Ni lazima tuifahamu ukweli huu na kisha kuuamini. Ni pale tu tutakapofikia ufahamu wa kina wa huduma ya Yohana Mbatizaji ndipo tunapoweza kuifahamu huduma hiyo kwa mahusiano yake na huduma ya Yesu na kisha kuufahamu ukweli wote wa ondoleo la dhambi kwa upana, yaani juu ya upatanisho wa kweli.

Agano la Kale na Agano Jipya yanatoa unabii makini kuhusu taswira ya kina juu ya huduma ya Yohana Mbatizaji. Mathayo 11:11 inaeleza juu ya Yohana Mbatizaji kama ifuatavyo: *“Hajondokea mtu katika wazao wa wanawake aliye mkuu kuliko Yohana Mbatizaji; walakini aliye mdogo katika ufalme wa mbinguni ni mkuu kuliko yeye.”* Katika sura ya 3 na ya 4 ya kitabu cha Malaki katika Agano la Kale, ilitabiriwa kuwa Mungu atamtuma Eliya. Malaki 4:5 inasema, *“Angalieni, nitawapelekea Eliya nabii, kabla haijaja siku ile ya BWANA,*

iliyo kuu na kuogofya,” kisha ikifuatiwa na aya ya 6, “*Naye ataigeuza mioyo ya baba iwaelekee watoto wao, na mioyo ya watoto iwaelekee baba zao, ili nisije nikaipiga dunia kwa laana.*” Biblia inatufundisha kuwa huyu Eliya aliyetabiriwa katika Agano la Kale si mwingine zaidi ya Yohana Mbatizaji ambaye alizipitisha dhambi za wanadamu, yaani dhambi za ulimwengu kwenda kwa Yesu kwa kupitia ubatizo wake.

Katika Agano Jipya, Yesu mwenyewe alisema kuwa Yohana Mbatizaji alikuwa ni “*ni mkuu kuliko wote waliozaliwa na wanawake,*” na kwamba ndiye “*Eliya atakayekuja*” (Mathayo 11:11-14). Sasa, ni jukumu gani ambao Yohana Mbatizaji alilitimiza alipokuja hapa ulimwenguni? Kama mwakilishi wa wanadamu, Yohana Mbatizaji alikuwa ndiye aliyezipitisha dhambi za ulimwengu kwenda kwa Yesu kwa kumbatiza Yesu. Yeye alikuwa ndiye aliyeitimiza huduma ambayo iligeuza mioyo ya wenye dhambi kumgeukia Mungu, na pia ndiye aliyembatiza Yesu ili kuzipitisha dhambi za ulimwengu kwenda kwa Yesu. Yohana Mbatizaji alikuwa na sifa za kubeba majukumu ya Kuhani Mkuu kwa sababu alikuwa akitoka katika nyumba ya Haruni Kuhani Mkuu kwa majaliwa ya Mungu (Luka 1:1-10). Kwa hiyo, Yohana Mbatizaji alikuwa ndiye aliyelitimiza jukumu la kikuhani la kuzipitisha dhambi za kila mtu kwenda kwa Yesu kwa kupitia ubatizo wa Yesu.

Sababu iliyomfanya Yohana Mbatizaji kuja hapa dunini ilikuwa ni kwa sababu ya kuzipitisha dhambi za ulimwengu kwenda kwa Yesu kwa kumbatiza Yesu. Pia Yohana Mbatizaji alikuwa ndiye aliyewakemea watu ambao walikuwa wamemwacha Mungu na aliwashuhudia kuwa Yesu Kristo alikuwa ni Mwana wa Mungu, Mwanakondoo wa sadaka ya kuteketezwa ambaye atazitoweshea mbali dhambi za ulimwengu kwa ubatizo wake na kwa kuimwaga damu yake.

Yesu aliutimiza unabii juu ya kuwekea mikono juu ya kichwa cha mwanasadaka wa sadaka ya kuteketezwa ulioandikwa katika Mambo ya Walawi wakati alipokuka kwa Yohana Mbatizaji akiwa kama sadaka ya kuteketezwa ambaye atazifanya dhambi za ulimwengu kutoweka kwa kubatizwa na Yohana Mbatizaji (Mambo ya Walawi 1:3-5).

Hii ndiyo sababu Yohana Mbatizaji alipaswa kumbatiza Yesu na kuzipitisha dhambi zote za ulimwengu wenda kwake, na kwa sababu hiyo kuitimiza haki ya Mungu, ambayo ni mapenzi ya Mungu Baba. Yesu alikuwa ni Mwanakondoo wa Mungu ambaye alizipokea dhambi za kilamtu ulimwenguni kwa kubatizwa na mkuu kuliko wazawa wote wa wanawake. Kwa maneno mengine, Yesu alibatizwa na Yohana Mbatizaji kwa kuwa alikuwa akitaka kuzipokea dhambi zote za ulimwengu mara moja na kwa wote.

Wakati Yohana Mbatizaji alipokuwa akiutoa ubatizo wake wa toba kwa watu wa Israeli, Yesu alikuja kwake na kusema, “Nibatize. Kwa kuwa ndivyo inipasavyo kubatizwa nawe ili kuitimiza haki yote ya Mungu” (Mathayo 3:15). Ili kubeba dhambi zote za ulimwengu, basi ilimpasa Yesu kuupokea ubatizo wa Yohana Mbatizaji, maana ni kwa ubatizo huo ndipo aliweza kuzichukua dhambi za kila mtu katika ulimwengu huu. Kwa kwa sababu hiyo Yesu alizibeba dhambi zote za ulimwengu kwa kupitia ubatizo huu ambao aliupokea toka kwa Yohana Mbatizaji. Pia Yesu amefanyika kuwa Mungu Mwokozi wa milele kwa kusulubiwa kwake na kuimwaga damu yake Msalabani na kwa kufufuka kwake toka kwa wafu katika siku ya tatu.

Kwa hiyo, Yesu alibatizwa kwa kuwa ndivyo ilivyompasa kuyatimiza mapenzi ya Mungu Baba (Mathayo 3:15). Pia Yohana Mbatizaji aliweza kumbatiza Yesu kutokana na mapenzi haya ya Mungu Baba. Kwa maneno mengine, Yesu

alipokea kule kuwekewa mikono kiroho na kisha akaimwaga damu yake kama ambavyo mwanasadaka wa sadaka ya kuteketezwa katika Agano la Kale alivyoimwaga damu yake. Katika Mambo ya Walawi sura ya 16, tunaona kuwa mbuzi wawili wa sadaka ya kuteketezwa walizipokea sadaka za mwaka mzima za watu wa Israeli kwa kule kuwekewa mikono na Kuhani Mkuu. Vivyo hivyo, Yesu alizipokea dhambi zote za ulimwengu kwa kupitia ubatizo wake alioupokea toka kwa Yohana Mbatizaji na kisha akaimwaga damu yake ya thamani Msalabani. Kwa hiyo Yesu ni Mwokozi wa wanadamu ambaye alizipokea dhambi zao katika kichwa chake kwa kubatizwa.


Yesu ndiye Mwana pekee wa Mungu Baba na Kuhani Mkuu wa mbinguni wa Ufalme wa Mungu. Kwa hiyo, ili Yohana Mbatizaji, ambaye ni mwakilishi wa wanadamu aweze kuutimiza ukuhani wake kama Kuhani Mkuu wa duniani, basi alipaswa kukutana na Yesu ambaye ni Kuhani Mkuu wa Ufalme wa Mbinguni na kisha kuitimiza haki yote ya Mungu Baba. Kwa kupitia ubatizo wa Yesu, basi ule upendo wa haki wa Mungu ulikuja kujulikana.

Sasa, ni nani basi ambaye ni mkuu kati ya Yohana Mbatizaji na Yesu? Kwa kweli Yesu, ambaye ni Kuhani Mkuu wa mbinguni ndiye mkuu kuliko Yohana Mbatizaji. Yesu ametukuzwa sana kuliko yeyote, kwa kuwa Yesu ni Mungu mwenyewe aliyeumba ulimwengu, na pia ndiye Mwana wa Mungu aliyekuja hapa duniani kuwaokoa wanadamu toka katika dhambi za ulimwengu. Ili kuwaokoa wanadamu toka katika dhambi za ulimwengu, Yesu alikuja hapa duniani na akabatizwa na Yohana Mbatizaji. Yesu si kiumbe kama tulivyo sisi.

Katika ule ubatizo ambao Yesu aliupokea toka kwa Yohana Mbatizaji unapatikana mfano wa kazi maalum ya Mungu. Wakati Yesu alipokuja kwa Yohana Mbatizaji ili

abatizwe, Yohana Mbatizaji alimwambia Yesu, “Mimi nahitaji kubatizwa na wewe, nawe waja kwangu?” Kama tunavyoona, mara ya kwanza Yohana Mbatizaji alikataa kuzipitisha dhambi zote kwenda kwa Yesu kwa kumbatiza, lakini mwishowe hakuweza kukataa, kwa kuwa Yesu mwenyewe alitaka kubatizwa na Yohana Mbatizaji ili azibebe dhambi zote za ulimwengu. Hivyo, Yesu akamwamuru Yohana Mbatizaji ili ambatize kwa kusema, “*Kubali hivi sasa; kwa kuwa ndivyo itupasavyo kuitimiza haki yote*” (Mathayo 3:15).

Kabla Yesu Kristo hajabatizwa na Yohana Mbatizaji, Wamataifa pamoja na Wayahudi, wote walikuwa na dhambi katika mioyo yao, na kwa sababu hiyo hawakuweza kukwepa kuhukumiwa adhabu na kuharibiwa kwa sababu ya dhambi zao. Tunafahamu kabisa kuwa kila mtu ni kiumbe dhaifu ambaye hawezi kukwepa kuangamizwa kwa sababu ya kutenda dhambi dhidi ya Mungu katika ulimwengu huu. Hii ndiyo sababu Yesu alizichukua dhambi zote za ulimwengu huu katika mwili wake kwa kubatizwa na Yohana Mbatizaji. Bwana wetu alipaswa kuitimiza kazi hii kwa kupitia Yohana Mbatizaji. Kwa kuwa ili Yesu aweze kuzichukua dhambi zote katika mwili wake, basi ilimpasa kupokea ubatizo ambao utaitimiza haki yote ya Mungu toka kwa Yohana Mbatizaji.

“*Kubali hivi sasa; kwa kuwa ndivyo itupasavyo kuitimiza haki yote*” (Mathayo 3:15). Katika kifungu hiki kwa lugha ya Kiyunani, “*haki yote*” ni “” (pasan dikaiosunen). Neno hili la Kiyunani ‘dikaiosune’ lina maanisha ni “hali ya haki zaidi” au “haki,” au “usawa.”

Kama ambavyo sadaka ya kuteketezwa ya Agano la Kale ilivyozitoweshea mbali dhambi zote za Waisraeli kwa kuzibeba, basi vivyo hivyo, katika Agano Jipya, Yesu alizioshelea mbali dhambi zote za wanadamu kwa kuja hapa duniani na kuzibeba

dhambi zote za wanadamu katika mwili wake kwa kubatizwa na Yohana Mbatizaji. Tukisema kimsingi, Yesu alikuja hapa duniani kama Mwanakondoo wa Mungu, na baada ya kufanyika sadaka ya kuteketezwa kwa ajili ya dhambi zetu, basi Yesu alitukomboza sisi toka katika dhambi za ulimwengu. Sababu iliyomfanya Mwokozi akafanyika kuwa mwanadamu na akataka kubatizwa na Yohana Mbatizaji imejengwa katika utimilifu wa haki ya Mungu.

Yesu alisema, *“Kubali hivi sasa; kwa kuwa ndivyo itupasavyo kuitimiza haki yote.”* Kwa upande wa kiroho, aya hii ina maanisha kuwa, “Ndivyo inipasavyo kwangu mimi kuzichukua dhambi za kila mtu mara moja na kwa wote kwa kubatizwa na wewe na kisha kuzioshelea mbali dhambi hizo.” Pia hii ina maanisha kuwa ubatizo wa Yesu alioupokea toka kwa Yohana Mbatizaji ulikuwa ni utimilifu wa kule kuwekea mikono katika Agano la Kale, ambako kulimaanisha kuwa Ysua alizipokea dhambi za wanadamu mara moja na kwa wote. Hivyo, sisi sote ni lazima tuwe na imani inayofahamu na kuamini katika ukweli uliodhihirishwa katika ubatizo wa Yesu alioupokea. Ni lazima tuyafahamu matokeo ya ubatizo ambao Yesu aliupokea toka kwa Yohana Mbatizaji na damu yake aliyoimwaga Msalabani, na pia ni lazima tuufahamu na kuuamini ukweli huo kwa usahihi.

Kanisa la Presibeterian linatoa toleo lililofupishwa la ubatizo ambapo wafuasi wake hawabatizwi kwa maji mengi, bali wanabatizwa kwa kunyunyiziwa katika jina la Baba, Mwana, na Roho Mtakatifu. Katika maandiko, aina hii ya ubatizo ilitolewa katika maeneo ambayo yana upungufu wa maji kama vile maeneo ya jangwani. Kwa mfano, hivi ndivyo Filipo alivyombatiza yule towashi wa Ethiopia (Kushi). Lakini wakati Yesu alipobatizwa na Yohana Mbatizaji, Yesu alisimama katika Mto wa Yordani huku maji yakiwa usawa wa

kiunoni. Ubatizo ambao Yesu aliupokea toka kwa Yohana ulikuwa ni ule ambao Yohana Mbatizaji aliweka mikono yake miwili juu ya kichwa cha Yesu hali akimzamisha katika maji, na kisha kumtoa katika maji. Ubatizo huu unalingana kabisa na lile tendo la kuwekea mikono katika Agano la Kale ambapo Kuhani Mkuu alizipitisha dhambi zote za Waisreali kwa kuiweka mikono yake miwili juu ya kichwa cha mwanasadaka wa kuteketezwa. Ubatizo ambao Yesu aliupokea toka kwa Yohana Mbatizaji ulikuwa ndio ubatizo ambao kwa huo Yesu alizipokea dhambi zote za ulimwengu.

Je, umuhimu wa ukweli kuwa Yohana Mbatizaji aliweka mikono yake juu ya kichwa cha Yesu ili ambatize ni upi? Katika Agano la Kale, kitendo cha kiibada cha ‘kuwekea mikono’ kilifanyika katima mazingira yafuatavyo: 1) kuzipitisha dhambi za mtu kwenda katika sadaka ya kuteketezwa (Mambo ya Walawi 1:1-10; 4:1-25); 2) kuwaweka wakfu watumishi wa Mungu (Hesabu 8:10, 27:18); na 3) kurudisha kufuru kwa aliyekufuru (Mambo ya Walawi 24:14).

Bila kujalisha jinsi hali ilivyokuwa, kitendo cha ‘kuwekea mikono’ kilikuwa ni njia ya kupitisha kitu fulani.’ Wakati mtumishi anapowekwa wakfu kama mchungaji, basi wale wachungaji wa zamani wanamwekea mikono juu ya kichwa chake kumaanisha kuwa zile nguvu walizopewa na Mungu sasa wanampatia huyo mchungaji mpya. Hii ina maanisha kuwa kwa kule kuwekea mikono, basi karama zote na nguvu ambazo zilikuwa zimeruhusiwa kwa wale wachungaji wa zamani basi sasa zimepelekwa kwa huyo mchungaji mpya.

Hata hivyo, matukio mengi ya ‘kuwekea mikono’ yalikuwa ni yale yanayohusiana na utaratibu wa sadaka ya kuteketezwa ambayo yalifanyika ili kuzipitisha dhambi kwenda kwa mnyama wa sadaka ya kuteketezwa. Ukifanya

mlinganisho, sababu iliyomfanya Yohana Mbatizaji kuiweka mikono yake juu ya kichwa cha Yesu ilikuwa ni kwa lengo la kuzipitisha dhambi zote za ulimwengu kwenda kwa Yesu. Hii ndio sababu hata leo hii, wakati wachungaji wanapowabatiza waamini, basi huweka mikono yao juu ya vichwa vya waamini. Kwa nini inafanyika hivyo, ni ishara ya imani yao kuonyesha kuwa wanaamini kuwa Yesu alizibeba dhambi za ulimwengu kwa kupitia ubatizo wake.

Kama Mwokozi, Yesu alizichukua dhambi za ulimwengu kwa kubatizwa na Yohana Mbatizaji, ambaye ni mwakilishi wa wanadamu. Hii ilikuwa sawa na kitendo cha Kuhani Mkuu wa Agano la Kale kuzipitisha dhambi za watu wa Israeli juu ya sadaka ya kuteketezwa kwa kuiweka mkono yake juu ya kichwa cha mwanasadaka (Mambo ya Walawi 16:11).

Hali akiwa anabatizwa na Yohana Mbatizaji, ambaye ni mwakilishi wa wanadamu, Yesu alizamishwa ndani ya maji na kisha akatoka kwenye maji. Kiroho, tendo hili lina maanisha ukweli kuwa kwa kuwa Yesu alikuwa amezichukua dhambi zote ulimwengu katika mwili wake mara moja na kwa wote kwa kubatizwa na Yohana Mbatizaji, basi ilimpasa Yesu kufa Msalabani, kufufuka tena toka kwa wafu, na kisha kufanyika Mwokozi mkamilifu. Kitendo hicho kinatueleza kuwa Yesu alizipokea dhambi za ulimwengu kwa kupitia ubatizo wake, akazibeba dhambi zetu, na kisha akahukumwa adhabu kwa ajili ya dhambi zote kwa kuimwaga damu yake na kufa Msalabani.

Kwa ufupi, ubatizo wa Yesu kwa tendo la kuwekewa mikono una maanisha kuwa Yesu alizipokea dhambi za ulimwengu, na kule kuzamishwa katika maji kuna maanisha kifo chake Msalabani, na tendo la kutoka ndani ya maji kuna onyesha ufufuo wake. Kwa maneno mengine, Yesu ameitimiza haki ya Mungu kwa kuyatimiza kwa haki maagizo ya sheria ya

dhambi na mauti ambayo tulipaswa kukabiliana nayo. Hii ndiyo sababu Biblia inasema, *“Maana yale yasiyowezezana kwa sheria, kwa vile ilivyokuwa dhaifu kwa sababu ya mwili, Mungu, kwa kumtuma Mwanawe mwenyewe katika mfano wa mwili ulio wa dhambi, na kwa sababu ya dhambi, aliihukumu dhambi katika mwili, ili maagizo ya torati yatimizwe ndani yetu sisi, tusioenenda kwa kufuata mambo ya mwili, bali mambo ya roho”* (Warumi 8:3-4).

Wakati Yesu alipotoka katika maji, Mungu Baba aliyafungua malango ya Mbinguni na akasema, *“Huyu ni Mwanangu, mpendwa wangu, ninayependezwa naye”* (Mathayo 3:17). Mungu alikuwa amepanga kuzitoweshea mbali dhambi zote za mwanadamu kwa kupitia Mwanawe kabla ya uumbaji. Na kazi hii ilitimizwa na Mwanawe alipokuja hapa duniani, akazichukua dhambi za mwanadamu katika mwili wake kwa kubatizwa na Yohana Mbatizaji, akaimwaga damu yake Msalabani hadi kifo, na kwa sababu hiyo akawakomboa waamini wake kikamilifu toka katika dhambi. Bwana wetu aliyatimiza mapenzi yote ya Mungu mara moja na kwa wote kwa kubatizwa na kuimwaga damu yake.

Kwa hiyo, wakati Yesu alipoyatii mapenzi ya Mungu Baba kwa kuzichukua dhambi zote za mwanadamu katika mwili wake kwa ubatizo wake, basi Mungu Baba alifurahishwa na Mwanawe Yesu na kusema, *“Yeye aliyefanya hivi ni Mwanangu, mpendwa wangu, ninayependezwa naye.”* Hii ndiyo sababu Wakrito wanapaswa kuamini katika ubatizo ambao Yesu aliupokea toka kwa Yohana Mbatizaji pamoja na damu ambayo Yesu aliimwaga Msalabani kama hukumu ya adhabu kwa dhambi zetu zote. Hii ndiyo sababu Mungu Baba aliyafungua malango ya Mbinguni na kusema kuwa Yeye aliyebatizwa sasa alikuwa ni Mwanawe, anayependezwa naye.

“Tazama, Mwanakondoo wa Mungu Aichukuaye Dhambi ya Ulimwengu!”

Sasa hebu tugeukie Yohana 1:29, wewe na mimi tunapaswa kuufahamu ushahidi ambao unathibitisha kuwa Yesu alizichukua dhambi za ulimwengu katika mwili wake mara moja na kwa wote kwa kubatizwa na Yohana Mbatizaji, na pia tunapaswa kuamini hivyo kwa mioyo yetu. Yohana Mbatizaji alipomwona Yesu aliyembatiza akija kwake siku ya pili yake alishuhudia hivi, *“Tazama! Mwanakondoo wa Mungu aichukuaye dhambi ya ulimwengu!”*

Kwa lugha nyingine, Yohana Mbatizaji alishuhudia kuwa *“Zaidi ya Yesu hakuna mwingine yeyote aliye Mwokozi wa wanadamu, Mwokozi ambaye alizipokea dhambi za wanadamu wote kwa kupitia ubatozi wake na ambaye ataimwaga damu yake kwa ajili yao.”* Siku ya pili yake, Yohana alipomwona Yesu alishuhudia tena akisema, *“Tazama, Mwanakondoo wa Mungu!”* Kwa kuwa Yesu alikuwa amekwisha batizwa na Yohana Mbatizaji, na kwamba alikuwa ameishazipokea dhambi za ulimwengu, basi ilimpasa Yesu kusulubiwa na kuimwaga damu yake. Hii ndiyo sababu Yohana Mbatizaji alishuhudia hivi, *“Tazama! Mwanakondoo wa Mungu aichukuaye dhambi ya ulimwengu!”*

Ni lazima tufahamu maana ya msemu usema *“dhambi za ulimwengu”* na kisha tuamue kuuamini au kutouamini ukweli wa ubatizo wake. Uelewa sahihi wa dhambi za ulimwengu ni upi? Watu wengi wanafikiri kwa jumla kuwa neno *“ulimwengu”* lina maanisha ni ule ulimwengu mdogo wanaoufikiria wao—yaani yale wanayoyafahamu tangu walipozaliwa hadi sasa. Lakini uelewa sahihi wa dhambi za ulimwengu unatutaka sisi kulichukulia neno *“ulimwengu”*

kumaanisha muda wote tangu kuumbwa kwa ulimwengu hadi mwisho wake.

Nilielezwa kuwa kuna aina fulani ya wadudu wanaoruka mchana wanaweza kuishi kwa siku moja tu. Basi kwa kiumbe kama huyo, tendo la kuishi masaa 12 ni sawa na kuishi nusu ya maisha yao yote. Lakini kama wataishi kwa muda mrefu kidogo, basi watakutana na muda wao wa kutua jua, na kama wataishi hadi kufikia masaa 24 basi hapo watakuwa wameyaishi maisha yao yote. Na kwa sababu hiyo, kwa viumbe kama hao wazo la “kesho” linakuwa halina maana kwao.


Vivyo hivyo, kwa kuwa tunaishi kwa miaka 70-80 tu, basi ni hakika kuwa hatuna ule ufahamu wa kutosha kuhusiana na wazo kama “milele” au “isiyo na mwisho.” Hata hivyo, Bwana wetu, Mungu Mwenyezi anatuambia kuwa: ulimwengu unahusisha muda tangu mwanzo wa ulimwengu huu nadi mwisho wake. Kwa maneno mengine, mawazo yetu kuhusiana na ulimwengu ni tofauti kabisa na mawazo ya muda ambayo Mungu anayazungumzia kuhusu ulimwengu. Muda ambao Bwana anauongea kuhusu ulimwengu ni muda mrefu sana kuliko tunavyodhania.

Imani yetu ni lazima ijengwe katika Neno la Mungu—hiyo ni kusema kuwa ni lazima tuamini katika injili ya maji na Roho iliyoandikwa katika Neno la Mungu. Kwa hiyo, tunapofikiria kile ambacho Yohana Mbatizaji alikisema—“Mwanakondoo wa Mungu aichukuaye dhambi ya ulimwengu”—au kile ambacho Bwana wetu mwenyewe alikisema—“Kwa kuwa ndivyo itupasavyo kuitimiza haki yote”—basi tunapaswa kuzifahamu kauli au sentensi hiyo kuwa zinamaanisha kwamba Yesu alizichukua dhambi za wanadamu wote kwa ubatizo wake na kisha akazibeba dhambi hizo kwenda Msalabani, tunapaswa kuuamini hivi kwa mioyo

yetu yote.

Ni lini Yesu alipozibeba dhambi za ulimwengu? Yesu alizichukua dhambi za ulimwengu katika mwili wake mara moja na kwa wote wakati alipobatizwa na Yohana Mbatizaji katika Mto Yordani. Maneno haya “*kwa kuwa*” yametokana na maneno ya Kiyunani ‘*hutos gar*’, ambayo yana maanisha ‘kwa namna hii,’ ‘kwa namna nzuri zaidi,’ au ‘hakuna njia nyingine zaidi ya hii.’ Neno hili linaonyesha kuwa Yesu alizichukua dhambi za wanadamu katika mwili wake kwa kupitia ubatizo wake alioupokea toka kwa Yohana Mbatizaji. Kwa maneno mengine, Yesu angeliweza kuzitoweshea mbali dhambi za ulimwengu wakati tu alipobatizwa na Yohana Mbatizaji. Hivyo ni lazima tuufahamu ubatizo wa Yesu na damu yake aliyoimwaga kuwa ndio ondoleo la dhambi zetu na kisha tuamini hivyo.

Kwa namna hii ya kuzipitisha dhambi za ulimwengu kwenda Yesu ambapo Yohana Mbatizaji aliweka mikono yake juu ya kichwa cha Yesu, basi Yesu aliweza kuzichukua dhambi zote za ulimwengu katika mwili wake mara moja na kwa wote, akaimwaga damu yake, na kwa sababu hiyo akakamilisha tendo la upatanisho wetu katika ukamilifu wake. Hili lilikuwa ndilo dhumuni la ubatizo wa Yesu. Tunafahamu kuwa katika Agano la Kale, kule kuwekea mikono juu ya sadaka ya kuteketezwa na kule kumwaga damu ya mwanasadaka wa sadaka ya kuteketezwa kulimaanisha ni upatanisho kwa Waisraeli. Vivyo hivyo, ni lazima tuamini kuwa kwa kupitia ubatizo wake, Yesu alizioshelea mbali dhambi za kila mtu kwa kuzipokea dhambi za ulimwengu, na kwamba tumetakaswa kwa sadaka ya mwili wa Yesu Kristo mara moja na kwa wote (Waebrania 10:10).

Kwa kiyunani, Neno “ubatizo,” “” (baptisma) maana yake ni “kuzamishwa.” Hivyo, “kubatiza”

maana yake ni kuzamisha katika maji au kulowanisha chini ya maji. Kwa usahihi kabisa kubatiza maana yake ni: 1) kuosha au kusafisha kwa kuzamisha au kulowanisha, kuchovya, kuosha, kusafisha kwa maji, kujiosha, kuoga; 2) kushinda; 3) kuzika; na 4) kuzipitisha kwenda kwa.

Hapa ndio inapotokea hoja kuwa ni kwa nini unapaswa kuifahamu injili ya maji na Roho kwa usahihi na kisha uiamini: Kwanza kabisa, dhambi zako zote zilipitishwa kwa Yesu kwa kupitia ubatizo ambao alioupokea toka kwa Yohana Mbatizaji. Kwa kuwa Yesu alikuwa amezipokea dhambi zote za ulimwengu kwa ubatizo wake, basi wale wote wanaoamini hivyo hawana dhambi. Kwa kuwa kwa kubatizwa kwa Yesu, Yesu amekwisha zioshelea mbali dhambi zote za ulimwengu na kwa sababu hiyo hakuna dhambi tena. Yesu alikuwa ni Mwanakondoo wa ambaye alizichukulia mbali dhambi za ulimwengu. Dhambi hizi za ulimwengu zinajumuisha dhambi zote ambazo umewahi kuzifanya na ambao utakuja kuzifanya, yaani tangu dhambi ulizozitenda ukiwa mdogo hadi zile ambazo utazifanya hadi kifo chako. Yesu aliitimiza haki yote kwa kuzibeba dhambi hizi zote na kisha kuzipeleka Msalabani.

Pili, maana ya kuosha ina maanisha kuwa wakati dhambi za ulimwengu zilipokuwa zikipitishwa kwenda kwa Yesu kwa ubatizo wake, basi dhambi hizo zilioshelewa mbali. Tatu, maana ya kuzika ina maanisha kuwa wakati dhambi za ulimwengu zilipokuwa kwetu, basi tulipaswa kubeba adhabu ya dhambi na kutupwa katika moto wa kuzimu, lakini kwa kuwa sasa dhambi zetu zilipitishwa kwenda kwa Yesu kwa kupitia imani yetu katika ubatizo wake, basi ilimpasa Yesu kufa kwa niaba yetu kwa ajili ya dhambi zetu. Hii ndiyo sababu Yesu alibatizwa kwa ajili yetu, akahukumiwa na kuimwaga damu hadi kifo na kisha akafufuka tena toka kwa wafu. Yesu amewawezesha wote wanaoamini kupokea ondoleo la dhambi

kwa kubatizwa, kwa kusulubiwa, kwa kuzikwa; kwa kufufuka tena toka kwa wafu; kwa kuketi mkono wa kuume wa Mungu Baba; na kwa kuwaruhusu wenye dhambi wote kuifahamu injili ya maji na Roho.

Tunapookolewa kwa kumwamini Yesu kuwa ni Mwokozi, katika ubatizo wake na damu yake Msalabani, basi ni hakika kuwa tutafanyika kuwa watoto wa Mungu. Kwetu sisi, hiyo ina maanisha kuwa dhambi zetu zilipitishwa kwenda kwa Yesu. Kwa kuwa Yesu alibatizwa na Yohana Mbatizaji na kisha akaimwaga damu yake Msalabani, basi ni hakika kuwa dhambi zetu haziwezi kuwepo kati yetu. Dhambi zetu zote tangu zile tulizozifanya tulipokuwa wadogo hadi tulipokuwa watu wazima na hadi siku tutakayokufa zilipitishwa zote kwenda katika mwili wa Yesu. Yesu aliimwaga damu yake Msalabani kwa niaba yetu kwa kuwa dhambi zetu zote zilikuwa zimepitishwa katika mwili wake na kwa sababu hiyo Yesu ametupatia maisha mapya.

Sasa, ikiwa tunaamini katika huyu Yesu ambaye ni Mwokozi, basi tunaweza kufanyika tusio na dhambi. Wale kati yenu ambao tangu sasa wanaifahamu injili ya maji na Roho na kisha kuiamini kwa mioyo yao yote, basi hao ndio wenye haki. Ninyi si wenye dhambi tena. Kwa sasa ninyi ni wenye haki. Mtu anaweza kufanyika kuwa mwenye haki kwa kuamini katika injili ya maji na Roho. Hatuwezi kuupata wokovu wetu kwa kutegemea jitihada zetu wenyewe, kwa kuwa kwa kufanya hivyo tutaendelea kuwa na mapungufu na kufanya dhambi, lakini Bwana amekwisha kuzioshelea mbali dhambi zetu zote kwa ubatizo wake alioupokea toka kwa Yohana Mbatizaji na kwa damu yake aliyoimwaga Msalabani. Hivyo wokovu unakuja katika mioyo yetu kwa kuifahamu kweli.

Injili ya Maji na Roho Inayothibitishwa na Utaratibu wa Sadaka ya Kuteketezwa wa Hema Takatifu la Kukutania Katika Agano la Kale

Kwanza kabisa, naomba nielezee kwa kifupi juu ya mwonekano wa Hema Takatifu la Kukutania la Agano la Kale. Hema Takatifu la Kukutania lilikuwa na umbo dogo, lakini lilizungukwa na ua wa nje ambao ulikuwa umezungushiwa uzio wa nguzo na kisitiri cha kitani safi iliyosokotwa. Katika ua huu kulikuwa na lango, hivyo mtu alipolikaribia Hema Takatifu la Kukutania palikuwa na madhabahu ya sadaka ya kuteketezwa, na birika la shaba la kunawia liliwekwa mbele kidogo ya madhabahu hii. Hema Takatifu la Kukutania liligawanywa katika maeneo mawili: Mahali Patakatifu na Patakatifu pa Patakatifu. Milango ya nyumba hii ya Mungu (mmoja kwa ajili ya Mahali Patakatifu na mwingine kwa ajili ya Patakatifu pa Patakatifu), pamoja na lango la ua wake yalikuwa yamefumwa kwa nyuzi za bluu, zambarau, na nyekundu na kitani safi ya kusokotwa.

Kwa nini Mungu aliitengeneza milango ya Hema Takatifu la Kukutania kwa kuifuma kwa nyuzi hizi za bluu, zambarau, na nyekundu na kitani safi ya kusokotwa? Hii ni kwa sababu kupitia nyuzi hizi Mungu alikuwa akiwaelezea jinsi ambavyo Yesu atakavyo kuja hapa duniani, akazichukua dhambi za ulimwengu mara moja na kwa wot kwa kupitia ubatizo ambao ataupokea toka kwa Yohana Mbatizaji, na kwamba atasulubiwa na kisha kuimwaga damu yake. Yesu aliutwaa mwili wake kama sadaka ya kuteketezwa kwa ajili yetu kwa kubatizwa na Yohana Mbatizaji na kwa kusulubiwa kwa ajili ya dhambi za ulimwengu.

Sisi tunaweza kukombolewa mara moja toka katika

dhambi zetu kwa kuamini katika Yesu kuwa ni Mwokozi na kwa kuliadini Neno linalotueleza kuwa Yesu, aliyefanyika kuwa nyuzi za bluu, zambarau, na nyuzi nyekundu alizichukua dhambi za ulimwengu katika mwili wake kwa kubatizwa. Yesu alizitumia nyuzi hizi za bluu, zambarau, na nyekundu na kitani safi ya kusokotwa katika milango ya Hema Takatifu la Kukutania ili kutueleza kuwa Yeye ni Mfalme wa wafalme, na kwamba ametuokoa sisi toka katika dhambi zetu kwa kubatizwa na kusulubiwa. Nyuzi za bluu, zambarau, na nyekundu na kitani safi ya kusokotwa zilizotumika katika mlango wa Hema Takatifu la Kukutania si kitu kingine bali ni mfano wa wokovu unaotueleza kuwa Bwana ametuokoa kikamilifu (1 Petro 3:21).

Hii ndiyo sababu kama tungelifungua lango la ua wa Hema Takatifu la Kukutania na kisha kuingia, tungeliona birika la shaba la kunawia kuipita madhabahu ya sadaka ya kuteketezwa. Madhabahu ya sadaka ya kuteketezwa inatuonyesha kuwa sheria ya Mungu ya haki kabla ya sheria yake ya wokovu, yaani “watu wamepangiwa kufa mara moja, na baada ya hapo hukumu.” Kwa maneno mengine, kwa kupitia madhabahu ya sadaka ya kuteketezwa, Mungu alituonyesha kuwa tutahukumiwa kwa sababu ya dhambi zetu. Ikiwa kweli tunamwamini Yesu kuwa ni Mwokozi, basi ni lazima tutambue kuwa katika Agano la Kale, na ili kwamba Waisraeli waweze kuokolewa toka katika dhambi zao na adhabu ya dhambi, basi walipaswa kuzipitisha dhambi zao kwa mwanasadaka wa sadaka ya kuteketezwa na kisha kumchinja mwanasadaka huyo mbele ya madhabahu.

Vivyo hivyo, Yesu alizichukua dhambi za ulimwengu katika mwili wake mara moja na kwa wote kwa kubatizwa na Yohana Mbatizaji, na hivi ndivyo alivyoweza kusulubiwa na kuimwaga damu yake kwa ajili yetu. Alipokuja hapa duniani,

Bwana wetu alibeba dhambi zetu kwa kubatizwa na Yohana Mbatizaji na kisha akabeba adhabu yetu yote ya dhambi mara moja na kwa wote. Kwa ufupi, Yesu amefanyika kuwa Mwokozi wetu wa kweli kwa kubatizwa, kwa kuimwaga damu yake na kisha kufufuka toka kwa wafu ili kutuokoa na dhambi na adhabu ya dhambi.

Ni Wapi Ambapo Dhambi Zetu Binafsi Zinapatikana?

Sasa, tufanye nini kuhusiana na dhambi zetu binafsi ambazo tutaendelea kuzifanya kila siku kadri tunavyoishi? Ndugu zangu, ikiwa tutakumbuka kila siku kuwa dhambi zetu zote zilipitishwa kwa Yesu wakati alipobatizwa katika Mto Yordani, yaani kama tutaendelea kuamini katika injili ya maji na Roho kwa mioyo yetu, basi ni hakika kuwa tutabakia tusio na dhambi. Kwa nini? Kwa sababu Yesu, hali akijua kuwa tutaendelea kufanya dhambi kila siku, alizichukua dhambi zote za ulimwengu kwa kubatizwa na Yohana Mbatizaji, akazibeba dhambi hizo hadi Msalabani, akaimwaga damu yake alipokuwa akifa, kisha akafufuka tena toka kwa wafu, na kwa kufanya hivyo alizitoweshea mbali dhambi hizo zote mara moja.

Hata hivyo, ukweli huu wa wokovu, ambao ni injili ya maji na Roho unafanya kazi wakati tunapofahamu na kuamini hivyo kwa mioyo yetu yote. Sisi tunaweza kufanyika tusio na dhambi wakamilifu kwa kukumbuka na kuamini kuwa dhambi zetu zote zilipitishwa kwenda kwa Yesu na akazioshelea mbali dhambi hizo wakati alipobatizwa na Yohana Mbatizaji, hii ni kwa sababu tunafanya dhambi kila siku. Sisi tumeoshwa toka katika dhambi ya asili na dhambi zetu binafsi kwa imani katika injili ya maji na Roho.

Ndugu Wakristo wapendwa, ikiwa unataka dhambi zako zote ziondolewe, basi unapaswa kufahamu na kuamini kuwa dhambi zetu zote zilipitishwa kwenda kwa Yesu wakati alipobatizwa. Na kwamba unapaswa pia kujikumbusha juu ya Neno la injili ya kweli, hasa pale inapotokea kuwa umefanya dhambi halisi. Ni kwa kufanya hivyo tu ndipo moyo wako utakaposafishwa wakati wote na ndipo hapo unapoweza kuwa na sifa za kuzitumikia kazi za Mungu za haki. Injili ya maji na Roho inatueleza kuwa dhambi zetu zote zilipitishwa kwenda kwa Yesu wakati alipobatizwa na Yohana Mbatizaji, na kwamba alihukumiwa Msalabani kwa ajili ya dhambi hizo. Biblia inatueleza kuhusu ondoleo la dhambi kwa kupitia injili ya maji na Roho.

Sisi sote ni lazima tulitambue an kulifahamu Neno la Mungu kuwa ni ukweli. Ikiwa unaamini katika injili ya maji na Roho, basi haiwezekani kwako kuwa na dhambi yoyote. Ikiwa tunamwamini kweli Yesu Kristo kuwa ni Mwokozi, basi sisi ni watu wa imani ambao tunaamini kuwa wakati fulani Yesu alizichukua dhambi za ulimwengu katika mwili wake bila kujalisha aina ya dhambi kwa kupitia ubatizo alioupokea toka kwa Yohana Mbatizaji. Ubatizo ambao Yesu aliupokea toka kwa Yohana Mbatizaji umemfanya kila mtu kuwa hana dhambi, kama kitabu cha Warumi kinavyotueleza, *“Kwa sababu kama kwa kuasi kwake mtu mmoja watu wengi waliingizwa katika hali ya wenye dhambi, kadhalika kwa kutii kwake mmoja watu wengi wameingizwa katika hali ya wenye haki”* (Warumi 5:19).

Kadri tunavyoishi katika ulimwengu huu, ni dhahiri kuwa tunatenda dhambi kila siku. Je, dhambi zetu zote zilipitishwa kwenda kwa Yesu? Dhambi zetu zote zilikwishapitishwa kwenda katika mwili wa Yesu muda mrefu uliopita, yaani zaidi ya miaka 2,000 iliyopita. Je, dhambi ambazo tungelikuja kuzifanya hapo baadaye kutokana na udhaifu wetu zilipitishwa

kwenda kwa Yesu pia? Ni sawa kabisa.

Je, hii ina maanisha kuwa ni sawa kwa sisi kutenda aina zote za dhambi kwa ufahamu wetu wa kawaida? Kwa kweli sio hivyo. Kwa kweli hata wale ambao wamezaliwa tena upya kwa kuamini katika injili ya maji na Roho kwa kweli wanaendelea kutenda dhambi kutokana na udhaifu wao. Hata hivyo, hao waliozaliwa tena upya wanaweza kuendelea kuiweka mioyo yao kuwa safi wakati wote kwa kujikumbushia juu ya injili ya kweli ya maji na Roho. Watu wanafanya dhambi kutokana na udhaifu walio nao kuliko kufanya dhambi kwa hiari.

Kwa hiyo, wakati waamini wa injili ya maji na Roho wanapoyapitia madhaifu yao, basi hawana wanaloweza kulifanya zaidi ya kumshukuru Bwana zaidi kwa kuifanya imani yao kuwa mpya katika ubatizo wa Yesu na damu yake aliyoimwaga Msalabani, kwa kuwa Bwana amekwisha zioshelea mbali dhambi zao zote kwa ubatizo na damu yake Msalabani na alihukumiwa adhabu kwa ajili ya dhambi hizo. Hivyo, kwa sasa hawajafungwa tena na dhambi, bali wanajitoa kwa hiari kuueneza ukweli huu kwa wengine. Kwa kufanya hivyo, mioyo yetu inafurahia zaidi.

Je, vipi kuhusu wewe? Je, unamini kuwa Yesu alikuja akabatizwa na Yohana Mbatizaji, akaimwaga damu yake hadi kifo, na kisha akafufuka tena toka kwa wafu? Ndiyo, tunatoa shukrani zetu nyingi kwa Yesu aliyekuja ili kuzitoweshea mbali dhambi zetu kikamilifu. Na kwa kweli, Yesu amezifanya dhambi hizo zote kutoweka mara moja.

Katika Hema Takatifu la Kukutania la Agano la Kale, kama tungeliingia kwa kupitia lango la ua wake na kisha kuipita madhabahu ya sadaka ya kuteketezwa, ni hakika kuwa tungelikuta birika la shaba la kunawia. Wakati vyombo vingine vyote vya Hema Takatifu la Kukutania vilikuwa vimetajwa vipimo na ukomo wake, birika la shaba la kunawia halikutajwa

vipimo vyake. Kiroho, hali hii inaonyesha ule ukweli kuwa kuwa kubatizwa na kuimwaga damu yake, Yesu amezitoweshea mbali dhambi zetu zote bila ukomo wa idadi. Vivyo hivyo, birika la shaba la kunavia lilikuwa na umuhimu wa usio na ukomo kuzioshelea mbali dhambi zako. Birika la shaka la kunawia lilikuwa na nguvu ya kuzioshelea mbali dhambi zao.

Birika hili la kunawia lilitengenezwa kwa shaba ambayo ina maanisha kuwa dhambi zote ni lazima zihukumiwe adhabu. Lakini birika hilo lilikuwa na maji ya kuiofua mikono na miguu ya kuhani. Hii inatueleza kuwa Bwana amezioshelea mbali dhambi za ulimwengu kwa kubatizwa kwake. Wakati kuhani wa Agano la Kale alipotoa sadaka katika madhabahu ya sadaka ya kuteketezwa, kwa kweli kulitokea harufu ya aina zote za uchafu, kuanzia damu ya mnyama hadi mavi yake kwa kuwa walikuwa wakimchinja mnyama mara baada ya kuiweka mikono yake juu yake. Makuhani walijiosha uchafu huo kwa kutumia maji yaliyokuwemo katika birika hilo. Vivyo hivyo, hili birika la shaba la kunawia lina maanisha juu ya ubatizo wa Yesu ambao ulizioshelea mbali dhambi zetu chafu. Dhambi zote binafsi tunazozitenda katika ulimwengu huu zimekwisha toweshewa mbali kwa kupitia ubatizo wa Yesu. Hivi ndivyo birika la shaba la kunawia linavyoeleza. Kwa kuamini ukweli huu tunaweza kuondolewa dhambi zetu zote na kuisha maisha yenye dhamiri safi milele.

Je, Yesu alibatizwa mara ngapi na Yohana Mbatizaji ili kuweza kuzichukua dhambi za ulimwengu huu? Yesu alibatizwa mara moja tu. Yesu amekwisha ziosha dhambi zote za ulimwengu huu kikamilifu kwa kuupokea ubatizo toka kwa Yohana Mbatizaji mara moja tu. Kwa nini Yesu alibatizwa mara moja? Kwa kuwa Yesu ni Mwana wa Mungu ambaye alikuwa na nguvu ya kuzipokea dhambi zote za ulimwengu

tangu mwanzo hadi mwisho mara moja na kwa wote kwa kupitia ubatizo wake. Kama Yesu alivyosema, “Mimi ni Alfa na Omega,” Yeye ni Mungu wa milele. Kwa kuwa Yesu ni Mwana wa Mungu aliye hai, basi ndio maana aliweza kuitimiza wokovu wake wa milele mara moja na kwa wote: Yesu alikuja hapa duniani mara moja; akazibeba dhambi za ulimwengu zote mara moja na kwa wote kwa kubatiza na Yohana Mbatizaji mara moja; alisulubiwa na akaimwaga damu yake mara moja, na kwa sababu hiyo amezioshelea mbali dhambi zetu mara moja.

Tunapaswa kuufahamu ukweli wa injili ya maji na Roho na kumwamini Yesu kuwa ni Mwokozi. Yesu alizioshelea mbali dhambi za ulimwengu kwa kubatizwa mara moja. Dhambi zako zilipitishwa kwenda kwa Yesu mara moja wakati alipobatizwa. Hivyo, kwa kubatizwa mara moja, Yesu aliitimiza haki yote ya Mungu ambayo inazitowesha dhambi za ulimwengu. Ni lazima utambue kuwa dhambi zako zote zilipitishwa kwenda kwa Yesu kwa kupitia ubatizo wake. Pia ni lazima uliamini jambo hili. Kwa kweli huwezi kupata hasara kwa kuliadini jambo hili. Tunaweza kupokea ondoleo la dhambi la milele kwa dhambi zetu kwa kuwa na imani katika injili ya maji na Roho.

Ikiwa utajikuta wewe mwenyewe unamwomba Yesu ili akusamehe dhambi zako za kila siku, basi ni lazima utambue kuwa bado hujazaliwa tena upya. Pia unapaswa kuuelewa ukweli wa injili ya maji na Roho, na pia unapaswa kumwamini Yesu kuwa ni Mwokozi wako wa kweli tena na tena kwa mujibu wa injili. Wachungaji ulimwenguni mwote, ambao wameuelewa vibaya ubatizo wa Yesu, wanapaswa kumwamini Yesu kwa mara nyingine tena. Wachungaji wengi hawana ule ufahamu mzuri wa injili ya maji na Roho ambayo imezioshelea mbali dhambi zao. Sasa unafikiri itawezekanaje

kwa wao kuwasaidia wengine kupokea ondoleo la dhambi wakati hata wao wenyewe hawajapokea ondoleo la dhambi? Ikiwa kwa namna yoyote ile umekuwa ukijifanya kuwa mtakatifu kwa matendo yako na mwonekano wa mwili wako ingawa moyo wako bado una dhambi, basi wewe ni mwanadini mnafiki na ni mtoto wa maangamizi. Kwa kweli watu hawataweza kupokea ondoleo la dhambi kwa msaada wako.

Hata hivyo, nafsi yako inaweza kuwekwa huru toka katika dhambi zako zote pale utakapoweza kutofautisha kati ya wokovu wa kweli na dini za uongo za hapa ulimwenguni kwa imani inayofahamu na kuamini katika injili ya maji na Roho. Ni pale tu utakapoifahamu injili ya maji na Roho kwa usahihi, Neno la Mungu la uzima, na kisha kuliadini kwa usahihi katika moyo wako, basi dhambi zako zote zinaweza kuoshelewa mbali. Lakini kuna watu wengi sana ambao bado wanabakia kuto utambua ukweli kuwa dhambi za ulimwengu zilipitishwa kwenda kwa Yesu wakati alipobatizwa na Yohana Mbatizaji. Kwa hiyo wewe mwenyewe ni lazima kwanza uikubali injili ya maji na Roho katika moyo wako kwa kuamini. Yesu alisema, *“Kwa kuwa, ndivyo itupasavyo kuitimiza haki yote” (Mathayo 3:15)*. Yesu aliitimiza haki yote ya Mungu wakati alipobatizwa. Yesu alizipokea dhambi zote za ulimwengu kwa kupitia ubatizo huu ambao aliupokea. Dhambi zako zote zilipokelewa na Yesu kwa ubatizo huu.

Je, ninyi si watu wa ulimwengu huu? Kwa kweli ninyi ni watu wa ulimwengu huu. Je, dhambi zenu hazijajumuishwa katika dhambi za ulimwenguni humu? Kwa kweli dhambi zetu zimejumuishwa. Mara utakapoutambua ukweli huu, basi unaweza kukombolewa kwa kupitia ukweli kuwa Yesu alizibeba dhambi zako zote kwa kubatizwa kwake. Kule kutambua kuwa ninyi ni wenye dhambi ambao mmefungwa kwenda kuzimu ni hatua muhimu sana inayoweza kukuongoza

kutambua kuwa Mwokozi wako pekee ni Yesu Kristo tu.

Je, upo ndani ya Kristo? Au bado upo nje ya Kristo? Unapaswa kufahamu vizuri mahali ulipo. Ninyi ni watu wa ulimwengu huu. Kama ni hivyo, je, dhambi zenu zote zilipitishwa kwenda kwa Yesu au la? Kwa kweli dhambi zenu zote zilipitishwa kwenda kwa Yesu. Je, unakubali kuwa wale Wakristo wanaosema kuwa, “Bwana, mimi bado ni mwenye dhambi,” si Wakristo waliozaliwa tena upya? Pamoja na kuwa wanamwamini Yesu, ukweli ni kuwa bado hawafahamu dhambi zetu zilipitishwa kwenda kwa Yesu kwa kupitia ubatizo wake, na kwa sababu hiyo wanakazia juu ya damu ya Msalaba na wanateseka kila siku huku wakiomba Mungu awasamehe dhambi zao.

Hata hivyo, Mtume Paulo ametuambia nini? Paulo alituambia kuwa, *“Furahini siku zote; ombeni bila kukoma; shukuruni kwa kila jambo; maana hayo ni mapenzi ya Mungu kwenu katika Kristo Yesu” (1 Wathessalonike 5:16-18)*. Ikiwa tutaendelea kupiga mayowe kumng’ang’ania Mungu ili kuzisamehe dhambi zetu, basi kile tunachokifanya ni kuukufuru ubatizo wake na damu yake hata kama tunakiri kuwa tunamwamini Yesu. Aina hii ya imani ni matukano tu kwa Yesu.

Je, Sisi Sote Tunaamini Katika Injili ya Maji na Roho?

Yesu alibatizwa na Yohana Mbatizaji. Dhambi zetu zote zilipitishwa kwenda kwa Yesu wakati huo mara moja na kwa wote. Yesu aliimwaga damu yake Msalabani baada ya kuwa amezipokea dhambi za ulimwengu kwa kupitia ubatizo wake. Kisha akafufuka tena toka kwa wafu katika siku ya tatu na sasa

anakaa mkono wa kuume wa kiti cha enzi cha Mungu.

Kwa kweli tunatakiwa kwa haraka kabisa kuupata ufahamu sahihi kuhusu ikiwa Yesu alizichukua dhambiza ulimwengu au la wakati alipobatizwa. Ni laziima tuitikie wokovu wa Mungu kwa kufahamu na kuamini katika injili ya maji na Roho. Ni lazima tukiitikie kile ambacho Mungu alikifanya kwa ajili yetu hali tukisema, “Hiyo ni sawa.” Wakati Biblia inapotueleza kuwa Bwana alizichukulia mbali dhambi zote za ulimwengu kwa kubatizwa, basi tunapaswa kuyaacha mawazo yetu binafsi na kuitikia maneno hayo ya Mungu kwa kuliadini Neno kama lilivyo. Kama Bwana asingelizichukua dhambi zetu kwa ubatizo wake, basi damu ya Yesu iliyomwagika Msalabani ingelikuwa ni bure. Ni lazima tuamini katika injili ya maji na Roho kwa mioyo yetu yote. Bwana amezitoweshea mbali dhambi zetu zote za ulimwengu.

Imani na wokovu havitegemei juhuzi zako binafsi. Wokovu wako toka katika dhambi unategemea ikiwa una imani katika injili ya maji na Roho ambayo Yesu ametupatia.

Je, sasa unatambua kuwa injili ya maji na Roho ni injili pekee iliyo ya kweli, na je unataka kuukiri ukweli huu katika moyo wako? Kama ni hivyo basi unapaswa kukiri kama ifuatavyo: “Bwana, hadi leo hii nilikuwa sijafahamu kuwa ulizichukua dhambi za ulimwengu mara moja na kwa wote kwa kubatizwa kwako; Kwa kweli nilikuwa nikielewa vibaya na sikuwa nikiamini. Lakini ninakushukuru kwa kunifanya niweze kutambua hata sasa, kiasi kuwa niliuelewa vibaya wokovu wako. Sasa, kwa kuwa nimefikia hatua ya kufahamu na kuufahamu ukweli wa maji na Roho, kwa kweli ninauamini ukweli huo na kukushukuru wewe Yesu kwa ajili hiyo.”

Wewe pia unapaswa kuifahamu injili ya maji na Roho na ufahamu kuwa injili hiyo si kwa ajili ya mtu mwingine bali ni kwa ajili yako, na kisha uikubali katika moyo wako kama

ilivyo. Kule kuukiri wokovu katika moyo wako kama ulivyo ndiyo imani ilivyo, na hii ndiyo imani inayojengwa katika ufahamu sahihi wa Yesu, yeye anayekuwezesha kumpokea katika moyo wako. Na kule kuiamini hii kweli ndiyo njia pekee ya kuweza kukufanya wewe kufanyika mtoto wa Mungu, na ndiyo imani halisi inayokutoa toka katika dhambi zako zote. Je, uelewa wako wa injili ya maji na Roho ni upi? Na je unaamini vipi?

Bwana wetu alisema, *“Tena mtaifahamu kweli, nayo hiyo kweli itawaweka huru” (Yohana 8:32)*. Ni lazima tuutambue ukweli wa injili ya maji na Roho kama ilivyo. Hii ndiyo imani inayoamini katika Mungu. Yesu ametuokoa toka katika dhambi za ulimwengu kwa maji na damu. Kwa kuwa Yesu ametuokoa toka katika dhambi za ulimwengu kwa maji na Roho, basi wale wote wanaoamini hivi mbele za Mungu basi kwa hakika watazaliwa tena upya.

Je, Ninyi Bado ni Wadeni?

Katika Yohana 3 Yesu alisema kuwa mtu asipozaliwa kwa maji na Roho hawezi kuingia katika Ufalme wa Mbinguni. Kuzaliwa tena kwa maji na Roho kunawezekana pale tu tunapoamini katika ubatizo wa Yesu, damu yake Msalabani, na ule ukweli kuwa Yesu ni Mwana wa Mungu na Mwokozi. Je, unaamini katika injili ya maji na Roho?

Hebu tufikirie kuwa kuna mtu amejilimbikizia deni la nusu milioni za dola. Riba peke yake kutokana na deni hilo bado inakuwa ni kubwa sana kwa mtu huyo mwenye deni kulilipa. Kwa watu wa kawaida wanaofanya kazi, deni la jinsi hii ni kubwa sana kuweza kulilipa. Mtu huyo anayedaiwa hakuweza kulilipa deni hilo na akajikuta amefilisika na

akaamua kukimbia. Lakini hata kama akikimbia na kwenda kufanya kazi mahali pengine, je mtu huyu anaweza kulipa walau riba hiyo pasipo deni lote halisi? Halafu inatokea kuwa yule anayedai akaenda kwa shahidi ili kudai alipwe fedha zake, lakini hata yule mdhamini hakuwa na fedha za kulipa pia. Kisha yule mdai akaenda kwa wazazi wa yule mdeni wake na kuwatishia kwa kila aina ya vitisho ili kuwalazimisha ili waweze kulilipa deni lake. Wazazi hawakuweza kuvumilia hilo wakaamua kumlipa anayedai na kisha yule mdeni akawapatia wazazi risiti ya malipo waliyoyafanya.

Baada ya kumlipa yule mdai, basi baba akaanza kumtafuta mtoto ambaye kwa hakika alikuwa akiteseka kimwili na kiakili. Yule baba alimtafuta mwanawe kwa miaka 10 lakini hakuweza kumpata. Siku moja baada ya miaka 12 kupitia, yule mtoto akarudi hali akiwa amejilimbikizia kiasi fulani cha fedha. Kwanza alienda kwa baba yake na kusema, “Nimetunza dola \$400,000, lakini bado ninapungukiwa dola \$100,000. Je, unaweza kuniazima kiasi hicho? Nitakaa pamoja na wewe na kufanya kazi za juhudi ili niweze kukulipa.” Kisha yule baba alimkumbatia yule mwanawe kwa machozi huku akimwambia, “Nimekwisha kulipia deni lako lote! Huna kitu cha kuhofia tena! Umeteseka kwa kiasi kikubwa muda huu wote!” Baada ya kumweleza yule mtoto wake kuwa ameshalilipa lile deni basi yule baba alionyesha risiti ya malipo.

Yule mtoto alijawa na shukrani, lakini pia alijiwazia yeye mwenyewe kuwa aliteseka pasipo sababu ya kuteseka hali akijifikiria, “Kwa miaka 12 iliyopita nimeishi maisha magumu kama mfu anayepumua, sikuwa na muda wowote wa amani, wakati kumbe nilikuwa na muda huo. Niliishi kama mfu anayepumua hali sikuwa mfu. Kwa kweli sikufahamu. Kumbe mateso yangu yote yamekuwa ni bure!”

Ndugu Wakristo wapendwa, wale wanaojaribu kupokea

ondoleo la dhambi zao kwa jitihada zao wenyewe, hata pale ambapo Yesu amezitoweshea mbali dhambi zao kwa kupitia ubatizo wake na damu yake Msalabani, basi ni wazi kuwa watu hao bado wanasumbuliwa na tatizo la dhambi kama vile yule mtoto mdaiwa alivyokuwa akidaiwa.

Yesu amekwishazitoweshea mbali dhambi zetu zote. Yesu amekwishazichukulia mbali dhambi zetu zote kwa kubatizwa kwake, kisha akabeba adhabu ya dhambi kwa kuimwaga damu yake Msalabani na kwa sababu hiyo ametuokoa sisi. Je, unalifahamu hili? Ule ukweli kuwa ulikuwa umefungwa katika dhambi zako kunatokana na ukweli kuwa ulikuwa bado hujafahamu kuwa Yesu alizichukulia mbali dhambi zako wakati ulipobatizwa. Kwa kweli Yesu alizichukulia dhambi mbali dhambi zako zote. Naomba uamini hivyo.

“Hakuna Tena Sadaka ya Dhambi”

Sasa hebu tugeukie Waebrania 10:1-18, *“Basi torati, kwa kuwa ni kivuli cha mema yatakayokuwa wazi si sura yenyewe ya mambo hayo, kwa dhabihu zilezile wanazozitoa kila mwaka daima, haiwezi kwa kati wowote kuwakamilisha wakaribiaao. Kama ndivyo, Je! Dhabihu hazingekoma kutolewa; kwa maana waabuduo, wakisha kusafishwa mara moja, wasingejiona tena kuwa na dhambi? Lakini katika dhabihu hizo liko kumbukumbu la dhambi kila mwaka. Maana haiwezekani damu ya mafahali na mbuzi kuondoa dhambi. Kwa hiyo ajapo ulimwenguni, asema:*

‘Dhabihu na toleo hukutaka,

Lakini mwili uliniwekea tayari.

Sadaka za kuteketezwa na sadaka za dhambi

Hukupendezwa nazo.

*Ndipo niliposema, Tazama, nimekuja—
(katika gombo la chuo nimeandikwa)
Niyafanye mapenzi yako, Mungu.’’*

Hapo juu asemapo, Dhabihu na matoleo na sadaka za kuteketezwa na hizo za dhambi hukuzitaka, wala hukupendezwa nazo (Zitolewazo kama iivyoamuru torati), ndipo aliposema, tazama, nimekuja niyafanye mapenzi yako. Aondoa la kwanza ili kusudi alisimamishe la pili. Katika mapenzi hayo mmepata utakaso, kwa kutolewa mwili wa Yesu Kristo mara moja tu. Na kila kuhani husimama kila siku akifanya ibada, na kutoa dhabihu zile zile mara nyingi; ambazo haziwezi kabisa kuondoa dhambi. Lakini huyu, alipokwisha kutoa kwa ajili ya dhambi dhabihu moja idumuyo hata milele; tangu hapo akingojea hata adui zake wawekwe kuwa chini ya miguu yake. Maana kwa toleo moja amewakamilisha hata milele hao wanaotakaswa. Na Roho Mtakatifu naye amshuhudia; kwa maana, baada ya kusema, Hili ni agano nitakaloagana nao baada ya siku zile, anena Bwana, Nitatia sheria zangu mioyoni mwao, Na katika nia zao nitaziandika; ndipo anenapo, Dhambi zao na uasi wao sitaukumbuka tena kabisa. Basi ondoleo la hayo likiwapo hapana toleo tena kwa ajili ya dhambi.’’

Kifungu hiki cha maandiko kinasema kuwa Torati ni “kivuli cha mema yatakayokuwa.” Kama ambavyo kule kuwekea mikono katika Agano la Kale kulivyokuwa halisia, basi ndivyo ilivyokuwa halisia kuwa Yesu alikuja hapa duniani na kisha akazichukua dhambi zetu zote mara moja na kwa wote kwa kubatizwa na Yohana Mbatizaji. Agano la Kale ni kivuli cha Agano Jipya. Vivuli vinaweza kuwepo pale tu kunapokuwa na maumbo ya kutoa vivuli hivyo.

Vivyo hivyo, wokovu wa Mungu uliodhihirishwa katika Agano la Kale ulitambuliwa kwa kupitia huduma ya Yesu

Kristo. Katika Agano la Kale, wanakondoo wengi wasio na idadi, na mbuzi, na njiwa walichinjwa na kutolewa sadaka kwa Mungu. Lakini haikuwezekana kwa damu ya mafahali na mbuzi kuziondolea mbali dhambi. Ondoleo la dhambi la milele lilipaswa kutimilizwa na Yesu ambaye ni Kuhani Mkuu wa Mbinguni. Hii ndiyo sababu Bwana wetu alikuja hapa ulimwenguni, akabatizwa, na kisha akaimwaga damu yake kwa ajili yetu.

Hali kikizungumzia juu ya Yesu, Kitabu cha Warumi kinatangaza kuwa Yesu ni Kuhani Mkuu wa Mbinguni. Katika Agano la Kale, Kuhani Mkuu ndiye aliyeziondoa dhambi za Waisraeli kwa kutoa sadaka kwa Mungu kwa niaba yao. Hivyo, Bwana wetu alikuja kama Kuhani Mkuu wa Mbinguni. *“Tazama, nimekuja (katika gombo la chuo nimeandikiwa) Niyafanye mapenzi yako, Mungu.”* Yesu alikuja kuyafanya mapenzi ya Mungu Baba.

Je, unafikiri mapenzi ya Mungu Baba ni yapi? Ni kuwaokoa wanadamu wote toka katika dhambi zao. Kwa kweli hakukuwa na mwanadamu hata mmoja katika sayari hii ambaye hakuweza kuyafanya mapenzi ya Mungu Baba. Kulikuwa na mmoja tu ambaye angeliweza kuyafanya mapenzi ya Baba, na huyu si mwingine bali ni Yesu. Kwa kuwa Yesu alizipokea dhambi zote za mwanadamu na kuzitoweshea mbali dhambi hizo kwa kuyatii mapenzi ya Mungu Baba, basi Baba anaweza sasa kuwapokea wale wote wanaomwamini Mwanawe kama wanawe mwenyewe. Haya yalikuwa ndiyo mapenzi ya Mungu Baba. Kwa maneno mengine, mapenzi ya Mungu yalikuwa ni kuzitoweshea mbali dhambi zetu.

Yesu alikuja hapa duniani, akazichukua dhambi zote za ulimwengu kwa kubatizwa, akaimwaga damu yake na kufa Msalabani ili kuyafuta mapenzi ya Mungu Baba, na kwa sababu hiyo ametupatia maisha mapya. Hii ndiyo sababu katika

Waebrania 10:9, Bwana wetu alisema, *“Tazama, nimekuja niyafanye mapenzi yako, Mungu.”*

Aya ya 9 inaendelea kusema, *“Aondoa la kwanza ili aweze kulisimamisha la pili.”* Utaratibu wa sadaka ya kuteketezwa wa Torati haukuweza kutoa wokovu wa milele kwa wanadamu. Kwa hiyo, Mungu ametoa wokovu wa milele kwa wale wote wanaoamini katika injili ya maji na Roho na si Torati. Je, tunaweza kuziondolea mbali dhambi zetu baadhi kwa kufanya kazi au matendo mema? Au kwa kutoa sala za toba? Au kwa kutoa matoleo makubwa katika makanisa yetu? Hakuna kati ya haya yanaweza kuzioshela mbali dhambi zetu. Kwa kweli hatuwezi kupokea ondoleo la dhambi kwa kupitia matendo yetu mema. Hii ndiyo sababu Bwana wetu alikuja hapa duniani ili abatizwe na kuimwaga damu yake.

Waebrania 10:10 inasema, *“katika mapenzi hayo mmepata utakaso, kwa kutolewa mwili wa Yesu Kristo mara moja tu.”* Yesu amefanyika kuwa Mwokozi wetu sisi tunaoamini kwa kubatizwa mara moja, kwa kufa Msalabani mara moja, na kisha kufufuka tena toka kwa wafu mara moja. Wapendwa Wakristo, ni muhimu sana kwako kutambua kuwa huwezi kupokea ondoleo la dhambi zako kwa kupitia Torati. Lakini mara utakapoamini katika maji na damu ya Yesu, na kwamba Yesu ni Mungu mwenyewe, basi ninyi nyote mtaweza kuingia Mbinguni.

Ili kuzifanya dhambi zetu ziweze kutoweka, Yesu alitoa sadaka ya kudumu kwa mwili wake kwa kubatizwa na kuimwaga damu yake. Yesu amefanyika kuwa Mwokozi wa milele kwa kuja hapa duniani, kwa kubatizwa, kwa kufa Msalabani, na kwa kufufuka tena toka kwa wafu. Je, dhambi zako zilipitishwa kwenda kwa Yesu milele wakati Yesu alipobatizwa? Je, hivi ndivyo Yesu alivyosema, *“imekwisha,”* alipokuwa akifa Msalabani? Je, Mungu ameiweka sheria ya

uzima katika mioyo yetu na amezitoweshea mbali dhambi zetu zote? Je, imani yako imewekwa katika injili ya maji na Roho? Je, umekuwa mwenye haki kwa kuamini injili hii? Au bado umebakia kuwa mwenye dhambi?

Ninyi nyote ni wenye haki. Kabla hujalisikia Neno, ninyi nyote mlikuwa ni wenye dhambi, lakini baada ya kulisikia Neno, sasa mmefanyika kuwa wenye haki na mmeuvaa utu mpya katika ufahamu mpya (Wakolosai 3:10). Sasa tunawezaje basi kubatizwa katika Yesu? Tunaweza kubatizwa katika Yesu Kristo, kufa pamoja naye, na kisha kufanywa hai kwa kuamini katika huduma ya haki ya Yesu kwa mioyo yetu yote. Hii ndiyo kanuni ya msingi ya imani inayoamini kwa moyo.

Ndugu Wakristo wapendwa, hebu tutambue sote kuwa hakuna njia nyingine ya sisi kuingia Mbinguni bali ni kwa imani; hebu sisi sote tufahamu na kuamini katika ubatizo huu wa Yesu na damu yake, badala ya kuitanguliza haki yetu binafsi; na kwa kufanya hivyo sisi sote tutaoshwa na kuwa safi toka katika dhambi zetu zote.

Kwa imani yangu ninatoa shukrani zangu nyingi sana zisizo na mpaka mbele ya injili ya maji na Roho ambayo Mungu ametupatia kwa kupitia Bwana wetu. Ni matumaini yangu kuwa kila mmoja wenu atafikia hatua ya kufahamu bila kushindwa juu ya ukweli wa injili ya maji na Roho iliyofunuliwa katika Mathayo 3:13-17, na kisha atauamini ukweli huo kwa moyo wake wote, na kwa sababu hiyo ninyi nyote mtafanyika kuwa watu wa Mungu mwenyewe.

Baraka zote za Mungu na ziwe juu yenu! ☒

SURA YA

4



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Kumwogopa Mungu na Kumtumikia Mungu ni Baraka

< Mathayo 4:1-11 >

“Kisha Yesu alipandishwa na Roho nyikani, ili ajaribiwe na Ibilisi. Akafunga siku arobaini mchana na usiku, mwisho akaona njaa. Mjaribu akamjia akamwambia, Ukiwa ndiwe Mwana wa Mungu, amuru kwamba mawe haya yawe mikate. Naye akajibu akasema, Imeandikwa, Mtu hataishi kwa mkate tu, ila kwa kila neno litokalo katika kinywa cha Mungu. Kisha Ibilisi akamchukua mpaka mji mtakatifu, akamweka juu ya kinara cha hekalu, akamwambia, Ukiwa ndiwe Mwana wa Mungu jitupe chini; kwa maana imeandikwa,

‘Atakuagizia malaika zake;

‘Na mikononi mwao watakuchukua,

Usije ukajikwaa mguu wako

Katika jiwe.’

Yesu akamwambia, Tena imeandikwa Usimjaribu Bwana Mungu wako. Kisha Ibilisi akamchukua mpaka mlima mrefu mno, akamwonyesha milki zote za ulimwengu, na fahari yake, akamwambia, Haya yote nitakupa ukianguka kunisujudia. Ndipo Yesu alipomwambia, Nenda zako, Shetani, kwa maana imeandikwa, Msujudie Bwana Mungu wako, umwabudu yeye peke yake. Kisha Ibilisi akamwacha; na tazama wakaja malaika wakamtumikia.”

Haki ya Mungu inayotuokoa toka katika dhambi zetu ipo hivi, kwamba Yesu alibatizwa na Yohana Mbatizaji na kwamba aliimwaga damu yake na kufa Msalabani ili kutuokoa tokakatika dhambi zetu zote mara moja na kwa wote, na kwamba Mungu alishuhudia kuwa Yesu alikuwa ni Mwokozi. Kifungu cha maandiko cha leo kinahusu tukio ambalo lilitokea mara baada ya ubatizo wa Yesu katika Mto Yordani.

Baada ya kubatizwa kwa Yesu, Yesu aliongozwa na Roho Mtakatifu kwenda nyikani ili akajaribiwe na Ibilisi. Na kwa sababu alikuwa na njaa baada ya kuwa amefunga kwa siku 40 mchana na usiku, basi Ibilisi alijaribu kumjaribu Yesu kwa majaribu matatu.

Jaribu la Kwanza

Jaribu la kwanza la Ibilisi limeandikwa katika aya ya 3: *“Mjaribu akamjia akamwambia, Ukiwa ndiwe Mwana wa Mungu, amuru kwamba mawe haya yawe mikate.”*

Yesu alikuwa na njaa kiasi gani baada ya kuwa amefunga kwa siku 4 mchana na usiku? Wakati mwili wa Yesu ulipokuwa na njaa sana, Ibilisi alimjaribu kwa chakula. “Ukiwa ndiwe Mwana wa Mungu, amuru kwamba mawe haya yawe mikate. Kisha utayala! Yaamuru yawe mikate. Kisha utakuwa hai! Je, si una njaa sana kiasi cha kifo? Ikiwa unataka kuishi basi fanya hivyo nilivyokwambia. Umefunga kwa siku 40 mchana na usiku hivyo ni lazima utakuwa ukikaribia kufa kwa njaa, je unahitaji kiasi gani cha chakula ili ule? Na je, kuna kitu gani hapa nyikani? Ikiwa wewe ndiwe Mwana wa Mungu basi unaweza kuyaamuru mawe haya kuwa mkate na kisha ukayala, si unaweza? Basi kula. Kula.”

Ni wazi kuwa Ibilisi alikuwa akimjaribu Yesu kwa sababu

alifahamu kuwa Yesu alikuwa ni Mwana wa Mungu. Lakini Ibilisi alimjaribu Yesu kwa chakula. Kwa maneno mengine, alikuwa akimjaribu Yesu kwa kupitia maisha yake ya kimwili. “Kuliko kufa na njaa, basi ni bora uyafanye mawe haya kuwa mikate ili uishi. Ikiwa unataka kuishi sasa, ni lazima unahitaji mkate kwa ajili ya mwili! Ikiwa wewe ndiwe Mwana wa Mungu, basi unaweza kabisa kuyafanya mawe haya kuwa mikate. Na hapo utaweza kuishi. Basi fanya hivyo. Fanya hivyo.” Ibilisi alimjaribu Yesu wakati Yesu alipokuwa na njaa kali kana kwamba angeliweza kuwa hai tu ikiwa atapata mkate. Hata hivyo, Yesu alilikanusha jaribu hili kwa kusema, “*Mtu hataishi kwa mkate tu, ila kwa kila neno litokalo katika kinywa cha Mungu.*”

Ndugu zangu Wakristo, katika hali ya kawaida, mwili na nafsi ya mwanadamu vinaishi kwa kutegemea kitu gani? Je, mtu anaweza kuishi milele kwa mkate kwa ajili ya mwili? Ibilisi alikuwa akimjaribu Yesu kwa mkate kwa ajili ya mwili. Ni kitu gani tunachopaswa kukiamini kwa kweli ili tuweze kuishi? Bwana alisema, “Imeandikwa, Mtu hataishi kwa mkate tu, ila kwa kila neno litokalo katika kinywa cha Mungu,” na hii ni kweli.

Wakati mtu anapokuwa na njaa, basi mtu huyo anafikiri kuwa inampasa kula mkate ili aweze kuishi, lakini kusema kweli, maisha ya mtu yanategemea imani katika Neno la Mungu. Maisha ya mtu ya kimwili na nafsi yanategemea juu ya Neno la Mungu. Ikiwa Neno la Mungu lisingekuwapo ulimwenguni, basi roho zetu na miili yetu ingelikuwa imepangiwa kufa. Mungu alisema kuwa miili yetu na nafsi zetu itaishi kwa imani katika litokalo katika kinywa cha Mungu, na hivyo ndivyo ilivyo. Kwa kuwa Neno la Mungu lililoandikwa ndio Ukweli, basi nafsi zetu zinaweza kuishi kwa kutegemea Neno la Mungu kwa imani. Kutokana na Neno la Mungu

ambalo ni chakula cha uzima, basi miili na nafsi zetu sote inaweza kuishi katika ukamilifu wake.

Mungu amelitoa Neno lake kwa watu wake. Mungu anawalisha kwa kupitia Neno, anasamehe dhambi, na anawafanya watu wake kuishi kwa kupitia Neno. Neno la Mungu liliumba vitu vyote katika ulimwengu huu, na aliruhusu kila kitu ambacho mwanadamu aliihitaji katika ulimwengu huu. Pia kwa kuwa kuna Neno la Mungu, basi nafsi zetu zinaweza kupokea ondoleo la dhambi mara moja na kwa wote kwa kupitia imani. Neno la Mungu ni aina ya Neno ambalo linazifutilia dhambi zetu zote. Neno la Mungu ni Neno la Kweli linalotuongoza kwenda katika Nuru, hivyo ni wale tu wanaoliamini Neno hilo ndio wanaoweza kuishi. Pia tunahitaji kuamini kuwa tunaweza kuishi kwa kuamini katika Neno la Mungu. Hii ni kweli. Ni lazima tufahamu kuwa wanadamu wanaishi kwa kuamini katika Neno la Mungu lililoandikwa badala ya kuishi kwa sababu ya uwepo wa mkate kwa ajili ya mwili. Bwana wetu alituambia kuhusu Neno la Mungu.

Kadri tunavyoishi katika ulimwengu huu, mara nyingi tunaangukia katika majaribu binafsi kwa sababu tumetekwa na tamaa zetu. Watu wanafikiria kuwa ikiwa tutakuwa na kiasi fulani cha fedha, basi tunaweza kuishi kwa raha katika ulimwengu huu. Kwa kweli, hii inaeleweka. Hata hivyo, ni kitu gani ambacho mwadamu anaishi kwa hicho? Je, mwanadamu anaishi kwa mambo gani? Mwanadamu anaweza kuishi kwa kuliadini Neno la Mungu lililoandikwa. Ikiwa kusingekuwa na Neno la Mungu, basi isingewezekana kwetu kumwamini Mungu au kukutana na Mungu.

Mwanadamu hawezi kuishi kwa mkate kwa ajili ya mwili tu. Hasa sisi wenye haki tunaweza kuishi ikiwa tutayasikia mafundisho sahihi ya Neno la Mungu. Ni vizuri kufahamu kuwa mwanadamu hajaumbwa kwa mwili pekee, bali

ameumbwa pia akiwa na nafsi na roho pia. Hivyo, ikiwa tutalisikia Neno la kweli la Mungu, basi tunaweza kutatua matatizo ya nafsi zetu kadri tunavyoishi. Kwa kusoma na kulisikia Neno la Mungu, nafsi zetu na miili yetu inaweza kupata uzito na kisha kuishi katika mafanikio. Ni pale tutakapolisikia Neno la kweli la msamaha wa dhambi basi hapo ndipo tunapoweza kupokea kusafishwa dhambi za nafsi zetu. Hii ndio sababu kila aliyelisikia Neno la kweli la Mungu basi anaweza kuishi katika mwili na nafsi kwa kuliadini Neno hilo.

Mara nyingi Ibilisi anamjaribu kila mtu kwa maneno kama haya: “Ikiwa ndiwe Mwana wa Mungu, amuru mawe haya kwamba yawe mkate. Yafanye mawe haya yawe mkate na kisha uyale. Ikiwa wewe ni mwana wa Mungu jambo hilo si linawezekana? Je, si una njaa? Basi fanya hivyo. Fanya hivyo. Ikiwa utapata mkate basi utaweza kuishi, si ndivyo? Kwa namna yoyote ile mwanadamu anaweza kuishi ikiwa atakula walau milo mitatu kwa siku, na kwamba ana akiba ya chakula cha kutosha kwa siku zote 365 za mwaka zidisha mara miaka 70 au 80. Je, huoni kuwa mwanadamu hawezi kufa bali ataishi ikiwa ana chakula?” Hivi ndivyo Ibilisi anavyotuambia mara kwa mara.

Ibilisi anawaambia watu hivi, na watu wengi wamefanywa wajinga kwa kauli hizi za Ibilisi. Kuna watu wengi ambao wanaangukia katika hili hali wakifikiri, “Hiyo nikweli. Ninaweza kuishi na kuwa hai ikiwa nitakuwa na kitu hiki.” Kwa kweli hapa hatuzungumzii fedha peke yake, bali tunazunguzia yala mawazo ya jumla kuwa ninaweza kuishi ikiwa nitakuwa na vitu fulani vya kidunia ninavyovihitaji. Wakati mwingine tunafikiri “Ninaweza kuishi na sintakufa hata pasipo kuwa na Neno la Mungu.”

Hata hivyo, kuwaza hivyo ni kosa kubwa. Kwa kweli, pasipo Neno la Mungu, basi miili yetu inakufa pia. Kwa kweli

mwanadamu haishi kwa mkate tu, wala haishi kwa na vitu vingi vya kidunia, au kwa kuzipata tamaa za kimapenzi ambazo ulimwengu unaweza kuzitimiza. Na hii ndiyo sababu tunahitaji kusikiliza kwa makini kile ambacho Yesu alikisema wakati Ibilisi alipomjaribu, *“Mtu hataishi kwa mkate tu, ila kwa kila neno litokalo katika kinywa cha Mungu.”* Ibilisi anatumjaribu wakati tunapokuwa na udhaifu, tunapokuwa tukihangaika kwa njaa, na wakati nafsi zetu zinapokuwa zimechoka. Mara nyingi Ibilisi anawauliza watu, “Ni wazi kuwa unaweza kuishi unapokuwa na mkate, si ndivyo?” na kwa sababu hiyo anawachanganya watu. Watu wengi wanazingatia vile walivyonyavyo na wanafikiri, “Ooh, nina mali za kutosha kuyawezesha maisha yangu! Basi kwa hali hiyo nitaishi na wala sintakufa hata kama sintalisikia Neno la Mungu.”

Lakini ndugu zangu Wakristo, hata wakati Ibilisi anapotumjaribu kama hivyo, ni vema tutambue kuwa sisi hatuishi kwa mkate tu, bali ni kwa kuliadini kila Neno litokalo katika kinywa cha Mungu. Ninatumaini kuwa tutalikumbuka jambo hili. Ninatumaini kuwa tutakumbuka kuwa hatuwezi kuishi pasipo kuwa na Neno la Mungu.

Unaweza kuishi ikiwa tu Neno la Mungu limo ndani ya moyo wako. Ndugu Wakristo wapendwa, je, hivi ndivyo ilivyo? Au si hivyo? Msisahamu ule ukweli kuwa tunaweza kuishi kwa kuwa Neno la Mungu lipo. Sababu iliyowafanya wanadamu wakaendelea kuwepo hadi wakati huu ni kwa sababu kuna Neno la Mungu. Wakati injili ya maji na Rjoho inapokuwa ikienezwa hata miisho ya ulimwengu, basi Bwana wetu atakuja, na wakati atakapokuja, Yesu alisema atauhitimisha ulimwengu huu na kisha kuanzisha ulimwengu mpya. Mambo haya yote yatakamilika kwa mujibu wa Neno lake.

Ndugu Wakristo wapendwa, Neno la Mungu ni ndio Kweli. Yesu alilishinda jaribu la kwanza la Ibilisi kwa kusema, *“Imeandikwa, Mtu hataishi kwa mkate tu, ila kwa kila neno litokalo katika kinywa cha Mungu”* Basi Ibilisi aliposikia hivi alishangazwa. Hata hivyo Ibilisi hakuishia kwa jaribu hilo tu.

Jaribu la Pili

Jaribu la pili linapatikana katika aya ya 5: *“Kisha Ibilisi akamchukua mpaka mji mtakatifu, akamweka juu ya kinara cha hekalu, akamwambia, Ukiwa ndiwe Mwana wa Mungu jitupe chini; kwa maana imeandikwa, Atakuagizia malaika zake; Na mikononi mwao watakuchukua, Usije ukajikwaa mguu wako Katika jiwe. Yesu akamwambia, Tena imeandikwa Usimjaribu Bwana Mungu wako.”*

Ibilisi alimjaribu Yesu kwa kumpeleka katika kinara cha hekalu na kisha akamwambia Yesu ajitupe chini. Ibilisi alilitumia Neno la Mungu kwa kuligeuza pale aliposema, ‘Kwa maana imeandikwa, Atakuagizia malaika zake; Na mikononi mwao watakuchukua, Usije ukajikwaa mguu wako Katika jiwe.’ Hapo kwanza ulilikana jaribu langu kwa sababu unaliadini Neno, si ndivyo? Basi sasa ufanye kama ilivyoandikwa. Je, unayaadini maneno haya? Basi jitupe chini, na kwa mujibu wa Neno lililo andikwa, Mungu atakuagizia malaika ili wakuchukue mikononi mwao, watakubeba na kukudaka, ili kwamba usije ukajikwaa mguu wako wakati utakapokuwa ukijitupa chini. Jaribu sasa.” Kisha Yesu akasema, *“Imeandikwa, Usimjaribu Bwana Mungu wako.”*

Ndugu Wakristo wapendwa, nyakati fulani Ibilisi anawajaribu watu kwa kutumia Neno la Mungu lililoandikwa. Hata hivyo, Yesu alisema juu ya kutomjaribu Bwana Mungu

wetu. Ibilisi alimwambia Yesu, “Kwa hakika hutakufa. Kwa nini? Kwa kuwa wewe ni Mwana wa Mungu.” Hii ni kweli. Yesu Kristo ni Mwana wa Mungu. Kwa hiyo, asingeliweza kufa. Yesu ni tofauti na sisi wanadamu. Hata hivyo, Ibilisi bado anamjaribu. Lakini Neno la Mungu linasema “Usimjaribu” Mungu. Kwa maneno mengine, ni lazima tuishi kwa kulihamini Neno la Mungu kuliko kumjaribu Mungu.

Mara nyingi watu wanamjaribu Yesu. Kuna mara nyingi sana ambapo watu huwa wanamjaribu Mungu kwa kusema, “Nilifanya hivi, lakini kwa nini Mungu ananifanyia hivi?” Lakini kama tungelimwamini Mungu kusingekuwa na sababu ya kumjaribu Mungu. Sisi hatuna sifa zinazotupasa kumjaribu Mungu, na hatupaswi kabisa kumjaribu Mungu. Mungu si mtu anayeweza kupokea majaribu toka kwetu. Sababu inayotufanya sisi tujaribiwe ni kwa sababu tunasukumwa kwa tamaa zetu wenyewe, na si kwa sababu Mungu anatujaribu sisi.

Mtu anaweza kuinua hoja dhidi ya Mungu huku akimchukulia Ibrahimu kama mfano: “Ni kwa nini Mungu alimfanya Ibrahimu kumtoa mwanae Isaka? Je, si kwamba Mungu alimjaribu Ibrahimu ili kumwona kama alikuwa akiamini au la?” Lakini hali halisi haikuwa hivyo. Si kwamba Mungu alimjaribu Ibrahimu. Bali, Mungu aliruhusu mchakato huo ili kutuonyesha sisi jinsi Ibrahimu alivyokuwa na imani na jinsi alivyolihamini Neno la Mungu kwa kweli katika moyo wake, na jinsi alivyoweza kufanyika kuwa baba wa imani kwa imani yake.

Ndugu Wakristo wapendwa, ni lazima tulihamini Neno la Mungu. Pamoja na kuwa Mungu haonekani kwetu, sisi tunapaswa kulihamini Neno la Mungu lililoandikwa kuwa ndilo Neno halisi ambao Mungu aliliongea. Tunapata uzoefu kwa kulihamini Neno la Mungu na kwamba Neno la Mungu linatimizwa katika ukamilifu wake wote. Hivyo, ni lazima

tuamini. Ikiwa hivyo ndivyo Neno la Mungu lilivyo, basi tunapaswa kuliadini kama lilivyo, na wala tusiyumbishwe kuhusiana na imani yetu katika Neno hata kama hali inatuyumbisha au kubadilika.

Ikiwa hivyo ndivyo Neno la Mungu lilivyo, basi huo ndio ukweli. Na kama Neno hilo lisipotimilizwa kama Neno la Mungu linavyosema, basi tujue kuwa tatizo lipo upande wetu. Ni kwa sababu hatuna imani, ni kwa sababu imani yetu haina nguvu ya kutosha, maana yake ni kuwa imani yetu inayumba, baadhi ya nyakati tunaonekana kuwa na imani, na wakati mwingine hatuonekani kuwa na imani. Kwa ufupi, Neno halitimizwi kama lilivyosemwa kwa sababu ya tatizo la imani yetu sisi.

Mungu anatenda miujiza yake kwa wale wote wanaoamini kwa kweli katika Neno la Mungu. Hata hivyo, Mungu alisema kuwa wale ambao imani zao zinayumba wasitarajie kupata kupata wakiombacho (Yakobo 1:7-8). Bila kujalisha jinsi imani yetu ilivyo ndogo, jambo la muhimu ni kwamba tunaamini au hatuamini. Tunapaswa kuamini na tusimjaribu Mungu. Ikiwa tunaliadini Neno la Mungu, basi tunapokea ondoleo la dhambi, na jambo hilo linatimizwa kwetu kama Neno lilivyo. Ndugu Wakristo wapendwa, Je, unaamini? —Ndiyo.—

Imani inayoamini katika Neno la Mungu ndiyo yenye umuhimu sana kwangu mimi na kwako. Hii ni kwa sababu Mungu anauangalia moyo wa mtu kuliko hali ya nje ya mtu huyo. Mungu anatazama ikiwa mtu huyo anaamini kwa kweli, anajiheshimu kwa mujibu wa imani, na ikiwa anaishi kwa imani. Hata hivyo, hii haimaanishi kuwa unapaswa kumwonyesha Mungu imani yako yenye nguvu sasa hivi. Hata kama imani yako ni ndogo kama punje ya haradali, basi unapaswa kuikiri imani yako katika Neno la Mungu, ukisema, “Ninaamini. Imani yangu ina mapungufu lakini ninaamini.

Ninafanya hivi kwa sababu ninaamini. Ninasubiri majibu yako kwa sababu ninakuamini Wewe. Ninakufuata kwa sababu ninaliamini Neno lako la ahadi.” Mungu anaziangalia imani imara kama hizo katika mioyo yetu. Wakati Ibilisi anapotujaribu wewe na mimi, basi tunapaswa kumpinga kwa kuamini katika Neno la Mungu lililoandikwa.

Jaribu la Tatu

Tatu, aya ya 8 inatueleza kuwa: *“Kisha Ibilisi akamchukua mpaka mlima mrefu mno, akamwonyesha milki zote za ulimwengu, na fahari yake, akamwambia, Haya yote nitakupa ukianguka kunisujudia. Ndipo Yesu alipomwambia, Nenda zako, Shetani, kwa maana imeandikwa, Msujudie Bwana Mungu wako, umwabudu yeye peke yake. Kisha Ibilisi akamwacha; na tazama wakaja malaika wakamtumikia.”*

“Kwa maana imeandikwa, Msujudie Bwana Mungu wako, umwabudu yeye peke yake.” Kitu ambao sisi wanadamu tunapaswa kukifanya ni kumwambudu Mungu peke yake na kumtumikia. Ni kitu gani ambacho kinahitajika kati yetu na Mungu? Tunapaswa kuishi vipi mbele za Mungu?

Ni lazima tumwogope Mungu, tumwabudu Yeye, tuamini, na tumfuate ikiwa ndiyo mapenzi yake, na kwa kuwa Mungu ni Mungu wa Neno na anaishi kama Neno, basi kwa kumwamini Yeye tunakuwa tukiliamini lile Neno, na tunakuwa tukimheshimu kwa mujibu wa Neno, na tunakuwa tukimwabudu na kumfuata kwa imani. Hivi ndivyo tunavyopaswa kuishi mbele zake *“Nawe utamsujudia Bwana Mungu wako, na kumwabudu yeye peke yake.”* Hili ndilo jukumu ambalo mimi na wewe na wanadamu wote tunapaswa kulifanya mbele za macho ya Mungu. Hakuna zaidi ambacho

tunapaswa kukifanya. Hakuna tunachopaswa kukifanya katika maisha yetu zaidi ya kumkiri Mungu, kumwamini Mungu mkuu, na kumtii, na kumsujudia, kumfuata na kuntumikia Mungu Muumbaji. Hii ndio kazi na ndivyo ilivyo.

Ibilisi alimchukua Yesu hadi katika kilele cha mlima mrefu na kisha akamwonyesha milki zote za ulimwengu na fahari yake. Je, mlima mrefu katika ulimwengu huu ni upi? Ni Mlima Evaristi. Mlima huu una urefu wa mita 8,848 kwenda juu. Ni rahisi sana kukariri urefu wa mlima huu, si ndivyo? Ndugu Wakristo wapendwa, pengine Ibilisi alimwonyesha Yesu ulimwengu akiwa juu ya Mlima Evaristi. Ibilisi alimwambia Yesu kuwa atampatia yote wakati alipokuwa akimwonyesha ulimwengu toka juu ya kilele cha Mlima Evaristi ili kuona kama Yesu atamwabudu yeye. Ibilisi alimwambia Yesu kuwa ikiwa Ibilisi atamwamini Yesu kuwa ni Mungu, na kisha akamtumikia na kumheshimu, basi atampatia ulimwengu mzima.

Lakini Yesu alisema nini? Yesu alisema: “Nenda zako, Shetani, kwa maana imeandikwa, Msujudie Bwana Mungu wako, umwabudu yeye peke yake.” Yeye ninayestahili kumsujua na kuntumikia ni Mungu Baba na sio wewe. Ninachopaswa kukisujudia na kukitumikia si utukufu wa ulimwengu huu.” Hivyo ndivyo Yesu alivyosema.

Kumsujudia na kuntumikia Mungu ndio furaha yetu, na ndio ukamilifu na utimilifu wetu. Kule kumwabudu na kuntumikia Mungu ndio kila kitu kwa kila mtu. Hivi ndivyo tunavyopaswa kufanya, hakuna kitu kingine cha kufanya, na hakuna kilicho na thamani na ukuu kama kuntumikia na kumwabudu Mungu. Kumsujudia Mungu ni kulikiri na kulikubali kila Neno la Mungu, na kuntumikia Mungu ni kumkubali Mungu mwenyewe. Je, kuna mambo gani mengine mazuri ambayo yanaweza kuzidi tendo la kumsujudia Mungu

aliyetuumba? Je, kuna maisha gani mazuri zaidi ya hayo? Je, kuna utukufu gani unaoweza kuwa mzuri kuliko huo? Sisi tunamwabudu Mungu kwa unyenyekevu. Na tunamshukuru Mungu kwa baraka zake zote na kwa kila kitu katika Yeye.

Kile ambacho ni baraka kwetu ni kuwa tunaweza kmwabudu Mungu, na Mungu anatupaka mafuta kwa baraka za Mbinguni wakati tunapomsujudia Yeye, tunapomtii, na tunapomwamini na kuieneza injili ya maji na Roho. Kwa kuwa Mungu ndiye anayetupatia kila kitu, basi Yeye ndiye mambo yote. Kwa kuwa Mungu ndiye mambo yote kwetu, na kwa kuwa ndiye kila kitu kwa wale waliozaliwa tena upya, basi ninaamini kuwa sasa unafahamu kuwa kumwabudu Mungu ni baraka.

Kwa kuwa Mungu yupo hai, basi hata sasa tuna furaha na tunashukuru, na tunaishi hali tukizipokea baraka zote. Kwa kuwa kuna Mungu, na kwa kuwa tuna moyo unaomwogopa Mungu, basi sisi tunaweza kumtukua yeye katika baraka zake.

Je, Ibilisi alisema kuwa ampatia Yesu kila kitu ikiwa atamwabudu yeye wakati alipokuwa akimwonyesha milki za ulimwengu? Kwa kweli kuna vitu vingi sana vya kushangaza katika ulimwengu huu ambavyo hatuvifahamu, na tuweza kutekwa na mng'ao wake kwa kitambo tu. Hata hivyo, hatuwezi kumwabudu Ibilisi hata kama kuna vitu vingi vya kushangaza na vinavyovutia macho yetu.

Ikiwa Ibilisi anataribu kwa vitu vya kidunia na kisha akasema atatupatia kila kitu tunachohitaji hapa duniani ikiwa tutamtumikia yeye kama Mungu, basi tunapaswa kumpinga kwa Neno la Mungu lililoandikwa: *“Nenda zako, Shetani, kwa maana imeandikwa, Msujudie Bwana Mungu wako, umwabudu yeye peke yake.”* Ni lazima tumpinge kwa namna hii. Kusema kweli, Ibilisi hawezi kutupatia vitu vingi. Shetani alijifanya na kumdanganya Yesu kana kwamba yeye alikuwa ni Mungu kwa

kusema: “Ukianguka chini na kunisujudia, basi nitakupatia haya yote,” lakini kusema kweli ni nani ambaye ndiye mmiliki wa vitu vyote? Ni Yesu.

Ndugu Wakristo wapendwa, je, vitu vyote duniani ni vya nani? Ni vyenu wenye haki. Je, vitu vyote duniani ni vya nani? Ni vya wana wa Mungu. Na hii ndio sababu Mungu anatuita sisi kuwa ndio wale watakaoirithi Mbingu. Mungu anawaita wale ambao wamezaliwa tena upya kuwa ndio wale watakaoirithi Mbingu. Ulimwengu huu ni urithi, je sasa ulimwengu huu ni wa nani? Ni wa wenye haki.

Hata hivyo, Ibilisi anasema: “Nisujudie, ikiwa humwamini Mungu, basi niamini mimi na unifuata, nitakupatia kila kitu hapa duniani.” Hii ndio mbinu ambayo mara nyingi shetani anaitumia. Kuna wakati ambapo Ibilisi aliwahi kuniwekea vipingamizi vya namna kama hiyo. Hii ni mbinu ambayo mara nyingi Ibilisi alitumia kwangu hata wakati ambapo bado sijamwamini Yesu. Hata hivyo, Ibilisi alipigwa nje katika raundi ya tatu.

Ndugu Wakristo wapendwa, tuishije mbele za macho ya Mungu? Tunahitaji kuishi maisha ambayo yanamwabudu Mungu, na yanayomtumikia yeye katika maisha yote. Mungu alizisamehe dhambi zetu kwa maji na damu, akatusafisha tukawa safi na kutufanya kuwa watoto wake, na akatupatia baraka ya kuweza kumwabudu na kumtumikia Mungu. Ni lazima tumshukuru Mungu ambaye ametupatia baraka za wokovu, na kisha tumwabudu yeye kwa imani na kisha tumtumikie katika maisha yetu yote.

Hebu litafakari Neno la Mungu kwa uangalifu ambalo lilimezisafishilia mbali dhambi zetu na kutufanya kuwa safi. Bwana alizisafishilia mbali dhambi zetu na kutufanya kuwa safi kwa kuzichukua dhambi zetu zote katika mwili wake kwa ubatizo wake, kwa kusulubiwa Msalabani, na kwa kupokea

adhabu kwa niaba yetu. Bwana ametupatia baraka kwamba tunaweza kumwabudu Mungu na kumtumikia kwa kutusafisha na kuwa safi kwa maji na damu na kisha kutufanya sisi kuwa watu wa Mungu.

Ni aina ipi ya jaribu ambalo linakusumbua wewe na mimi? Je, unafanyaje kuyashinda majaribu haya? Yesu alitupatia jibu sahihi kwa kupitia majaribu matatu aliyoyapitia katika kifungu cha leo cha maandiko. Yesu aliyapinga majaribu ya Ibilisi kwa imani yake katika Neno la Mungu. Ikiwa tunalielewa jibu hili, halafu tukaishi hali tukiwa tunaliadini jibu hili, basi sisi pia tunaweza kuyapinga majaribu haya. Pamoja na kuwa kumwabudu Mungu ni baraka, kusema kweli wengi wetu hatufahamu vizuri kuhusu hilo.

Ndugu Wakristo wapendwa, je, unafikiri ni vema kutumikiwa kuliko kumtumikia bila kanuni? Lakini ni vema utambue kuwa ni jambo zuri sana kwangu mimi na wewe kwamba tunamtumikia Mungu. Ndugu Wakristo wapendwa, kumwabudu Mungu ni baraka kuu. Ni baraka kuu kuwa tunamwamini Yeye aliye katika cheo cha juu. Je, ni sawa au si sawa? Ni sawa. Kwa kiwango chochote kile, tunapaswa kumtumikia fulani katika ulimwengu huu, kwa kweli hatuwezi kuishi pasipo kuwa na wa kumtumikia. Ikiwa hatutamtumikia Mungu basi ni wazi kuwa tutamtumikia Ibilisi. Kwa hakika, kama hatutamtumikia Ibilisi basi tutawatumikia watu. Kwa namna yoyote, ni lazima tuamue kuwa tutakuwa ni watumishi wa nani. Ndugu Wakristo wapendwa, katika hali kama hii si jambo la baraka kumtumikia Mungu? Hata hivyo, kwa kuwa tunaishi pasipo kulifahamu hili, basi Yesu alilipokea jaribu la mwisho na akatupatia jibu sahihi: *“Nawe utamsujudia Bwana Mungu wako, na kumwabudu yeye peke yake.”*

Ndugu Wakristo wapendwa, sisi sote ni lazima tuliadini Neno la Mungu. Tunapolisikia Neno la Mungu tunafikiri: “Ooh,

Yesu alituambia jibu sahihi, na kuishi kwa namna hii ndio sahihi, hivyo ninapoabudu basi inakuwa vema kama ninaliabudu Neno la Mungu. Pamoja na kuwa wakati mwingine ninakuwa kama taahira, zuzu, mjinga, na punguani, ukweli unabakia kuwa mimi nimepokea baraka kubwa sana. Nilifikiri kuwa ninapaswa kuishi kwa kufuata mahitaji ya moyo wangu bila kupangiwa masharti na mtu mwingine, huku nikijisema, “ni maisha yangu”, lakini hali haikuwa hivyo. Kwa sasa ninatambua kuwa kuishi kwa namna hiyo ni kitu cha kibaya. Kwa kweli ni haki kumtumikia Bwana kama kiongozi wangu na kuishi maisha yangu kama mtumishi wa Mungu.” Ni lazima tuukubali ukweli wa injili ya maji na Roho na kisha tuwe na imani inayoamini na kuisha tuishi huku tukibarikiwa. Ingawa kuna baadhi ya nyakati tunapojiangalia wenyewe tunaonekana kuwa ni wajinga kiasi, lakini kwa kweli ni lazima tutambue kuwa ni bahati sana na ni haki kuishi huku tukimtumikia na kumwabudu Mungu.

Ninajiuliza ni kitu gani ninge kuwa ninakitumikia ikiwa kama ninge kuwa simtumikii Mungu kwa sasa. Kwa hakika ningelikuwa naitumikia miungu ya nchi hii, ambayo ingeliweza kunipatia raha ya mwili. Ningelikuwa ninakunywa na kula kila siku, hali nikiwa na hofu ya kujua kuwa nitaishi vipi hali nikiendelea kuitumikia miungu ya nchi hii. Kila aina ya kinywaji ingeliweza kuwa mungu wangu. Ningelikuwa ninaishi nikiwa ninashikilia mambo hayo.

Ndugu Wakristo wapendwa, Yesu ametufanya sisi kuzaliwa tena upya, na ametueleza aina ya maisha ambayo tunapaswa kuishi na kwamba ni aina ipi ya imani ambayo ni imani sahihi. Pamoja na kuwa tuna mapungufu na udhaifu, ukweli ni kuwa sisi hatupo kama tulivyokuwa hapo kabla. Ninatumaini kuwa unamshukuru Mungu ambaye ametupatia baraka ya kuweza kuokolewa, na kuweza kumkiri na

kumwabudu Mungu. Bila shaka una ule moyo wa shukrani kwa Bwana, si ndivyo? Ndiyo. Kwa kweli hiyo ni baraka kubwa ambayo kwa hiyo tunamshukuru sana Mungu.

Yesu alitupatia sisi imani hii kwa kuyapinga majaribu matatu na kutufundisha kuamini kuwa mwanadamu ataishi kwa Neno la Mungu. Kwa kuamini kuwa hatupaswi kumjaribu Mungu. Na kuamini kuwa ni haki kumwabudu Mungu na kumtumikia katika maisha yetu yote. Mungu ametupatia imani ambayo ni baraka kuu. Ni lazima tuwe na imani na kisha tuishi hali tukimwabudu Mungu katika maisha yetu yote.

Hivi ndivyo inavyotupasa kuishi. Ndugu Wakristo wapendwa, je, mnaamini? —Ndiyo.— Je, mnaamini kuwa hii ni haki? —Ndiyo.— Ni lazima tuamini katika mioyo yetu hiyo ndiyo njia ya haki ya maisha.

Ni baraka kubwa kwetu sisi wenye haki kwamba tunaweza kumwabudu Mungu hata pale tunapokuwa na mapungufu. Ni baraka kiasi gani kuwa na huyu Mungu wa Neno? Kwa kweli tunatoa shukrani zetu nyingi sana kwa Mungu. Mungu alitupatia imani hii ya haki, na tuna imani kuwa Mungu anampatia yeyote imani hii ya haki. Ninatumaini kuwa nafsi yangu na zenu zinapokea baraka nyingi toka kwa Mungu kwa kuamini katika Neno la Mungu. ☒

SURA YA

5



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Hotuba Mlimani

< Mathayo 5:1-16 >

“Naye alipowaona makutano, alipanda mlimani; na alipokwisha kuketi, wanafunzi wake walimjia; akafumbua kinywa chake, akawafundisha, akisema:

Heri walio maskini wa roho;

Maana ufalme wa mbinguni ni wao.

Heri wenye huzuni;

Maana hao watafarijika.

Heri wenye upole;

Maana hao watairithi nchi.

Heri wenye njaa na kiu ya haki;

Maana hao watashibishwa.

Heri wenye rehema;

Maana hao watapata rehema.

Heri wenye moyo safi;

Maana hao watamwona Mungu.

Heri wapatanishi;

Maana hao wataitwa wana wa Mungu.

Heri wenye kuudhiwa kwa ajili ya haki;

Maana ufalme wa mbinguni ni wao.

Heri ninyi watakapowashutumu na kuwaudhi na kuwanenea kila neno baya kwa uongo, kwa ajili yangu. Furahini na kushangilia; kwa kuwa thawabu yenu ni kubwa mbinguni; kwa maana ndivyo walivyowaudhi manabii waliokuwa kabla yenu.

Ninyi ni chumvi ya dunia; lakini chumvi ikiwa imeharibika itatiwa nini hata ikolee? Haifai tena kabisa, ila kutupwa nje na kukanyagwa na watu. Ninyi ni nuru ya

ulimwengu. Mji hauwezi kusitirika ukiwa juu ya mlima. Wala watu hawawashi taa na kuiweka chini ya pishi, bali juu ya kiango; nayo yawaangaza wote waliomo nyumbani. Vivyo hivyo nuru yenu na iangaze mbele ya watu wapate kuyaona matendo yenu mema, wamtukuze baba yenu aliye mbinguni.”

Katika Mathayo sura ya 5 aya ya 1-7 tunasoma kuwa Yesu aliongea na wanafunzi wake na kwetu pia. Wakristo wameyaita mafundisho haya ‘Hotuba Mlimani’ kwa kuwa Yesu aliyaongelea mambo haya akiwa juu ya mlima.

Baraka Kwa Walio Maskini wa Roho

Kwanza, tukiangalia katika Maandiko toka Mathayo sura ya 5, Yesu alisema: *“Heri walio maskini wa Roho; maana Ufalme wa Mbinguni ni wao.”* Bwana wetu anamaanisha nini anaposema “Heri walio maskini” ni kwamba Bwana aliwapatia Mbingu wale walio maskini wa roho tu.

Mafundisho yake kuwa *“Heri walio maskini wa roho”* ndio Ukweli. Ni hivyo tu. Maskini wa roho ambao Yesu aliwazungumzia hawawezi kutosheka katika ulimwengu huu, na hivyo wanaupokea wokovu ambao Yesu anautoa. Ikiwa roho yako inatosheka na vitu vya kidunia, basi itakuwa ni vigumu sana kwako kupokea katika moyo wako ondoleo la dhambi aliloliruhusu kwa kupitia injili ya maji na Roho. Hii ndio sababu anasema ikiwa wewe ni maskini wa roho basi Ufalme wa Mungu unaweza kuwa wako. Mungu anakupatia msamaha wa dhambi na Ufalme wa Mbinguni kwako wewe uliye maskini wa roho.

Heri Wenye Huzuni Kwa Kupitia Injili ya Maji na Roho

Fundisho la pili la Yesu katika Mathayo 5:4 linasema: *“Heri wenye huzuni; maana hao watafarijika.”* Hili ni fundisho ambalo Yesu alilitoa alipowaona wale walioamini katika injili ya maji na Roho wakiwa katika maumivu kutokana na dhambi walizozitenda mbele za Mungu. Bwana alisema kuwa wale wanaohuzunika mbele za Mungu kwa sababu ya dhambi zao watafarijiwa na Mungu. Kwa nini iwe hivyo? Ni kwa sababu watu wa jinsi hiyo wanaumia mbele za Mungu kwa sababu ya dhambi zao. Yeye anayemkiri Mungu na kuamini kuwa Mungu yupo hai hawezi kufanya lolote zaidi ya kulia kwa sababu ya dhambi zake. Mungu anawafariji watu hawa kwa kuwapatia wokovu kwa kupitia injili ya maji na Roho.

Kusema kweli, pamoja na kuwa tunamwamini Yesu mara nyingi, bila shaka tunafanya makosa mbele za Mungu na kufanya dhambi. Hata hivyo, faraja ya Mungu ipo pale kwa wale ambao wanaumizwa katika mioyo yao kwa sababu ya dhambi walizozitenda na kwamba hawajaishi kwa kufuata mapenzi ya Mungu, na kwamba bado wanatenda dhambi pamoja na kuwa wanamkiri Mungu.

Mara nyingi tunakuwa na mapungufu mbele za Mungu. Kwa kweli, wengine wanaweza wakajifanya kuwa hawana hisia juu ya maovu na makosa yao kwa kuwa wamefikia hatua ya kujihakikishia kuwa tabia-asili walizopewa na Mungu haziwezi kuwa mbaya. Hata hivyo, hatuwezi kamwe kupokea faraja ya Mungu ikiwa tutakuwa na mioyo isiyohuzunika mara tunapotenda makosa na kuwa na mapungufu na kushindwa kuishi kwa kufuata mapenzi ya Mungu. Hii ndiyo sababu wewe na mimi tunapaswa kuwa na moyo unaoamini katika injili ya

maji na Roho huku tukihuzunika mbele za Mungu juu ya matendo yetu maovu, na huku tukihuzunikia dhambi tunazozitenda sisi kwa sisi. Hii ni njia pekee ambayo kwa hiyo mioyo yetu inaweza kufarijika kwa kupitia faraja ya wokovu ambayo Mungu ametupatia.

Baraka Ambazo Wapole Wanazipokea

Katika Mathayo 5:5, Biblia inatueleza kuwa *“Heri wenye upole; Maana hao watairithi nchi.”* Kuna sababu kuwa ni kwa nini mioyo yetu inapaswa kuwa na upole mbele za Mungu. Ikiwa mioyo yetu itakuwa na upole mbele za Mungu, basi tunaweza kuyapokea maneno ya wokovu ya injili ya maji na Roho ambayo Mungu anayazungumza katika mioyo yetu. Ikiwa mioyo yetu haina upole bali imejazwa nia ya uchafu, basi kwa hakika hatuwezi kuyakubali maneno yote ya Mungu katika mioyo yetu. Hii ndio sababu kuwa ile mioyo ambayo haina upole itakuwa ni tatizo. Na hii ndiyo sababu kuwa mtazamo wa mioyo yetu mbele za Mungu ni wa muhimu sana. Wanafiki wanaweza kuwadanganya na kuwafanya watu wajinga kwa muda mfupi tu lakini hawawezi kuwa na ushirika wa milele pamoja na Mungu labda mpaka walipokee Neno la Mungu kwa moyo wenye unyenyekevu.

Katika Mathayo 5:5, Biblia inatueleza kuwa *“Heri wenye upole; Maana hao watairithi nchi.”* Maneno haya yanatueleza kuwa wale waliopokea ondoleo la dhambi wataurithi Ufalme wa Milenia na Ufalme wa Mungu wa milele kama urithi wao wa imani. Ikiwa tutaipokea injili ya ondoleo la dhambi, yaani injili ya maji na Roho, basi tutapokea msamaha wa dhambi wa milele. Yeyote anayepokea katika moyo wake kuwa injili ya maji na Roho ndiyo Kweli basi anaweza kupokea baraka zote

za Mbinguni. Maneno haya yanatueleza jinsi ilivyo heri na baraka kwao wanaoipokea injili ya maji na Roho kwa upole katika mioyo yao.

Ni lazima tukubali katika mioyo yetu kuwa ‘maneno yote ya Mungu ni sahihi.’ Mungu alizungumza kwetu sote kwa kupitia Neno lililoandikwa la Mungu. Mungu anasema nasi kwa kupitia Neno lake: “kimsingi wewe umejaa dhambi kwa sababu ya wazazi wako waliokutangulia.” Hapo ndipo tunapopaswa kuwa na moyo unaoyakubali maneno ya Mungu. Tunapaswa kuyakubali kwa upole maneno yoyote yanayotoka katika kinywa cha Mungu kwa upole. Maneno yoyote ambayo Mungu, ambaye ni kweli anayazungumza ndio ukweli. Wale ambao wanaweza kuyapokea maneno yote ya Mungu kwa upole katika mioyo yao wanaweza kuwa na imani itakayourithi Ufalme wa Mbinguni.

Wale walio na mioyo ya upole mbele za Mungu wanayaamini kwa uhakika maneno ambayo Mungu anayazungumza kwetu kama yalivyo. Kwa hiyo, Mungu anazungumza nao kuhusu injili ya maji na Roho. Na anatoa Ufalme wa Milenia kama urithi kwa wale walioipokea injili ya maji na Roho katika mioyo yao. Imani hii ndiyo inayotuwezesha kuirithi nchi mpya.

Baraka Ambazo Wale Wanaotaka Kuitumikia Injili ya Maji na Roho Wanapokea

Katika aya ya 6, Biblia inasema: *“Heri wenye njaa na kiu ya haki; Maana hao watashibishwa.”* Maneno haya yana maanisha kuwa wale walio na njaa kwa ajili ya kazi ya Mungu watashibishwa kwa kuifanya kazi ya haki ya Mungu. Wenye haki wana njaa ya kumtumikia Mungu. Hivyo, wanafanya kazi

ya haki ili kula chakula kwa ajili ya roho zao. Hii ni kwa sababu maneno yote ya Mungu ni chakula kinachotoa uzima kwa kila nafsi (Isaya 55:1). Kazi zote za Mungu ni matoleo ya kiroho kwa wenye haki. Ukweli huu ni siri iliyofichika kwa wale ambao hawajazaliwa tena upya. Wenye haki wanapata shibe kamili toka katika matendo ya haki kwa kuungana na Kanisa.

Kwa kuwa sisi ambao ni wenye haki kwa kupitia ondoleo la dhambi, ni ama tuna njaa kwa ajili ya kazi ya Mungu au tunakuwa na njaa kwa ajili ya tamaa za mwili. Kwa kuwa kila mtu aliye na moyo unaotaka kufanya kazi ya haki kwa ajili ya Mungu, basi Mungu anawezesha kufanya kazi hizo za haki kwa ukamilifu kwa kupitia Kanisa lake. Mungu anatupatia imani ya kiroho ili kwamba tuweze kuifanya kazi kwa ajili ya Mungu, na anatufanya tushibishwe kadri tunapoifanya kazi ya haki. Kwa kweli, wale wanaotaka kuifanya kazi ya haki kwa ajili ya Mungu wanajifunza kutokana na uzoefu kwamba wanapata ule ukamilifu wa roho.

Je, una njaa kwa ajili ya kazi ya haki ya Mungu? Kama ndivyo, basi utapokea ukamilifu wa roho yako kwa kuieneza injili ya maji na Roho na kuifanya kazi ya Mungu. Ni lazima ufahamu kuwa hata kama nafsi yako ya nje inaweza kuwa na moyo unaozifuata tamaa za mwili, ukweli ni kuwa Roho Mtakatifu ndani yako ana njaa ya kazi ya haki ya Mungu na anapenda wakati wote kuifanya kazi ya haki.

Katika Mathayo sura ya 4 Bwana wetu alisema kuwa *“Mtu hataishi kwa mkate tu, ila kwa kila neno litokalo katika kinywa cha Mungu.”* Wakati Yesu alipokuwa akifunga kwa siku 40, shetani alitokea mbele za Yesu na kusema, *“Ukiwa ndiwe Mwana wa Mungu, amuru kwamba mawe haya yawe mikate.”* Shetani anamjaribu Yesu pamoja na mtu mwingine yeyote hali akisema ‘mkate kwa ajili ya mwili ni uzima.’ Hata

hivyo, ukweli hauko hivyo. Hii ndio sababu Yesu alisema, *“Mtu hataishi kwa mkate tu, ila kwa kila neno litokalo katika kinywa cha Mungu.* Mwanadamu hawezi kuishi kwa mkate kwa ajili ya mwili tu. Hii ni kwa sababu mwanadamu ana roho pia. Kwa hiyo, watu wanahitaji kuula mkate kwa ajili ya mwili na pia wanahitaji kulila Neno la Mungu linalotoka katika kinywa cha Mungu ambalo ni chakula cha roho. Hii ndiyo njia pekee inayoweza kuifanya miili na roho zetu kuwa hai.

Kwa asili, ukweli huu unatueleza kuwa Neno la Mungu ambalo Mungu alilizungumza linaziruhusu roho zetu kuishi. Sisi wenye haki hatuwezi kuishi kwa mkate kwa ajili ya mwili tu bali kwa kusikia na kuamini katika Neno la Mungu linalotoka katika kinywa cha Mungu. Haijalishi mtu aliyezaliwa tena upya anakula mkate kiasi gani, kwa kawaida kunakuwa na ile hisia ya njaa na kiu kwa kuwa roho ina njaa kwa ajili ya kazi ya haki ya Mungu. Kwa kuwa Roho Mtakatifu anaishi ndani ya moyo wa mwenye haki, basi ni lazima tuishi kwa kufanya matendo ya haki. Hii ni kusema kuwa, mwenye haki anaweza kuishi kwa kusikia na kuamini katika kila neno litokalo katika kinywa cha Mungu. Hii inaonyesha kuwa tunaweza kuishi kwa kuamini katika kila neno la Mungu na kwa kumfuata Bwana kwa imani.

Ukweli ni kuwa roho za watakatifu waliozaliwa tena upya zina njaa kwa ajili ya kazi ya haki ya Mungu. Wanadamu hawaishi kwa mkate kwa ajili ya mwili tu, bali ni kwa kusikia na kuamini katika kila neno linalotoka katika kinywa cha Mungu. Ni kwamba roho ya mwenye haki inaweza kuufurahia ukamilifu wa kiroho kwa kuieneza injili ya maji na Roho kwa wengine. Ukweli ni kuwa roho na mwili wa wenye haki unaishi kwa kuifanya kazi ya haki ya kuwaokoa wengine toka katika dhambi zao.

Katika moyo wa mtakatifu aliyezaliwa tena upya kuna ile

nia ya kuzifanya kazi za haki. Kwa hakika sisi wenye haki hatuwezi kuishi kwa ajili ya kuyafuata mambo ya dunia hii tu. Kwa hakika hatuwezi kuishi kwa mambo ya mwili tu. Miongoni mwa wenye haki, yeye aliye na imani dhaifu anaweza kufikiria kama hivi: “Kwa kuwa nimepokea ondoleo la dhambi, basi sasa ninaweza kuishi ikiwa tu nitatutua tatizo la chakula, mavazi na makazi.” Basi mwenye haki aliye na mawazo kama hayo ataishia kuzifuata tamaa zake binafsi na kisha atayapoteza maisha yake.

Hata hivyo, mwenye haki hawezi kuishi kwa kufuata tamaa za mwili tu. Hata kama mwenye haki anaishi kwa kuzifuata tamaa za mwili, ukweli unabakia kuwa mwili hautatimiza tamaa zake. Ikiwa mwenye haki anazifuata tamaa za mwili tu, basi moyo wa mwenye haki huyo utabakia mpweke. Kwa upande mwingine, sisi ambao tumezaliwa tena upya tuna njaa na kiu kwa ajili ya matendo ya haki na kwa sababu hiyo tuna furaha wakati wote katika kuieneza injili ya maji na Roho. Mwenye haki anaupata uzoefu wa ubora wa roho na ubora wa mwili kwa kuamini katika Neno la Mungu na kuzifanya kazi za haki.

Mara nyingi waamini wapya hawaufahamu ukweli huu. Hivyo, watu ambao ni wenye imani dhaifu mara nyingi wanauawa kiroho baada ya kuwa wamezifuatia tamaa za mwili. Wenye haki wanaozifuata tamaa za mwili wanajaribiwa na shetani kwa vitu vya kimwili. Ikiwa mwenye haki atajitoea kulifuata hilo jaribu, basi mtu wa jinsi hiyo atakufa.

Hii ndio sababu Bwana alisema heri walio na njaa na kiu ya haki. Wewe na mimi sasa tumefanyika kuwa watu ambao tunaibeba na kuieneza haki ya Mungu. Basi matoleo ya kweli ya roho zetu ni kuieneza injili ya maji na Roho. Ni kwa ajili ya kuifanya kazi ya haki ya Mungu. Kadri tunavyoeneza injili ya maji na Roho, basi jambo hilo linafanyika kuwa ni matoleo ya

kweli ya wewe na mimi.

Wakati Bwana wetu alipokuwapo hapa duniani pamoja na wanafunzi wake, kulikuwa na nyakati ambapo Bwana wetu alihitaji chakula kwa ajili ya mwili pia. Wakati fulani huko Sikali katika mji wa Samaria wanafunzi wa Yesu walipaswa kwenda mwendo mrefu ili kutafuta chakula. Wakati wanafunzi walipoleta chakula na kumwambia “Bwana, ule chakula hiki,” Bwana aliwajibu akisema, “Mimi ninacho chakula ambacho ninyi hamkifahamu.” Chakula alichokisema kipo katika kazi ya kuieneza injili ya maji na Roho. Na hivi ndivyo Yesu alivyosema alipokuwa akimueleza mwanamke pale kisimani kuwa Yeye mwenyewe alikuwa ni Masihi.

Ni lazima tufahamu kuwa Yesu alitengeneza chakula kwa ajili ya Roho yake kwa kuyatekeleza mapenzi ya Baba. Yesu aliwaambia wanafunzi wake hivyo kwa sababu wanafunzi wake walikuwa bado ni wachanga kiroho na hawakuufahamu ukweli huo. Hii ni kusema kuwa, maneno haya yalikuwa ni kwa ajili yangu na kwa ajili yako na Wakristo wengine waliozaliwa tena upya.

Kusema kweli, njia sahihi ya kufuatwa kwa roho za wenye haki ni kwa kufuata na kuamini na kuitekeleza haki ya Mungu, na hivyo kushibishwa kila siku. Wenye haki wanashibishwa kwa kuamini na kuipeleka haki ya Mungu. Sisi sote tunashibishwa wakati tunapoipeleka haki ya Mungu na kwa sababu hiyo tunaweza kuishi hali tukimsifu Mungu.

Kuna baraka kwa watu wanaoona njaa na kiu kwa ajili ya haki ya Mungu. Je, una njaa na kiu kwa ajili ya haki ya Mungu? —Ndiyo.— Mimi pia nina kiu kwa ajili ya haki ya Mungu. Hivyo, baada ya kuwa nimeifanya hii sehemu ya kazi ya Mungu, basi ninafanya kazi nyingine kwa ajili ya haki ya Mungu na ninaendelea kufanya kazi ya Mungu na kuendelea kutafuta zaidi kuipeleka haki ya Mungu kwingineko.

Siku moja nilitazama kipindi cha Television kinachoitwa “Safari Ulimwenguni.” Katika kipindi hiki, watu mbalimbali ambao walikuwa wamesafiri katika sehemu mbali mbali za ulimwengu walikuwa wakionyesha filamu ambazo wamezichukua toka katika nchi mbalimbali duniani. Nilipokuwa nikikitazama kipindi hicho niliwaza kuwa “Ninapaswa kuieneza injili ya maji na Roho katika nchi ile.” Hata wale watu waliokuwa wakikitazama kipindi kile waliona kuwa ni jambo la kufurahisha kuona tamaduni na desturi mpya, mimi mwenye haki nilitambua kuwa watu katika nchi ile walihitaji injili ya maji na Roho. Kwa kuwa wenye haki wana njaa na kiu ya haki, basi haijalishi jinsi wanavyoona bali wanaona kwa mtazamo tofauti. Sisi wenye haki tunaona umuhimu wa kuieneza injili ya maji na Roho kwa wale ambao hawaifahamu haki ya Mungu katika ulimwengu huu.

Je, nini kitatokea ikiwa tutaipeleka injili ya maji na Roho kwao? Watu hao watapokea ukombozi toka katika dhambi zao zote. Hiyo ni sahihi. Ikiwa tunapenda kuipeleka injili ya maji na Roho kwa watu katika nchi ile, basi kuna kitu ambacho tunapaswa kukifanya kwanza, na kitu hicho ni kumtafuta mtu anayefahamu lugha na tamaduni za nchi husika. Na hii ndiyo sababu tunajaribu kwanza kutafuta watafsiri wazuri wa lugha mbalimbali.

Mara nyingi Mungu anawasaidia wale wanaoona njaa na kiu ya haki ili kuzifanya kazi za haki. Kama tulivyojaribu kupata watu ambao wanaweza kutafsiri, kwanza tuliweka matangazo katika mtandao wa intaneti. Hatimaye tukapata mwitikio. Watu wengi wanaovutiwa wameomba nasi tumewakabidhi kazi ya kutafsiri baada ya kuwa tumewachagua watafsiri mahiri katika kila lugha.

Sisi ni wenye haki ambao tunaifanya kazi ya kuipeleka injili ya maji na Roho kwa watu mbalimbali ulimwenguni.

Wenye haki wanapenda kuipeleka haki kwa kila nafsi iliyopotea katika ulimwengu. Sisi, tuliozaliwa tena upya tuna njaa kwa sababu tunataka kuieneza injili ya haki kwa kila mtu ulimwenguni.

Kwa kuwa haki ya Mungu ni matoleo ya uzima kwa roho za wenye haki, basi wale wenye njaa na kiu kwa ajili ya haki watashibishwa. Wenye haki hawawezi kuishi pasipo kuieneza haki ya Mungu katika ulimwengu huu. Pasipo chakula cha kiroho basi wenye haki wataishia kufa kwa njaa ya roho. Tukizungumza kiroho, wenye haki ni kama miti mizuri inayozaa matunda mazuri. Kama ambavyo watu wanavyoona njaa ikiwa hawakula chakula kwa ajili ya mwili, basi wenye haki waliopokea ondoleo la dhambi hawataweza kuwa hai kutokana na njaa ya kiroho ikiwa hatutaieneza haki ya Mungu. Wapendwa Wakristo, kujaribu kuishi maisha ambayo hayaienezi haki au maisha ambayo hayana muungano na kanisa lako, basi baadaye utajisikia kwa hakika kuwa roho yako ina njaa kwa ajili ya haki ya Mungu. Kwa kuwa mioyo ya wenye haki ina njaa ya haki na inapenda kuieneza kazi ya Mungu, basi mioyo hiyo inahitaji kujilisha kwa ajili ya matoleo ya roho.

Watu ambao ni wachanga katika imani wanahitaji kuendelea kujilisha matoleo ya roho, lakini ikiwa imani itakuwa na kufikia kiwango fulani baada ya kuwa wamekila chakula cha kiroho na kisha wameieneza haki, basi watu hao wanaweza kufurahia raha za wokovu wao binafsi. Hii ndio sababu watangulizi wa imani ya haki waliyafuata maisha ya haki. Mara nyingi ninasema kwa wenzangu, “Hebu tupumzike baada ya hili,” hata hivyo, ni vigumu kumpumzika. Tunawezaje kupumzika ikiwa wewe na mimi tunaweza kufa kiroho ikiwa hatuienezi kazi ya Mungu? Basi tunapaswa kuieneza kazi ya Roho.

Wapendwa Wakristo, je, hatuli chakula miili yetu

inapokuwa na njaa? Ikiwa unajihisi kuwa unakaribia kufa kwa njaa, basi unapaswa kula. Kwa hiyo, mtu yeyote anayeona njaa na kiu kwa ajili ya haki ya Mungu ni lazima aifanye kazi ya Mungu. Watu wa jinsi hiyo ni wale waliobarikiwa. Mara nyingi Bwana wetu anayaelezea maneno haya kwa wenye haki. Sisi ambao ni wenye haki tunafanyika kuwa wakamilifu wa roho pale tunapoifanya kazi ya Mungu. Wapendwa Wakristo, ikiwa unapendwa kujazwa roho basi uwe na juhudi katika kazi ya Mungu!

Hata hivyo, huwezi kuifanya kazi ya Mungu peke yako. Hivyo ni lazima tuipeleke kazi ya Mungu tukishirikiana na wengine. Kulisikia neno la Mungu ni haki, na pia kulisoma Neno la Mungu na kumwomba Mungu ili kuomba msaada kwa ajili ya haki ya Mungu na kufanya kazi kwa nguvu katika kila nafasi ni kwa ajili ya haki ya Mungu. Bwana alisema, *“Utafuteni kwanza ufalme wa Mungu na haki yake, na hayo yote mtazidishiwa.”* Mungu alituambia kuwa utafuteni kwanza ufalme wake kwanza. Hii ina maanisha kuwa tunapaswa kuifikiria kwanza kazi ya Mungu halafu ndipo tuyafikirie mambo ya mwili baadaye. Ikiwa hivi ndivyo tulivyo mbele za Mungu, basi sisi sote tunazipokea baraka zote toka kwa Mungu katika mwili na katika roho. Huu ni ukweli wa roho ambao Mungu amezungumza kwetu. Huu ni ukweli ambao Wakristo na watumishi wa Mungu hawapaswi kuusahau.

Baraka Ambazo Wenye Rehema Wanazipokea

Mathayo 5:7 inasema, *“Heri wenye rehema; Maana hao watapata rehema.”* Katika Biblia kuwa na rehema kwa watu wengine maana yake ni kuwa na huruma kwa ajili ya wenye dhambi. Tunapowaona watu ambao ni wenye dhambi

tunajifikiria sisi wenyewe kuwa ni ‘huzuni sana’. Wakati sisi wenye haki tunapoziangalia nafsi za watu ambao hawajazaliwa tena upya, kwa kweli nafsi hizo zinaonekana kuwa ni mbaya na zenye huzuni. Hii si tu kwa ajili ya watu katika nchi yetu, bali hali hiyo inajitokeza pia tunapowaona watu toka katika nchi nyingine nyingi ulimwenguni.

Wakati wa safari yangu ya kwanza ya kimissionari kwenda China, nilitelemka na kuingia katika duka la kahawa katika mji wa Beijing ili niweze kupumzika pamoja na wenzangu. Pale niliwaona wasafiri wawili toka nchi za magharibi wakiwa wameketi pembeni yetu wakiwa wameagiza kipande cha mkate na vikombe viwili tu vya kahawa. Tulipokuwa tukizungumzia juu ya mipango ya utume katika nchi kwa kina walionekana wakiendelea na ushirika wao wa mazungumzo vizuri kwa karibu ya masaa mawili. Wakati mtu mmoja alipoongea yule mwingine alisikiliza na kujibu ‘aha’, na wakati mwingine tena alipoongea yule mwingine naye alisikiliza na kusema ‘aha’. Kwa kweli walionekana kuyafurahia sana maongezi yao. Haijalishi ni mazungumzo gani walikuwa wakiyaongea ukweli ni kuwa njaa yao ya mazungumzo ilionekana bayana.

Kwa hali yoyote ninapowaona watu kama hao kwa kweli ninawaonea huruma pia. Wanakuwa na mazungumzo ya kina wanapokuwa na majadiliano yanahusu mambo madogo ya kimwili, lakini watu hao wanahitaji kuisikia injili ya maji na Roho toka kwetu. Na hii ndiyo mada kuu ambayo walipaswa kuizungumzia. Kwa kweli ninapowaona watu wa jinsi hiyo ninawaonea huruma. Hata kama wanazunguka na kujivuna, ukweli unabaki kuwa ni huzuni kwao kwa kuwa hawaifahamu injili ya maji na Roho.

Katika mioyo ya wenye haki, tunatamani kuvifanya vitabu kama mgao wa matoleo kwa nafsi zilizopotea na kisha

kuvisambaza vitabu hivyo kwa kila mtu. Hata hivyo, watu wanaweza kuendelea kutofahamu jinsi walivyo wa kuhuzunisha. Ingawa nchi yetu inaweza isiwe na utajiri wa kutosha na nguvu ya taifa kulinganisha na nchi za magharibi, na kwamba wanaweza kutuangukia sisi kama watu tunaotoka katika nchi dhaifu, ukweli ni kuwa sisi wenye haki tuna ile huruma ya kiroho kwa watu ulimwenguni. Hata watu wanaotoka katika nchi zinazohesabika kuwa na utajiri mkubwa bado wanaonekana ni watu wa kuhuzunisha wanapotazamwa na wenye haki.

“Heri wenye rehema; Maana hao watapata rehema.” Hii ina maanisha kuwa wale walio na rehema kwa ajili ya watu wengine watapata rehema. Kuna idadi kubwa ya watu ambao tunapaswa kuwaonea rehema! Huu ndio ukweli katika ulimwengu mzima.

Baraka Ambazo Wale Walio na Msamaha wa Dhambi Wanazipokea

Katika Mathayo 5:8 Bwana alisema, *“Heri walio na moyo safi.”* Bwana alisema kuwa wale walio na moyo safi watamwona Mungu. Wapendwa Wakristo, kwa asili, walio na moyo safi ni wale ambao wamepokea ondoleo la dhambi katika mioyo yao kwa kumaini katika Neno la Mungu na katika injili ya maji na Roho. Wale wasiozifuata tamaa za mwili bali wanaifuata injili ya maji na Roho ndio wale ambao mioyo yao ni safi.

Jana nilitazama igizo la kihistoria katika Televisheni. Katika igizo hilo, mtu mmoja ambaye alikuwa chini ya Mfalme siku moja aliasi dhidi ya mfalme na akaivamia ikulu. Yule mfalme aliyekuwepo katika kiti cha utawala alifadhaishwa na

uasi huo. Hatimaye huyu aliye chini ya Mfalme alipanga uhaini akishirikiana na wengine walio chini yake. Mara ya kwanza huyu aliye chini ya Mfalme alijifanya kuwa yupo kinyume na dhana ya kukiteka kiti cha Ufalme. “Siwezi kamwe kufanya hivyo, kumsaliti mfalme ati kwa sababu walio chini yangu wapo kinyume na maelekezo yangu.” Kwa kweli ilionekana kana kwamba anazifahamu kanuni vizuri na alionekana kama ni mwenye haki, lakini kwa kweli hakuwa chochote zaidi ya kuwa ni mwoga. Alikuwa akingojea fursa ya kwenda kuketi katika kiti cha Ufalme na hatimaye aliyakubali matakwa ya waliokuwa chini yake ya kumng’oa Mfalme huku akijifanya kuwa jambo hilo lipo kinyume na mapenzi yake bali kwa sababu ya ushawishi wa mke wake. Wale wanaoanzisha mapinduzi katika ulimwengu huu wote wapo kama mtu huyu. Hivyo ni sahihi kama alivyosema mtu fulani kuwa, siasa ni mchakato wa kumfanya kila mtu kuwa ni faida binafsi katika faida ya jamii.

Wapendwa ndugu zangu Wakristo, Je, Bwana wetu anaweza kukosa mchango wetu? Hapana, hawezi. Bwana ni Mfalme wa wafalme aliye mkamilifu na pia ni Mfalme mwema kwetu. Mfalme wa wafalme alijishusha mwenyewe na akawatumikia watu wake toka katika dhambi zao. Alizishafishilia mbali dhambi zote za watu wake na akawaokoa kwa kutumia injili ya maji na Roho. Sasa, hawa watu wake watamfuata Bwana kwa heshima. Watu hawa wanajitoa kumfuata Mfalme wao.

Yesu Kristo, ambaye ni Mfalme wa Wafalme, yeye ni Mfalme wa wenye haki. Yesu Kristo ambaye ni Mfalme wa dunia, yeye ni Mungu kwetu. Tunapoangalia katika kumbukumbu za Mathayo sura ya 1 hadi ya 7 tunaweza kufahamu kwa wazi kuwa Yesu Kristo hakuwa ni mtu ambaye alikuwa ni kiumbe kama vile Konfusiasi, Sokrato, Plato, au

Budha. Yesu Kristo ni mkamilifu kwetu sote na Mwokozi wetu. Naye ni Mfalme ambaye anatawala juu ya Mbingu na dunia.

Bwana wetu alisema, *“Heri walio maskini wa roho: Maana ufalme wa Mbinguni ni wao.”* Ni nani basi ambaye angeliweza kuyasema mambo haya? Hakuna hata mmoja anayeweza kufanya hivyo. Mfalme wetu ni mwokozi wetu tu, ambaye ni Yesu Kristo. Leo hii kuna wanatheolojia wengi ambao wanaukana uungu wa Yesu. Hata hivyo, ni kweli kuwa Yesu, Baba wa Yesu, na Roho Mtakatifu ndio Mungu aliyeumba mbingu na nchi (Mwanzo 1:1). Bwana aliwaambia wanafunzi wake kuwa *“Heri walio na moyo safi maana hao watamwona Mungu.”*

Je, kuna yeyote miongoni mwenu ninyi mliozaliwa tena upya kwa kupokea ondoleo la dhambi aliye na mashaka juu ya uungu wa Yesu? Hatuwezi kukana mara moja kuwa Yesu Kristo ni nafsi katika Mungu Utatu, na kwamba yeye ni Mfalme wa wafalme. Bwana alikuja hapa ulimwenguni na akatuokoa toka katika dhambi zetu na hukumu ya dhambi kwa injili ya maji na Roho. Ikiwa tunamwamini Yesu Kristo kuwa ni Mwokozi wetu pamoja na injili ya kweli, basi Mungu Baba anatufanya tuokolewe toka katika dhambi zetu zote mara moja na kwa wote. Sisi tunaamini katika nguvu ya injili ya maji na Roho.

Ikiwa Yesu Kristo hakuwa Mungu, basi mwanadamu hawezi kupokea ukombozi toka katika dhambi. Ikiwa Yesu Kristo si kiumbe mkamilifu kuliko sisi, basi kazi zake zote hazikuwa kamilifu pia. Na kama ndivyo hivyo, basi sisi hatuwezi kupokea wokovu toka katika dhambi zetu zote kwa kumwamini yeye kuwa ni Mwokozi wetu. Sisi tunapata wokovu toka katika dhambi zetu zote kwa kumwamini yeye kwa sababu Mwana wa Mungu alikuja hapa ulimwenguni kama Mwokozi na akatuokoa toka katika dhambi zote za

ulimwengu.

Baraka Ambazo Wapatanishi Wanazipokea

Katika Mathayo 5:9 Bwana alisema, *“Heri wapatanishi; Maana hao wataitwa wana wa Mungu.”* Mungu anatuita sisi Wakristo tuliozaliwa tena upya kuwa ni makuhani wa kiroho. Tukiongea kiroho, sisi ni makuhani, ambao tunasimama miongoni mwa watu katika ulimwengu huu na kuwapatanisha kwa Mungu kwa kupitia Kristo. Wale waliofanyika kuwa makuhani mbele za Mungu wanafanya kwa juhudi ili kuleta upatanisho kati ya Mungu na watu. Ikiwa tutaieneza injili ya maji na Roho, na ukweli wa ondoleo la dhambi kwa watu wengine katika ulimwengu huu, basi sisi tunafanya kazi ya kuwapatanisha watu hao na Mungu. Pia wenye haki wanaueneza wokovu wa Mungu na mapenzi ya Mungu kwa watu wengine.

Wapatanishi wanaueneza ukweli huu: “Watu wamefanya dhambi mbele za Mungu. Kwa hiyo, wanaelekea katika maangamizi kwa sababu ya dhambi zao. Watu hao watakwenda kuzimu. Hivyo, pokeeni upendo wa Mungu na wokovu wake kwa kuamini katika injili ya maji na Roho kisha mtapokea wokovu toka katika dhambi zote.” Sisi tunaipenda kwa kweli injili ya wokovu na tunaeneza. Tunawaweka watu huru na kufanya upatanisho kati yao na Mungu kwa kuwapatia Sheria ya Mungu na injili ya maji na Roho.

Wanafunzi katika shule yetu ya utume wanakwenda maeneo mbalimbali ili kuwafikia watu, na ikiwa tunataka kuwafikia watu basi ni lazima tuunoe upanga wa kiroho wa Neno tunapokwenda huko ili kuwafikia. Sisi tunafahamu na kuamini katika injili ya maji na Roho, na tunaithibitisha injili

hii kwa nafsi zilizopotea kuwa tunaiani. Hivyo kwanza ni lazima tuweke alama katika vifungu vya maandiko ambapo injili ya maji na Roho inapatikana, na baada ya hapo ndipo tunapoweza kwenda kuwafikia wengine huko waliko. Ni hapo tu ndipo tunapoweza kukutana na nafsi zilizotekwa na dhambi na kisha kuwafundisha kiusahihi. Katika kila jambo kuna tofauti kati ya kufanya kwa imani na kufanya pasipo imani. Maneno haya ya Biblia ni silaha za kiroho kwa kwenye haki. Neno la Mungu ni silaha yenye nguvu kwa kila aliyezaliwa tena upya.

Bwana alisema kuwa wapatanishi wamebarikiwa. Hii ina maanisha kuwa kuna baraka kwa wale wanaoienza injili hii ya maji na Roho. Bwana alisema kuwa watu hawa wataitwa wana wa Mungu. Ni kweli kuwa ni wana wa Mungu tu ndio wanaoweza kuieneza injili ya maji na Roho, na wale wanaoisikia injili wanaweza kufanya amani na Mungu. Wenye haki ni waaminifu katika kuihubiri injili ya maji na Roho. Na kwa hiyo wanapokea baraka nyingi toka kwa Mungu kimwili na kiroho.

Baraka Wanazozipokea Wale Wanaoudhiwa Kwa Ajili ya Haki

Katika Mathayo 5:10 inasema, *“Heri wenye kuudhiwa kwa ajili ya haki; Maana ufalme wa mbinguni ni wao.”* Wale wanaoamini katika injili ya maji na Roho na wanaoienza kazi hii wataupata Ufalme wa Mbinguni. Wale wanaoteswa na kuudhiwa kwa ajili ya haki wamebarikiwa.

Wapendwa Wakristo, je umewahi kuudhiwa na kuteswa kwa ajili ya haki ya Mungu? Je, umewahi kuudhiwa na kuteswa na wenye dhambi kwa ajili ya haki ya Mungu, na kwa

ajili ya injili ya maji na Roho, kwa kuitunza injili ya maji na Roho, kwa kuwa na muungano na Kanisa la Mungu na Ufalme wa Mungu na kwa kuifanya kazi ya Mungu? Je, umewahi kudharauriwa na watu kwa sababu ya imani yako katika injili ya maji na Roho? Basi huko ndiko kuudhiwa na kuteswa kwa ajili ya haki ya Mungu. Wakati mwingine wenye haki wanaudhiwa na kuteswa hata na familia zao za kibailojia kwa ajili ya haki ya Mungu. Kwa kweli kuna baraka toka kwa Mungu kwa ajili ya watu kama hao wanaoudhiwa na kuteswa kwa ajili ya haki ya Mungu.

Wenye haki hawapaswi kusoneneshwa kutokana na kuudhiwa na kuteswa kwa ajili ya haki ya Mungu. Hiyo ni baraka toka kwa Mungu. Ikiwa wenye haki wanaishi kwa ajili ya haki ya Mungu, kwa kweli wataudhiwa na kuteswa hata na wenye dhambi. Ikiwa unajaribu kuwa katika muungano na kanisa la Mungu, basi kwa hakika utaudhiwa na kuteswa. Kwa kweli ni mapenzi ya Mungu kwa wenye haki kuudhiwa na kuteseka (2 Timotheo 3:12). Wanawaudhi wenye haki kwa maneno wakisema, “Je, unahitaji kwenda katika kila ibada badala ya kuwa na maisha ovyo ovyo ya kiimani? Je, si mmetingwa na kazi? Hebu rahisisha mambo ndugu yangu! Je, kuna shida yoyote ikiwa hauhudhuria ibada moja ya Jumapili katika mwaka? Je, unapaswa kweli kuishi kwa imani? Je, unatakiwa hasa kufanya hivyo?”

Je, mnafanya hivyo au la? Ndivyo mnavyofanya. “Je, mnapaswa kweli kufanya hivyo na kisha kuvunja mahusiano yetu ya karibu? Inaonekana kuwa imani yako katika Yesu si sahihi.” Hivi ndivyo watu wanavyosema. Wakati watu ulimwenguni wanaposema amani, wao wanafikiria kuwa ni kule kuwa na ushirikiano nao ndiko kunakomaanisha amani, lakini amani ya kweli ni kuudhiwa na kuteseka kwa ajili ya Ufalme wa Mungu, kwa ajili ya injili ya Mungu, na kwa ajili

ya wokovu wa nafsi. Hii ndio maana ya kuudhiwa na kuteswa kwa ajili ya injili ya kweli ya Mungu.

Kufanya upatanisho kwa ajili yako binafsi, kwa ajili ya umashuhuri, kwa ajili ya majivuno, na kuikwepa hasara yako binafsi huko si kuudhiwa na kuteswa kwa ajili ya haki bali ni kuudhiwa na kuteswa kwa ajili yako binafsi. Kuudhiwa huku na kuteswa si kwa ajili ya haki ya Mungu. Aina hii ya kuudhiwa na kuteswa ni yako binafsi tu. Kile ambacho Bwana wetu alikisema ni kuudhiwa na kuteswa kwa ajili ya haki, kwa matendo ya haki, kwa wokovu wa nafsi, na kwa Ufalme wa Mungu.

Wakati mtu fulani anapokutana na kukutesa na kisha akakusemea kila aina ya mabaya dhidi yako kwa uongo kwa ajili ya haki ya Mungu, basi unaweza kumjibu yeye kwa fikra ukijisemea, “Pamoja na kuwa ananiudhi na kunitesa kwa sababu hanifahamu mimi, basi mimi ninapaswa kufanya jambo fulani ili kumwokoza yeye toka katika dhambi.” Ufalme wa Mbinguni ni kwa watu kama wewe.

Leo hii, wengi miongoni mwa wale walioisikia injili ya kweli hawapendi kuudhiwa na kuteswa kwa ajili ya haki. Kwa hiyo wanaogopa kuwa na imani ya kweli katika Kristo. Watu wengine wanaifahamu injili ya maji na Roho lakini hawaipeleki kwa wengine; na wengine wanadiriki hata kuwa upande wa wenye dhambi badala ya kuwa upande wa Mungu, na wanafanya hivyo ili kukwepa kuudhiwa na kuteswa. Hawa si watu wenye baraka. Hata kama wamepokea ondoleo la dhambi, ikiwa hawataudhiwa na kuteswa kwa ajili ya injili hii ya maji na Roho, basi wataishia kuisaliti imani ya kweli badala ya kuitunza imani yao hadi siku watakaposimama mbele za Mungu. Kwa kweli inakubalika kwa mtu fulani kuwa mdhaifu, lakini ikiwa mtu huyo anaikana injili ya kweli toka ndani ya moyo wake na anaungana na watu wengine wa ulimwengu huu

kusimama kinyume na injili, basi mtu huyo hajabarikiwa.

Kama jinsi wavuvi walivyokusanya samaki wazuri katika chombo na kisha kuwatupilia mbali wale wabaya, basi vivyo hivyo Mungu atawatenga waovu miongoni mwa wenye haki (Mathayo 13:47-49). Maelezo haya yamo katika mfano wa Mbinguni katika kitabu cha Mathayo. Hata hivyo, kusema kweli mtu yeyote aliye na Roho Mtakatifu hawezi kukwepa kuudhiwa na kuteswa kwa ajili ya haki. Baada ya kuamini katika injili ya maji na Roho na kupokea ondoleo la dhambi, mtu hawezi kufanya lolote zaidi ya kuishi kwa ajili ya haki ya Mungu. Kwa kweli haiwezekani kwa mtu kushughulikia matamanio ya mtu binafsi ikiwa mtu huyo anaongozwa na Roho Mtakatifu ndani ya moyo wake. Mwenye haki anapokea kuudhiwa na mateso kwa ajili ya haki ya Mungu.

Ule ukweli kuwa mtu mwenye haki anateseka kwa magumu, je, hilo si jambo baya? Wakati mwingine haiwezi kuwa hivyo, sisi tunateseka na kukutana na magumu ili kuieneza injili, lakini je, kuna jambo lolote ambalo si gumu? Ninatumaini kuwa ninyi nyote ndio wale wanaoudhiwa na kuteswa kwa ajili ya haki ya Mungu. Pia mimi mwenyewe ninapenda kuwa mtu wa kwanza kuteseka kwa ajili ya haki ya Mungu. Ukiwa kama mtu mwenye haki, ninatumaini kuwa huudhiwi na kuteseka kwa sababu ya makosa ya kizembe kama vile kukamatwa ukiendesha vibaya baada ya kuwa umelewa, kufungwa ulipokamatwa ukiiba, au kukamatwa na kupelekwa jela ulipokuwa ukitapeli. Kwa kweli Mungu hawezi kupendezwa na hayo.

Katika Mathayo 5:11-12 Yesu alisema, *“Heri ninyi watakapowashutumu na kuwaudhi na kuwanenea kila neno baya kwa uongo, kwa ajili yangu. Furahini, na kushangilia; kwa kuwa thawabu yenu ni kubwa mbinguni; kwa maana ndivyo walivyowaudhi manabii waliokuwa kabla yenu.”* Yesu

alisema kuwa tutabarikiwa pale tutakapo tukanwa na kuteswa na wakati mtu atakapotusema vibaya kwa uongo kwa ajili yake.

Mara nyingi watu ulimwenguni huwaudhi na kuwatesa watoto wa Mungu na kanisa la Mungu. Je, hii ina maanisha nini? Hii ina maanisha kuwa sisi wenye haki tumebarikiwa. Ikiwa tunatukanwa na kushutumiwa na watu katika ulimwengu kwa sababu ya kuamini na kuifuata haki ya Mungu, basi kwa hakika tutabarikiwa na Mungu. Wenye haki kama hawa wamebarikiwa kwa sababu wanaudhiwa na kuteswa kwa ajili ya injili ya Mungu na Kanisa lake. Lakini baadhi hawana imani katika Neno lake kiasi kuwa wanajaribu kuyakwepa maudhi na mateso ambayo yanawajia kwa ajili ya Mungu.

Wale manabii na watumishi wa Mungu katika Agano la Kale, ambao ni watangulizi wetu wa imani, waliteseka sana kuliko sisi kwa ajili ya Mungu.

Sisi ni Chumvi na Nuru ya Ulimwengu

Yesu alisema, *“Ninyi ni chumvi ya dunia; lakini chumvi ikiwa imeharibika itatiwa nini hata ikolee? Haifai tena kabisa, ila kutupwa nje na kukanyagwa na watu.”* Sisi ambao ni wenye haki ni chumvi ya dunia. Kule kusema kuwa wenye haki ni chumvi ya dunia maana yake ni kuwa wenye haki ni viumbe wenye maana katika ulimwengu huu. Watu wanaoamini katika injili ya maji na Roho ni viumbe muhimu sana katika ulimwengu huu.

Hata hivyo, inakuwaje basi ikiwa chumvi itapoteza ladha yake? Na je ina maanisha nini kusema kuwa chumi imepoteza ladha yake? Hii ina maanisha kuwa haiwezi kufanya kazi kama chumvi. Mtu mwenye haki anapoteza nguvu zake kwa sababu anautupilia mbali Ukweli na anafanya kazi kwa mujibu wa

taratibu za ulimwengu huu badala ya kuishi kwa ajili ya injili ya maji na Roho.

Katika Mathayo 5:14-15, inasema, *“Ninyi ni nuru ya ulimwengu.”* Na pia inasema *“Mji hauwezi kusitirika ukiwa juu ya mlima. Wala watu hawawashi taa na kuiweka chini ya pishi, bali juu ya kiango; nayo yawaangaza wote waliomo nyumbani.”*

Wenye haki ni mwanga wa wokovu. Ulimwengu unaisikia injili ya maji na Roho toka kwa wenye haki. Kwa maneno mengine, wenye dhambi wanapokea wokovu toka katika dhambi kwa kupitia sisi wenye haki.

Katika Mathayo 5:16, Biblia inasema, *“Vivyo hivyo nuru yenu na iangaze mbele ya watu wapate kuyaona matendo yenu mema, wamtukuze baba yenu aliye mbinguni.”* Tunaishi hali tukimtukuza Mungu kwa kuamini katika injili ya maji na Roho na kisha tunazipokea baraka hizo nane kwa imani. Ni lazima tuendeleo kuyaishi maisha haya ya kiimani kwa imani inayoamini katika Bwana. Tunamshukuru Mungu ambaye anatupatia baraka za kimungu. Ukweli huu wote ni Hotuba Mlimani ambayo Bwana aliiongea. ☒

SURA YA

6



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Fundisho la Bwana Juu ya Maombi (1)

< Mathayo 6:1-15 >

“Angalieni msifanye wema wenu machoni pa watu, kusudi mtazamwe na wao; kwa maana mkifanya hayo, hampati thawabu kwa Baba yenu aliye mbinguni. Basi wewe utoapo sadaka, usipige panda mbele yako, kama wanafiki wafanyavyo katika masinagogi na njiani, ili watukuzwe na watu. Amin, nawaambieni, wamekwisha kupata thawabu yao. Bali wewe utoapo sadaka, hata mkono wako wa kushoto usijue ufanyalo mkono wako wa kuume; sadaka yako iwe kwa siri; na Baba yako aonaye sirini atakujazi. Tena msalipo, msiwe kama wanafiki; kwa maana wao wapenda kusali hali wamesimama katika masinagogi na katika pembe za njia, ili waonekane na watu. Amin, nawaambia, wamekwisha kupata thawabu yao. Bali wewe usalipo, ingia katika chumba chako cha ndani, na ukiisha kufunga mlango wako, usali mbele za Baba yako aliye sirini; na Baba yako aonaye sirini atakujazi. Nanyi mkiwa katika kusali, msipayuke-payuke, kama watu wa mataifa; maana wao hudhani ya kuwa watasikiwa kwa sababu ya maneno yao kuwa mengi. Basi msifanane na hao; maana Baba yenu anajua mnayohitaji kabla ninyi hamjamwomba. Basi ninyi salini hivi:

Baba yetu uliye mbinguni,

Jina lako litukuzwe.

Ufalme wako uje.

Mapenzi yako yatimizwe,

Hapa duniani kama huko mbinguni.

Utupe leo riziki yetu.

Utusamehe deni zetu,

Kama sisi nasi tuwasamehevyo wadeni wetu.

Na usitutie majaribuni,

Lakini utuokoe na yule mwovu.

Kwa kuwa ufalme ni wako, na nguvu, na utukufu, hata milele. Amina.

Kwa maana mkiwasamehe watu makosa yao, na Baba yenu wa mbinguni atawasamehe ninyi. Bali msipowasamehe watu makosa yao, wala baba yenu hatawasamehe ninyi makosa yenu.”

Katika kanisa letu kuna mtoto anayeitwa Jin Woo Kim. Alikuwa karibu kufa kutokana na ugonjwa ambao haujulikana vizuri. Alipotibiwa mara ya kwanza hospitalini, hata madaktari hawakujua sababu au chanzo cha ugonjwa ule, hivyo wakachanganyikiwa kabisa wasijue namna ya kumtibu mtoto yule. Tulichoweza kukifanya ni kuomba tu kwa Mungu ili amponye mtoto yule. Sasa, Bwana alimwongoza mtoto yule kuweza kuonana na daktari mzuri zaidi, na kwa sasa yupo katika hali nzuri zaidi. Wakati shida zinapotujilia, basi tunapaswa kufanya kila tutakaloweza lakini kwanza kabisa ni lazima tukumbuke kuomba.

Katika Mathayo 6:1, Bwana alisema, *“Angalieni msifanye wema wenu machoni pa watu, kusudi mtazamwe na wao; kwa maana mkifanya kama hayo, hampati thawabu kwa Baba yenu aliye Mbinguni.”* Hii ina maanisha kuwa hatupaswi kuyaonyesha matendo yetu mema kwa wengine katika maisha yetu ya kidini. Maneno haya ni kwa wote waliozaliwa tena upya na wale ambao bado hawajazaliwa tena upya. Hata hivyo,

sisi, wenye haki ni lazima tukumbuke jambo hili kwa kusema, *“Angalieni msifanye wema wenu machoni pa watu, kusudi mtazamwe na wao.”* Bwana alisema kuwa ikiwa tutayafanya matendo yetu ya haki ili kusudi tuweze kutazamwa na watu, basi hatutaweza kupata thawabu yetu toka kwa Baba wa Mbinguni hapo baadaye.

Tunaweza kupata dhana mashuhuri katika kifungu cha maandiko cha somo la leo. Dhana hiyo ni kuwa chochote tutakachofanya, hatupaswi kukifanya mbele za watu ili kuonyesha haki yetu. Bwana alisema kuwa tunapaswa kumwamini Yeye na Neno lake katika mioyo yetu, na kisha kufanya matendo ya haki kwa mioyo yetu yote mbele za Mungu aonaye sirini. Hii ina maanisha kuwa tunapaswa kufanya kitu chema katika mioyo yetu kuliko kufanya kitu chem kwa nia ya kujionyesha kwa watu. Tukifanya kama Bwana anavyotuagiza ndipo Mungu Baba yetu atakapo tupatia thawabu yetu. Kwa maneno mengine, ikiwa tutaishi maisha ya imani ili tu kujionyesha, basi hatutaweza kukubaliwa na Mungu na wala hatutapata kibali chake. Hata kama mtu atajaribu kufanya jambo zuri kwa juhudi zaidi, ukweli ni kuwa jambo hilo haliwezi kuwa na maana ikiwa litakuwa linafanywa kwa lengo la kujionyesha.

Je, kila kitu tunachokifanya kitakuwa ni unafiki ikiwa watu wengine watakuja kukifahamu? Kwa kweli si hivyo. Ukweli ni kuwa ikiwa mtu analifanya jambo lolote ambalo mwishowe litakuja kujulikana kwa imani yake, yaani ikiwa mtu atatenda matendo ya haki kwa imani, basi jambo hilo litakuwa limefanywa kwa imani na huko si kujionyesha. Kila kitu kinachofanyika pasipo imani na toka katika moyo usioamini hicho ndicho kitakachokuwa ni unafiki. Haijalishi kuwa watu watakuja kuona matendo yetu mema au la. Kwa kifupi, tendo la kulibeba na kulipeleka Neno la Mungu kwa

imani mara zote linakubaliwa na Mungu, lakini jambo lolote tukilifanya kwa lengo la kupata kibali kwa wanadamu kuliko kupata kibali kwa Mungu, basi jambo hilo litakuwa ndilo unafiki.

Mungu hawezi kutoa thawabu kwa imani ya kinafiki, na kwa hiyo tunapaswa kuepuka imani kama hiyo katika maisha yetu ya kidini. Ni lazima tulikumbuke fundisho hili akilini mwetu tunapokuwa tukifanya kazi za kuwasaidia wengine au kuomba.

Hivi Ndivyo Bwana Anavyotaka Sisi Tuombe

Katika Mathayo 6:5-6, neno linasema: *“Tena msalipo, msiwe kama wanafiki; kwa maana wao wapenda kusali hali wamesimama katika masinagogi na katika pembe za njia, ili waonekane na watu. Amin, nawaambia, wamekwisha kupata thawabu yao. Bali wewe usalipo, ingia katika chumba chako cha ndani, na ukiisha kufunga mlango wako, usali mbele za Baba yako aliye sirini; na Baba yako aonaye sirini atakujazi.”*

Wakati tunapomba, ni kitu gani tunachokihitaji? Ni lazima tuombe kwa moyo unaokwenda mbele za Mungu kama mtoto mdogo. “Mungu, sina kitu hiki. Naomba unipatie kitu hiki.” “Baba Mungu, nipo katika shida, tafadhari naomba unisaidie.” Kuomba hali ukiwa na moyo wa mtoto ni kuomba kama hivi na inawezekana pale tunapokuwa na imani rahisi. Kwa hiyo, wakati tunapoyafanya matendo yetu mema, basi ni lazima tuyafanya matendo hayo kwa kuwa tuna imani katika mioyo yetu.

Pia Bwana alisema, *“Bali wewe usalipo, ingia katika chumba chako cha ndani, na ukiisha kufunga mlango wako, usali mbele za Baba yako aliye sirini; na Baba yako aonaye*

sirini atakujazi” (Mathayo 6:6). Tunapomwomba Mungu, tunapaswa kwenda katika chumba chetu cha siri katika mioyo yetu ili kuyataja maombi yetu kwa Mungu hali tukiwa mahali pa siri. Mungu Baba atayasikiliza maombi yetu na kisha atatupatia thawabu pale tutakapokuwa tukiomba mbele ya uwepo wake. Kwa maneno mengine, tunapomwomba Mungu, tunamwomba Mungu ambaye yupo mahali pa siri, na kwa sababu hiyo hatupaswi kujionyesha kwa wengine. Hii haimaniishi kuwa tunaweza kuomba tukiwa sirini tu, bali hatuombi ili tuweze kuonekana na wengine kuwa tnaomba, bali tunaomba kwa mioyo yetu kwa kuwa tunataka kumtafuta Mungu kwa mioyo yetu.

Je, unajifunza nini toka katika somo la Maandiko hapo juu? Tumejifunza kuwa Mungu hapendi kujionyesha. Kwa nini Mungu hapendi kujionyesha?

Watu wanakusanyika katika duara na kuanza kupiga kelele huku wakisema “Bwana” mara tatu kwa sauti kubwa, huku wakiipiga madhabahu, na wengine huku wakitubu kwa huzuni huku wakisema, “Bwana, nisamehe. Nimefanya dhambi.” Watu wanalia kwa jinsi hiyo, lakini mara wanapotoka tu nje ya kanisa, wanaanza kucheka. Wanalia kwa wakati mmoja kisha baada ya muda mfupi wanacheka na kupiga makofi huku wakifanya machukizo. Kwa kuwa katika aina hizo za ibada kila mtu anakuwa katika hali ya kuchanganyikiwa, basi inafikia hatua kuwa haya mtu mwenye akili timamu anajiuliza kuwa, “Je, nina shida ya akili? Ninajisikia kama ninataka kuchanganyikiwa, hasa ninapowaona watu wakilia kwa muda fulani halafu baada ya muda mfupi wanacheka.” Hii ndiyo sababu wenye akili na ufahamu sahihi hawaendi kwenye makanisa kama hayo. Pia Mungu hawapendi watu kama hao, na anaugeza uso wake ili wasiweze kumwona na anawaita watu wa jinsi hiyo kuwa ni

wanafiki.

Je, watu wanaolia na kupiga kelele wanapoomba wakati hawana lolote la kufanya na Bwana wanapokuwa wamerudi majumbani mwao, hao ni akina nani? Sehemu kubwa ya watu hawa ni wale ambao wamepagawa na mapepo. Katika mikutano yao hata viongozi wao wamepagawa na mapepo na wananena kwa lugha ambazo watu hawawezi kuzielewa. Wakati mwingine wanawahamasisha wafuasi wao kwa kutumia mivumo ya sauti katika vipaza sauti huku wakisema, “Pokea moto! Moto moto!” wanawafanya watu kuchanganyikiwa huku wakiwafanya waombe kwa machozi kwa wakati mmoja, halafu wakati unaofuata kumtukuza Mungu kwa wazimu wenye makeke.

Tabia kama hizi ni za kujionyesha ambazo hazina la kufanya kuhusiana na mapenzi ya Mungu. Tunapolisama Neno la Mungu, tunaweza kuona kuwa Mungu hapendi kujionyesha. Kinachomfurahisha Mungu ni kuomba kwa imani katika mioyo yetu. Mungu anafahamu kuwa ni aina gani ya imani ambayo kwa hiyo tunaomba, na kwa sababu hiyo anataka kusikia maombi yetu ya kweli mbele za Mungu.

Ni lazima tubadilishe mitazamo yetu ya maombi mbele za Mungu wetu. Tunachotakiwa kukifanya ni kuwa wa kweli na wapole wakati tunapoomba, “Bwana, sina kitu hiki, tafadhari noambi unipatie.” Tunatumia maneno mengi na sentensi ndefu tunapoomba kwa sababu imani yetu haina nguvu ya kutosha. Ikiwa tutaendelea kulisikia Neno la Mungu, basi imani yetu inayomwamini Mungu itakua. Kadri tunavyolishikilia Neno la Mungu na kuomba, basi tutakua na kisha kumwamini Mungu, na kadri tutakavyoyapokea majibu kutokana na sala zetu tulizoomba kwa maombi yenye imani, basi tutakuwa na shukrani zaidi kwa Mungu. Na kadri tunavyozidi kujifunza zaidi kuhusu Mungu, basi tunakuwa na hatimaye kuwa watu

wa imani baadaye. Na hivyo tutafikia hatua ya kumwomba Mungu zaidi na zaidi, na kisha tutafanyika watu ambao tunamwomba Mungu kwa kweli wakati wowote tunapoomba. Wakati mwingine tunamwomba Mungu kuhusu mapatano ya jambo fulani. Kusema kweli, kuna wakati ambapo tunaomba kwa sauti, lakini ikitokea hivyo ni kwa lengo la kumwomba Mungu na si kuwafanya watu wasikie kuwa tunaomba. Mambi ya kweli ni yale yenye imani rahisi kama hizi: “Mungu, naomba msaidie fulani na fulani kwa kuwa hali yake si nzuri. Mponye fulani na fulani. Mpatie afaya fulani na fulani. Mbariki fulani na fulani kutokana na hali yake.”

Kabla sijazaliwa tena upya nilizoea kuomba kwa sentensi ndefu sana kama hivi: “Baba yetu, ambaye ni mtakatifu, na mwenye rehema na mwenye baraka tele. Asante kwa ajili ya upendo wako na rehema ambazo Mungu Baba unatupatia...” nilizoea kutamka maneno yote yaliyorembeshwa katika sala zangu. Je, maombi kama hayo ni maombi yanayokwenda kwa Mungu aliye sirini? Ikiwa kweli tutaomba hivi wakati wote, je Bwana atasikia? Je, tuna mambo mengi sana ya kuyaombea? Kwa kweli sifikirii hivyo. Bwana alisema “Msipayuke-payuke kama wafanyavyo Wamataifa na Mafarisayo. Je, unadhani kuwa ninaweza kukusikia kwa sababu unasema maneno mengi? Hiyo si kweli.” Pia Bwana alisema, “*Basi msifanane na hao; maana Baba yenu anajua mnayohitaji kabla ninyi hamjamwomba*” (Mathayo 6:8). Haya ndiyo maombi ambayo Bwana alitufundisha kama mfano wa namna ya kuomba.

Sala ya Bwana Inatueleza Kuomba Kwanza Kwa Ajili ya Msamaha wa Dhambi

Toka katika Mathayo 6:9, Bwana anatufundisha sisi jinsi

ya kuomba kwa mifano yake ya maombi. Na haya ndiyo mafundisho yaliyomo katika Sala ya Bwana. Bwana alisema, “*Basi ninyi msalipo, salini hivi.*” Jambo la kwanza ni, “*Baba yetu uliye Mbinguni, jina lako litukuzwe.*” Hii ina maanisha kuwa tunapaswa kuomba ili kwamba jina la Bwana liweze kutukuzwa. Wale ambao bado hawajapokea ondoleo la dhambi ni lazima wafahamu kuwa wanapaswa kuomba kwanza ili waweze kupokea ondoleo la dhambi, kwa kuwa hiyo ndiyo sala ambayo inalitukuza kwanza jina la Bwana. Hivyo mwenye dhambi ni lazima aombe hivi kwanza: “Mungu, naomba uzifute dhambi zangu. Naomba unifanye kuwa mtoto wa Mungu.” Hivi ndivyo wanavyopaswa kuomba kwanza. Pia wanapaswa kuomba hivi, “Tafadhari naomba unisaidie niweze kuzaliwa tena upya kwa kuisikia injili ya maji na Roho. Naomba unisaidie niweze kuyaamini maneno yako yote. Naomba unisaidie niweze kuelewa kila maneno ya Mungu.” Hivi ndivyo wanavyopaswa kuomba.

Hata hivyo, sisi wenye haki ambao tumepokea ondoleo la dhambi tunaweza kuomba maombi sahihi na kuishi maisha sahihi ambayo yanalingana na ule mstari wa kwanza wa Sala ya Bwana: “*Baba yetu uliye Mbinguni, Jina lako Litukuzwe.*” Kwa kweli, ikiwa tunataka kutolikufuru jina la Mungu na kuishi maisha matakatifu, basi tunapaswa kuomba msaada wa Mungu kama hivi: “Tafadhari naomba usinifanye niwe kikwazo na kisha nikalikufuru jina lako. Naomba unisaidie niweze kuishi maisha matakatifu kwa imani katika maisha yangu yote. Naomba unisaidie niweze kuishi maisha matakatifu ambayo yanastahili kwa wenye haki wa Mungu.” Ni lazima tumwombe Mungu “kutushikilia kila wakati”, yaani kila tunaomba msaada ili tuweze kulitukuza jina la Mungu.

Mungu alitupatia sisi wenye haki mada ya kwanza ya maombi ili tuweze kuishi maisha yetu kwa utakatifu ili jina

lake liweze kutukuzwa. Kwa kuwa wenye dhambi hawawezi kumwita Mungu kuwa Baba yao, basi wenye dhambi hao ni lazima waombe kwanza kwa ajili ya ondoleo la dhambi zao: “Tafadhari naomba uzifute dhambi zangu. Naomba unisaidie niweze kuifahamu injili ya maji na Roho ambayo umenipatia. Naomba nipokee ondoleo la dhambi kwa kufahamu na kuamini katika Ukweli wa Upatanisho wako.” Ili kuweza kulitukuza jina la Mungu kama mstari wa kwanza wa Sala ya Bwana unavyosema, basi kila mwenye dhambi ni lazima amwombe Mungu msaada wake kwa ajili ya ondoleo la dhambi.

Ni Lazima Tuishi Maisha ya Maombi Ambayo Ni Kwa Ajili ya Ufalme wa Mungu Duniani

Je, sehemu ya pili ya maombi ni ipi? Sehemu ya pili ya maombi ni “Ufalme wako Uje. Mapenzi yako yatimizwe hapa duniani kama huko Mbinguni.” Ni lazima tuombe ili kwamba Ufalme wa Mungu uweze kuanzishwa hapa duniani. Mungu Baba yetu alimtumza Bwana wetu na amezitoweshea mbali dhambi zetu zote mara moja na kwa wote kwa ubatizo wa Bwana na damu yake Msalabani. Kwa hiyo, sisi tuna roho Mtakatifu katika mioyo yetu, na Ufalme wa Mungu upo katika mioyo yetu kiroho.

Hata hivyo, kuna watu wengi sana ambapo bado hawajapokea ondoleo la dhambi katika mioyo yao na bado wanahangaika na dhambi. Kwa kuwa Ufalme wa Mungu bado haupo katika mioyo yao, basi ni lazima waombe kwa ajili ya msamaha wa dhambi kwanza. Bwana wetu amezitoweshea mbali dhambi zote za ulimwengu takribani miaka 2000 iliyopita wakati alipokuwa akibatizwa na Yohana Mbatizaji na wakati aliposulubiwa. Hata hivyo, bado kuna watu wengi

ambao wana dhambi kwa sababu hawaufafhamu na wala hawauamini ukweli huu. Kwa hiyo, ni lazima tuombe ili kwamba waweze kupokea ondoleo la dhambi zao zote.

Mungu ndiye Mkuu wa kila mwanadamu. Hata hivyo, ukweli ni kuwa watu wengi katika ulimwengu huu wanajitoa kumfuata ibilisi na kisha wanaishi kama watumishi wake badala ya kumtumikia Mungu. Kwa kweli Mungu anachukia sana mambo yanayomvunjia heshima kama hayo, na anataka viumbe wake wote ambao aliwaumba kuliadini Neno lake, kuzaliwa tena upya na kisha kufanyika watu wake. Hivyo ni lazima tuombe ili kwamba Ufalme wa Mungu uweze kuja katika moyo wa kila mtu kabla mwisho wa ulimwengu na kabla Ufalme wake wa Milenia havijafika. Mungu anatutaka sisi kuomba ili kwamba kila mtu aweze kupokea ondoleo la dhambi, na ili kwamba ulimwengu mzima uwe ni Ufalme ambapo Mungu anatawala, na ili kwamba mambo haya yote yaweze kutendeka. Hivyo, Mungu anatuamuru sisi tuliozaliwa tena upya kuupanua Ufalme wake. Kwa maneno mengine, sisi, wenye haki ni lazima tuombe kwa ajili ya kupanuka kwa Ufalme wa Mungu.

Ni Lazima Tuishi Maisha ya Imani Kwa Ajili ya Chakula cha Uhai

Hebu tusome Mathayo 6:11, kifungu ambacho kina mada ya tatu ya maombi katika Sala ya Bwana. *“Utupe leo riziki yetu.”* Ni lazima tuombe kwa ajili ya chakula chetu cha kila siku tunachokula. Lakini pia hii ina maanisha kuwa tunapaswa kumwomba Bwana kwa ajili ya chakula cha uzima wa milele. Tunahitaji kula chakula kwa ajili ya miili na roho zetu. Hivyo ni lazima tuombe, “Mungu tunaomba utupatie chakula

tunachoweza kula kwa ajili ya miili yetu na roho zetu.” Tunachokiomba si kwa ajili ya kutosha mwaka mzima au kwa ajili ya mwezi mzima, bali sisi tunaomba kile tunachokihitaji kwa mahitaji yetu ya mwili na roho kila siku.

Ndugu Wakristo wapendwa, tunahitaji kuomba kwa ajili ya mkate wetu wa kiroho wa kila siku. Si makosa kumwomba Mungu kwa ajili ya chakula tunachokihitaji kwamiili yetu na roho. Kwa kuwa tulifanyika watu tunaoamini katika injili ya maji na Roho na kwamba sasa tuna ile fursa ya kuweza kumwomba Mungu Baba chochote tunachokihitaji, basi tunapaswa pia kuomba kwa mujibu wa mada hii ya tatu. Wale wanaoamini katika injili ya maji na Roho basi hao ndio watu wanaofanya kazi kwa ajili ya haki ya Mungu, na kwa sababu hiyo ni lazima waombe ili kwamba Mungu aweze kuwasaidia kupata vitu mbalimbali vya hapa duniani kwa ajili ya injili ya maji na Roho, na ili Mungu aweze kuzibariki zinazoendelea. Kwa kweli ni sahihi kwa wenye haki kuishi kwa ajili ya haki ya Mungu na kuishi kuishi vizuri kwa ajili ya kuieneza injili ya maji na Roho. Si tu kwamba tunaomba Sala ya Bwana mara moja tu katika maisha, bali tunapaswa kuomba kwa kufuata mada hizo za maombi kila siku.

Ikiwa tutamwomba Mungu ili atupatie chaku cha kila siku tunachokihitaji, basi ni hakika kuwa Mungu atatujiu. Tunapoomba kwa moyo wote, tunaweza kabisa kuona jinsi Mungu anavyotupatia chakula cha mwili na roho katika kanisa la Mungu. Mungu anatupatia chakula cha kutosha ili kwamba watumishi wa Mungu, watu wake na Wakristo wote waweze kukusanyika katika Kanisa lake na kisha kuishi kwa umoja kadri wanavyoendelea kuifanya kazi ya injili na kumtumikia Bwana. Mungu anatupatia chakula cha kiroho ila siku wakati tunapoyasikiliza mahubiri ya watumishi wake, shuhuda za watakatifu, na hata pale tunapoitafakari Biblia sisi wenyewe.

Mara nyingi sisi wenye haki tunaweza kupata chakul chetu cha kila siku toka katika maisha yetu ya kila siku kuliko kulisoma Neno la Mungu. Mara nyingi Roho Mtakatifu aliye katika mioyo yetu anafurahishwa wakati wote na kazi yetu ya kiroho ambayo inamfurahisha Mungu Baba. Na kile kinachomfanya Roho Mtakatifu afurahishwe ndani ya mioyo yetu ni kile chakula cha kila siku kwetu. Ikiwa tutamwomba Bwana kila siku “Tunaomba utupatie chakula” halafu hatufanyi chochote, basi ni lazima tutambue kuwa haya si maombi halisi. Ikiwa umemwomba Mungu, basi ni lazima utegemee jinsi Mungu atakavyojibu maombi yako na kisha ufanye vizuri pale mahali ulipo ili kwamba Mungu aweze kufanya kazi kwa kupitia sisi. Ikiwa hatufanyi kazi kwa ajili ya injili ya maji na Roho halafu tukategemea kuwa Mungu atatupatia chakula chetu cha kiroho wakati tukiwa tumekaa tu, basi ni vema tutambue kuwa kufanya hivyo ni kumdhihaki Mungu.

Mara nyingi tunakusanyika katika Kanisa la Mungu kwa ajili ya ibada za kuabudu. Kwa kweli hiki ndicho chakula ambacho tunaweza kula na si tu kusikia maneno kanisani, ni vema ifahamike kuwa kuifanya kazi ya Mungu kwa mujibu wa mapenzi yake kunafanyika kuwa ndio chakula cha kiroho kwetu. Ikiwa mwenye haki haifanyi kazi ya Mungu hata baada ya kuwa amepokea ondoleo la dhambi, basi imani yake itakufa haraka au baadaye kidogo na mwishowe ataishia kuliacha Kanisa la Mungu. Kuna baadhi ya watu ambao wanaipoteza hata ile imani inayoamini katika Ukweli wa Mungu wa wokovu mkamilifu. Hivyo, ni lazima tuifanye kazi ya haki ya kuieneza injili ya maji na Roho ili tuweze kupata chakula chetu cha kila siku.

Wale Waliofanyika Kuwa Wenye Haki Kwa Imani Wanatakiwa Waweze Kusameheana

Katika Mathayo 6:12 imeandikwa kuwa, *“Utusamehe deni zetu, kama sisi nasi tuwasamehevyo wadeni wetu”* Hii ni mada ya nne ya Sala ya Bwana. Tunaweza kuielewa vibaya mada hii tukidhani kuwa inatueleza kutubu kila siku na kusamehewa kila siku. Hata hivyo, mada hii ya nne haizungumzii juu ya kusamehewa kila siku. Mada hii ya nne ina masharti yake. Kwa kuwa tumepokea ondoleo la dhambi toka wka Mungu mara moja kwa kuamini katika injili ya maji na Roho, basi tunapaswa kuishi kwa ajili ya haki ya Mungu kwa kuwasamehe watu wengine ambao wametukosea. Ni lazima tuwasamehe watu wengine ambao wametukosea kama vile Bwana alivyotusamehe dhambi zetu zote pasipo masharti kwa maji na damu. Maneno haya ya Mungu yanatueleza kuwa kwa kuwa Mungu ameziondolea mbali dhambi zetu zote, basi ni lazima na sisi tuyafute makosa ya wengine wanayotukosea.

Hebu fikiria kuwa tuna deni la dola bilioni miatano ambazo ni kiwacho kikubwa sana cha fedha kiasi kuwa hatuwezi kulipa deni hilo hata kama tutafanya kazi maisha yetu yote. Mshahawa wa dhambi wa kila mmoja wetu unaweza kuwa kama kiasi hicho cha deni. Lakini Mungu alituonea huruma na akalifuta deni hilo pasipo masharti yoyote. Badala ya kusema ‘nataka deni langu lilipwe,’ Mungu, Baba alimtuma Mwanawe na akamfanya abatizwe ili azichukue dhambi zote za ulimwengu, na akasulubiwa. Kwa hiyo, Mungu alilipa deni la dhambi zetu na akatuokoa kwa kupitia ubatizo wa Yesu na damu yake Msalabani. Hivi ndivyo Bwana alivyolifuta deni letu kwa kuamini katika ondoleo lake la dhambi. Tumepokea ondoleo la dhambi kwa kutofanya kitu chochote kilichostahili kufutiwa dhambi zetu, bali tumefutiwa dhambi zetu kwa

kuamini katika Kweli. Tumepokea karama ya wokovu kwa imani na pia tumepokea kule kusafishwa dhambi zetu toka kwa Mungu kwa imani. Kwa kuwa Yesu alilipa lile deni la dola bilioni miatano ambalo tusingeliweza kulilipa katika muda wa maisha yetu yote kwa ubatizo wake na damu yake Msalabani, basi ukweli ni kuwa dhambi zetu zilifutwa kwa kutofanya chochote bali ni kwa neema yake tu.

Sasa, tunapaswa kuyafuta makosa mengine madogodogo ambayo watu wengine wanakuwa wametukosea. Ni lazima tuishi katika msingi wa kusameheana sisi kwa sisi. Hali tukiwa tunaishi kati ya wenye haki na wenye dhambi, basi tunapaswa kuwasamehe wengine yale makosa ambayo wanakuwa wametutendea. Tunahitaji kusameheana kwa mujibu wa injili ya Bwana.

Sisi ni wadeni wa Mungu kwa ajili ya dhambi zetu, lakini Bwana alikuja hapa ulimwenguni na akazisamehe dhambi zetu zote kwa ubatizi alioupokea toka kwa Yohana Mbatizaji na damu yake. Bwana alizona dhambi zetu na hali yetu kuwa hatuna msaada, hivyo akazifutulia mbali dhambi zote kwa uwezo wake. Kwa kuwa Bwana alifahamu wazi kuwa tusingeliweza kuwa wenye haki hataka tungejitoa maisha yetu kwa ajili ya kuziondoa dhambi, basi ndio maana Bwana alizioshelea mbali dhambi zetu zote kwa ukweli wa injili ya maji na Roho. Mungu Baba alimtuma Mwanawe pekee, Yesu Kristo, na akamfanya kuzichukua katika mwili wake dhambi zote za ulimwengu kwa ubatizo wake, kwa kusulubiwa na kwa kufufuka kwake, na kwa sababu hiyo ametuokoa sisi kikamilifu toka katika dhambi zetu zote. Hivyo, Yesu Krisot amefanyika kuwa Mwokozi wa milele aliyetuokoa toka katika dhambi zetu zote za milele.

Sisi tumekutana na Bwana aliye hai kwa kuamini katika injili ya maji na Roho. Je, unaamini katika injili ya maji na

Roho kama wokovu wako binafsi moyoni? —Ndiyo.— Je, sisi tumepokea ondoleo la dhambi kwa kuamini kwamba Yesu alizisamehe dhambi zetu zote kwa injili ya maji na Roho? —Ndiyo.—

Sasa, kwa kuwa tumesamehewa dhambi za ulimwengu kwa neema ya kushangaza, basi sisi nasi tunahitaji kusamehe makosa ya wengine ambao wametufanyia. Mada ya nne ya Sala ya Bwana inahusu kusameheana. Kuitenda na kuifuata sala hii ambayo Bwana wetu alituumuru ni njia sahihi ya maisha yetu ya kiroho.

Tunachotakiwa kukifahamu vizuri katika sehemu hii ya nne ya Sala ya Bwana ni kuwa hatujapokea ondoleo la dhambi kwa kuzisema sala za toba. Watu wengine wanakiangalia kifungu hiki kinachosema, *“Utusamehe deni zetu, kama sisi nasi tuwasamehevyo wadeni wetu,”* na kisha wanasema, “Hebu angalia. Unapokea ondoleo la dhambi pale unapozitamka sala za toba.” Lakini hii si kweli. Mafundisho hayo potofu ni kwa sababu wanaielewa vibaya injili ya maji na Roho.

Aya hii inasema kuwa wale waliopokea ondoleo la dhambi kwa injili ya maji na Roho wanapaswa pia kusameheana na kuyafunika mapungufu ya kila mmoja wao. Dhambi za mwanadamu haziwezi kuondolewa ati kwa msamaha wa midono, bali dhambi hizo zinahitaji upatanisho wa kisheria: Mnyama wa kisheria asiye na mawaa, kuzipitisha dhambi kwa kuwekewa mikono, kifo cha yule mnyama aliyewekewa mikono kinacholipa mshahara wa dhambi. Yesu Kristo ametekeleza matakwa yote ya sheria kwa ajili ya msamaha wetu kwa kuzichukulia mbali dhambi zote za ulimwengu. Hivyo kwa kupitia imani yetu ambayo ilitupatia ondoleo la dhambi, basi sisi nasi ni lazima tuyafute makosa ya watu wengine kadri tunavyoishi.

Ni Lazima Tuombe Ili Kwamba Mungu Atulinde Kwa Kila Njia

Katika Mathayo 6:13 maandiko yanasema: *“Na usitutie majaribuni, lakini utuokoe na yule mwovu.”* Majaribu maana yake ni kupita katika magumu. Kwa hiyo kule kusema “usitutie majaribuni” maana yake ni kuomba ili kwamba tusiingizwe katika majaribu na magumu. Tunaomba mbele ya Mugu Baba tunapaswa kuomba kama hivi: “Mungu Baba, naomba usinifanye kuingia katika magumu, naomba unilinde katika mazingira yote ya hatari. Mungu naomba unibariki, naomba unisaidie nisikosee kwa sababu nina vitu vingi vya kidunia au kwa sababu sina vitu vya kidunia vya kutosha, na omba unilinde na yule mwovu na ninaomba unisaidie nisiangukie majaribuni.” Tunapaswa kuomba ili kwamba Mungu asitutie majaribuni.

Ni lazima tuombe kwa uangalifu tangu ile sala ya kwanza hadi sala ya sita kila siku. Ikiwa mtu ataangukia katika majaribu kwa kweli inakuwa ni kazi ngumu sana na mzigo mzito kwa akili ya mtu, na mtu anaweza kuishia kufa. Hivyo ni lazima tuombe kwa Mungu kila siku ili tusiingie katika magumu.

Kwa nyongeza, tunapaswa kutoka katika magumu ndani ya mioyo yetu kwa kuwa na faragha ya kiimani pamoja an wandugu katika kanisa la Mungu. Kanisa la Mungu ni mahali pazuri pa faragha miongoni mwa Wakrito waliozaliwa tena upya. Haiwezekani kuwa na faragha ya kweli miongoni mwa watu ambao hawajazaliwa tena upya. Hata hivyo, ndani ya Kanisa la Mungu kuna watu wengi sana ambao unaweza kuwa na faragha nao kadri utakavyo.

Na unapojaribu kuwa na faragha na mtu fulani, basi itakuwa vizuri zaidi ikiwa utafanya faragha na mtu ambaye

yupo juu yako kiroho. Hii ni kwa sababu mtu kama huyo anaweza kukushirikisha ufahamu na uzoefu wake wa kiroho ambao ni wa kweli na unaowezezekana kwa kina. Pia ni vizuri sana kwetu kwa sababu watu waliokomaa kiroho wanaweza kutusaidia kukila chakula cha kiroho kwa urahisi kwa kuwa kwa namna moja au nyingine wanafanana na sisi katika mazingira tuliyonayo. Hata hivyo, tunapaswa kuwa waangalifu kwamba tusiwe na faragha na mtu ambaye ametuacha sana kiimani maana anaweza kutushirikisha mambo ambayo yanaweza kuwa magumu sana kwetu kuyala kiroho.

Hii inaweza kufananishwa na wakati ule tulipoanza kujifunza kuendesha baiskeli. Mwalimu mzuri kwa mwanafunzi mtoto ambaye ndio kwanza bado anajifunza kuendesha baiskeli ni kaka yake au dada yake, ambao wameshafahamu namna ya kuendesha baiskeli, hao ni wazuri zaidi kuliko wazazi wao. Mtu ambaye anaweza kuelezea vizuri kwa mtoto ili aweze kufahamu kuendesha baiskeli ni mtu yule ambaye amepitia hivi karibuni mafunzo hayo. Ikiwa baba atataka kumfundisha mtoto wake kuendesha baiskeli, basi bila shaka anaweza kulete baiskeli kubwa ambayo ni saizi yake na kwa sababu hiyo atamvunja moyo mtoto anayetaka kujifunza. Mtoto anaweza kujifunza kwa haraka anapowaona dada zaka au kaka zake wanapokuwa wakiendesha baiskeli ndogo na kwa sababu hiyo anatiwa moyo kuwa hata yeye anaweza huku akijisema “kwa kweli ninaweza kufanya vile.” Vijana wadogo wanaweza kuwsaidia watoto kupata maelekezo halisi. Baiskeli kubwa ya baba inaweza kuwavuruga watoto wanaojifunza hata kabla hawajaipanda hiyo baiskeli.

Hivi ndivyo inavyoweza kulingana na faragha zetu katika imani. Yeye anaweza kutusaidia kukua katika imani hatua kwa hatua ni yule ambaye tunakaribiana katika kiwango cha imani, yaani mtu ambaye amepita katika mapito yanayofanana na

yako. Faragha inakuwa na faida zaidi unapokuwa na mtu ambaye amepitia mapito yale yale muda si mrefu kabla yako.

Ni lazima tuombe wakati wote kuwa ‘usitutie majaribuni na utuhifadhi salama’ na ‘utuokoe na yule mwovu’ hali tukiwa na imani katika injili ya maji na Roho. Hatari kubwa tunapokuwa katika mikono ya mwovu ni kwamba tunakuwa hatutambui kuwa tupo katika hatari. Je, unaionaje hatari hiyo? Hivyo ni lazima tuombe ili kwamba tusiangukie katika mikono ya yule mwovu, na kwamba ili Mungu atuokoe na yule mwovu. Na ikiwa utajihisi kuwa upo katika majaribu, basi jitoe katika hali hiyo haraka kwa imani yako.

Mathayo 6:14-15 inasema, *“Kwa maana mkiwasamehe watu makosa yao, na baba yenu wa mbinguni atawasamehe ninyi, Bali msipowasamehe watu makosa yao, wala Baba yenu hatawasamehe ninyi makosa yenu.”*

Ni lazima tusameheana. Kusema kweli, wale waliozaliwa tena upya ni wazuri sana katika kusamehe. Hata hivyo, hata miongoni mwetu sisi wenye haki jambo la kusamehe ni jambo gumu sana. Pengine ndio sababu Bwana wetu anarudia kukazia hapa juu ya kuwasamehe wengine. Je, unasamehe kwa urahisi au husamehi hasa unapoyaona makosa ya watu wengine na udhaifu wao?

Kwa kuwa baadhi ya mambo hayawezi kutengeuliwa, basi inawezekana kabisa tukaumia katika mioyo yetu, lakini tunapaswa kusamehe kwa urahisi. Wakati mtu mmoja anapokiri kwa kweli kuhusu kile ambacho amekifanya vibaya, basi hakuna sababu ya kutomsamehe mtu kama huyo. Wakati watu wanaporudi na kubadilika toka tabia zao mbaya, basi tunapaswa pia kuwakubali.

Hata hivyo, kuna watu wengi ambao hawawezi kufanya hivyo. Wale wanaoangukia katika majaribu ya mwovu mara nyingi wanawaongoza wengine kuangukia katika majaribu

badala ya kuwasamehe. Kwa hiyo, hatupaswi kuwaongoza wengine kwenda katika majaribu ati kwa sababu tu ya magumu na matatizo ambayo yanatukabili. Wale wanaowafanya waamini wenzao kuchanganyikiwa na kusimama kinyume na Mungu wataishia katika maangamizi yao.

Hatupaswi kuishi maisha yetu ya kidini ili kuwaonyesha wengine imani yetu. Kwa ufupi, jambo lolote lile kwamba ni jema au baya tunapaswa kulitafakari mbele za Mungu. Tunapofanya hivyo, na tunapotambua katika mioyo yetu kuwa tumefanya vibaya, basi tunachotakiwa kufanya ni kukubali na kukiri kuwa tulifanya makosa kwa kusema, “ilikuwa ni kosa.” Ikiwa tutayasikia maneno ya kuomba radhi au ya kusamehe au ya kukiri makosa waliyoyafanya, basi sisi tunapaswa kuacha kukasirika katika mioyo yetu na kisha kusamehe. Yesu alisema, *“Bali maneno yenu yawe Ndiyo, ndiyo; Siyo, siyo; kwa kuwa yazidiyo hayo yatoka kwa yule mwovu”* (Mathayo 5:37). Hatuhitaji maelezo au tafadhari. Jambo pekee tunalotakiwa kulifanya ni kuifikiria haki mbele za Mungu na kukiri makosa yetu ikiwa tutakuwa tumefanya makosa yoyote.

Tunapoisikia habari kamili toka kwa ndugu ikiwa amekosea, basi tunachopaswa kumwambia ndugu huyo ni kuwa ‘hilo ni kosa’ na ni juu yake kulikubali. Na anachotakiwa huyo ndugu ni kutafakari mambo haya mbele za Mungu, kumwangalia Bwana ambaye ameyatoweshea mbali hata makosa haya kwa ubatizo wake na damu yake Msalabani, na kisha kusimama tena kwa imani. Bila kujalisha makosa ambayo tumeyafanya, tunahitaji kusimama katika imani katika haki ya Mungu, na kumshukuru Mungu ambaye amezifutilia mbali dhambi zetu na kisha kuomba mwongozo wa Mungu kwa kupitia Roho Mtakatifu ili kuweza kufanya vizuri katika siku zijazo.

Majumuisho ya Sala ya Bwana

Tunapaswa kuomba kwa mujibu wa mada ya kwanza ya maombi, “Baba yetu uliye Mbingunu, Jina lako Litukuzwe.” Kwa mwenye dhambi ambaye hajazaliwa tena upya, basi hii sehemu ya kwanza “Jina lako Litukuzwe,” ina maanisha ni kuomba “Naomba nisaidie kupokea ondoleo la dhambi ili kwamba niweze kulitukuza jina la Mungu.” Lakini kwetu sisi tuliozaliwa tena upya na kupokea ondoleo la dhambi, mada hii ina maanisha ni kuomba “Naomba unisaidie kuishi maisha mazuri, maisha ya haki ambayo ambayo yatakutukuza wewe Mungu, jinsi hiyo.” Hata hivyo, wale ambao hawajazaliwa tena upya ni lazima waombe kwanza kwa ajili ya ondoleo la dhambi ili kwamba waweze kumtukuza Mungu.

Hivyo, wenye haki ni lazima waombe hivyo: “Tafadhari naomb niishi maisha matakatifu. Tafadhari naomba niishi maisha ya imani. Tafadhari naomba unisaidie nisilikufuru jina lako.” Kwenda kwa wenye dhambi na kuikubali imani yao kuwa ni wenye haki kwa kweli ni tabia mbaya kwa Mungu inayolidhihaki jina la Mungu. Hatupaswi kufanya hivyo. Ni lazima tupambane na wale wanaosimama kinyume na Mungu. Kufanya amani nao na kutafuta ushirika na faragha pamoja nao ni dhambi kubwa mbele za Mungu. Kwa hiyo, kufanya kazi kwa ajili ya injili kwa ushirikiano na wenye imani hiyo inakuwa ni haki. Kuipatanisha mioyo yetu na wenye dhambi ni kuanguka katika maovu na kumkufuru Bwana.

Je, ni kitu gani kinachoweza kutokea ikiwa tutashirikiana na mpelelezi anayekuja kuchunguza mambo muhimu ya nchi? Kufanya hivyo kutatufanya sisi kuwa wabaya kama mpelelezi huyo na mhaini msaliti anayeiua nchi yake. Hili ni jambo ambalo msaliti analifanya, msaliti ambaye hafahamu mahali anapotakuwa kuwepona na ambaye anashirikiana na adui katika

kuiuza nchi yake, na kwa hakika hii ni dhambi kubwa inayohitaji adhabu ya kifo.

Mstari wa pili wa Sala ya Bwana unasema “Ufalme wako uje, mapenzi yako yatimizwe hapa duniani, kama huko Mbinguni,” kwa kweli mstari huu unapaswa kuombwa na wenye haki kwa ajili ya kuziombea nafsi nyingine ambazo bado hazijapokea ondoleo la dhambi. Ni kuomba kuwa mapenzi ya Mungu yafanyike duniani.

Sasa, mapenzi ya Mungu ni nini? Mapenzi ya Mungu ni kwamba kila nafsi iweze kupokea ondoleo la dhambi. Tunapaswa kuomba Mungu ili atusaidie kwa hilo. Ni lazima tuombe kwa ajili ya wafanyakazi na vifaa vya kidunia, na kisha tunahitaji kujitoa sisi wenyewe kwa Bwana ili kuifanya kazi yake. Ni lazima tujitoe sisi wenyewe pamoja na muda wetu na kila kitu tulichonacho ili kwamba mapenzi ya Mungu yaweze kufanyika hapa duniani. Ni lazima tuishi kwa ajili ya kazi ambayo itamwongoza kila mtu kupokea ondoleo la dhambi. Ni lazima tuombe kwa ajili ya jambo hilo kila siku na kufanya juhudi ili kwamba mapenzi ya Mungu yaweze kufanyika hapa duniani kwa kuitoa mioyo na miili yetu kikweli kweli.

Baadhi ya watu baada ya kuwa wamepokea ondoleo la dhambi wanasahau mkazo wa Bwana aliotufundisha kuwa tunapaswa kuomba kwa ajili ya Ufalme wa Mungu. Ikiwa mtu aliyepokea ondoleo la dhambi haombi kw ajili ya kuieneza injili au haungani na Kanisa la Mungu kwa ajili ya dhumuni hili, basi mtu huyo anakaa mahali pa mtu mwovu. Mtu wa jinsi hiyo asitegemee baraka za kimwili na kiroho toka kwa Mungu. Kwa hiyo, kusema kweli, wale watu wenye haki ambao hawaishi na kuomba kwa ajili ya haki ya Mungu basi ni vema watambue kuwa wato hao wanaishi nje ya mapenzi ya Mungu na hawana ushirika na mapenzi ya Mungu.

Tunapaswa kuomba kwa ajili ya chakula chetu cha kila

siku, jambo ambalo ni mada yetu ya tatu ya maombi. “Mungu tunaomba utupatie chakula ili tusiweze kufa njaa. Tunaomba utupatie chakula kwa ajili ya mwili na roho. Bariki biashara zetu ili kwamba tuweze kuifanya kazi ya Mungu.” Tunapaswa kuomba kwa majaliwa yake ili kwamba tuweze kuitumikia injili ya maji na Roho. Hili ni eneo la tatu la maombi.

Sehemu ya nne ya maombi ni kwamba tunapaswa kusamehe wengine ambao wametukosea kama Bwana alivyotusamehe dhambi zetu zote kwa maji na damu. Miongoni mwa akina kaka na akina dada katika famili yetu ambao wamepokea ondoleo la dhambi, na watumishi wa kike na wa kiume wa Mungu tunapaswa kusameheana kama ambavyo Bwana alivyoazitoweshea mbali dhambi zetu zote. Wakati mtu anaposema, “hili ni kosa,” basi mtu mwingine anapaswa kukubali, “Aah, ndiyo, nimekosea,” Kisha tunapaswa kusameheana toka ndani ya moyo. Hata kama silizungumzii sana jambo hilo, ninaamini kuwa utalisamehe kwa urahisi. Na hii ndiyo sababu umeweza kuishi kwa uaminifu hadi sasa, si ndivyo?

Tunapaswa kuomba ili kwamba tusiweze kuangukia majaribuni, ili kwamba tusiweze kuingia katika magumu, ili kwamba Mungu aweze kutuhifadhi salama. Na sehemu ya sita ya maombi ni “Utuokoe na yule mwovu”. Ni lazima tuombe ili kwamba sisi tuliozaliwa tena upya tusingukie katika mikono ya yule mwovu au kuwa watumwa wa mwovu, na ili kwamba Mungu aweze kutukomboa toka katika yule mwovu hasa tunapokuwa katika mikono ya mwovu.

Kisha Bwana alisema, “Ni lazima tusameheane makosa yetu.” Hii ina maanisha kuwa wenye haki ni lazima wasameheane.

Sisi wenye haki tunapaswa kuomba kwa namna ambayo Bwana alitufundisha kuomba na kisha tuamini hivyo. Ni

lazima tuombe kwa kufuata mada kama hizo kila siku. Kwa nyongeza, tunapaswa kuishi kama mada hizo zinavyoelekeza kila siku. Ni lazima tuombe ili tuweze kusameheana, ili tusingukie majaribuni, kwa ajili ya chakula cha kila siku, na kwa ajili ya Ufalme wa Mungu hapa duniani. Pia ni lazima tujaribu kuishi maisha ya kimaombi kwa imani. Tunapaswa kuishi maisha yenye maombi hasa katika yale maeneo ambayo tuna mapungufu nayo ili tuweze kumtukuza Mungu.

Ndugu Wakristo wapendwa, ikiwa tutakichukua kifungu cha leo cha Maandiko kwa wale ambao bado hawajazaliwa tena upya, basi ni hakika kuwa watakitafsiri tofauti. Hata hivyo, sisi tuliozaliwa tena upya tunakichukua kifungu tunakichunguza na kukitafsiri, ninaamini kuwa hawa wao wanakubali kuwa kile nilichokisema hadi sasa sijakosea na kwamba nipo sahihi. Je, unaamini hivyo? —Ndiyo.—

Mada ya kwanza ya maombi ambayo Mungu anaisema kwa wale waliozaliwa tena upya ni “Jina Lako Litukuzwe.” Hata hivyo, katika maisha ya kila siku, pengine tunafanya mambo ambayo yanalikufuru jina la Mungu kuliko kulitukuza? Je, wewe ni mimi ni watu tunaoweza kufanya jitihada ya asilimia 100% wakati wote? Hata kama hatuwezi kumtukuza Bwana, basi angalau tusilikufuru jina la Bwana. Hii ina maanisha kuwa badala ya kuwa ni kikwao kwa kazi ambayo Kanisa la Mungu inajaribu kulifanya, sisi tunapaswa kuheshimu, kupenda, kuungana na kushirikiana na Kanisa la Mungu na huduma zake ili kwamba jina la Mungu litukuzwe.

Ndugu Wakristo wapendwa, kwa kweli tunapaswa kuomba kwa ajili ya akina kaka na akina dada, kwa watumishi wa kike na wa kiume, kwa ajili ya kupanuka kwa Ufalme wa Mungu, kwa ajili ya maisha ambayo hayalikufuru jina la Mungu, na kwa ajili ya chakula chetu cha kila siku. Pia tunapaswa kumsamehe kila mtu aliyetuokosa toka katika

mioyo yetu kama Bwana alivyo zifutulia mbali dhambi zetu zote. Pia ni lazima tuombe ili tusije tukaingia kwenye shida.

Hebu tuombe ili kwamba mioyo yetu isiangukie majaribuni. Ikiwa hatulisikilizi Neno la Mungu, basi mioyo yetu itaangukia majaribuni na kuingia katika shida. Tunapokuwa hatujalisikia Neno, ambalo ni chakula cha kiroho, basi mioyo yetu itaosa afya. Na itakapotokea hivyo, basi hapo ndipo tutakapoangukia majaribuni, yaani kwa maneno mengine tutaangukia katika shida. Hapo ndipo mawazo yetu ya kimwili yatakapoinuka na kuyatawala mawazo yetu ya kiroho. Hali hii inapotokea, na kwa kuwa sisi, wenye haki hatuwezi kuzifuata tamaa za mwili kwa asilimia 100%, basi mioyo yetu itakuwa katika shida kwa sababu tutajikuta tukienda nyumba na mbele kati ya mwili na roho. Kwa hiyo, tunapaswa kuangalia ili tusiweze kuangukia katika hali kama hiyo.

Ili kuweza kujiandaa kwa ajili ya afya ya kiroho, basi ni lazima tuje katika kanisa la Mungu na kulisikia Neno la Mungu. Bila kujalisha kuwa ni nani anayehubiri Neno wakati wa ibada, ukweli ni unabaki kuwa Neno la Mungu linahubiriwa wiki nzima katika Kanisa la Mungu. Hata kama hakuna kitu maalum tunachoweza kukipata, ukweli ni kuwa walau tunaweza kuepukana na makapi ya mawazo ya kimwili na makosa yake kwa kulisikiliza Neno. Tunaweza kuepukana na makapi ya mawazo ya kimwili na makosa yake pale tunapolisikiliza Neno. Kama vile maji yanayotiririka yasivyoweza kuoza kwa sababu maji yana uwezo wa kusafisha makapi na uchafu kadri yanavyozidi kutiririka, basi vivyo ndivyo Neno la Mungu linavyoweza kuyaondoa mabaki katiak mioyo yetu kadri linavyozidi kutiririka kama maji ya uzima ndani ya mioyo yetu. Tunapokuwa tumejiepusha na mawazo ya kimwili, basi mawazo mapya ya kiroho yanainuka na yanaitawala ile nafasi iliyo wazi, na kwa sababu hiyo akili zetu zinakuwa salama na

zinalindwa.

Kwa hiyo, tunapaswa kuchunguza wakati wote ili kuona ikiwa kuna mada yoyote ya maombi iliyoandikwa katika Biblia ambayo tumekuwa tukiizembea. Ikiwa kutakuwa na jambo lolote ambalo tumekuwa tukilizembea, basi tunapaswa kuacha tangu sasa. Ni lazima tuanze kuomba kwa ajili ya maeneo haya, na kisha ni lazima tuyaangalie sana maeneo haya. Na hii ndiyo sababu Bwana alisema kuwa hatupaswi kujionyesha tunapokuwa tukiomba, na pia alitufundisha jinsi ya kuomba juu ya vipengele vichache.

Sala ya Bwana inashughulikia kila kitu. Hii inaonyesha jinsi tunavyoweza kuishi maisha ya maombi. Kusema kweli, sehemu ya kwenza ya maombi imekwisha jibiwa kwa ajili yetu. Ondoleo la dhambi katika sehemu ya kwanza ya maombi imekwisha timilizwa, lakini sasa ni lazima tuombe ili kwamba tuweze kuishi maisha matakatifu. Kwa hiyo, ni lazima tulisikie Neno la Mungu na kuieneza injili kila siku ili kuweza kuutunza utakatifu, ili kwamba tusiweze kuwa wale wanaoushusha utukufu wa Mungu. Ili tusiweze kuwa wale ambao wanaushusha utukufu wa Mungu, basi tunapaswa kuomba kila siku kwa Bwana ili aweze kutuhifadhi salama na kutubariki.

Si tu kwamba miili yetu ndiyo inayopaswa kula bali hata roho zetu zinatakiwa kula. Kwa wenye haki ambao wamepokea ondoleo la dhambi zao zote, basi kule kulisikia Neno na kuomba kunaweza kuwa ndio chakula chao cha kiroho, lakini kusema kweli, chakula cha kweli cha kiroho ni kule kuieneza injili. Imani inayotenda kazi ndiyo chakula cha hali ya juu kinachoweza kutupatia afya katika mioyo yetu. Tunapoliamini Neno toka katika mioyo yetu na kufanya kwa imani hiyo, basi tunaweza kusimama imara katika imani, na kwa sababu hiyo tunajazwa kiroho na viini vyote vya hali ya juu ya kiroho vinatawanyika katika miili yetu yote na hivyo tunaweza kukua

kama watu wa kiroho.

Ikiwa kuna mwovu yoyote anayetuletea matatizo, basi tunapaswa kuungana na kuyakana maovu, na kama kuna mtu miongoni mwetu anayeangukia katika mikono ya yule mwovu, basi tunapaswa kuungana ili kumsaidia. Tunapaswa kuungana na kujilinda kwa kuomba, “Mungu, tunaomba tafadhari usimamishe dhoruba hii ya kiroho toka kwa yule mwovu. Tafadhali tunaomba utusaidie kila moja wetu.”

Tunapaswa kufikiria juu ya mada za maombi ambazo tumekuwa tukizizembea, na kama kumekuwa na eneo ambalo tumelizembea, basi tunapaswa kugeuka na kisha kuishi maisha ya haki.

Mungu alitushauri kushikamana, kupendana, kutiana moyo kadri mwisho unavyozidi kukaribia. Sisi wenye haki, ambao tumezaliwa tena upya tunapaswa kuijaza mioyo yetu kwa imani na kisha kuvutana huku tukiuhifadhi upendo wa kweli wa moyo. Ikiwa mtu yumo katika matatizo, basi badala ya sisi kupata faida kutokana na hali yake, basi tunapaswa sisi kusimama katika eneo lake na kuomba ili kwamba matatizo yake yaweze kutatuliwa. Hivyo ndivyo tunavyopaswa kufanya kama watu wa Mungu. Basi tunapaswa kulifikiria jambo hilo kama ni shida yetu wenyewe na kisha kujadiliana kwa hali ya kujaliana kama vile “Je, ingelikuwaje kama matatizo hayo yangekuwa ni ya kwangu? Je, ningelifanya nini?” Hata kama mtu huyo asingeliweza kufanya kama ambavyo tungelifanya sisi na hata kama mtu huyo haishi maisha ya haki, basi tunapaswa kuomba na kumkubali hali tukiwa na tumaini kuwa mtu huyo atabadilika.

Kwa kuwa sisi ni wanadamu wenye mapungufu mengi, mara nyingi tunafanya makosa mengi yasiyoweza hata kuelezeka. Hata sasa, kwa kuwa Mungu ndiye hakimu atakayetoa hukumu ya mwisho, basi ni heri kwetu ikiwa

tutaligeukia na kulishikilia Neno ambalo limezifutilia mbali dhambi kama hizo kwa imani katika Mungu. Hii ni kwa sababu kama Mungu akisema kuwa kitu fulani ni bure, basi ni kweli kitu hicho kinakuwa ni bure. Ni lazima tukubaliane sisi kwa sisi katika imani inayoamini katika moyo wa Bwana ambao kwa huo sisi sote tunakubaliwa na kupokelewa.

Bila kujali hali ilivyo, tunapaswa kufanya maamuzi yetu ya mwisho kulingana na kanuni zinazojengwa katika Mungu, yaani maombi kwa Mungu, maisha yanayomfuata Mungu, na kisha kuishi kwa mujibu wa Sala ya Bwana. Hatupaswi kuwa wale wenye imani dhaifu ambao wanaifahamu tu Sala ya Bwana, bali tunapaswa kuwa wale wenye imani yenye nguvu yenye ufahamu sahihi inayofanya kwa mujibu wa imani katika maombi. Hiyo ni pale tunapofanyika kuwa wale wanaoishi kwa mujibu wa Sala ya Bwana kwa kuamini katika injili ya maji na Roho.

Kwa kweli ninashindwa jinsi ya kutoa shukrani zangu nyingi kwa Mungu ambaye anatusaidia kuishi kwa mujibu wa mapenzi ya Bwana. ☒

Fundisho la Bwana Juu ya Maombi (2)

< Mathayo 6:5-15 >

“Tena msalipo, msiwe kama wanafiki; kwa maana wao wapenda kusali hali wamesimama katika masinagogi na katika pembe za njia, ili waonekane na watu. Amin, nawaambia, Wamekwisha kupata thawabu yao. Bali wewe usalipo, ingia katika chumba chako cha ndani, na ukiisha kufunga mlango wako, usali mbele za baba yako aliye sirini; na Baba yako aonaye sirini atakujazi. Nanyi mkiwa katika kusali msipayuke-payuke, kama watu wa mataifa; maana wao hudhani ya kuwa watasikiwa kwa sababu ya maneno yao kuwa mengi. Basi msifanane na hao; maana Baba yenu anajua mnayohitaji kabla ninyi hamjamwomba. Basi ninyi salini hivi;

Baba yetu uliye mbinguni,

Jina lako litukuzwe.

Ufalme wako uje.

Mapenzi yako yatimizwe,

Hapa duniani kama huko mbinguni.

Utupe leo riziki yetu.

Utusamehe deni zetu,

Kama sisi nasi tuwasamehevyo wadeni wetu.

Na usitutie majaribuni,

Lakini utuokoe na yule mwovu.

Kwa kuwa ufalme ni wako, na nguvu, na utukufu, hata milele. Amina.

Kwa maana mkiwasamehe watu makosa yao, na Baba

yenu wa mbinguni atawasamehe ninyi. Bali msipowasamehe watu makosa yao, wala Baba yenu hatawasamehe ninyi makosa yenu.”

Ninatumaini kuwa ninyi nyote ni watu wa maombi. Ninaamini kuwa mnafanyika uwa watu wa imani kwa kuomba na kwa kupata uzoefu kutokana na majibu ya Mungu. Ninatumaini mnafanyika kuwa watu imani yenye nguvu na kwamba mtawapatia watu wengi msaada kama Petro alivyosema, *“Mimi sina fedha, wala dhahabu, lakini nilicho nacho ndicho nikupacho. Kwa jina la Yesu Kristo wa Nazareti, simama uende”* (Matendo 3:6). Pia ninatumaini kuwa mtaomba kwa ajili ya mahitaji yenu mnayoyahitaji na kwamba mtayapokea.

Kwa kawaida, wanadamu wana mapungufu, na kwa sababu hiyo ni lazima tuombe bila kukoma. Hii ndiyo sababu Paulo alisema, *“Furahini siku zote, ombeni bila kukoma, shukuruni kwa kila jambo.”* Ni lazima ujifunze maombi ambayo unaomba kwa imani katika Mungu. Ikiwa hutaiondeleza tabia ya kuomba kwa sauti mnapokuwa mkiomba kwa pamoja juu ya jambo fulani, basi utashindwa kuomba peke yako kwa ujasiri wakati utakapokuwa ukihitaji kuomba kwa ajili yako binafsi.

Maombi ni pumzi ya uhai na hawala ya fedha iliyo wazi. Hii ina maanisha kuwa chochote utakachomwomba Mungu, Mungu atakpatia. Kwa kuwa Mungu ni Baba wa wenye haki, basi wakati tunapoomba, Mungu hutusikia na kutupatia majibu.

Ni Lazima Tumwombe Mungu Msaada Hali Tukiwa na Imani Katika Injili ya Maji na Roho

Mathayo 7:7-12 inatueleza kuhusu maombi: *“Ombeni, nanyi mtapewa; tafuteni, nanyi mtaona; bisheni, nanyi mtafunguliwa; kwa maana kila aombaye hupokea; naye atafutaye huona; naye abishaye atafunguliwa. Au kuna mtu yupi kwenu, ambaye mwanawe akimwomba mkate, atampa jiwe? Au akiomba samaki, atampa nyoka? Basi ikiwa ninyi, mlio waovu, mnajua kuwapa watoto wenu vipawa vyema, Je! Si zaidi sana Baba yenu aliye mbinguni atawapa mema wao wamwombao? Basi yoyote myatakayo mtendewe na watu, nanyi watendeeni vivyo hivyo; maana hiyo ndiyo torati na manabii.”*

Kifungu hiki cha maandiko kinasema kuwa tunapomba kwa kweli katika imani, basi Mungu Baba atatupatia. Bwana alitufundisha jinsi ya kuomba na kwamba Baba anafahamu kila kitu tunachokihitaji, lakini ni lazima tuombe kwa Mungu, na ni hapo tu ndipo Mungu anapotusikia na kutupatia majibu. Pamoja na kuwa tunatakiwa kujifunza juu ya neema ya Mungu kwa kupitia injili yake, lakini ukweli ni kuwa tunapaswa kujifunza maisha ya ushirika na Mungu. Tunahitaji kujifunza kwa kupitia imani yetu kuwa kama sisi wenye haki tukiomba basi Mungu Baba anajibu maombi yetu.

Wakati Mungu Baba ni Baba wala wale wote wanaoamini katika injili ya maji na Roho, inawezekanaje basi Mungu asiwapatie watoto wake yale mema wanayoyahitaji? Ni lazima tuamini kuwa Mungu ni Baba yetu na kwamba anatupatia mambo mema kila tunapomba. Ni lazima tuombe hali tukiwa na imani inayoamini katika maombi. Wale wanaofahamu namna ya kumwomba Mungu kwa juhudi katika imani wanaweza kuomba kwa ajili ya kaka na dada zao na kwa

wokovu wa nafsi nyingine. Kinachomfanya mtu kuwa mtu wa imani ni kule kujaribu kuomba katika haki ya Mungu. Imani ya wale wanaoamini katika wokovu wa kweli wa Mwokozi itandelea kukua kwa hatua kadri wanavyoendelea kupata uzoefu wa nguvu ya maombi yenye juhudi. Kwa hiyo, ni lazima tujifunze kuhusu maombi kwa kupitia imani.

Pamoja na kuwa tulikombolewa toka katika dhambi zetu mara moja na kwa ajili ya wote kwa injili ya maji na Roho, ukweli ni kuwa ni lazima tumwombe Mungu “bila kukoma” kama vile tunapumua wakati wote. Ikiwa tutamwomba Bwana ili atupe msaada wakati wote, basi ni hakika kuwa Mungu atatusikia. Ni lazima tuishi kadri tunavyozidi kuueneza uhusiano wetu na Mungu kwa kupitia imani, kwa kuwasiliana naye, kwa kumwomba msaada kila wakati, na kwa kuupokea msaada wake.

Ninaamini kuwa mnafanyika kuwa watu wa maombi, na kwamba hata mimi ninafanyika kuwa mtu wa maombi kwa kupitia imani. Pia ninaamini kuwa sisi sote tutajifuna kuomba ili kwamba tuweze kuwa wale tunaoomba kwa imani na kisha kuyazoea majibu ya Mungu. Ninaamini kuwa wewe na mimi tunamwomba Mungu ili atupatie mambo mengi ili kwamba tuweze kuwa matajiri katika imani, utajiri wa mali, afya bora na haki ya Mungu na ili kwamba tuweze kuzishiriki baraka hizo pamoja na wengine. Ninaamini kuwa Mungu atatupatia baraka hizi na kwamba atatufanya tubarikiwe kadri tunavyoendelea kuwa watu wa maombi ya kweli.

Ni Lazima Tuiombe Imani Ambayo Inalitukuza Jina Takatifu la Mungu Baba

Katika kifungu cha leo cha maandiko, Bwana

ametufundisha mambo ya kuyaombea na jinsi ya kuomba. Yesu anasema, *“Basi ninyi salini hivi; Baba yetu uliye mbinguni, jina lako litukuzwe”* (Mathayo 6:9). Bwana anatueleza sisi kuiombea kwanza sehemu hii: *“Baba yetu uliye mbinguni, jina lako litukuzwe.”* Ni lazima tuombe kwanza ili jina la Mungu litukuzwe, yaani tulitukuze kwanza jina la Mungu.

Ili tuweze kufanya hivyo ni aina ipi ya imani ambayo tunapaswa kuwa nayo? Kwa hakika, ni lazima tuwe na imani inayoamini katika injili ya wokovu inayotupatia ondoleo la dhambi. Ili kuwa na imani hiyo, ni lazima tuifahamu na kuiamini injili ya maji na Roho, ambayo Bwana alimwambia Nikodemo (Yohana 3:1-17).

Kwa hiyo, ikiwa tutalitukuza jina Mungu Baba aliye Mbinguni, basi ni lazima kwanza tuwe wale ambao tumepokea ondoleo la dhambi mbele za Mungu. Hii ina maanisha kuwa ni lazima tuwe wale wanaoamini kuwa Mungu na Yesu Kristo ni Mungu aliyetuumba wewe na mimi, na kwamba alibatizwa na Yohana Mbatizaji ili kutuokoa wewe na mimi toka katika dhambi zote, na kwamba alifanyika kuwa Mwokozi ambaye alisulubiwa. Imani inayoweza kumwita Baba wa Yesu Kristo Baba yetu ni imani inayoamini katika injili ya maji na Roho. Hii ndiyo njia pekee inayoweza kutuhalalishia sisi kumwita Mungu *“Baba yetu uliye mbinguni,”* na kisha kumwomba hali tukimwita kwa kufuata kanuni. Na ni kwa imani hii tu ndipo tunapokea zile sifa zinazotuwezesha kumwomba Mungu kwa kuwa Mungu ni Mwokozi na Baba yetu. Kwa kuwa wale walipokea ondoleo la dhambi wana imani kama hii, basi hao wanaweza kuomba *“Baba yetu uliye mbinguni, jina lako litukuzwe.”* Kwa hiyo, Bwana alitufundisha kuomba kwanza kwa jambo ambalo ni la muhimu sana kiimani.

“Jina lako litukuzwe” maana yake hatupaswi kulidharau

na kulilalamikia jina lake. “Jina lako litukuzwe” ina maanisha ni aina ipi ya imani ambayo tunapaswa kuwa nayo ili tuweze kumtukuzwa Mungu na kuishi maisha ambayo hayalikufuru jina la Mungu. Hii ina maanisha kwamba ili kufanya hivyo, basi ni lazima tuwe na imani juu ya wokovu toka katika dhambi zote ambayo Mungu ametupatia: “Bwana ametuokoa toka katika dhambi zetu zote za ulimwenguni kwa kutupatia haki ya wokovu na kwa kutufanya tuamini katika haki ya Mungu. Mungu ametufanya sisi kuwa tusio na dhambi kwa kupitia injili ya maji na Roho. Kwa hiyo, sisi ni watu wa Mungu.” NI lazima twende mbele za Mungu Baba hali tukiwa na imani hii kila tunapoomba.

Sisi sote ni lazima tuwe na imani inayoamini katika injili ya maji na Roho. Ni lazima tuitunze na kuishikilia imani yetu yenye nguvu katika injili ya maji na Roho ambayo Bwana aliiongea. Kwa hiyo, Bwana anatueleza kuomba ili tuweze kuwa na imani takatifu inayotuwezesha kupokea ondoleo la dhambi.

Ni Lazima Tuamini Kuwa Kila Mtu Duniani Ataipokea Injili ya Maji na Roho Ili Kwamba Ufalme wa Mungu Uanzishwe Haraka Duniani

Pili, Bwana alisema, “*Ufalme wako uje, mapenzi yako yatimizwe hapa duniani kama huko mbinguni.*” Hii ina maanisha kuwa wanadamu wote ni lazima wafanyike kuwa watu wa Mungu ili kwamba ufalme wa Mungu uweze kuja. Kwa kweli, hata kabla ya uumbaji, Mungu alikuwa amepanga kutufanya sisi kuwa watu wa Mungu katika Kristo kwa kupitia injili ya maji na Roho, Mungu alimuumba mwanadamu kwa majaliwa hayo, na ametuokoa sisi wenye dhambi toka katika

dhambi zetu. Kisha Mungu alitupatia wokovu wake mkamilifu kwetu sisi tunaoamini katika Ukweli wa injili ya maji na Roho. Kwa hiyo, sisi ambao tulifanyika kuwa watu wa Mungu kwa kuamini katika injili ya maji na Roho ni lazima tuishi maisha ambayo yana tabia ya kuomba na kufanya kazi kwa juhudi ili kwamba Ufalme wa Mungu uweze kuja haraka.

Ni lazima tufanye hivi ili kwamba idadi ya watu ambao watakuwa wamepokea ondoleo la dhambi iweze kuongezeka. Tuna hakika kuwa Bwana atarudi tena hivi karibuni na kwamba atatupatia baraka na zawadi sisi ambao tumekuwa waaminifu kwa kulifuata Agizo lake Kuu ya Utume. Ni lazima tuombe kwa ajili ya kuanzishwa kwa Ufalme wa Mungu ili kwamba Mungu aweze kuitimia mipango yake iliyokuwa imepangwa kwa kupitia Yesu Kristo.

Ni lazima tuishi kwa imani na kuwaombea watu ili waweze kupokea ondoleo la dhambi na kwa kupanuka kwa Ufalme wa Mungu. Ni lazima tufanye kazi kwa juhudi katika kuieneza injili ya maji na Roho katika kila nchi hapa ulimwenguni ili kwamba wale wote watakaoamini waweze kuamini na kumrudia Mungu na kumtukiza. Ni lazima tuwasaidie wasioamini kutubu haraka mbele za Mungu na kisha waweze kuupokea wokovu wake mkamilifu. Na hii ndiyo maana ya kifungu kinachosema *“Ufalme wako uje, mapenzi yako yatimizwe hapa duniani kama huko mbinguni.”*

Kwa hiyo, ni lazima tuombe na kufanya kazi kwa juhudi ka mujibu wa Sala ya Bwana. Ni lazima tuombe kwamba Mungu afungue mlango ili kwamba injili ya maji na Roho iweze kuenezwa kwa haraka. Na ni lazima tuombe kwa ajili ya utume huu: “Tafadhari tunaomba utuhifadhi salama na utubariki ili kwamba tuweze kuifanya kazi yako.” *“Mapenzi yako yatimizwe hapa duniani kama huko mbinguni.”* Kwa kweli, kama vile ondoleo la dhambi linavyotimizwa katika

mioyo yetu, basi ni lazima tuishi maisha ya maombi ili kwamba injili ya maji na Roho iweze kutimilizwa katika mioyo ya wengi ambao bado hawajaisikia injili. Ni lazima tuombe kadri tunavyozidi kuishi ili kwamba Mungu aweze kuwapatia imani akina kaka na akina dada wote katika Mungu, na kwamba atubariki ili tuweze kuieneza injili nzuri ya maji na Roho katika ulimwengu mzima na kwa jinsi hiyo tutakuwa tumemtukuza Mungu kwa imani ya kweli.

Ni Lazima Tuombe Kwa Ajili ya Chakula Chetu Cha Kila Siku

Tatu, Bwana alitueleza sisi kuomba kwa ajili ya chakula chetu cha kila siku: *“Utupe leo riziki yetu.”* Tunaweza kuishi tu ikiwa tutakuwa na chakula chetu cha kiroho. Kwa hiyo, Mungu alitueleza kuomba kwa ajili ya chakula cha kiroho. Yesu alisema kuwa ni lazima tuombe kwa ajili ya chakula chetu cha kila siku. Ni lazima tuombe kwa ajili ya chakula chetu cha kila siku *“Mungu tusaide ili kwamba tuweze kula chakula cha kiroho na kisha tuendeleo kuishi.”*

Mungu alitueleza kuomba kwa ajili ya mkate au riziki yetu ya kila siku, hivyo tunapaswa kuomba namna hii: *“Baba Mungu, tunaomba utujazie vitu vya hapa duniani ili kwamba tusipungukiwe vitu vyovyote vya kimwili na kiroho, ili kwamba ukitubariki tuweze kuzishiriki baraka hizo pamoja na wengine kuliko kukopa toka kwa wengine. Naomba niwe mtu wa imani ambaye ninajaribu kuhudhiria kila mkutano na kisha uwa na faragha na watakatifu wengine waliozaliwa tena upya ili niweze kukila chakula cha kiroho.”*

Ndugu Wakristo wapendwa, je, tunaweza kuishi siku moja pasipo kula chakula cha kiroho? Je, tunaweza kuishi hata

siku moja pasipo kuifanya kazi ya Mungu? Bwana wetu alisema “*Mimi ninacho chakula msichokijua ninyi*” (Yohana 4:32). Chakula kwetu sisi tuliozaliwa tena upya ni kuifanya kazi ya Mungu. Tunapoifanya kazi ya Mungu, basi kazi hiyo inafanyika kuwa chakula katika mioyo yetu na Roho Mtakatifu aliye ndani ya mioyo yetu anafurahi. Unapokuwa umechukia pamoja na kuwa umeishapokea ondoleo la dhambi, basi tumia wakati huo kujaribu kuifanya kazi ya Mungu. Unapomtumikia Mungu, mwili wako unaweza kuchoka, lakini Roho Mtakatifu aliye ndani yako anafurahia. Mioyo yetu ina shukukuru kwa sababu Roho Mtakatifu amefurahishwa. Hiki ndicho chakula cha kiroho.

Sisi pia tunaweza kukila chakula acha kiroho pale tunapokutana na akina kaka na akina dada waliopokea ondoleo dhambi na kuwa na faragha pamoja nao. Hii ni kwa sababu, wakati wa faragha hizo, ufahamu na mapenzi ya Roho Mtakatifu vitakuwa vimebadilishana toka kwa mwamini mmoja hadi mwingine kwa kupitia miili ya akina dada na akina kaka. Lakini, hii haimaniishi kuwa ni lazima tuyatenge maisha yetu toka ulimwenguni. Hii ina manisha kuwa sisi tunaishi katika ulimwengu na kwa hiyo ni lazima tukutane na wenye haki wengine mara kwa mara kadri inavyowezekana.

Pia tunapaswa kuomba na kuisoma Biblia ili tuweze kula chakula chetu cha kila siku. Ni nani anayeweza kufanya vizuri katika kukila chakula cha kiroho kila siku? Lakini tunaweza pia kula chakula cha kiroho na kupata nguvu za kiroho kwa kuja kanisani. Hii ndiyo sababu tunapaswa kuhudhuria kila ibada ya kuabudu na mikutano ya Kanisa la Mungu. Kukusanyika pamoja ni kuzuri na pia ni baraka kubwa kula chakula cha kiroho. Kufanya hivi ni kuitenda pia kazi ya kiroho. Zaburi 133:1 inasema, “*Tazama, jinsi ilivyo vema, na kupendeza, Ndugu wakae kwa pamoja, kwa umoja!*”

Mikusanyiko yote na ibada zote katika kanisa haijapangwa hivyo bila maana yoyote, bali imepangwa hivyo kwa utaratibu maalum ili kwamba tuweze kula kwa pamoja chakula cha kila siku ambacho ni vigumu kukila ukiwa peke yako. Kwa hiyo, kwa kuja katika mkutano huu, basi sisi sote kwa pamoja tunaweza kula chakula cha kutosha.

Ndugu Wakristo wapendwa, kwa kuwa Mungu amesema tuombe kwa ajili ya chakula chetu cha kila siku badala ya kulalamikia upungufu wa chakula, basi sisi tunapaswa kuomba msaada kwa Mungu wakati tunapoomba: “Mungu nipatie chakula cha kila siku, Mungu naomba nipatie baraka za kuweza kujipatia vitu mbalimbali ili kwamba nisipungukiwe vitu hivyo vya kidunia. Naomba unipatie chakula cha kiroho na imani, na ninaomba unibariki ili kwamba niweze kuifanya kazi ya Mungu kwa imani. Naomba unipatie baraka za kimwili na za kiroho.” Tunaweza kupata chakula pale tu tunapokuwa tumeomba msaada.

Ni lazima tuombe chakula kwa ajili ya mwili na kwa ajili ya roho. Ni lazima tuifanye kazi ya Mungu na kisha tuwe na shukrani katika hiyo kazi. Ni lazima tuombe, tutafute, tubishe, na tuombe kwa ajili ya vitu hivyo. Ni lazima tuombe sana, kwa kuwa Yesu alituahidi kuwa, “*Ombeni, nanyi mtapewa; tafuteni, nanyi mtaona; bisheni, nanyi mtafunguliwa*” (*Mathayo 7:7*). Kwa kawaida tunaomba kwa mioyo yetu, tunakiri kwa vinywa vyetu, na tunatenda ili kutafuta, kuomba na kupokea. Ikiwa tutaangalia, tutaomba, na kisha kutafuta jinsi na kwa namna gani Mungu anaweza kutupatia, basi ni dhahiri kuwa tutapokea. Hivyo ndivyo tunavyoishi kila siku. Kwa hiyo, Bwana alituambia kuomba kwa ajili ya mambo haya.

Ni Lazima Tusameheane Kama Watoto wa Mungu Baba

Sehemu ya nne ya maombi ni *“Utusamehe deni zetu, kama sisi nasi tuwasamehevyo wadeni wetu.”* Hii ina maanisha kuwa kwa kuwa Mungu alizisamehe dhambi zetu, hakupaswi kuwa na kitu chochote kile ambacho sisi tuliozaliwa tena upya hatuwezi kusemeheana. Ikiwa kuna mawazo yoyote maovu ya kimwili katika mioyo yetu kiasi kuwa hatuwezi kuwasamehe wengine, basi tunapaswa kuomba: “Mungu, naomba unihifadhi na kunikomboa toka kwa yule mwovu ili kwamba nisiangukie maovuni, na ninaomba unipe moyo na imani inayoweza kuwasamehe wengine.” Hii ina maanisha kuwa tunapokosa kuwa na nguvu ya kuweze kuyafuata mapenzi ya Mungu, basi ni wakati tunaopaswa kumwomba Mungu ili atupatie msaada ili tuweze kuishi kwa msaada toka kwa Mungu.

Kwa nyongeza, hakuna hata mmoja ambaye maisha yake ya kiimani yapo sahihi tangu mwanzo. Unapojiangalia wewe mwenyewe, je unayaona mapungufu mengi ya kwako binafsi? —Ndiyo.— Je, ni kweli kuwa tuna makosa mengi kuliko matendo ya haki? —Ndiyo.— Ndugu Wakristo wapendwa, naomba msikatishwe tamaa. Kama tunafanya makosa, kama tuna mapungufu, na halafu tunashtakiwa na dhamiri zetu, hapo tunafanya nini? Hapo ndipo tunapomwita Mungu tena.

“Mungu Baba, naomba unifanye kuwa mtu mwenye baraka, mtu wa imani, mtu wa furaha. Naomba unipatie imani.” Je, hatupaswi kuomba msaada kwa Mungu kama hivi? Je, si kweli? Kwa kweli hivyo ndivyo tunavyopaswa kufanya. Tunapoomba msaada wa Mungu, je Mungu anatupatia msaada huo au la? —Mungu anatupatia msaada.— Je, wakati Mungu anapotupatia msaada, je tunafanyika kuwa watu wa imani au la? —Kwa kweli tunafanyika.— Kwa hiyo, ninatumaini kuwa

mnafanyika kuwa watu wa imani ambao mnatafuta na kuishi kwa imani badala ya kuwa watu mnaotazama nyuma hali mkiwa mmekata tamaa, hali mkiwa na majuto kwa maisha ya sasa, na hali mkiwa mmeyakatia tamaa maisha ya baadaye. Yaliyopita yamepita na yaliyopo ndiyo yaliyopo. Yaliyopita si ya maana sana kama wimbo huu unavyosema: “Usijiulize kuhusu yaliyopita.”

Mungu ni mwenye nguvu sana, na kwa sababu hiyo anawapenda sana watu wanaomwamba vitu vingi. Kwa kweli Mungu anasirishwa wakati tunapokuwa hatuombi. Wakati tunapomwomba Mungu juu ya mahitaji yetu, ukweli ni kuwa Mungu anafurahishwa sana na anawaza, ‘Unafahamu kuwa nina nguvu, unafahamu kuwa Baba yako ni tajiri. Ni veme kufanya hivyo.’ Tunapaswa kuomba vitu vizuri badala ya kusema ‘ninaweza kufanya mimi mwenyewe’ kwa sababu kwa kusema hivyo basi ile heshima ya Baba inapotea. Mungu aliyetuokoa, anafurahishwa sana anapotuona tukimwomba ili atupatie vitu. Mwombe Mungu akupatie, na akupatie zaidi. Tunapaswa kuomba kila siku “tunaomba utupatie riziki yetu ya kila siku,” na mwombe Mungu atupatie baraka kila tunapoifungua midono yetu. Ikiwa huyu angelikuwa ni baba wa kimwili, bila shaka angelituchapa makofi kwa sababu tunamwomba kila siku, lakini Baba yetu wa kiroho hayuko hivyo. Bali, anafurahishwa tunapomwomba kutupatia yale tunayoyahitaji ili tuweze kuifanya kazi ya injili ya maji na Roho kila siku.

Ikiwa baba yako wa kiroho alikupatia kitu jana, halafu ukaja kumwomba tena kitu kile kile siku ya leo, ni hakika kuwa baba yako huyo atakasirika, na kwa sababu hiyo mtoto wa kimwili hawezi hata kule kuomba kwa kuwa anaogopa. Wakati mwingine tunachunguza hisia ya baba na mama na kufikiri ‘Ooh, ikiwa nitaomba ili nipatiwe leo, bila shaka

nitachapwa kofi,’ na kama anaonekana kuwa katika hisia nzuri, basi ndipo hapo tunapodiriki kwenda kuomba na wakati mwingine tunatoka mikono mitupu. Hata hivyo, Baba yetu wa kiroho hayupo hivyo. Ikiwa tunamwomba mara tunapokuwa tumeyafungua macho yetu ‘naomba unipatie,’ na kisha wakati tunapokwenda kulala ‘naomba unipatie,’ basi hapo Mungu anafurahishwa na anasema, “Ndiyo, nitafanya. Nitakupitia kitu hicho, lakini hupaswi kukitumia vibaya, bali ukitumie vizuri, Sawa?” na hapo Mungu anatupatia kitu hicho mara moja. Huu ndio ukweli.

Mungu Baba, aliyekuokoa wewe na mimi anawapenda wale wanaoomba zaidi. Ikiwa hauna imani mwombe Mungu ukisema “Mungu naomba unipe imani, naomba imani. Naomba imani.” Ndipo utatambua muda si mrefu kuwa Mungu amekupatia imani. Unaweza kujisikia hivi, “Aah, nina imani, ninaweza kuamini, nimeitumia imani yangu. Nina imani!” Usione shida kumwomba Mungu hali ukiwa umefungwa kwa mawazo yako binafsi. Wewe mwombe Mungu kitu chochote kwa ujasiri kana kwamba ulimpa Mungu kitu hicho akutunzie. Mungu anapenda sana mambo kama hayo.

Ndugu Wakristo wapendwa, je, mnafahamu kiasi cha imani ambacho hakikuwepo kabla hatujapewa imani tuliyoomba? Ni kwa sababu umekuwa ukimwomba Mungu “nipatie imani, nipatie imani,” na kwa hapo Mungu alikupatia. Sisi tuliipokea imani kwa sababu Mungu alitupatia. Hakuna njia nyingine ya kuweza kuwa na imani. Pia ni kwa sababu Mungu alitupatia imani na akafanyika kuwa Baba yetu. Hakuna cha zaidi tulichokifanya zaidi ya kuomba “tunaomba utupatie Bwana, tunaomba utupatie.”

Tunapowafundisha watoto wadogo kuhusu maombi, mara nyingi watoto wanaomba hivi, “Yesu naomba unipatie biskuti. Ninaomba katika jina la Yesu. Amen” na kisha wanafungua

macho yao. Wakati wanapofumbua macho yao kama kunakuwa hakuna biskuti basi wanashangaa, “Hakuna biskuti,” na kisha wanaanza kulia. Katika mazingira kama hayo huwa ninawaeleza, “Eeh, we mhuni, inawezekanaje Mungu akakupatia biskuti wakati umefumba macho tu na kufumbua baada ya maombi yako? Kwa sasa Mungu anasikiliza maombi yako, ‘Sawa’, na anafikiria katika moyo wake ‘nitampatia kitu alichoomba’ na kisha atawaamuru malaika kukuletea biskuti.”

Hata kama Mungu hatoi kwa haraka wakati tunapoomba, uzoefu unaonyesha kuwa Mungu anatoa kwa mtu aliye sahihi kwa wakati wake na tunaweza kushuhudia kuwa Mungu anatoa. Hii ndiyo sababu tunapaswa kuomba wakati wote ili Mungu aweze kutupatia zaidi.

Je, hauna shida nyingi? Kama kuna kitu chochote ambacho tunakihitaji au kama kuna kitu chochote ambacho tunapungukiwa kimwili au kiroho, basi ni lazima tuombe kwa ajili ya mambo hayo: “Mungu tupatie imani. Mungu tunaomba utupatie baraka. Tunaomba utupatie ujazo wa Roho Mtakatifu. Nimesikia kuwa kuna ujazo wa Roho Mtakatifu—Mungu tunaomba utupatie ujazo huo. Tunaomba utusaidie ili tuishi kwa ajili ya haki. Tunaomba utupatie tunayohitaji.” Ikiwa tutaomba hivyo, basi hata kama sala hiyo ni sala ya mtoto ambaye hajakomaa, basi kuwa Baba anafahamu kile ambacho mtoto anakihitaji, Mungu anatoa kile ambacho mtoto anakihitaji kwa wakati unaofaa.

Hii ndiyo sababu kuomba si vigumu. Wewe sema “naomba unipatie” na kwa kufanya hivyo utakuwa umeomba. Je, unafikiri hivyo?—“Ndiyo, sasa nimekua. Mungu alisema kuwa hatupaswi kurudia kitu kile kile tena na tena. Tena Biblia inasema kuwa ninapotaka kuomba ninapaswa kwenda katika chumba changu na kuomba, lakini nikienda chumbani kwangu siwezi kuomba kwa sababu ninapatwa na usingizi.” Kule

kusema ndani ya moyo “naomba unipatie” ndio maombi yenyewe.

Tangu nilipoanza kuomba nimegundua kuwa Mungu hapendi maombi yenye aya zinazorembeshwa. Tunapofanya malalamiko mbele ya “Mungu Baba yetu ambaye ni mtakatifu, wenye heshima, mwenye neema, mwenye enzi....” basi Mungu anashindwa kutuvumilia hali akisema, “kama maombi yenyewe ndio haya, basi mwisho wa maombi hayo ni nini?” Haijalishi tunaweza kuyarembesha maombi yetu kwa maneno mengi kiasi gani, lakini ikiwa hatutamweleza Mungu dhumuni la maombi yetu, basi ni vema tufahamu kuwa maombi yetu hayo yatakuwa ni bure. Tunapokuwa tupo katika uhitaji wa mahitaji ya msingi, basi tunapaswa kuyataja yale tunayoyaombea mara moja. “Mungu naomba unipatie kitu hiki.” Tunapoomba ni vema kuwa na sentensi moja fupi. Tunaporefusha sentensi katika maombi bila sababu inatufanya tufikie kusahau kile tulichokuwa tukitaka kukiombea. ‘Nilikuwa nataka kuombea nini? Aah, nimesahau. Sikumbuki tena.’ Hapo ndipo tunapofikia hatua ya kuombea kitu ambacho hatukihitaji sisi wenyewe. Je, hujawahi kufanya hivyo?

Tulipofungua shule ya umissionari kwa mara ya kwanza, tulizoea kukaa duara kila baada ya kumaliza kipindi darasani. Wakati mwingine tulikuwa tukiomba kwa pamoja na wakati mwingine tulikuwa tukiomba kila mtu peke yake kwa zamu. Tulikuwa tukiomba kwa muda mrefu, na kwa kawaida tulikuwa tukiomba zaidi ya masaa mawili hadi migongo yetu ikawa inauma. Hata hivyo, tuliomba kwa juhudi. Kiongozi wa maombi aliendelea kutoa mada za maombi nasi tulifuatia kwa maombi. Baadhi ya ndugu wapendwa walilalamika kuwa migongo yao inauma kutokana na mikutano hiyo ya maombi.

Niliambiwa tukio fulani ambapo kiongozi fulani wa kanisa wakati mmoja aliwahi kuomba katika ibada ya asuhubi

kwa zaidi ya masaa matatu hali akisoma na kuvitaja vifungu toka kitabu cha Mwanzo hadi Ufunuo. Maombi yake hayakuisha kiasi kuwa kila mtu aliyekuwepo alilazimika kwenda nyumbani kupata kifungua kinywa na kisha akarudi na wakamkuta bado akiendelea kuomba. Kwa ujumla, watu wa jinsi hiyo hawaombi vya kutosha wanapokuwa nyumbani au mahali pengine popote. Hivyo wanapoombwa kuomba katika ibada, basi wao wanaomba kwa muda mrefu ili kufidia kule kutoomba kwao. Hata hivyo, hatupaswi kuomba hivyo. Maombi mafupi ni maombi mazuri sana. Tukiwarefusha sana maombi kama tunavyoweza kuurefusha mpira basi hatimaye tunaweza kusahau kile tulichotaka kukiombea.

Wakati fulani tunaweza kuomba kwa pamoja hali tukiombea mambo fulani maalum. Ikiwa kiongozi wa maombi anazitaja mada nyingi za maombi kwa wakati mmoja, basi kusema kweli, mara nyingi ninashindwa kukumbuka zile mada zote na ninaikumbuka ile mada ya mwisho. Inapotokea hivyo, basi mimi huanza kuomba kwa ajili ya ile mada ninayoikumbuka kwanza. “Mungu, ninaomba unipatie hiki, naomba unipatie kile,” basi ninapokuwa nikiombea ile mada ya mwisho ndipo wakati mwingine ninapoweza kukumbuka hata zile mada nyingine zilizokuwa zimetajwa na kiongozi wa maombi.

“Mungu Baba, naomba utupatie chakula chetu cha kila siku, tunaomba utupatie mahitaji mengine ya kimwili, tunaomba utupatie afanya nzuri, tunaomba utupatie nguvu ya kuifanya kazi ya Mungu, tunaomba utubariki, utupatie imani na utusaidie kuitenda haki yako kwa imani. Tunaomba utusaidie ili tusiyatumie maisha yetu vibaya.”—Tunaomba hali tukiweza mambo ya msingi kwa jinsi hii.

Kuomba katika imani si kitu kigumu. Ikiwa tumeokolewa, basi Mungu ni Baba yetu. Kwa kweli ni kitu cha ajabu mtu

anapokasirishwa kwa kumuita Mungu Baba “Baba”. ‘Je, Yesu ni Baba? Je, Baba wa Yesu ni Baba? Ikiwa Roho Mtakatifu ni Mungu, basi ina maana kuwa Roho Mtakatifu ni Baba?’ Basi ikiwa utafikiria hivyo, kwa kweli jambo hili litakufanya usumbuke. Ndugu Wakristo wapendwa, Mungu Utatu ndiye Mwokozi wetu na ndiye Baba yetu. Kuna baadhi ya watu ambao pamoja na kuwa wamemwamini Yesu kwa zaidi ya miaka 20 bado hawalifahamu jambo hili, na kwa sababu hiyo bado wamechanganyikiwa hali wakiwa hawafahamu ikiwa Mungu ni Baba, au Yesu ndiye Baba, au Roho Mtakatifu ndiye Baba. Ukweli ni kuwa majina hayo matatu yote yana maanisha kitu kimoja tu.

Mungu Yehova maana yake ni kuwa “Mungu aliye hai.” Mungu si sehemu ya uumbaji. Yesu ni Mwokozi wetu na Roho Mtakatifu ni Roho Mtakatifu wa Mungu, kwa hiyo nafsi hizo zote tatu ni Mungu mmoja katika Uungu na kwa sababu hiyo hatupaswi kujichanganya sana kwa hilo. Unachotakiwa kufanya ni kuamini kuwa “Mungu alisema hivyo, na kwa sababu hiyo alichokisema ni sahihi.” Ikiwa ni kweli kuwa tumezaliwa tena upya na tukawa tumepokea ondoleo la dhambi, basi ni wazi kuwa kila kitu kimeruhusiwa kwetu. Basi, mkifahamu hivyo, basi ninatuamini kuwa ninyi nyote mnafanyika kuwa watakatifu wa Mungu na watumishi wa kika na wa kiume wa Mungu ambao mnaomba kwa ajili ya chakula chenu cha kila siku.

Hebu tukazie tena mada yetu kuu kwa mara nyingine. Tunazungumzia kuhusu mafundisho ya Yesu: *“Utusamehe deni zetu, kama sisi nasi tuwasamehevyo wadeni wetu.”* Kuna makosa mengi ambayo watu wengine wanatufanyia, na pia kuna makosa mengi ambayo sisi nasi tunawafanyia wengine. Hata hivyo, Je, Yesu hajazifutilia mbali dhambi zetu zote na dhambi za wengine? —Kwa kweli Yesu alizifutilia mbali

dhambi hizo zote.— Wakati Yesu alizitoweshea mbali dhambi zetu zote, je, sisi hatupaswi kuwasamehe wengine ambao wanatukosea? —Kwa kweli tunapaswa kuwasamehe.— Na hivi ndivyo tunavyopaswa kuomba, *“Na utusamehe deni zetu, kama sisi nasi tuwasamehevyo wadeni wetu.”* Wakati Mungu anapokuwa amezisamehe dhambi zetu zote, basi ikiwa hatutasameheana, basi ni vema tufahamu kuwa kufanya hivyo kutakuwa si jambo jema kwetu sisi kama watoto wa Mungu. Na hii ndiyo sababu Yesu alisema hivi.

Kwa hiyo, tunapaswa kuomba hivi wakati tunapokuwa tumefanya makosa na kuwa na mawazo mabaya kiasi cha kuweza kuangukia katika kutenda maovu na kujaribu kuwaadhibu wengine, na kuwa na kinyongo na wengine: “Uniokoe na yule mwovu. Usinitie majaribuni na kuniingiza katika shida kwa sababu ya hasira yangu ya kimwili ambayo inakuwa ni kikwazo katika injili kuliko kuwa faida. Unisaidie nisiangukie majaribuni na kuniingiza katika shida ili kwamba mimi pamoja na Wakristo wengine pamoja na Kanisa zima tusidhuriwe na majaribu hayo. Naomba unilinde nisiangukie katika maovu. Naomba unisaidie kuutawala moyo wangu. Naomba unipatie nguvu inayoweza kuzibeba na kuzifanya kazi za haki za Mungu.”

Mungu alitueleza kusamehe, kupenda, kuvumilia na kuwaombea wengine. Ni lazima tuombeane: “Mungu, naomba umpatie imani ili kwamba aweze kuokolewa toka katika dhambi zake, tabia zake ni hizi na hizi, lakini tafadhari naomba umwokoe.” Tunapaswa kuomba kwa jinsi hiyo. Je, tunaweza kuomba kwa ajili ya kila mtu ulimwenguni? —Tunaweza.— Tunaweza kuwasamehe na kuwapenda wote katika injili nzuri ya maji na Roho.

Kwa kweli, watu wenye haki hawapaswi kuangukia katika maovu. Ni vema kuangukia katika haki, je, ni vema kuangukia

maovuni? Je, tulewe na kufanya vurugu na kuwapiga watu wengine? Hapana, hatupaswi kufanya hivyo. Ikiwa utakuwa na nguvu kiasi hicho, basi hebu tuzitumie nguvu hizo kwa kazi ya Mungu. Tunapaswa kuzitumia nguvu hizo kwa juhudi katika kuifanya kazi ya Mungu, na kisha kufanya kazi kwa juhudi kwa ajili ya mapenzi ya Mungu kuliko kupigana. Hii ndiyo sababu Mungu anatueleza sisi kuomba kwa ajili ya mambo haya ili kwamba tusiweze kuangukia maovuni. Hatupaswi kuangukia maovuni.

Katika ulimwengu huu kuna watu wengi sana waovu. Tunapokutana na watu kama hayo, na ikiwa wanaonekana kuwa hawawezi kuwa na jambo lolote lenye manufaa kwetu, basi ni busara kujiepusha na watu kama hao na kuwakwepa.

Kwa nini Mungu aliiongeza aya hii mwishoni mwa Sala ya Bwana? *“Kwa maana mkiwasamehe watu makosa yao, na Baba yenu wa mbinguni atawasamehe ninyi. Bali msipowasamehe watu makosa yao, wala Baba yenu hatawasamehe ninyi makosa yenu.”* Hii ina maanisha kuwa mwenye haki ni lazima aishi kama mwenye haki kwa imani. Ikiwa tulipokea ondoleo la dhambi kwa dhambi zetu zote mbele za Mungu, basi ni lazima tuwasamehe ndugu zetu wote wa kiume na wa kike pamoja na wale ambao bado hawajazaliwa tena upya. Ikiwa hatutakuwa na moyo wa kusamehe, basi tunapaswa kuomba msaada: “Mungu Baba, naomba unipatie moyo wenye kusamehe.” Mungu aliongeza fundisho hili ili kutuamuru sisi kuishi kwa kusameheana.

Je, kuomba ni rahisi au ni vigumu? Kwa kweli kuomba si vigumu. Kiini cha maombi ni imani—yaani ile imani kuwa Mungu ni Mungu wangu, Mwokozi wangu, na Baba yangu. Imani kwamba Mungu alitumba sisi na akatuokoa toka katika dhambi zetu zote. Ikiwa ni hivyo, basi sisi tuliozaliwa tena upya ni watu wake, watu wa familia yake, na watoto wake, na kwa sababu hiyo ni kitu cha kawaida na cha asili kwa sisi kumuita Mungu Baba. Kwa nyongeza, ni jambo la haki kwetu sisi kumshukuru Mungu kwa kutufanya sisi kuwa watu wake.

Tunapaswa kuomba ili kwamba tusiangukie maovuni na majaribuni na ili kwamba tusiiendee njia mbaya isiyo sahihi. Yesu anatufundisha kitu tunachopaswa kukiombea kwanza: *“Utafuteni kwanza ufalme wake, na haki yake; na hayo yote mtazidishiwa.”* Je, kuna kitu chochote unachokihitaji? Basi omba na kisha uishi kwa ajili ya Ufalme wa Mungu kwanza. Hapo ndipo Baba yako atakapokupatia kila kitu. Hii ni ahadi ya Mungu.

Hivyo, ni lazima tuamini hivi, itafute kwanza kazi ya Mungu hata kama tuna mapungufu mengi, jaribu kuishi kwa kufuata mapenzi ya Mungu kwanza, na kisha mwombe Mungu akupe msaada. Tunapaswa wakati wote kuwa na nia ya kukua kiroho na kuwa waaminifu katika kazi za Mungu kwa kuipokea neema na msaada hata kama tuna mapungufu mengi. Unaelewa? —Ndiyo.— Je, una amini? —Ndiyo.—

Wakati tunapoomba sote kwa pamoja ni lazima tuwe waangalifu kuwa tunaomba sote kwa sauti. Unapofanya hivyo, mawazo yako yanapangiliwa kiasi kuwa unaikuza imani kwa kusema, *“Niliomba hivi, na ninaamini hivi.”* Na wakati Mungu anapojibu tunaweza na tutaweza kutafahamu kuwa *“jibu hili linatoka kwa Mungu kwa kuwa niliomba vile,”* na kwa sababu hiyo imani yetu itakuwa. Hii ndiyo sababu kuwa ni muhimu sana kuomba kwa midomo yetu.

Kwa nyongeza, tunapoomba, inawezekana kabisa kuliombea jambo moja au kitu fulani tena na tena, lakini hatupaswi kuomba kwa kanuni. Wakati mwingine, moyo unasema hivi, lakini maneno maovu yanaweza kutoka mdomoni. Inapotokea hivyo, ni lazima tuyasahihishe yale maneno maovu yaliyotoka mdomoni kwa maneno yetu mengine yaliyo mema. Mungu anaona, anafahamu, na anafanya kazi katikati ya mioyo yetu, lakini ni muhimu sana kuyakiri maombi yetu kwa vinywa vyetu pia. Kwa hiyo Biblia inasema, *“Maana kwa moyo mtu huamini hata kupata haki, na kwa kinywa mtu hukiri hata kupata wokovu.”*

Tena Bwana anasema, *“Basi yoyote myatakayo mtendewe*

na watu, nanyi watendeeni vivyo hivyo; maana hiyo ndiyo torati na manabii” (Mathayo 7:12). Ikiwa kweli tunataka kupokea kitu fulani, basi tunapaswa kuomba. Ikiwa kweli tunataka kuwa na imani mbele za Mungu, na ikiwa tunataka kuishi kwa imani, ikiwa tunataka kuishi kwa haki, na ikiwa tunataka kuwa na maisha makamilifu kimwili na kiroho, basi tunapaswa kuomba mara kwa mara kwa ajili ya vitu vingi tunavyovihitaji.

Hebu tuishi kwa imani kama hiyo. Hebu tuishi kwa imani kama hiyo na kumkaribisha Bwana atakapokuja tena. Hii ndiyo imani yangu na haya ndiyo maombi yangu mbele za Mungu. Na ninaamini kuwa siku moja itatokea hivyo.

Wakati tunapojitoa sisi wenyewe katika kuieneza injili ya kweli ulimwenguni kote kwa kupitia huduma ya maandiko, ni dhahiri kuwa kiasi kikubwa cha fedha kinahitajika. Ninaamini kuwa Mungu atashughulikia hata kiasi cha fedha kinachohitajika katika uchapishaji. Hadi sasa Mungu ametupatia mahitaji yetu na hadi sasa ni hakika kuwa Mungu atatuwezesha. Tunamshukuru Mungu kuwa hadi sasa tumeweza kuifanya kazi ya Mungu vizuri kiasi kuwa kumeinuka idadi kubwa ya watenda kazi waliozaliwa tena upya kwa kupitia maandiko ya Kikristo. Lakini ibilisi analifahamu hili na anajaribu kuizuia huduma yetu. Ninahofia kuwa ibilisi anaweza kuiyumbisha kazi hii na kutupatia magumu mengi. Kwa hiyo, hatuwezi kufanya lolote zaidi ya kumwomba Mungu ili atupatie msaada na ulinzi wake.

Wakati mwingine tunapochapisha vitabu vyetu tunafanya kazi pamoja na wale waliozaliwa tena upya, lakini kuna baadhi ya nyakati ambapo tunalazimika kufanya kazi hata na wale ambapo hawajazaliwa tena upya. Tulipokuwa tukihariri toleo la Kifaransa la kitabu chetu cha kwanza, kwa kweli tulijitahidi sana kuweka jitihada kubwa, lakini tuliweza kuona makosa katika jalada kosa ambalo lilikuwa linakifanya kitabu kuonekana ni tofauti na kile kitabu cha asili. Ni kweli kuwa mtafsiri wa Kifaransa alijitahidi alivyoweza lakini alifanya

kosa kubwa kiasi cha kuzifanya juhudi zote kuonekana si kitu. Hivyo, ni lazima tuendeleo kumwomba Mungu ili kuepuka hasara kama hivyo tangu sasa na kuendelea.

Hadi sasa, matoleo yetu ya Kiingereza na Kihispania katika mfululizo wa injili yamekuwa mashuhuri sana. Na kwa kweli toleo litakalofuata kwa kuwa mashuhuri ni toleo la Kifaransa. Je, hii ina maanisha nini? Katika maeneo ambayo Mungu anafanya kazi kwa nguvu ndiyo maeneo ambayo ibilisi naye anafanya kazi kwa juhudi ili kuivuruga kazi. Hii ndiyo sababu kuwa ni lazima tumwombe Mungu ili atulinde na yule mwovu, na ili Mungu aweze kuwaongoza na kuwatawala wale watu ambao tunafanya nao kazi ili kwamba kila kitu kiweze kwenda vizuri. Pia tunapaswa kumwomba Mungu ili awalinde ndugu watumishi wote wa kike na wa kiume ambao wanajitoa kwa ajili ya utume huu wa thamani. Hii ndiyo sababu ni kwa nini tunaomba.

Pia unapaswa kuomba kwa ajili yako mwenyewe. Mungu atatukuzwa ikiwa utaishi maisha yako ya kiimani kwa uaminifu! Pia, ili watu wengine waweze kuokolewa kwa kupitia wewe, basi ni lazima uishi maisha ya haki na ya kiimani, na hivi ndivyo unavyoweza kubarikiwa kimwili na kiroho. Hii ndiyo sababu tunaomba. Ni lazima tufahamu umuhimu wa maombi na ni vema tuishi hali tukiomba kwa imani.

Hebu tuishi hali tukiomba maombi ya imani ambayo yanamwamini Mungu wakati wote. Ni lazima tuishi huku tukiomba ili kwamba Mungu awabariki watumishi wote waume kwa wake na watu wote wa Mungu katika maeneo ambayo tunafanya kazi kwa ajili ya injili, na ili kwamba Mungu aweze kubariki na kutupatia kila tunachokihitaji ili kwamba ule uenezaji wa injili ya maji na Roho uweze kufanyika kwa nguvu. ☒

Ishi Kwa Moyo Wako Wote Katika Bwana

< Mathayo 6:21-23 >

“Kwa kuwa hazina yako ilipo, ndipo utakapokuwapo na moyo wako. Taa ya mwili ni jicho; basi jicho lako likiwa safi, mwili wako wote utakuwa na nuru. Lakini jicho lako likiwa bovu, mwili wako wote utakuwa na giza. Basi ile nuru iliyomo ndani yako ikiwa giza; si giza hilo!”

Somo la andiko la leo linasema, *“Taa ya mwili ni jicho; basi jicho lako likiwa safi, mwili wako wote utakuwa na nuru.”* Mioyo yetu ina vigeugeu kama kipindi cha majira ya mvua. Pia mawazo ya mwanadamu yao hivyo hivyo. Hata hivyo, Bwana alisema, *“Taa ya mwili ni jicho.”* Anachomaanisha hapa Bwana wetu ni kuwa mwili wetu wote unaweza kujaa nuru ikiwa macho yetu ni mazuri, na kwamba ni lazima tuzingatie jinsi tunavyoyaelekeza mawazo yetu yanayokuja na kuondoka.

Kwa kuwa jicho ni taa ya mwili, basi jicho linapokuwa jema, basi mwili wote unakuwa na nuru, lakini jicho linapokuwa baya, basi mwili wote utakuwa na giza. Mioyo yetu inapokuwa na huzuni basi kila kitu tunachokiona kinakuwa ni giza. Lakini ikiwa tunaitafakari injili ya maji na Roho mara kwa mara, basi mioyo yetu inapata nuru. Wakati Bwana anapozungumzia juu ya jicho la mtu, ni kwamba ana maanisha juu ya mioyo yetu ya kiimani.

Mioyo yetu si imara. Moyo wako na wangu inakuja na kupotea. Mioyo yetu ina ile hali ya kupotea katika baadhi ya

nyakati. Tunapotafakari juu yai injili ya maji na Roho, basi hapo ndipo mioyo yetu inapompenda Bwana, lakini ghafla tena tunajikuta tukivutwa kuupenda ulimwengu kwa sababu ya mawazo yetu ya kimwili.

Jicho ni taa ya mwili. Hivyo, ni lazima tufikiri juu ya Bwana na kisha kuimwaga mioyo yetu katika kuieneza injili ya maji na Roho. Tunapofikiria jinsi Bwana wetu alivyozisafishilia mbali dhambi zetu, basi ndipo tunapotambua jinsi mioyo yetu ilivyosafishwa. Kama Bwana wetu alivyosema katika Agano la Kale, *“Dhambi zenu zijapokuwa nyekundu sana, zitakuwa nyeupe kama theluji; Zijapokuwa nyekundu kama bendera, zitakuwa kama sufu”* (Isaya 1:18), Bwana wetu amezifutulia mbali dhambi zetu kikamilifu kwa kuzichukua dhambi za ulimwengu katika mwili wake kwa kupitia ubatizo toka kwa Yohana Mbatizaji na kwa kusulubiwa katika Agano Jipya.

Ni lazima tuzingatie katika injili ya maji na Roho. Ingawa mara kwa mara mioyo yetu inakwenda na kurudi nyuma kati ya Bwana na ulimwengu, ukweli ni kuwa tunapaswa kuyaelekeza mawazo yetu katika kuieneza injili ya maji na Roho. Tunamshukuru Bwana kwa kuzifutulia mbali dhambi zako na dhambi zangu. Ni lazima tukumbuke katika mioyo yetu kuwa Bwana amezitoweshea mbali dhambi zetu ambazo zilikuwa zimeifunika mioyo yetu kama vile wingu zito (Isaya 44:22). Kila tunapomfikiria Bwana ambaye amezifutulia mbali dhambi zetu, basi mioyo yetu inalipuka kwa hisia.

“Taa ya mwili ni jicho.” Kwa kuwa hakuna njia nyingine zaidi ya Bwana inayoweza kuifanya mioyo yetu na nafsi zetu kulipuka kwa hisia, basi tunapomfikiria Bwana mioyo yetu inajazwa ule mwanga wa kiroho mbele za Mungu. Mara nyingi mioyo yetu inakwenda na kurudi nyuma kati ya hali ya kiroho na ile ya kimwili, lakini tunapoiweka mioyo yetu kwa Bwana

ambaye alizisafishilia mbali dhambi zetu, na tunapoifikiria injili inayotueleza kuwa Bwana aliuchukua mzigo wa dhambi wa kila mtu na kisha akazitoweshea mbali dhambi zote mara moja na kwa wote, basi hatuwezi kufanya lolote zaidi ya kumshukuru Mungu na kumpenda Bwana zaidi na zaidi.

Hivyo, tunatamani zaidi kuieneza injili hii ya maji na Roho kwa wengine. Tunapoitoa mioyo yetu kwa Bwana na matendo yake ya haki kuwa Bwana alizifutilia mbali dhambi zetu, basi mioyo yetu inalipuka kwa shangwe na kwa sababu hiyo watu wengi wanapokea wokovu. Tunapomfikiria Bwana na kumshukuru kwa imani, basi mioyo yetu inaloweshwa na Roho Mtakatifu. Hii maana yake ni kuwa mioyo yetu inapata ule unyevunyevu wa baraka nyingi za wokovu wa kiroho katika nuru. Basi hapo ndipo mioyo yetu inapofanyika kuwa yenye haki, yenye wema na inayopendeza mbele za macho ya Mungu, na inapofikia hapo inakuwa na nia ya hali ya juu ya kuzifanya kazi za Mungu.

Tunaweza kuiacha mioyo yetu katika nuru au katika giza. Je, ni wapi tunapoweza kuiacha mioyo yetu? Kwa hakika hakuna shaka kuwa tunapenda kuiweka mioyo yetu mahali ambapo Bwana wetu amezifutilia mbali dhambi zetu. Kwa nyongeza, kwa kuwa Bwana wetu hakuzitoweshea mbali dhambi zetu tu, bali alitufanya na sisi kuwa watoto wa Mungu, basi tunapaswa kuifanya mioyo yetu kuuzingatia Ufalme wake wa Mbinguni.

Ni lazima tumshukuru Mungu kwa imani kwa baraka zake zilizotuokoa sisi, ambao tusingeweza kufanya lolote zaidi ya kufa kutokana na dhambi zetu na kuwa watoto wa Ibilisi, kwa kumtuma Yesu Kristo, na kwa kumfanya abatizwe na kuzichukua dhambi za ulimwengu hadi Msalabani na kisha kumwaga damu hadi kifo ili kuzifutilia mbali dhambi zote mara moja na kwa wote. Pale mahali tunapoiweka mioyo yetu

ni pa muhimu sana. Hapo ndipo mioyo yetu inapoweza kukutana na baraka za wokovu ambao Mungu ametupatia au katika mawazo ya kimwili yasiyo ya haki yatokayo katika ulimwengu na mwili. Kuna matokeo tofauti sana kulingana na mahali pale tunapoiweka mioyo yetu. Tunaweza kuamua njia hii au njia ile, pamoja na kuwa tuna mioyo inayoyumba, ninataka kukueleza kuwa tunapaswa kuiweka mioyo yetu katika wokovu ambao Mungu ametupatia. Ni lazima tuitoe mioyo yetu kutokana na ukweli kuwa Mungu alitupatia Ufalme wa Mbinguni na baraka za Mungu.

Tunaitoa mioyo yetu katika eneo ambalo Mungu amezitoweshea mbali dhambi zetu zote, zilizokuwa kama wingu zito akazifanya kuwa nyeupe kama theluji, na kisha tukimwomba Mungu, basi Mungu atasikia na kuyajibu maombi yetu. Ni lazima tuitoe mioyo yetu kwa Mungu na kwa kazi ya kiroho hali tukiwa na imani kuwa Mungu anafurahishwa na kazi yetu ya kuieneza injili ya maji na Roho. Hapo ndipo tunapoweza kupata uzoefu jinsi mioyo yetu inavyolipuka na jinsi kazi ya Mungu inavyoendelea. Tunaweza kufanyika kuwa watu wenye baraka zake kwa kutumika katika kazi ya Mungu.

Wapendwa kaka na dada zangu, tunapoitoa mioyo yetu katika kuieneza injili ya maji na Roho, basi mioyo yetu inakuwa na shukrani. Tunapoishi katika ulimwengu huu, wakati fulani tunakatishwa tamaa na wakati mwingine tunaangukia katika tamaa zetu za kimwili. Hakuna mtu mwenye haki ambaye haanguki hata mara moja. Hata hivyo, hata pale tunapokuwa viumbe wa jinsi hiyo, kinachojalisha ni pale ambapo tumeiweka mioyo yetu. Ni wapi ambapo kila mmoja wetu analenga kuuweka moyo wake? Ikiwa kwa bahati mbaya umeuweka moyo wako katika giza, basi ninaamini kuwa utauleta kwenye nuru.

Tunajaribu kuieneza injili katika sehemu zilizosalia za

ulimwengu. Tutafanyaje? Ninajisikia hofu kama vile wana wa Israeli walivyokuwa wakikabiliana na ukuta mzito wa Yeriko walipoingia katika nchi ya Kanaani kwa mara ya kwanza. Kikwazo cha kwanza kwa wana wa Israeli kilikuwa ni ukuta wa Yeriko. Ukuta wa Yeriko ulikuwa ni mgumu sana na wenye uimara. Usingaliweza kuangushwa kwa mapanga na mikuki. Kwa kuwa ulikuwa umejengwa kwa miamba mikubwa sana, usingaliweza kuangushwa kirahisi. Watu wa Yeriko walikuwa juu ya ngome hiyo, basi bila kujali jitihada za wana wa Israeli za kuuangusha ukuta wanalikuwa kuwatazama Waisraeli tokea juu na kuwadhihaki. Kwa kuwa walikuwa wameweka matairi katika magogo makubwa ya mti, basi wale askari wa Israeli walijaribu kulisukuma na kulivunja lango la mji lakini hawakuweza kulivunja kwa kuwa lilikuwa limejengwa kwa uimara mkubwa. Hata hivyo, mji uliangushwa wakati waisraeli walipokuwa na imani katika Mungu na walipolitii Neno lake la ahadi kwa kina.

Sisi pia tunahitaji imani kama hiyo. Katika kipindi tulichonacho, ikiwa hatutaiweka mioyo yetu kwa Mungu, basi kwa hakika hatuwezi kuuendeleza utume wetu wa kuieneza injili ya maji na Roho. Hata hivyo, ikiwa tutaiweka mioyo yetu kwa Mungu, nina hakika kuwa inawezekana kuieneza injili ya maji na Roho kwa sehemu nyingine za ulimwengu zilizosalia. Ikiwa hatuna imani katika injili ya maji na Roho, basi hatuwezi kuieneza injili na kama matokeo ya hilo ulimwengu huu utaelekea katika maangamizi.

Tulipojaribu kuieneza injili ya maji na Roho katika sehemu za ulimwengu zilizosalia kulikuwa na magumu mengi. Tuliamua kuchapisha vitabu vyetu ya kitume vinavyohusu injili ya maji na Roho katika lugha nyingi mbalimbali na kisha kuvituma kwa kila mtu ulimwenguni. Kwa hiyo, vitabu vya injili vimetafsiriwa katika lugha nyingi mbalimbali zilizopo

ulimwenguni. Tumeweza kuieneza injili ya kweli kwa kuchapisha na kusambaza vitabu hivyo katika ulimwengu mzima.

Tunapofikiria juu ya kuieneza injili ya maji na Roho katika sehemu zilizobakia za ulimwengu, na kisha kuitoa mioyo yetu kwa kazi hiyo, basi mioyo yetu itaangaziwa. Wewe na mimi bado tupo katika hali ya mwili, hivyo ikiwa tutaitoa mioyo yetu kwa Bwana, basi mioyo yetu itashukuru na itafaa kufanya kazi ya injili mbele za Mungu. Kwa upande mwingine, ikiwa hatutaitoa mioyo yetu katika kuieneza injili, bali tukaitoa mioyo yetu kwa ajili ya mambo ya kidunia, basi mioyo yetu itakuwa ni michafu mno. Pamoja na kuwa mioyo yetu inakwenda nyuma na mbele kati ya mwili na roho, basi ni jambo la muhimu sana kuiweka mioyo yetu katika injili ya maji na Roho. Kama ilivyoandikwa, *“Kwa kuwa hazina yako ilipo, ndipo utakapokuwapo na moyo wako.”* Tunaweza kuwa watu wa nuru mbele za Mungu au tunaweza kuwa watu tusio na maana kutegemeana na wapi tunapoiweka mioyo yetu. Tunapoitua mioyo yetu kwa Mungu, basi tunaweza kuwa watu wenye maana kwa Mungu na watu wengine. Pia tunaweza kuwa tuliobarikiwa kama vile Ibrahimu na watenda kazi wa Mungu ambao wanaweza kumshirikisha yeyote injili hii inayotoa uzima.

Hebu tuiweke mioyo yetu kwa Mungu. Pamoja na kuwa tunaishi katika ulimwengu huu, basi ni lazima tuiweke mioyo yetu kwa Mungu. Pamoja na kuwa mioyo yetu inakwenda mbele na nyuma, ninatumaini kuwa utauweka moyo wako katika injili ya maji na Roho na katika baraka ambazo Mungu amekupatia kuliko kuweka moyo wako katika ulimwengu. Ni baraka ngapi za kimwili na za kiroho ambazo Mungu ametupatia kwa kupitia injili ya maji na Roho? Pia kwa kupitia injili hii, Mungu ametupatia baraka za wokovu kiasi gani?

Tunapofikiria kuhusu hilo, basi hatuwezi kufanya lolote zaidi ya kuiweka mioyo yetu kwa Mungu. Ni jambo la maana sana kuitoa mioyo yetu kwa Mungu. Pia ni muhimu sana kuitoa mioyo yetu kwa injili. Ni muhimu sana kuitoa mioyo yetu kwa wokovu mkuu uliozifutilia mbali dhambi zetu zote. Ni vema kumshukuru na kumtukuza Bwana, na ni muhimu sana kufanya kazi kwa ajili ya injili ya maji na Roho. Pia tunamshukuru Mungu kwa kutufanya sisi kuwa watoto wake. Mungu ametupatia Mbingu na hivyo inaweza kuhalalishwa kuwa ni vema tuitoe mioyo yetu kwa Bwana.

Ninatumaini kuwa utauweka moyo wako kwa Bwana. Wakati fulani moyo wako na wangu unaweza kuwa na kigeugeu ukienda mbele na nyuma, tunachopaswa ni kuigeuza na kuielekeza mioyo yetu kwa Mungu na kuishi kwa ajili ya kazi ya Bwana. Tunapotembea barabarani na tukakiona kitu kizuri, basi mioyo yetu na macho yetu itakifuata kitu hicho kwa muda, lakini tunachopaswa ni kuiondoa mioyo yetu toka katika kitu hicho na kisha kuikabidhi kwa Bwana.

Katika Mathayo Sura ya 6, Bwana anazungumzia hasa kuhusu vitu ama hazina: *“Kwa kuwa hazina yako ilipo, ndipo utakapokuwapo na moyo wako.”* Je, hazina iliyopo katika mioyo yetu ni ipi? Je, hazina yetu ni ipi kwangu mimi na kwako? Je, hazina yetu ni Bwana? Je ni baraka toka kwa Bwana? Au je ni ulimwengu huu? Je ni fedha katika ulimwengu huu? Ni nini hasa ambacho ni hazina yako?

Hazina ni Bwana. Ikiwa unaamini kuwa hazina ni aina yoyote ya kitu, basi naomba ugeuze mawazo yako. Kusema kweli, vitu havina thamani kama Bwana. Hii ni kwa sababu mkuu wa vitu vyote ni Bwana. Hata hivyo, tunaweza kuishi pasivyo vitu? Hatuwezi. Kwa upande mwingine, vitu hivyo havitoki kwa Bwana pia? Vinatoka kwa Bwana. Mungu anasema, *“Kwa kuwa hazina yako ilipo, ndipo utakapokuwapo*



na moyo wako.” Hivyo, ikiwa utauweka moyo wako kwa Mungu, basi kila kitu kitakuja kwako. Utapewa kila kitu kwa njia ya haki.

Hata hivyo, baadhi ya wahubiri wa uongo wanaweza kuifundisha aya hii kama hivi “ikiwa utatoa sadaka kubwa, basi hiyo ina maanisha kuwa una imani.” “Msijiwekee hazina duniani, bali jiwekeeni hazina mbinguni, kwa maneno mengine, toeni zaka kubwa na sadaka kwa kanisa.” Na kisha wanaweka aya hii katika bahasha ya matoleo *“Kwa kuwa hazina yako ilipo, ndipo utakapokuwapo na moyo wako.”*

Hili ni fundisho la uongo. Dhumuni la makanisa ya kidunia ni kufanikiwa katika dunia hii, hivyo wanachokijali zaidi ni kujipatia fedha. Ikiwa watazitemia fedha hizo kwa haki inakuwa ni kwa bahati tu, lakini mara nyingi wanazitemia ili kukidhi matakwa ya tamaa zao. Watu hao ni wazuri sana kwa kushawishi kuhusiana na fedha, wanatumia aya hii ya Biblia kuwaomba Wakristo fedha na kuwafanya walete akiba zote walizonazo ili ziwe kwa jina la Kanisa.

Baadhi ya wahubiri wanasukuma juu ya ujenzi ya makanisa mapya kwa kupata fedha toka kwa waumini wa kanisa. Je, hii ni haki? *“Kwa kuwa hazina yako ilipo, ndipo utakapokuwapo na moyo wako.”* Kwa kuwa wanachokijali wao ni jengo la kanisa, basi hiyo ndiyo hazina yao. Waumini wanajivunia jengo la kanisa lao lenye thamani ya dola \$15,000,000 kana kwamba kuhudhuria katika hilo ni kitu cha heshima. Ikiwa tutayapima mawazo yao kwa kipimo cha x-ray bila shaka tunaweza kuona kuwa hamna kitu. Kwa kweli mioyo yao ni mitupu pia. Kwa kuwa kile wanachotaka kukiweka katika mioyo yao ni jengo la kanisa la dola \$15,000,000, basi watu wa jinsi hiyo hawawezi kuona kuwa Yesu amezitoweshea mbali dhambi zao zote zilizokuwa kama wingu zito kwa injili ya maji na Roho. Kuna watu wengi

wanapaswa kuonewa huruma ambao hawawezi kuona kuwa Mungu amewafanya kuwa watoto wake na kwamba ametupatia Ufalme wa Mbinguni.

Kinyume chake, kwetu sisi ambao tumezaliwa tena upya, Bwana ndiye hazina yetu. Baraka zote za rehema ambazo Bwana wetu ametupatia—kama vile Wokovu wake, kutufanya sisi kuwa watoto wake, kutupatia Ufalme wa Mbinguni, kuzifutilia mbali dhambi zetu, na kutufanya sisi kuwa wenye haki—hizi ndizo hazina zetu. Hakuna kitu kilicho cha thamani kuliko hivi. Kama wimbo huu unavyoimbwa, “Ni bora niwe na Yesu kuliko fedha na dhahabu,” hakuna heshima katika ulimwengu huu ambayo ni ya thamani sana zaidi ya kuwa na Bwana Yesu. Hakuna kitu cha thamani kuliko wokovu ambao Bwana ametupatia.

Hivyo, wewe na mimi ni lazima tuieneza injili ya maji na Roho katika mioyo ya watu. Ni lazima tuishikilie mioyo yetu ambayo mara nyingine inakwenda mbele na nyuma na kisha tuitoe mioyo hiyo kwa ajili ya kazi ya Bwana. Ikiwa tutampatia Bwana mioyo yetu, basi kwa hakika tutakuwa hatufanyi kazi isiyo na maana, bali tutaweza kwenda katika Ufalme wa Mungu. Wakati fulani tunafanya vitu visivyo na maana, lakini ikiwa tutafanya zaidi kwa kazi zenye maana, basi kwa hakika tutasifiwa na Mungu na kuheshimiwa na watu.

Mathayo sura ya 6 inazungumzia kuhusu somo hili kwa kina. *“Bali utafuteni kwanza ufalme wake, na haki yake; na hayo yote mtazidishiwa. Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.”* Wewe na mimi ni lazima tuiweke mioyo yetu kwa Bwana na katika kazi yake. Ni lazima kwanza tuutafute ufalme wake na haki yake. Mungu ametuokoaje? Mungu alizifutilia mbali dhambi zetu na kuzifanya kuwa nyeupe kama theluji kwa maji, damu, na Roho Mtakatifu. Bwana amezitoweshea mbali

dhambi zetu zote zilizokuwa kama wingu zito na kuzifanya kuwa nyeupe kama theluji. Ni lazima tumshukuru Mungu na kumshukuru Bwana ambaye ni Mwokozi wetu mkamilifu. Na pia ni lazima tuutafute kwanza Ufalme wa Mungu katika mioyo yetu.

Ni mapenzi ya Mungu kuwa injili ya maji na Roho ienezwe katika ulimwengu mzima ili kwamba wale watakaoiamini waamini na wale watakaoikataa wakatae. Ni lazima tutoe fursa sawa kwa kila mtu ya kuisikia injili ili kuyatimiza mapenzi ya Mungu. Ni lazima tufanye kazi kama hizo.

Hata hivyo, Bwana ndiye hazina ya kweli kwako wewe na mimi. Weka moyo wako juu ya Bwana. Pamoja na kuwa sisi ni watu wenye mapungufu mengi hebu tuiweke mioyo yetu kwa Bwana. Hebu tuiweke mioyo yetu kwa Bwana na tuieneze injili ya maji na Roho mara kwa mara kadri itakavyowezekana.

Halleluya. Tunamshukuru Mungu kwa kutusaidia kuiweka mioyo yetu kwa Bwana. ☒

Usihofu Kuhusu Maisha Yako, Bali Mwamini Mungu Peke Yake

< Mathayo 6:25-34 >

“Kwa sababu hiyo nawaambieni, Msisumbukie maisha yenu, mle nini au mnywe nini; wala miili yenu, mvae nini. Maisha je! Si zaidi ya chakula, na mwili zaidi ya mavazi? Waangalieni ndege wa angani, ya kwamba hawapandi, wala hawavuni, wala hawakusanyi ghalani; na Baba yenu wa mbinguni huwalisha hao. Ninyi je! Si bora kupita hao? Ni yupi kwenu ambaye akijisumbua aweza kujiongeza kimo chake hata mkono mmoja? Na mavazi, ya nini kuyasumbukia? Fikirini maua ya mashamba, jinsi yameavyo; hayafanyi kazi, wala hayasokoti nami nawaambia, ya kwamba hata Sulemani katika fahari yake yote hakuvikwa vizuri kama mojawapo la hayo. Basi, ikiwa Mungu huyavika hivi majani ya kondeni, yaliyopo leo, na kesho hutupwa kalibuni, je! Hatazidi sana kuwavika ninyi, enyi wa imani haba? Msisumbuke, basi, mkisema, tule ini? Au Tunywe nini? Au tuvae nini? Kwa maana hayo yote mataifa huyatafuta; kwa sababu Baba yenu wa mbinguni anajua ya kuwa mnahitaji hayo yote. Bali utafuteni kwanza ufalme wake, na haki yake; na hayo yote mtazidishiwa. Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.”

Sisi tuliozaliwa tena upya tunajaribiwa pia kuhofia maisha yetu ya baadaye hata baada ya kuwa tumepokea ondoleo la dhambi. Hofu hizi zinahusiana na jinsi gani ninavyoweza kuishi tangu sasa hadi hapo baadaye, yaani kwamba nitakula nini, nitavaa nini, nitapata wapi fedha, na nitaishi vipi. Basi kwa namna hii tunajikuta tukiwa ma mioyo yenye kuhofia maisha ya baadaye. Ninaona kuwa miongoni mwa wale waliozaliwa tena upya hasa wale walio vijana ndio wanaojaribiwa zaidi kuhofia sehemu ya maisha yao yaliyobakia kwa kuwa hawafahamu kuwa Mungu anawasaidia na wanawaza hivyo kwa kuwa bado hawajapata uzoefu wa jinsi Mungu anavyoyaongoza maisha yao. Kwa kweli kuwa sisi tu wanadamu basi ni asili yetu kuhofia.

Kila mtu aliyezaliwa katika ulimwengu huu anafanya kazi kwa juhudi kwa ajili yake. Watu wa jinsi hiyo wamekuwa wakiishi pasipo imani katika Mungu, na wamekuwa na tabia ya kuishi kwa kuzitegemea juhudi na nguvu zao binafsi, hivyo hata baada ya kuzaliwa tena upya kitu cha kwanza ambacho wanakihofia ni kuwa watakula nini, watakunywa nini, na wataishi vipi. Hata hivyo Bwana anatueleza kile ambacho sisi tuliozaliwa upya tunapaswa kukifikiria kwanza: *“Utafuteni kwanza ufalme wa Mungu na haki yake.”* Mungu anasema, *“Utafuteni Ufalme wa Mungu, na haki ya Mungu. Kwanza ungana na kanisa na uzitafute kazi zinazoifanya kazi ya Mungu, Ufalme wa Mungu, vitu ambavyo vinawaokoa watu. Ombeni! Kisha nitawajazia mahitaji yenu yote ya kimwili kama vile chakula, vinywaji, na jinsi ya kuishi.”*

Mara ya baada ya mimi kukombolewa toka katika dhambi niliwaza pia kuhusu maisha yangu ya baadaye. Nilihofia kuhusu *“nitaishi vipi? Nitakula nini? Nitavaa nini? Nitafanya nini ili niweze kuishi?”* Kama kungelikuwa na mambo fulani ya kuyafanya ambayo ningelipaswa kuyafanya, basi kwa

hakika ningelikuwa nimeyafanya hayo, lakini kama kusingelikuwa na mambo maalumu ya kuyafaya, basi nisingelifahamu namna ya kufanya kwa wakati huo. Kwa wale ambao walihifadhi kiasi fulani cha fedha kabla ya kupokea ondoleo la dhambi zao wanakuwa na nafasi ndogo ya kuchanganyikiwa. Hata hivyo, kwa mtu kama mimi ambaye nilikuwepo kwenye masomo halafu ndipo nikapokea ondoleo la dhambi inakuwa ni jambo la kuchanganya zaidi. Kwa kweli sikuweza kufanya lolote zaidi ya kuendelea kuhofia jinsi nitakavyoishi katika ulimwengu huu.

Vijana wa kike na wa kiume katika kanisa letu ambao ni wanafunzi au wanaoanza katika ulimwengu halisi, wanaweza kukatishwa tamaa pale wanapofikiri jinsi wanavyoweza kuishi katika ulimwengu huu. Tutafanya nini ili tuweze kula? Tutavaa nini? Basi ni kweli kuwa kuna hofu nyingi sana za jinsi hiyo.

Hata hivyo, Bwana anatuambia sisi sote, “Msihofie mambo kama hayo. Hayo ni mambo ambayo yanawasumbua wale ambao hawajazaliwa tena upya.” Kwa maelezo hayo tunaweza kufikiri hivi katika akili zetu, “Bwana wetu ni katili sana na hajali hali zetu. Hili ni tatizo la hali halisi, inawezekanaje kutohofia hali hiyo? Matatizo ya chakula, mavazi, na mahali pa kuishi yanahitajika sasa hivi. Sasa inawezekanaje kutoyahofia mambo hayo?” Hata hivyo, Bwana anatueleza kwa ukakamavu kuwa, “Hayo ni mambo ambayo wamataifa ndio wanaoyahofia. Ninyi misihofie jinsi mtakavyoishi. Fikirini kwanza juu ya haki ya Mungu na kisha endeleeni kuishi wakati mnapoendelea kuibeba na kuitekeleza haki ya Mungu.” Bwana anasema, *“Waangalieni ndege wa angani, ya kwamba hawapandi, wala hawavuni, wala hawakusanyi ghalani; na Baba yenu wa mbinguni huwalisha hao. Ninyi je! Si bora kupita hao?”*

Kwa kweli ikiwa tunaamini yale ambayo Bwana

ameyasema, basi hakuna hoja tunayoweza kuitoa dhidi yake. Sisi tunahofia kuhusu maisha yetu lakini Bwana anatueleza wazi, “Msihofie kuhusu vifaa na vitu mbalimbali. Hayo ni mambo ambayo watu wa mataifa ndiyo wanayoyaomba. Hayo ni yale ambao wale ambao hawajazaliwa tena upya ndio wanaoyaomba. Yatafakarini maua ya kondeni, jinsi yameavyo; hayafanyi kazi wala hayasokoti. Ikiwa Mungu huyavika maua ya kondeni, ambayo leo yapo hai na kesho hayapo na kisha hutupwa motoni, je hataweza kuwavisha ninyi. Enyi wenye imani haba?”

Ndugu Wakristo wapendwa, je, maua ya kondeni yanakua vipi? Je, yanaanza kuchipua mara moja na kisha kukua na kuchanua? Hii ni kwa sababu Mungu anayapanda hivyo, anayapatia mwanga wa jua kadri yanavyohitaji, na anayapatia mvua na kuyafanya yachanue. Bwana anasema kuwa Mungu anaitunza mimea kama hiyo ya kondoni, kama ni hivyo, Mungu atakutunza kwa kiasi gani wewe uliye mwenye haki?

Ndugu Wakristo wapendwa, kuna tofauti kubwa kati ya hofu tulizonazo na uhakika unaotoka katika Neno la Mungu la kweli. Kwa sasa tunapata hofu sana kuhusu maisha yetu ya baadaye, lakini hakuna tunaloweza kusema zaidi kwa kuwa Mungu anatufumba vinywa kwa kusema, “*Yafikirini maua ya kondeni.*” Mungu anatoa mwanga wa jua na mvua ili kuyakuza maua vizuri. Je, kama ni hivyo Mungu hawezi kututunza sisi ambao ni watoto wake? Iweni na imani inayomwamini Mungu. Kwa kufanya hivyo unaweza kuwasiliana na Mungu.

Je, tufanye nini ili tuweze kuwasiliana na Mungu? Kwa kwa kweli hakuna njia nyingine zaidi ya kuliadini katika Neno la Mungu. Tunapoliamini Neno lake kama lilivyo, basi hapo tunaweza kuwasiliana naye kwa imani. Ikiwa Mungu anasema hivyo, basi tunapomwamini Mungu kwa mujibu wa Neno lake kuwa “Mungu atanivisha, atanilisha, atanisaidia ili niweze

kuishi,' basi hapo ndipo tunapoweza kuhusiana na Mungu na kuwa wamoja, na tunaweza kuwasiliana na Mungu, na kisha kujibiwa kwa mujibu wa imani yetu.

Yafikirini Maua ya Kondeni

Je, una imani inayoamini kama hivi?—"Mungu aliyakuza maua ya kondeni. Mimi ni mmoja wa watu wa Mungu, mtoto wa Mungu, na Mungu ni Baba yangu na mchungaji, hivyo ninaamini kuwa Mungu atanilisha na kunivika." Njia pekee ya kuvunja hofu ni kuamiani. "Mungu, ninakuamini wewe!" Kwa kweli hakuna maneno mengine zaidi ya haya mbele za Mungu. Kwa kweli hakuna maneno mengine tunayoweza kusema.

Ndugu Wakristo wapendwa, wakati Bwana anaposema jambo moja, je tunaweza kusema jambo jingine dhidi ya lile alilolisema Bwana? Katika kifungu cha leo cha maandiko, Mungu anaahidi kuwa atatupatia kila kitu tunachohitaji pale tutakapoutafuta kwanza Ufalme wa Mungu na haki yake. Tunapokichukua kifungu hiki cha maandiko kwa imani basi kwa hakika hatuwezi kusema jambo jingine lolote. Kwa hakika hatuwezi kutoa udhuru wowote, kinyume na hapo tutakuwa hatuna imani. "Ninaweza kuyakuza maua ya kondeni. Ikiwa ni hivyo, Je siwezi kukukuza wewe? Ninaweza kuukuza mmea wa mwaka moja, kama ni hivyo, je, siwezi kuwakuza watoto wangu?" Sasa mwaminini Mungu.

Ikiwa tunaamini hivi, basi tunaweza tusifikirie kwa namna hii: "Mvua ni kitu ambacho Mungu anakifanya kitoke angani bure, na mwanga wa jua ni kitu ambacho Mungu anakitoa bure, na kwa sababu hiyo nyasi zinakua, lakini ukweli ni kuwa hatuwezi kuishi kwa mvua na jua tu. Mungu, hufahamu jinsi inavyotubidi kufanya kazi kwa juhudi ili tuweze kuishi?" Kwa

kweli hakuna njia inayoweza kumfanya Mungu asifahamu. Ikiwa Mungu anasema kuwa anatufahamu sisi sote, basi ni lazima tuamini kuwa Mungu atatupatia uwezo, hekima, na baraka ambazo zitatuwezesha kuishi katika ulimwengu huu. Ikiwa Mungu alilichukua ua na kulitumia kutoa hoja ili kutueleza kuwa Mungu anatoa kila kitu kwa wakati sahihi, basi ni wazi kuwa tunaweza kuamini kuwa Mungu atatupatia kila kitu kwa wakati wake kwetu sisi ambao ni watoto wa Mungu.

Bwana anatupatia mfano mwingine ili kuiimarisha imani yetu kwake kwa kusema, *“Waangalieni ndege wa angani, ya kwamba hawapandi, wala hawavuni, wala hawakusanyi ghalani; na Baba yenu wa mbinguni huwalisha hao. Ninyi je! Si bora kupita hao?”* (Mathayo 6:26).

Hata hivyo, baadhi ya watu wasioamini wanaitafsiri aya hii vibaya hali wakisema, “Angalia, waangalieni ndege wa angani! Jinsi walivyo na juhudi! Ikiwa tutafanya kazi kwa juhudi hapa ulimwenguni kama hao ndege wanaoruka angani, basi tunaweza kuishi vizuri katika ulimwengu huu.” Wao hutoa hoja kama hii. Kwa kuwa watu hawa hawana imani, ndio maana wanatoa hoja kama hii, “Aah, ikiwa mtu anafanya kazi kwa juhudi, basi mtu huyo anaweza kuwa na chakula cha kutosha na kuishi kwa kutosheka.”

Hoja kama hizi ni kinyume kabisa na hoja za imani ambao Bwana wetu ametuambia. Ni nani anayeweza kusema kuwa tukifanya kazi kwa juhudi hatupaswi kuhofia kuhusu chakula? Hata hivyo, je, kila mtu anayefanya kazi kwa juhudi anakuwa tajiri? Kwa kweli hali haiko hivyo kwa kila mtu. Kuna watu wengi sana ambao wanafanya kazi katika maeneo yao waliyoajiriwa kwa miezi au hata kwa mwaka mzima lakini bado hawajalipwa.

“Waangalieni ndege wa angani, ya kwamba hawapandi, wala hawavuni, wala hawakusanyi ghalani; na Baba yenu wa

mbinguni huwalisha hao. Ninyi je! Si bora kupita hao?” Kile ambacho Bwana amekisema katika aya hii si kwamba tunaweza kuwa na chakula ikiwa tutafanya kazi kwa juhudi. Bwana wetu anasema kuwa, Mungu Baba yetu, ambaye alituokoa sisi, anatupatia mahitaji yetu ya chakula, vinywaji, na mavazi ili kuyawezesha maisha yetu katika ulimwengu huu. Hii ina maanisha kuwa Mungu atatulisha na kutuvalisha sisi wenye haki. Hii ina maanisha kuwa Mungu atamtunza kila mwenye haki anayeishi kwa kuieneza injili. Mkazo mkuu katika aya hii ni kuwa: “Mnapokuwa watoto wangu, je nitawatafanya mfe na njaa na nisiwavike? Mnapokuwa watoto wangu wakati mnapoishi katika ulimwengu huu, mnapokuwa mngali hai, mnapokuwa na kazi za kufanya katika ulimwengu huu, je, sintawatunza?”

Mimi pia kabla sijazaliwa tena upya nilipata shida sana nilipokisoma kifungu hiki. Lakini kwa sasa hali haiko hivyo. Nilipokutana na Bwana kwa mara ya kwanza, kwa kweli sikufahamu jambo la kufanya. Hivyo, nilifikiri nitapaswa kuwa na biashara ili niweze kupata fedha za kujikimu kimaisha. Kusema kweli sikuwa na mipango mingine yoyote katika akili zangu. Kwa kweli nilikuwa nilipokutana na Bwana kwa mara ya kwanza kwa kupitia injili ya maji na Roho nilikuwa ni mtu wa kuhuzunisha. Kwa kweli hofu za jinsi nitakavyoishi, nitakula nini, nitavaa nini, hofu za jinsi ya kuieneza injili mara baada ya kuwa nimeupokea wokovu zilichukua nafasi katika maisha yangu. Suala la ni jinsi gani ninaweza kuungana na kanisa la Mungu pia lilichukua nafasi katika maisha yangu, kwa kweli nilikuwa katika hali ya mashaka kuhusiana na kile nilichopaswa kukifanya wakati huo huo nikifikiria jinsi ya kuishi kwa kujitegemea mwenyewe. Lakini Bwana anasema, “Hayo ni mambo ambayo wamataifa huyaomba.” Hata hivyo, nilijikuta nikiliasi Neno lake mara nyingi kwa kusema “Hiyo ni

hoja ya ufahamu wako lakini ufahamu wangu hauniambii hivyo kwa sasa.”

Basi wakati nilipoangalia mbele kuhusiana na jinsi nitakavyoishi tangu wakati huo hadi hapo baadaye, kwa kweli niliona giza. Nilipokuwa nikiangalia mazingira yaliyokuwa yakinizunguka, kwa kweli hali ilikuwa ni mbaya sana na hata sikujua jambo la kufanya. Kwa kweli kwa wakati huo sikufahamu jambo lolote la kufanya, lakini jambo pekee ambalo nilikuwa na uhakika nalo ni kuwa Mungu alikuwa amefanyika kuwa Baba yangu na kwamba Bwana alikuwa amezitoweshea mbali dhambi zangu zote. Kisha Bwana akasema, *“Mkiwa na imani kiasi cha punje ya hardali mtauambia mlima huu, Ondoka hapa uendele kule; nao utaondoka.”* Hii ina maanisha kuwa Bwana alinipatia injili ya kweli inayoniwezesha mimi kuishi kwa imani. Pia Bwana alinambia, *“Utafuteni kwanza ufalme wake, na haki yake; na hayo yote mtazidishiwa.”*

“Aah! Hivi ndivyo ninavyoweza kuishi!” Kwa kweli niliamua kujitoa mwenyewe kwa kazi ya Mungu. Nililishikilia Neno hili na nikaanza kuomba kwa kila kitu ambacho nilikuwa nikikihitaji. Niliomba hivi: “Mungu Baba, sina fedha zozote. Mungu ninataka kuieneza injili ya maji na Roho, lakini sina fedha zozote. Naomba unipatie fedha. Naomba unipatie na vifaa mbalimbali. Sina jengo. Naomba unipatie jengo la kanisa. Nipatie nafsi za watu. Ninajaribu kuandaa vitabu vya kuienezea injili ya maji na Roho, lakini sina mahali pa kuchapishia vitabu hivyo. Naomba unipatie kiwanda cha kuchapishia vitabu.”

Sasa, ile imani yangu ndogo ilikuwa na nikaanza kuomba vitu vikubwa kwa ajili ya kuifanyia kazi ya Mungu. Kwa kweli nimepata uzoefu kuwa Mungu amejibu kila kitu nilichoomba—bila kujali kuwa ni kikubwa au ni kidogo. Kwa kweli jambo

hili limenifanya na linanifanya mimi kukuwa taratibu kama mtu wa imani. Hii ina maanisha kuwa wakati mwingine tunafanyika kuwa watu wa imani pasipo hata sisi wenyewe kutambua.

Wakati jambo fulani linapotokea, ninafikia hatua ya kufikiri kuwa: “Mungu anatoa ikiwa tutaomba! Na kwa sababu hiyo hakuna kitu ambacho akina kaka na akina dada wanapaswa kukihofia! Mungu anatusaidia! Mungu anawasaidia akina dada na akina kaka! Ikiwa akina kaka na akina dada wapo katika matatizo na wanapitia magumu fulani, basi ni vema tufahamu kuwa Mungu anatoa ikiwa tutaomba!” Imani yetu inakuwa taratibu kadri tunavyozidi kuomba kwa imani. Hii ndiyo sababu Bwana anasema, *“Msijisumbue kwa neno lolote; bali katika kila neno kwa kusali na kuomba, pamoja na kushukuru, haja zenu na zijulikane na Mungu. Na amani ya Mungu, ipitayo akili zote itawahifadhi mioyo yenu na nia zenu katika Kristo Yesu”* (Wafilipi 4:6-7). Mungu wetu anaweza kutupatia vitu vya kutosha kuliko vile tunavyoviomba na kuviwaza (Waefeso 3:20).

Kwa kuwa tunaamini hivi, basi tunamwomba Mungu kwa ujasiri. Badala ya kufanya mambo kwa juhudi zetu wenyewe, badala ya kujaribu kutumia mbingu mbalimbali za kibinadamu, sisi tunaomba kwa kila jambo: “Mungu! Tunaomba utupatie vitu hivi. Kwa kweli tunavihitaji.” Kwa sasa hata kama hatuwezi kuona ishara njema kwa macho yetu, sisi bado tutaendelea kumwomba Mungu. Kwa nini? Kwa sababu maombi yanafanya vitu vitokee, hivyo ni bora kabisa kuomba kuliko kujaribu kwa mbinu zetu. Nilipozaliwa tena upya kwa mara ya kwanza nilikuwa nikipanga kuuza vyungu ili kujipatia fedha za kujikimu kimaisha. Lakini kadri imani yangu ilivyokua, basi nilifikia hatua ya kuomba kuliko kufanya vitu kwa juhudi zangu binafsi.

Ikiwa tuna imani katika Mungu, basi tunamwomba Mungu kwanza ili atupatie msaada wake. Hata kama hakuna majibu sisi tunaendelea kuomba kwa juhudi. “Mungu, tunaomba utufanyie hivi. Tunaomba utufanyie jambo hili na lile.” Tunapomba kwa muda mrefu na pasipo kukomba, basi tunaona wazi kuwa Mungu anajibu maombi yetu. Kisha tunalipokea jibu la Mungu na kisha tunaendelea kuomba kwa ajili ya mada nyingine. Kwa hiyo, tunapata uzoefu kuwa tunapokea majibu toka kwa Mungu. Hivyo tunafanyika kuwa watu wa imani. Tunafikia hatua ya kuwa na imani yenye nguvu inayomwamini Mungu. Tunafikia hatua ya kuamini kwa uhakika kuwa Bwana anatulisha, anatuvika, na anatufanya tuishi. Tunapoishi kwa ajili ya haki ya Mungu, basi ni dhahiri kuwa tunaiendeleza na kuikuza imani yetu katika Mungu.

Hivyo, tunapofanya kazi kwa ajili ya haki ya Mungu hatuhofii sana juu ya kile tutakachokula tangu sasa na kuendelea, au kuhusu kile tutakachokunywa au kuvaa. Kila tunapohitaji kitu fulani tunageukia katika maombi: “Mungu tunaomba utupatie tena. Tunaomba uwapatie kaka na dada zetu vitu wanavyovihitaji. Tunaomba utupatie afya. Tunaomba utupatie hiki na kile.” Tunageukia katika maombi. Hii haimaanishi kwamba tunakaa tu na kuomba na kutofanya chochote kwa ajili ya maisha yetu. Tunapaswa kuomba kwanza na kisha kuitafuta haki ya Mungu. Kisha ndipo Mungu anapotupatia kile kinachohitajika kula, kunywa, na mambo mengine kadhaa yanayohitajika katika maisha ya mwanadamu. Ninatumaini kuwa unaamini kuwa Mungu anatupatia kila kitu.

Kusema kweli, tumeweza kuishi na kuifanya kazi yake hadi sasa kwa sababu Mungu ametupatia kila kitu tulichokihitaji. Hivyo, tunaamini kuwa Mungu atatupatia sisi wenye haki yale tunayoyahitaji hapo baadaye kwa kuvaa, kwa chakula, na kunywa, vitu ambavyo ni muhimu kwa maisha

yetu. Si hayo tu, bali Mungu atatupatia yote tunayohitaji wa ajili ya kuueneza Ufalme wa Mungu.

Akina kaka na akina dada, hii ndio sababu ni baraka kuishi ndani ya Mungu. Sisi hatuishi kutokana na vile tulivyonavyo, bali tunaishi kwa imani katika Mungu. Hii ndio sababu kuwa wenye haki wanaweza kuishi hali wakiwa na mali katika mwili na Roho. Ikiwa kweli tunaishi kwa imani inayomwamini Mungu, basi ni hakika kuwa tutaishi tukiwa navyo vingi katika mwili na Roho.

Mungu alitueleza: *“Bali utafuteni kwanza ufalme wake, na haki yake; na hayo yote mtazidishiwa.”* Hii ina maanisha kuwa ni lazima tuishi kwa kuungana na Kanisa la Mungu kwa ajili ya Ufalme wa Mungu na haki yake, kwa ajili ya injili, na kwa ajili ya wokovu wa nafsi za watu wengine. Bwana anatuambia sisi kuishi kwa ajili ya injili ya maji na Roho. Hii ina maanisha kuwa Mungu atatupatia kila kitu ikiwa tutaishi kwa ajili ya haki ya Mungu. Hii ni ahadi ya usalama ambayo Mungu anatahakikishia wewe na mimi. Hili ni agano ambalo Mungu alilifanya nasi ambao tumezaliwa tena upya. Ikiwa tutaitoa mioyo yetu na kisha kuishi kwa ajili ya injili ya Mungu, basi ni hakika kuwa Mungu atatutunza maisha yetu kwa kutupatia chakula, vinywaji, na mavazi. Kwa hakika Mungu atahakikisha kuwa tunaishi tukiwa na mali katika mwili na roho.

Ndugu Wakristo wapendwa, ishini kwa ajili ya Mungu. Je, una hasira kuhusiana na maisha yako? Ishi kwa ajili ya injili ya Mungu. Ishi kwa ajili ya injili ya maji na Roho. Zielekeze akili zako katika kazi ya Mungu. Ikiwa utafanya hivyo basi maisha yako ya baadaye yatakuwa na uhakika. Ni wakati gani tunapokuwa na hofu zaidi kama wanadamu? Ni wakati ambao vile tulivyonavyo bila kujalisha kuwa ni vingi au vichache vinapoanza kupungua na kuisha, basi hapo ndipo tunapojiona kuwa hatupo salama. Na wakati mwingine huwa tunaona raha

wakati vile tulivyonavyo vinapokuwa vimekwisha kabisa na tunapokuwa mikono mitupu. Kwa kuwa tunakuwa hatuna kitu cha kuweka akiba au kuweka ghalanai, basi inakuwa rahisi zaidi kwetu kujaribu tena kwa imani katika Bwana. Hata hivyo, tunakuwa hatupo salama zaidi pale tunapokuwa hatujaishiwa kabisa, yaani wakati tunapojaribu kuishi kwa vile vichache tulivyobaki navyo. Huo ndio wakati ambapo huwa tunakuwa na hasira yenye hofu huku tukihofia kuvipoteza hata vile vichache tulivyo navyo.

Ndugu Wakristo wapendwa, ikiwa tuna kitu chochote kilichobakia au ikiwa hatuna chochote kilichobakia hebu tuishi kwa ajili ya Bwana, kwa ajili ya injili, na kisha tumwamini Bwana. Hapo ndipo Bwana atakapotujaza si tu kwa vile tulivyonavyo bali atatujazia kwa wingi. Hii ni kwa sababu Bwana wetu anatumwamini vitu vingi pale tunapoishi kwa ajili ya injili, na Bwana anatusaidia kuishi wakati tunapovitawala vile tulivyonavyo.

Hivyo ndivyo ilivyo. Naomba leo hii ukikumbuke kifungu cha leo cha maandio kinachosema: *“Bali utafuteni kwanza ufalme wake, na haki yake; na hayo yote mtazidishiwa.”* Hii ni kwa sababu ikiwa tutaishi kwa ajili ya Mungu, basi Mungu hataweza kufanya lolote kinyume zaidi ya kutupatia vile tunavyovihitaji.

Kulikuwa na ndugu mmoja ambaye alikuwa ni fundi nguo. Kwa kweli fundi nguo hawezi kuwa na fedha nyingi sana. Huyu fundi alisema kuwa kuna wakati ilimgharimu kukesha usiku kucha ili kuikamilisha suti moja. Hivyo wakati alipofanya kazi nyingi kwa ajili ya kanisa, basi huyo fundi aliishiwa fedha zote alizokuwa nazo. Basi huyo fundi akaanza kumwomba Mungu. Basi tangu wakati huo watu wakaanza kuagiza nguo nyingi za mafunzo kuliko suti. Baadhi ya kampuni zikaanza kuagiza nguo za mafunzo kwa mamia na

kwa maelfu kiasi kuwa alipoanza biashara yake hiyo akawa anapata fedha nyingi sana. Basi hatimaye huyo fundi aliweza kuishi vema hali akiendelea kumtumikia Bwana.

Kuishi ni kuishi tu na hakujalishi kuwa mtu anashona suti au anashona nguo za mafunzo, lakini kuna ndugu wengi ambao wanaweza kumtumikia Mungu zaidi kwa kuwa waliomba walipokuwa na shida. Ukweli ni kuwa kuna mifano mingi kama hiyo. Mtu yeyote ambaye ameishi kwa ajili ya Mungu basi ni lazima atakuwa na uzoefu kama huo. Sisi wenye haki hatuishi kutokana vile tulivyonavyo. Sisi tunamtumikia Bwana kutokana na vile ambavyo Bwana ametupatia kwa sababu Bwana anatumia. Ikiwa tutaishi kutokana na vile tulivyonavyo, basi ni hakika kuwa tutaishiwa kabisa vitu hivyo hivi karibuni.

Katika Agano la Kale kulikuwa na mjane huko Sarepta. Wakati huo kulikuwa na ukame mbaya sana kwa miaka kadhaa toka kwa Mungu. Kutokana na njaa kali yule mjane aliishiwa kila kitu na kitu cha mwisho alichokuwa amebakiza ulikuwa ni unga kidogo tu katika pipa. Mjane huyo alikuwa na hakika kuwa ikiwa angeukanda ule unga basi angeliweza kupata donge la mkate wa kutosha watu wawili au watatu tu. Basi yule mjane akaukanda ule unga ili kupata mkate. Wayahudi wanatengeneza mikate kama sehemu yao ya chakula. Wao huukanda unga na kisha kulisambaza hilo dida la unga uliokandwa na kisha hulibanika katika makaa ya moto.

Basi wakati yule mjane alipokuwa akienda kutengeneza mkate ili aweze kuula kwa mara ya mwisho na mtoto wake pekee alidhanja kuwa ndio wanakwenda kula mkate huo na kisha kufa kwa njaa. Kisha mtumishi wa Mungu Eliya akatokea.

“Mwanamke, una chakula chochote?”

“Mwanamke akajibu ‘Ndiyo, nina kiasi hiki cha unga.’”

“Oka mkate huo na kisha uniletee ili niweze kula.”

Ndugu Wakristo wapendwa, yule mjane alimletea Eliya

mkate kwa sababu alikuwa ameambiwa na mtumishi wa Mungu. Yule mjane alifikiri kuwa anakwenda kula kila kipande cha mwisho cha mkate na mtoto wake pekee, lakini badala yake akampatia yule mtumishi wa Mungu kile kipande ili akile. Yule mjane alimpatia mtumishi wa Mungu kipande cha mwisho alichokuwa nacho. Ilionekana kwamba hakukuwa na tumaini jingine tena kwake. Hata hivyo, jambo la ajabu lilitokea kwa wakatu huo. Baada ya kuwa amemaliza kula, yule mtumishi wa Mungu aliomba. Baada ya yule mtumishi wa Mungu kuomba, unga haukuisha katika lile pipa. Jambo hili limeelezwa vizuri katika Biblia.

Ndugu Wakristo wapendwa, Biblia inasema, *“Bali utafuteni kwanza ufalme wake, na haki yake; na hayo yote mtazidishiwa.”* Wale ambao hawajazaliwa tena upya wanawatapeli wengine fedha zao kwa kutumia aya hii. Jambo hili linatokea mara kwa mara katika maisha ya kila siku. Lakini kusema kweli, kuziongoza nafsi ili ziweze kuishi kwa imani na kuitumikia injili ya maji na Roho si uongo, bali ni Neno la Mungu. Ikiwa kweli tunaishi kwa ajili ya Bwana, basi ni dhahiri kabisa kuwa Bwana atatupatia tunayoyahitaji. Naombao uamini hilo. Unapaswa kuliadini hilo.

Ndugu Wakristo wapendwa, naomba unifuatishie. “Bwana ninakuamini wewe!” Pamoja na kusema haya bado unaweza kujiona haupo salama, ni kweli? Basi unaweza kupaza sauti. “Ninaamini!” Je, umeweza kuishi kwa kuzitegemea nguvu zako hadi sasa? Basi naomba umshikilie sana Mungu kwa imani zaidi. Ikiwa utakishikilia kitu kinachoisha, basi hatimaye utaishiwa tu. Ikiwa kitu ni cha kwisha basi ni hakika kuwa hutaweza kukizuia kisiishe hata kama una nguvu kiasi gani. Hii ndiyo sababu Bwana wetu anatueleza kuishi kwa imani.

Sisi tunapaswa kuishi kwa moyo kwa ajili ya Mungu na kisha kumtumikia Mungu bila kujalisha kuwa tuna vingi au

vichache. Kwa kufanya hivyo, ni hakika kuwa Bwana atakupatia kila kitu unachokihitaji. Ikiwa tunamtumikia Mungu, basi Mungu anakuwa na wajibu wa kutupatia yale tunayoyahitaji. Mungu anatupatia mahitaji yetu kwa wingi kwa kuwa sisi tunaweza kumtumikia yeye moja kwa moja. Kwa kuwa Mungu ni mwenye kudra, basi ni hakika kuwa atatupatia tunayoyahitaji ili kulitunza agano lake.

Maisha yetu hayategemei matakwa yetu binafsi bali yanategemea imani yetu. Sisi watumishi wa Mungu na akina kaka na akina dada tunapaswa kuishi kwa imani—yaani ile imani ambayo ina uzoefu wa jinsi Mungu alivyotufanyia wakati tulipokuwa tukiishi kwa ajili ya Mungu. Ikiwa tutaishi kwa ajili yetu binafsi, basi ni wazi kuwa imani yetu haiwezi kukua. Tunapoishi kwa ajili ya Mungu, Basi imani yetu katika Mungu inaweza kukua taratibu. Ndugu Wakristo wapendwa, je, mnafahamu kuwa baraka za Mungu nikama malipo ya ziada kwa watu wanaoishi kwa imani? Malipo ya ziada hutolewa kwa nyongeza juu ya bei au thamani ya kitu iliyozoeleka.

Mbali na wokovu wake, Mungu anatoa malipo haya ya nyongeza. Sisi tunaishi kwa sababu Mungu anatupatia baraka nyingi kama malipo ya nyongeza. Ikiwa Mungu hatatupatia malipo ya nyongeza na badala yake akatupatia malipo tunayoyastahili basi ni hakika kuwa hatuwezi kuishi. Ikiwa tunapokea kulingana na kazi tunayoifanya, Je, si dhahiri kuwa wavivu na wazembe wote wangelikufa? Kwa kweli Mungu anatoa vitu vingi kama malipo ya nyongeza na hiyo ni sehemu tu ya baraka zake. Nasi tunaishi na Mungu ambaye anatupatia Neema yake. Kwa hiyo, tunaishi kwa imani inayomwamini Mungu ambaye ametuokoa.

Ndugu Wakristo wapendwa, ikiwa tunamwamini Mungu, basi Mungu atatenda kazi ndani yetu. Naomba umwamini Mungu. Naomba umwamini Mungu hata kama ni vigumu

kufanya hivyo. Ahadi ya Mungu ni kuwa atatusikia ikiwa tutamwamini yeye. *“Utafuteni kwanza ufalme wake, na haki yake; na hayo yote mtazidishiwa.”* Kadri unavyoishi pata uzoefu wa jinsi Mungu anavyotoa “vitu vyote”. Ninamaanisha kuwa unapaswa kuupata uzoefu jinsi Mungu anavyotimiza, jinsi Mungu anavyokupatia mahitaji yako. Ikiwa utakuwa haujaishi kwa imani unawezaje kuupata uzoefu wa baraka za Mungu na uwezo wa Mungu wa kutupatia mahitaji yetu kwa kupitia rehema zake?

Ndugu Wakristo wapendwa, ishini kwa imani: “Ninakuamini wewe Mungu! Ninaamini kuwa utanivika, utanilisha, na kwamba sintaishi na mwili ulio uchi, kwamba utanivika na kunifanya niishi ili kwamba nisiaibike. Na ninaamini kuwa utanilisha. Ninaamini kuwa utaniruhusu niendeleo kuishi kimaisha.”

Naomba uamini kwa jinsi hii. Ikiwa unaamini, basi ni wazi kuwa Mungu atakupatia kile unachokiamini. Je, Mungu wetu ni Mungu ambaye hawezi kufanya hivyo? Je, ni Mungu ambaye hawezi kulisha? Mungu ni Mungu mwenye nguvu za kuweza kufanya hayo. Hivyo ni lazima tuachane na vipimo vyetu binafsi na kisha tuamini katika Mungu mwenyezi mwenye kudra. Liamini Neno. Uwe na tumaini! Kulitumaini Neno ni imani. Ndugu Wakristo wapendwa je, mmeelewa?

Je, Bado Una Hofu Kuhusu Maisha Yako ya Baadaye?

Je, bado una hofu kuhusu maisha yako ya baadaye? Nilipokuwa nikisoma katika chuo niliwahi kuwa na hofu nyingi sana hasa wakati nilipokuwa nakaribia kuhitimu. Nilipokuwa nikianza masomo nilikuwa nakwenda shuleni

kama fahari la ng'ombe. Sikuwa na kitu cha kuhofia. “Jamani twendeni tukale keki.” Mimi nilikuwa sijali, lakini nilipofikia muhula wa pili wa mwaka wa mwisho nilianza kuwa na hofu. “Nilianza kuwaza kuwa ninakaribia kuhitimu hivi karibuni. Ooh, baada ya kuhitimu nitafanya nini? Kwa kweli nilipata shida sana.” Kila nilipokuwa nikilifikiria hilo kwa kweli nilipata shida kubwa. Ilifikia hatua nikapoteza hata hamu yangu ya kula chakula.

Kusema kweli, si wanafunzi tu ndio wanaohofia jinsi watakavyoishi bali ni kila mtu huhofia jinsi atakavyoishi, jinsi atakavyo kula, tena huhofia hivyo hata baada ya kuwa wameokolewa. Hata hivyo, ni mwanzo mpya kwa wale ambao wamezaliwa tena upya. Ikiwa tumezaliwa tena upya, basi yale mambo ya zamani kama vile yale tuliyoyafanya hapo zamani, aina ya kazi tuliyokuwa nayo hapo zamani, na jinsi tulivyoishi havijalishi na wala havina maana tena. Hata hivyo kwa kuwa uliishi kadri ulivyoweza hapo kabla, basi sasa kwa kuwa umezaliwa tena upya basi unatakiwa kuwa na mwanzo mpya. Sasa tunaufanya mwaka mpya. Kipindi kipya!

Katika Kutoka 12, imeandikwa hivi, “*Mwezi huu utakuwa mwanzo wa miezi kwenu; utakuwa n imwezi wa kwanza wa mwaka kwenu*” (Kutoka 12:2). Mungu alitoa kalenda mpya kwa Waisraeli ili kusherehekea kutoka kwao Misri, yaani wakati ambapo walitolewa katika utumwa. Kutoka ulikuwa ni mwanzo mpya katika historia ya Waisraeli. Walivuka bahari Nyekundu, ambayo ni bahari ya kifo, kisha wakafikia mahali kuielekea Nchi ya Ahadi. Hawakuhesabiwa tena kama watu wa Farao bali badala yake walifanyika kuwa watu wa Mungu.

Vivyo hivyo, tangu wakati ule tulipozaliwa tena upya, sisi tumefanyika kuwa viumbe vipya. Hii ndiyo sababu tunapaswa kuanza maisha mapya yaliyo tofauti kabisa na yale tuliyoishi awali. Maisha mapya tunayopaswa kuyaanza si mwendelezo

wa maisha ya zamani. Kwa sasa, sisi ni watu ambao tulikufa pamoja na Kristo na kisha kufufuka pamoja naye na kisha kuwa na maisha mapya. Kama ilivyoandikwa, *“Basi tulizikwa pamoja naye kwa njia ya ubatizo katika mauti yake, kusudi kama Kristo alivyofufuka katika wafu kwa njia ya utukufu wa Baba, vivyo hivyo na sisi tuenende katika upya wa uzima”* (Warumi 6:4).

“Hata imekuwa, mtu akiwa ndani ya Kristo amekuwa kiumbe kipya; ya kale yamepita tazama! Yamekuwa mapya” (2 Wakorintho 5:17). Kwa wale waliozaliwa tena upya, mambo yote yamekuwa mapya. Sisi tunajifunza kwa mambo mapya, tunaenda kazini tukiwa na mambo mapya, tunamtumikia Bwana kwa vitu vipya, na tunaishi kwa mambo mapya. Hebu na tuishi kwa mambo mapya tangu sasa na kuendelea. Kwa sehemu fulani, maisha ya waliozaliwa tena upya yanaweza kuonekana kama ni mwendelezo wa maisha yao ya zamani, lakini kusema kweli, Mungu anapotuangukia anaona namna tofauti kabisa ya maisha, na anauona mwanzo wa maisha mapya. Yote ni mapya.

Tunapoiamini injili ya maji na Roho basi tunafanyika kuwa viumbe vipya na kisha tunakombolewa toka katika dhambi zetu zote. Kwa sasa wewe na mimi ni viumbe vipya. Kwa sasa mambo ya kale yamepita. Udhaifu wako wote, hofu zako, na namna yako ya maisha ambayo ilizoea kutegemea katika njia za kibinadamu vyote vimepita. Sasa umefanyika kuwa kiumbe kipya. Na kwa sababu hiyo unapaswa kuishi kwa imani.

Ndugu Wakristo wapendwa! Sisi tutaishi kwa imani kama inavyoonyeshwa katika aya hii, *“Mwenye haki ataishi kwa imani.”* Moja ni kwa imani, na mbili ni kwa imani! Tatu na nne ni pia kwa imani. Tunapoanguka, tutaishi kwa imani, na tunapotembea kwa ukakamavu, tutaishi kwa imani—katika hali yoyote ambayo tunaweza kuwemo, sisi tutaishi kwa imani. Hii

ndiyo jumla ya imani jinsi ilivyo. Imani inatufanya sisi tuweze kuishi! Hili ndilo jibu sahihi. Hii ndiyo sababu katika kifungu cha leo cha maandiko Biblia inatueleza kuwa, *“Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.”* Hii ina maanisha kuwa tunapaswa kutohofia maisha ya baadaye. Kwa nini? Kwa sababu maisha yetu ya baadaye yapo mikononi mwa Mungu. Hii ndiyo sababu Bwana alitueleza kuwa kutohofia mambo ya baadaye. Ni jambo gani linaweza kutekelezeka kwa kuhofia maisha ya baadaye?

Bwana alitueleza, *“Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.”* Sisi tunapaswa kuishi leo au kesho kwa imani. Tunapaswa kuyapa changamoto maisha ya baadaye kwa imani mbele za Mungu. Tunamwomba Mungu kwa imani, “Mungu! Nifanyie hivi na vile kwa ajili yangu”. Maombi yanaleta changamoto ya kiimani pale mtu anapomwamini Mungu kuwa atatenda kwa ajili yetu. Hivyo ndivyo tunavyopaswa kufanya, na kwa sababu hiyo matakwa yetu binafsi na viapo kuhusiana na yale tutakavyofanya hapo baadaye vinakuwa havina maana. Sisi binafsi hatuwezi kujihakikishia chochote kuhusu maisha yetu ya baadaye. Hakuna kitu cha kibinadamu kilicho na uhakika. Hii ndiyo sababu kuwa Mungu, ambaye ni Bwana wa watu wote ametueleza katika kifungu cha maandiko ya leo kuwa hatupaswi kuhofia kuwa tutakula nini, tutakunywa nini, au kwamba tutavaa nini.

Ndugu Wakristo wapendwa, hatupaswi kuhofia jinsi tutakavyoishi, yaani jinsi miili yetu itakavyotunzwa. Hebu tusihofu. *“Ni yupi kwenu ambaye akijisumbua aweza kujiongeza kimo chake hata mkono mmoja?”* Hivi ndivyo urefu wangu ulivyo, je, ninaweza kuuongeza urefu huu walau kwa sentimita 1 ikiwa nitahofia? Je, urefu huo unaweza kutokea

tukihofia usiku kucha? Hakuna kitu kinachoweza kutokea ati kwa sababu tunahofia. Je, tunaweza kupata mkate au fedha kwa kuhofia?

Hatupaswi kuwa na wasiwasi kuhusu kitu chochote, bali tunapaswa kuyapeleka mahitaji yetu mbele za Mungu kwa maombi na kusali. Omba bila kukoma na omba kwa imani. Hivyo ndivyo tunavyopaswa kufanya. Kuamini na kuomba ndio mambo tunayopaswa kuyafanya. Ikiwa unahofia, basi mwombe Mungu akupe msaada. Mtumaini Mungu. Ndugu Wakristo, ishini maisha yetu kwa kumwamini Mungu. Je, mnaelewa? —Ndiyo.— Tunaweza kuishi ikiwa tutaamini na tutakufa ikiwa hatutaamini.

Ndugu Wakristo wapendwa, ikiwa humwamini Mungu, basi ni hakika kuwa utakufa. Ikiwa unazitegemea mali ulizo nazo, basi ipo siku mali hizo zitatoweka. Kama ambavyo kichana cha mapeazi kinavyojifungua na hatimaye mapeazi kutoweka ndivyo mali tunazozitegemea zinavyoweza kutoweka. Je, kichana cha mapeazi kina mapeazi mangapi? Je, kina mapeazi mia moja? Hapana, kichana hicho kina mapeazi manne au matano tu. Ndugu Wakristo wapendwa, hebu tufikirie kuhusu hilo. Je, unaweza kuishi maisha yako yote kwa kutegemea vile ulivyonavyo tu, kama vile nguvu zako, uwezo wako, afya yako, na mali yako? Nina maanisha kuwa unapaswa kuhesabu ikiwa unaweza kutekeleza mahitaji yote ya kibinadamu kwa watoto wako na kwa wazazi wako. Ndugu Wakristo wapendwa, je mnaweza kuyahesabu hayo? Haijalishi kuwa tuna mali kiasi gani, kama tutakuwa na maisha yenye msingi huo tu basi ni vema tufahamu kuwa hatutaweza kuishi. Sasa tunahitaji kitu gani? Tunahitaji kuwa na imani katika Neno la Mungu.

Kuna kitu kimoja ambacho ninataka nikukazie kwa sauti. Na kitu hicho ni kumwamini Mungu tu. Hata kama huwezi

kumwona Mungu kwa macho yako, na hata kama kuwa na imani inaonekana kama kitu kisicho na msingi, ukweli unabaki kuwa unapaswa kumwamini Mungu. Wewe mwamini Mungu tu.

Biblia inaeleza kuwa, “*Basi imani ni kuwa na hakika ya mambo yatarajiwayo, ni bayana ya mambo yasiyoonekana. Maana kwa hiyo wazee wetu walishuhudiwa*” (Waebrania 11:1-2) Hata kama hakuna ushahidi unaoonekana kwa macho, na hata kama hakuna kitu kinachoonekana cha kushika kwa mkono, ukweli unabaki kuwa tunapaswa kumwomba Mungu kwa imani: “Mungu, naomba unipatie. Ninaamini! Naomba uyashughulikie mahitaji yangu yote ya chakula, mavazi, na tatizo la nyumba katika maisha yangu. Nisaidie ili niweze kuishi maisha yenye thamani.” Ikiwa unamwamini Mungu na kumwomba msaada wake, ni hakika kuwa Mungu atajibu. Hata hivyo, ikiwa huamini na ikiwa unaendelea kuishi kwa kuzitegemea nguvu zako binafsi, mahesabu yako binafsi, basi ni hakika kuwa utakufa. Ni hakika kuwa utapoteza hata kile kiasi kidogo ulichonacho na utakuwa ombaomba halisi.

Aya inayosema “*mwenye haki ataishi kwa imani*” ina maanisha kuwa njia pekee ambayo kwa hiyo mwenye haki anaweza kuishi ni kwa imani tu. “*Mwenye haki ataishi kwa imani*” (Warumi 1:17, Waebrania 10:38). Ndugu Wakristo wapendwa, hakuna kitu kingine chochote chenye msaada zaidi ya imani inayomwamini Mungu. Ndugu Wakristo wapendwa je, mnaamini? Imani si kitu kinachowahusu wengine. Huwezi kuikuza imani yako ili umpatie mtu mwingine. Imani ni yako tu.

Tunaweza kuishi kwa kumwamini Mungu na Neno la Mungu. Mambo yanaweza kutokea kulingana na imani yetu katika Mungu na katika Neno lake. Ni jambo la muhimu sana kuliadini Neno la Mungu, kumwomba Mungu kwa imani, na kuishi hali tukifuata mapenzi yake badala ya kitu chochote kile. ☒

Yatosha Kwa Siku Maovu Yake

< Mathayo 6:34 >

“Basi msisumbukie ya kesho; kwa kuwa kesho itajisumbukia yenyewe. Yatosha kwa siku maomvu yake.”

Bwana alisema, *“Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.”* Adui mkubwa kwa wenye haki wanaoishi maisha ya imani ni hofu. Tena si hofu ya leo, bali ni hofu ihusianayo na mambo au maisha ya baadaye. Kwetu sisi wenye haki, hofu kuhusiana na maisha ya baadaye inatokana na mapungufu na udhaifu wetu. Hivyo tunaweza kusema, “Hivi ndivyo nilivyo sasa, kwa nini basi nishohie kuhusiana na ya kesho?”

Ni asili ya kawaida kuwa na hofu tunapojiangalia sisi wenyewe. Hata hivyo, ikiwa tutayaona mapungufu yetu ya leo na kisha tukajiangalia sisi wenyewe, ambao tunaonekana kutokuwa na uwezekano wowote wa kuwa na maisha mazuri ya baadaye, basi hakuna lolote tunaloweza kulifanya zaidi ya kuyahofia maisha yetu hayo ya baadaye. Hali hii inaweza kutufanya kuyakatia tamaa maisha yetu ya kiimani. Hii ni kwa sababu kwa kuwa tunafikiri kuwa tunajifahamu wenyewe vizuri na kwamba hakuna uhakika kuwa maisha yetu ya baadaye yanaweza kuwa mazuri, basi inapofikia kuwa hakuna tumaini ndipo tunapoanguka kutokana na hofu zetu. Basi hofu hizi zinaidhoofisha imani yetu kwa kina na kisha kutufanya kuangukia katika hofu mbaya—hali tukijiuliza “Je, niachane na imani yangu?”

Hata hivyo, Bwana wetu alisema. *“Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.”* Ikiwa tuna kitu chochote ambacho tunapungukiwa kwa sasa, basi tunakabiliana kila siku na kitu hicho kinachopungua kila siku. Kesho itajisumbukia yenyewe na yatosha kwa siku maovu yake.

Ni kitu gani kinatokea tunapoangukia katika hofu kwa kuyaangalia mapungufu na udhaifu wetu? Kama ambavyo chachu ndogo inavyofanya mkate mzima kuumuka, basi kwetu sisi wanadamu, na hata kwetu sisi wenye haki, mioyo yetu inafunikwa kivuli cha hofu.

Hakuna mtu asiye na udhaifu. Kila mtu ana udhaifu. Ikiwa tutajiangalia sisi wenyewe kwa asilimia 100% basi hebu tutafakari kuwa kuna mtu ambaye anahofia hali yake ya sasa na hali yake ya baadaye kwa kiwango cha asilimia 10% ndani ya ile asilimia 100%. Ile asilimia 10% katika asilimia 100% ni tatizo lakini asimilimia 90% inayobakia ni sawa. Hata hivyo, kutokana na hii asilimia 10% tuna ule mtazamo kuwa kuna mambo ambayo tunapaswa kuyahofia. Hii asilimia 10% inaizidi ile asilimia 90% kwa mawazo kuwa tunakosa au kupungukiwa kitu fulani, kuwa tu wadhaifu, na kwamba kila wakati tunafanya makosa, na kwamba hatuwezi kufanya lolote, na kwamba maisha yetu ya baadaye hayawezi kuwa mazuri. Kama matokeo ya mawazo hayo, hali hiyo inatufanya sisi kuwa watu tusioweza kufanya lolote.

Hata hivyo, kusema kweli, Bwana wetu alisema, *“Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.”* Kile ambacho Bwana alikisema hapa ni kuwa: “Je, kuna kitu chochote unachokikosa? Ikiwa una tatizo leo kutokana na kile unachokikosa, basi tatizo hilo linatosha na hupaswi kuhofia kile ambacho utakikosa hapo baadaye. Usilete matatizo ya

baadaye katika wakati uliopo na kisha utakateseka kwa kuwaza kwa kina juu ya hayo.” Bwana anasema kuwa kesho itajisumbukia yenyewe.

Kuna nini katika mafundisho haya? Tunapoyaangalia maisha yetu kwa asilimia 100% halafu kukawa na asilimia 10% ambayo inatupa hofu, basi ukweli ni kuwa tunachopaswa kukihofia ni kiwango cha siku ile ile. Kwa kweli, hii haimaanishi kuwa hakutakuwa na hofu hapo baadaye. Hii haimaanisha kuwa kuna maeneo yoyote katika maisha ambayo tuna udhaifu nayo au ambayo tunapungukiwa. Sisi sote tuna maeneo kama hayo. Hata hivyo, ikiwa udhaifu utajitokeza, basi tunatakiwa kusumbuliwa katika maeneo yale ambayo udhaifu umejitokeza kwa siku hiyo. Hakuna sababu ya msingi ya kuzileta hofu za baadaye katika wakati wa sasa kimawazo. Bwana anasema kuwa hatupaswi kuchanganyikiwa hali tukifikiri kuwa sisi ni walemavu ambao hatuwezi kufanya lolote na kisha kujikatia tamaa ati kwa sababu tu tumekatishwa tamaa kuwa hatuwezi kuishi maisha ya kiimani tena.

Wewe na mimi ni watu wenye haki. Hata hivyo, sisi si wakamilifu katika kila kitu. Kila mtu ana mapungufu na udhaifu. Tunapopata uzoefu wa hali hiyo kwa mara ya kwanza, na tunapokuwa ndio tumezaliwa tena upya, basi inakuwa ni sawa. Kwa nini? Kwa sababu bado tuna matumaini. Ni sawa kwa sababu tuna matumaini kwamba hali itabadilika. Lakini kadri tunavyozidi kuishi zaidi na zaidi katika maisha yetu ya imani basi inakuwa si sawa tena. Miili yetu haibadiliki ati kwa sababu tunaishi maisha ya imani. Hata Paulo hakuweza kusema kwamba alikuwa hana mapungufu. Isipokuwa Paulo alisema, *“Ole wangu, maskini mimi! Ni nani atakayeniokoa na mwili huu wa mauti?”* (Warumi 7:24) Tunaweza kuona kuwa hata yeye alikuwa katika hofu na madhaifu.

Kwa hiyo, tunapokiona kitu kitupacho hofu, basi hatupaswi

kuhofia juu ya maisha ya baadaye jambo ambalo linaweza kutufanya tufe kwa sababu ya mzigo wa hofu. Ikiwa tutasumbuliwa kwa sababu ya matatizo fulani au kwa sababu ya udhaifu fulani, basi tunaweza kuwa katika matatizo kutokana na tatizo lililopo kuliko kuyaacha maisha ya kiimani na kisha kufa ati kwa sababu tu tunapungukiwa. Hili ni neno la kutia moyo toka kwa Bwana. *“Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.”* Tunaweza kuwa na ujasiri tunapoliamini fundisho hili.

Sisi wenye haki, tunapaswa kuishi kwa ajili ya Mungu na haki yake. Pamoja na kuwa sisi wenye haki tuna upande hasi, yaani upande wa madhaifu ndani yetu, ukweli unabaki kuwa maisha yetu ni mazuri tunapokuwa na muungano na Kanisa la Mungu. Sisi watumishi wa Mungu tunaishi kwa ajili ya Bwana. Sisi pia tuna mapungufu mengi, hofu, and maeneo kadhaa yenye udhaifu. Hata hivyo, kama matokeo ya hilo, je, tunateseka kwa sababu ya hayo kiasi kuwa hatuwezi kusonga mbele? Kwa kweli si hivyo. Sisi tunaacha kuyahofia hayo na tunaendelea mbele kwa imani katika Neno lake.

Haijalishi jinsi tunavyoweza kujaribu kuficha udhaifu wetu, sisi tunafahamu kuwa hatuwezi kujibadili sisi wenyewe, na kwa sababu hiyo tunaweza kuyakatia tamaa maisha yetu ya kiimani. Hii ndiyo sababu Bwana wetu alisema, “Kwa nini unahofia, usihofu kuhusu kesho. Usihofie mapema kuhusu kile ambacho kinaweza kutokea kesho. Mambo kama hayo yanapotokea, na kisha ukateseka kutokana na mambo hayo, basi inatosha kuteseka kwa siku hiyo.” Hatupaswi kufa leo kwa sababu ya mambo ya kesho hali tukifikiri kuwa hatuna tumaini, na au kuyaacha maisha ya kiimani kwa sababu ya kubeba mizigo mizito ya hofu au huzuni na kisha kupoteza nguvu zetu na hatimaye kufa.

Wewe na mimi sote tuna udhaifu wa mwili. Sisi sote tuna mapungufu. Mateso ya siku moja yanatosha kwa siku na kwa

sababu hiyo hakuna haja ya kubeba mateso ya kesho kwa mara moja na kisha kufa. Tunapowatazama watu walio na dhana ya ukamilifu, wakati fulani tunaona kuwa wanaweka matarajio katika hali ya baadaye na kisha wanaikatia tamaa njia au mapito ambayo hawajawahi kuyapita. Watu hao wanajitazama wao wenyewe na kisha wanajihesabu kama hivi: “Mimi ni mtu wa jinsi hii. Kwa kweli sistahili kuifanya kazi ya Bwana na sistahili katika Ufalme wa Mungu. Na si asili yangu kuishi maisha ya imani.” Hofu hii ya asilimia 10% inaweza kuwafanya wao kukata tamaa na hatimaye kuyaacha maisha yao ya kiimani hali wakisema, “Mimi sistahili kwa kazi hiyo, na kwa sababu hiyo nitaachana na maisha yangu ya kiimani.”

Hivyo unapaswa kutambua kuwa huu ni mpango wa Ibilisi. Usiangukie katika hofu kama hizo, Bwana alituambia, “*Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.*” Pamoja na kuwa sisi si watu wakamilifu katika mwili, na kwa kuwa Yesu amezitoweshea mbali dhambi zetu zote, basi tunachopaswa kukifanya ni kuteseka kutokana na matatizo yaliyopo muda hadi muda. Ikiwa kuna kitu ambacho kinatulazimu kuteseka, basi inatosha kabisa kuteseka kwa siku hiyo husika. Kwa kweli nyakati nyingine hatuwezi kufanya lolote zaidi ya kujisikia upweke kwa sababu ile asilimia 10% ya hofu inazizidi asilimia 90% zilizosalia za maisha yetu ya kiimani. Lakini ni lazima tuzitoweshee mbali cheche za hofu kabla hazijawasha moto mkubwa unaoweza kuiunguza imani yetu. Ni lazima tukiri kuwa Yesu aliuchukua udhaifu na mapungufu yetu yote pamoja na dhambi zetu zote wakati alipobatizwa na Yohana Mbatizaji.

Ni lazima tusikilize kwa makini jinsi Biblia inavyosema katika Mathayo 6:34. Kila mmoja wetu sisi wenye haki ambaye anafikiri kwa kina kuhusu maisha yake ni lazima ayasikilize kwa umakini mafundisho ya Yesu. Ni lazima tufikirie kwa makini juu

ya kile ambacho Yesu anakisema kuhusu kutokuwa na hofu kwa ajili ya kesho. Hakutakiwi kuwa na mambo kama ya kujiangalia binafsi na kisha kuihofia kesho na hatimaye kuyaacha maisha ya kiimani. Ikiwa leo tunapungukiwa, basi tunateseka kidogo leo hii, na ikiwa kutakuwa na kitu ambacho kinapungua hapo kesho, basi tutateseka hapo kesho. Hatupaswi kuwa kama mtu wenye dhana ya ukamilifu, ambaye anafikiri kuwa “Aah, hapana. Ni muhimu sana kwangu kumfuata Yesu,” na kisha anajiua kama Yuda alivyofanya, na hivyo kuwa Mkristo mjinga au mtu wa Mungu mjinga. Je, unaelewa ninachokisema?

Kusema kweli, je, kuna maeneo ambayo unahofia kuhusu maisha ya baadaye au kuhusu kesho? Ndiyo, kwa kweli yapo maeneo kama hayo. Na jambo kubwa katika hayo ni kule kujitazama sisi wenyewe na kisha kuhofia. Kwa kuwa sisi ni watu, na hasa wenye haki miongoni mwa watu hao basi tunajikuta tukihofia sana. Ikiwa tunahofia kuhusu kesho, basi kwa kweli tutakufa kiroho. Tutakufa sasa. Kwa kweli kufa leo hii hata kabla hatujiishi hiyo kesho ni ujinga hasa.

Kinachoikwaza imani yetu ni hofu ya ulimwengu. Ni kule kuhofia kuhusu kesho. Ni hofu ambazo tunakuwa nazo sisi wenyewe hali tukiwa tumezificha katika mioyo yetu pasipo kumweleza yoyote yule. Hofu kuhusiana na madhaifu na mapungufu yetu ya leo, na ule uwezekanao wa kujirudia kwa hofu hizo kesho inatufanya sisi kuanguka. Je, tutaubeba mzigo peke yetu na kisha kufa peke yetu hali tukisema, “siwezi kumweleza yeyote kuhusu hili”? Kwa kweli hayo si mapenzi ya Mungu.

Sisi ni wasafiri tunaokwenda katika Ufalme wa Mungu. Petro pia aliwaita wasafiri hao kuwa ni watakatifu “*wapitaji na wasafiri*” (1 Petro 2:11). Sisi ni wapitaji na wasafiri kwenda katika Ufalme wa Mungu ambao tunaishi hapa duniani kama vile upepo unavyopita. Msafiri anapata shida kwa wakati fulani hadi wakati mwingine, na siku hadi siku. Hatuwezi kuwa wasafiri

ikiwa tutakuwa na hofu kuhusu ‘ni wapi nitakwenda kulala, wapi nitakwenda kupumzika.’ Si busara ikiwa tutayaleta mateso yetu ya baadaye mapema katika wakati wa sasa na kisha kuteseka kwa ajili ya hayo mara moja na kufa. Ni lazima tupige kelele katika mioyo yetu, *“Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.”*

Ni lazima tukiri kwa imani tukisema, “Ni kweli. Mafundisho ya Bwana wetu ni ya Kweli. Ndivyo ilivyo. Bwana wetu alinifundisha kuwa wakati mateso yanapokuja, basi ni lazima nikabiliane nayo siku kwa siku na si busara kuyaleta mateso ya baadaye na kisha kuyateseka katika wakati wa sasa. Ni kweli, kama Bwana anavyofundisha, ninapaswa kuteseka siku kwa siku, na ikiwa Mungu ataruhusu mateso yoyote kunijia, basi nitatakiwa kuteseka katika ile siku ambayo Mungu ameiruhusu.”

Hatufahamu yatakayotokea kesho, na hatujui kuwa mateso hayo yatakuwa ni magumu kiasi gani hata kama yatakuwa ni makubwa kiasi gani. Hofu inaweza kuinuka siku kwa siku, lakini ninatumaini kuwa huzui mapenzi ya Mungu kwa sababu ya hofu kama hizo. Sisi watu wenye haki tunaishi kwa kufuata mapenzi ya Mungu kwa takribani asilimia 90%. Ni takribani asilimia 10% ndani yetu ambayo ndiyo imezikwa katika hofu zetu. Kila mtu amezikwa katika hofu zake walau kwa asilimia 10%. Hivyo, hatupaswi kuuawa kwa sababu ya hiyo asilimia 10%. Hatupaswi kujiua kwa sababu ya asilimia hiyo. Imeandikwa kuwa, *“Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.”* Je, una hakika kuwa inakutosha kuteseka kwaajili ya shida au mateso ya leo tu? Ndiyo, sisi tuna hakika hiyo.

Wapendwa Wakristo, je, mna mateso? Je, mna hofu? —Ndiyo.— Ikiwa tuna mateso leo hii ni lazima tuteseke kwa siku hiyo tu. Baada ya hapo inatosha na imekwisha. Kesho ni siku mpya. Ninayasema haya kwa watakatifu wote na kwa watumishi

wote wa Mungu wakike na wa kiume: Bwana ametuambia kuwa, “Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.” Ukweli huu ni mkubwa kiasi gani? Uhakika huu ni wa thamani sana!

Ikiwa Bwana wetu angelikuwa hajasema hili, basi tungelikuwa bado tumefungwa na madhaifu yetu ya sasa na pengine hata kufa kutokana na hofu inayozidi kwa kuyafikiria madhaifu yetu ya baadaye hali tukisema “Ni lazima nifanye jambo hilihili hapo baadaye.” Hii ni sawa na ule mtazamo wa mabaya ambao Yuda Iskariote alikuwa nao. Yuda aliona wazi kuwa Yesu alikuwa amehukumiwa, na hivyo akavitupa vile vipande thelathini vya fedha katika hekalu na kisha akaenda kujinyonga, akisema, “Mimi ni mtu ambaye nilipaswa kufa kama hivi.” Je, alionekana kuwa mwenye heri kwa hilo? Hapana! Hayo si mapenzi ya Mungu wetu.

Kujiua mwenyewe ati kwa sababu ya jukumu au jambo ambalo umelifanya si njia pekee ya kuonyesha utii wako mbele za Mungu. “Yatosha kwa siku maovu yake.” Maisha yetu ni yenye shida na yasiyo kamili. Na hivyo ndivyo yalivyo maisha yetu. Ikiwa tunastahili kuteseka ati kwa kuwa sisi si wakamilifu, basi tunachopaswa kukifanya ni kuteseka kwa kitambo tu wakati pale mapungufu yetu yanapojitokeza. Ninaamini huwezi kuwa miongoni mwa wale wanaoteseka mapema na kisha kufa au kuiacha imani yao kwa sababu tu ya kuhofia mambo au maisha ya baadaye.

Hatupaswi kuwa mabwana wa nafsi zetu. Bwana wa nafsi zetu ni Mungu tu. Ni sahihi kusema kuwa kadri tunavyozidi kuishi maisha ya imani, ndivyo tunavyozidi kuyaona mapungufu yetu. Hata hivyo, hatupaswi kuhofia juu ya yale yanayoweza kutokea kwa upande wetu hapo kesho. Kesho ni kesho na leo ni leo.

Haya ndiyo ninayoweza kukushirikisha. Ikiwa ulikielewa kitu kimoja, basi ninaamini kuwa mahubiri yangu yamekuwa

na mafanikio. Hii ndiyo sababu ninayarudia mafundisho yale yale tena na tena katika mahubiri.

Kusema kweli, sisi ni wale ambao hatuwezi kufanya lolote zaidi ya kufa kwa sababu ya hofu zetu za baadaye. Ikiwa tutakuwa katika mawazo yetu ya kimwili, basi wewe na mimi hatuwezi lolote zaidi ya kuwa viumbe wa jinsi hiyo. Hata hivyo, Bwana wetu ametuokoa sisi tulio kama hao kwa Neno lake la maji na Roho. Na anatutia nguvu akisema, “*Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.*” Bwana ametuokoa toka katika hofu zetu na mapungufu yetu. Bwana ametuokoa wewe na mimi. Wapendwa Wakristo, je hii si kweli? —Ndiyo.—

Wale wanaoyakatia tamaa maisha yao ya kiimani ni wale ambao wanaangalia kile kinachoweza kutokea kesho na kisha wanapata hofu mapema na kisha kuyaacha maisha yao ya kiimani. Kuna uwezekano mkubwa kuwa watu wa jinsi hiyo wanaweza kuongezeka. Hii ndiyo sababu Bwana wetu anasema hivi. “*Basi msisumbukie ya kesho; kwa kuwa kesho itajisumbukia yenyewe. Yatosha kwa siku maovu yake.*” Ni lazima tuteseke leo hii kwa jambo ambalo ni la muhimu kwetu sisi kuteseka leo hii. Hakuna hata mmoja ambaye hana mateso yoyote, na Bwana Mungu ametufanya sisi kuwa wenye haki ambao tunaweza kuyashinda mateso yetu yote kwa imani. Haijalishi kuwa mateso yanatoka wapi, ikiwa yanatoka ndani ya mapungufu yetu au ikiwa ni mateso ambayo Bwana ameyaruhusu, basi kinachotakiwa ni kuteseka kutokana na mateso hayo kwa siku ile husika, na kwa sababu hiyo hakuna haja ya kuhofia mateso ya baadaye. Hii ni imani. Bwana wetu aliyachukua madhaifu yetu yote. Mungu ametuokoa toka katika dhambi zetu zote na toka katika hofu zetu zote. Tunapomwamini na kumfuta Bwana, basi tunaona kuwa hakuna kabisa hofu, mashaka, woga, au huzuni.

Ikiwa tusingekuwa na mafundisho haya leo hii, basi kuna uwezekano mkubwa kwamba katika maisha yetu ya kiimani tungelisema, “Aah, ninakata tamaa sasa hivi. Aah nitakufa sasa hivi!” Utakapokaribia wakati wa kuja kwa Bwana, nina hakika kuwa tutawaona watu wengi wa jinsi hiyo. Kwa kuwa matarajio ya wakati huo yanamfanya kila mtu kuyafunua mapungufu yake. Hofu yetu inaongezeka kwa sababu ya ulimwengu kuwa katika hali ya vurugu na ugumu wa kuishi katika ulimwengu huu, lakini hupaswi kuhofia hofu za kesho mapema leo hii na kisha kufa leo hii. Ninatumaini kuwa utafanyika kuwa yule anayehofia mambo ya kesho hapo kesho iyo hiyo. Pia ninatumaini unaamini kuwa yatosha kwa siku maovu yake.

Mateso na hofu havidumu milele. Kinachodumu milele kwetu sisi ambao tumepokea ondoleo la dhambi ni Bwana, wokovu na Ufalme wa Mbinguni. Hofu ni za muda na hazidumu. Kama siku inavyoweza kuwa yenye hali ya hewa ya wazi, au yenye mawingu, mvua, au jua, basi sisi nasi hatuwezi kuwa wakati wote wa kidunia au wa kiroho. Pamoja na kuwa tuna mapungufu, ukweli ni kuwa sisi tunayafuata mapenzi ya Mungu. Yesu amekwisha yashughulikia mapungufu yetu yote. Hivyo, ninaamini kuwa utaishi kwa imani kwa kufuata mafundisho ya Bwana. Tunamshukuru Bwana kwa kutupatia mafundisho ya jinsi hiyo ili kwamba tusiweze kuangukia katika hofu kama hizo. Kwa kweli mafundisho haya ni mazuri mno kwetu sisi tunaishi katika siku hizi za mwisho, tunashukuru sana.

Sisi tuna mateso kila siku, lakini mateso ya siku moja yanatosha kwa siku hiyo. Na ni lazima tuishi kwa ajili ya kazi ya Mungu iliyobarikiwa kila siku kwa kuamini kuwa anatupatia nguvu mpya kila siku ili kuweza kuyashinda matatizo yote na shida zote ambazo zinatuzuia tusifanye kazi kwa ajili ya injili.

Halleluya! ☒

SURA YA

7



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Ni Lazima Tuingie Kwa Kupitia Mlango Mwembamba Kwa Kuamini Katika Nguvu ya Injili

< Mathayo 7:13-14 >

“Ingieni kwa kupitia mlango ulio mwembamba; maana mlango ni mpana na njia ni pana iendayo upotevuni, nao ni wengi waingiao kwa mlango huo. Bali mlango ni mwembamba, na njia imesonga iendayo uzimani, nao waionao ni wachache.”

Katika kifungu cha leo cha maandiko, Bwana wetu alituamuru “kuingia kwa kupitia mlango mwembamba.” Je, huo mlango mwembamba ambao Yesu anatuambia tuingie kwa kupitia huo ni upi? Na je anaposema juu ya mlango mpana ana maanisha nini? Sisi sote inatupasa sasa kutembea katika njia yenye magumu. Ili kufanya hivyo, inatupasa kuamini katika injili ya maji na Roho kwa juhudi zaidi, na ni lazima tutembea kwa imani katika Neno la Mungu. Kwa hakika, tunaweza kuuacha mlango mwembamba na kisha kuuendea mlango rahisi, yaani ule mpana, lakini tunapaswa kutofanya hivyo kwa kuwa Bwana ametueleza sisi kuingia kwa kupitia mlango mwembamba na wenye ugumu.

Kuna watu wengi katika ulimwengu huu ambao hawapendi kuingia kwa kupitia mlango mwembamba na wenye magumu. Kwa sababu njia inaonekana kuwa ni nyembamba sana, ngumu, na yenye hatari kwao, na ni wachache tu ndio wanaofanikiwa kuiona, walio wengi hawapendi kuingia katika njia hiyo na wanafikiri kuwa mtu yeyote anayeifuata njia hiyo ni mjinga. Hata hivyo, imani ya jinsi hiyo si imani ya mwamini aliye na busara.

Hekima inayomwongoza mtu kwenda katika uzima inapatikana katika mlango mwembamba. Wale walio katika mlango huu na wanaouelekea uzima ndio wenye busara hasa. Hivyo watu wa jinsi hiyo hawasiti kuingia katika njia hii ingawa wanaweza kuwa ni wachache tu. Ni kweli kuwa katika ulimwengu huu kuna watu wengi wasiopenda kuingia katika mlango huo mwembamba, pamoja na ukweli huo ni wazi kuwa wapo watu ambao wanaingia katika mlango mwembamba. Ingawa idadi yao inaweza kuwa ndogo sana, ukweli ni kuwa wapo watu wengi wanaoutafuta mlango mwembamba na wanaofurahia kutembea katika njia hiyo nyembamba. Ili kwamba kila mtu aweza kuokolewa toka katika dhambi ni lazima aingie katika mlango huo na apite katika njia nyembamba.

Njia Nyembamba Ni Njia ya Kweli, Njia Iendayo Katika Uzima wa Milele

Kuna watu wengi sana katika ulimwengu huu wasio na idadi wanaokiri kumwamini Yesu, lakini ukweli ni kuwa wengi wao wanatembea katika njia pana kutokana na kushindwa kwao kutambua kuwa Yesu alizichukua katika mwili wake dhambi zote za ulimwengu kwa kubatizwa na Yohana Mbatizaji. Wale wanaotembea katika njia nyembamba

wanafahamu kuwa wapo katika njia sahihi kuelekea katika uzima wa milele, kwa kuwa wanaamini katika kweli kuwa ubatizo wa Yesu ulizichukulia mbal idhambi zao mara moja na kwa wote.

Lakini ni nani miongoni mwa Wakristo wa ulimwengu huu anayelifahamu fumbo hili la mlango mwembamba na na njia ngumu? Hata wanaojiita Wainjili wa nyakati za sasa hawafahamu kuwa Yesu alizichukua katika mwili wake dhambi zote za ulimwengu kwa kupitia ubatizo wake alioupokea toka kwa Yohana Mbatizaji. Umuhimu wa ubatizo wa Yesu ni kuwa unabeba ukweli wa kushangaza kuhusu wa wokovu, ambao ni ni kwamba Yesu alizibeba dhambi za ulimwengu na kisha akasulubiwa kwa ajili yetu.

Hata hivyo, kuna Wakristo wengi wa majina ambao wanamwamini Yesu kana kwamba wanatekeleza moja kati ya dini nyingi za ulimwengu huu ambao wanafikiri kuwa Yesu alizisamehe dhambi zao zote alipokuwa pale Msalabani—Wakristo wa jinsi hiyo wanafahamu kuwa dhambi zao zinabaki kama zilivyo katika mioyo yao. Miongoni mwa wale wanaojiita Wainjili wanadai kuwa mtu anaweza kuwa hana dhambi ikiwa tu ataamini kuwa Yesu ni Mwokozi. Wanadiriki hata kutudhihaki wakisema, “Tunachopaswa kukifanya ni kumwamini Yesu kuwa ni Mwokozi wetu. Na kwamba ni kwa nini tuamini katika injili ya maji na Roho?” Wao wanasisitiza kuwa ni sahihi kwa wao kuamini kuwa hawana dhambi na kwa sababu hiyo wanakataa kuamini injili ya maji na Roho. Lakini kusema kweli, wanatembea katika njia pana ya ulimwengu hali wakiwafuata watu wengi wa kidunia na Ukristo uliofanywa kuwa wa kidunia.

Ikiwa Bwana amezungumza nasi kuhusu injili ya maji na Roho, basi tunapaswa kuwa na shukrani kwa kule kuipokea nguvu ya ondoleo la dhambi kwa kuamini katika injili ya

wokovu kama ilivyo. Tunapoiamini na kuieneza injili ya maji na Roho basi tunakuwa tukitembea katika njia nyembamba na ngumu. Wale wanaotembea katika njia nyembamba ni lazima wawasaidie wale walio katika njia pana ili waweze kumrudia Mungu na kumfuata. Haijalishi mazingira ambayo waamini wa injili ya maji na Roho wanaweza kuwa nayo, lakini kwa kuwa Bwana mwenyewe amewaeleza kupitia katika mlango mwembamba, basi wanapaswa kupita katika njia hiyo nyembamba kwa imani.

Kwa kuwa Wakristo wengi wamefanya mapatano na watu wa ulimwengu huu ili kutembea katika njia pana, basi inawezekanaje kwa Wakristo hao kupokea ondoleo la dhambi katika mioyo yao? Pamoja na kudai kuwa wanamwamini Yesu kuwa ni Mwokozi wao, Wakristo wa jinsi hiyo wanaoishi maisha yao hali wakiwa na mapatano na watu wa ulimwengu huu wana dhambi katika mioyo yao, na pia wanatembea katika njia pana ili hatimaye kuyafikia maangamizi yao.

Mtume Paulo alisema, *“Hamfahamu ya kuwa sisi sote tuliobatzwa katika Kristo Yesu tulibatizwa katika mauti yake?”* (Warumi 6:3). Pia alisema, *“Lakini mtu awaye yote asipokuwa na Roho wa Kristo, huyo si wake”* (Warumi 8:9). Matokeo ya kumwamini Yesu kuwa ni Mwokozi ni kuokolewa toka katika dhambi, kufanyika wasio na dhambi, na kuwa na Roho Mtakatifu katika moyo.

Pamoja na kuwa Roho Mtakatifu hawezi kuonekana kwa macho yetu, Yeye Roho Mtakatifu ni Roho ya Kweli ishukayo kwa wale wote wanaoamini katika injili ya maji na Roho iliyotolewa na Yesu. Na jukumu la Roho Mtakatifu ni kushuhudia kwa waamini kama hao juu ya injili ya maji na Roho hali akiwathibitishia kuwa, *“Bwana amekuokoa kikamilifu toka katika dhambi zetu zote kwa kupitia injili ya maji na Roho. Hivyo kwa sababu hauna dhambi.”*

Yeye ni Roho anayelishuhudia Neno la Kweli katika mioyo ya waamini wa injili ya maji na Roho, na kwa sababu hiyo haiwezekani dhambi kuonekana ndani ya mioyo ya waamini hao wa injili ya maji na Roho. Roho Mtakatifu anakaa katika mioyo ya waliozaliwa tena upya, na pia anazifanya akili zao kuwa na shuhuda kamilifu za wokovu. Kwa maneno mengine, Roho Mtakatifu anashuhudia kuwa dhambi zote za ulimwengu huu zilipitishwa katika mwili wa Yesu wakati alipobatizwa na Yohana na Mbatizaji. Roho Mtakatifu anawatia nguvu wale wanaopita katika njia nyembamba hali akiwapa imani, na huku akiwaongoza na kuwafundisha katika mambo yote kwa Neno la kweli, na pia anawashikilia. Roho Mtakatifu anaziimarisha nafsi zetu, akili zetu, na miili yetu kwa kutukumbusha juu ya injili ya Neno la maji na Roho. Kwa ufupi, Roho Mtakatifu anashuhudia kuwa Yesu alibatizwa na alikufa Msalabani kwa ajili yetu.

Wale Wanaoamini na Kufuata Injili ya Kweli Ndio Wale Wanaotembea Katika Njia Nyembamba

Wale wanaotembea katika njia nyembamba ni makuhani wa kiroho ambao wanawakomboa wale walioangukia katika maangamizi kutokana na dhambi zao. Wao ni waamini halisi wa injili ya maji na Roho. Bwana anafurahishwa na watu wa jinsi hiyo walio katika njia nyembamba na ngumu. Haijalishi jinsi njia hii ya wenye haki inavyoweza kuwa ngumu, lakini kwa kuwa ni njia inayowaokoa wengine toka katika dhambi zao, basi ni lazima tuiptie njia hiyo. Pia ni lazima tuitumikie injili usiku na mchana ili kuwaokoa wote ambao hawajapokea ondoleo la dhambi zao. Kwa maneno mengine, wale ambao bado wapo katika njia pana wanatakiwa kuongozwa na sisi ili

na wao waweze kuingia katika mlango mwembamba. Wale watu wanaotembea katika njia pana ni lazima wakumbuke kuwa pamoja na kuwa njia hiyo pana inaweza kuwa ni yenye raha kwao, ikiwa wataendelea kuifuata basi ni dhahidi kuwa wataishia katika njia ya maangamizi.

Wale wanaotembea katika njia pana ndio hao Wakristo wanafiki ambao wamepatana na watu wa dunia hii na kwa kwa sababu hiyo wanatembea katika njia ya maangamizi yao wenyewe. Ndio wale wanaosimama kinyume na injili ya maji na Roho hali wakidai kuwa ni haki kwao kuwa na dhambi pamoja na kuwa wanamwamini Yesu.

Je, Bwana wetu alisema nini kuhusu watu kama hao ambao wapo katika njia pana? Yesu alisema, *“maana mlango ni mpana na njia ni pana iendayo upotevuni, nao ni wengi waingiao kwa mlango huo.”* Kwa lugha nyingine, kuna Wakristo wengi ambao dhambi zao zimebakia kama zilivyo na kwa sababu hiyo wanaangukia katika maangamizi yao pamoja na kuwa wanakiri kumwamini Yesu, hii ni kwa sababu wameshindwa kuifahamu injili ya maji na Roho. Lakini hii imani potofu waliyonanyo ndiyo inayowavutia watu na ndiyo njia yao pana ya maangamizi ambao watu wengi wanaifuata.

Wao wanafundisha kuwa kitu ambacho Wakristo wanapaswa kukifanya ni kuwa wema. Lakini mafundisho ya jinsi hiyo ni uongo mkuu ambao unapishana kabisa na ukweli. Aina hii ya mafundisho ni tofauti kabisa na injili ya maji na Roho ambayo imetufanya sisi kuwa wasio na dhambi. Pamoja na ukweli huu, watu wa ulimwengu huu wanaiona imani ya wale wasioamini katika injili ya maji na Roho kuwa ni ya kuvutia. Pamoja na kuwa Wakristo hao wa mazoea hawajapokea ondoleo la dhambi zao hata pale wanapokuwa wakihudhuria kanisani, lakini pamoja na hayo bado wanakubaliwa na watu wa kidunia ili mradi tu wakiishi kwa wema. Lakini Mungu haithibitishi na

kuikubali imani ya jinsi hii.

Hivyo, sisi ambao tumechagua njia nyembamba tunayaishi maisha yetu katika Kanisa la Mungu ambalo linaihubiri injili ya maji na Roho, Neno lake, na kufuata mapenzi yake. Tumeisikia na kuliadini Neno la injili ya maji na Roho, na kwa sababu hiyo tumeokolewa toka katika dhambi zetu zote na kufanyika tusio na dhambi mara moja na kwa wote. Na baada ya kuokolewa toka katika dhambi zetu, sisi tumefanyika kuwa wafanyakazi wa Mungu tunaoziona nafsi nyingine katika njia ya uzima. Hivyo, tumefanyika kuwa wale wanaotembea katika njia nyembamba na ngumu.

Hata hivyo, Wakristo wengi hawamwamini Yesu kwa lengo la kuoshwa dhambi zao na kuwa safi, wala hawataki kuwa wenye haki. Kwa kweli inataabisha kuona kuwa aina hiyo ya imani inazidi kuenea sana huku wale wanaoiunga mkono wakitembea kwa majivuno katika njia pana ya kidunia. Wanazipiga pembe zao huku wakijihesabia kuwa ni wenye busara. Hawatambui kuwa ni makosa kutembea katika njia pana, lakini kwa ujasiri kabisa wanaendelea kuwakana na kuwaona waliozaliwa tena upya ambao wanatembea katika njia nyembamba kuwa ni wajinga.

Hata viongozi wa Kikristo hawatambui kuwa wanatembea katika njia pana bila hata wao kutambua. Kilicho muhimu kwao ni kutambuliwa na watu wengine na kupata heshima ya kidunia, na kwa bahati mbaya, imani yao inawavutia na kuwavuta watu wengi kama vile mwanasiasa anavyoweza kuwavuta wapiga kura wengi. Wanafahamu vizuri kitu ambacho watu wanataka kuwa navyo. Mara nyingi wanasema yale ambayo yanawavutia watu kuliko yale yanayomvutia Mungu. Wao ni walimu wa uongo na watumishi wa Shetani. Watumishi wa kweli wa Mungu hawawezi kufanya yale ambao walimu hawa wa uongo wanayafanya. Kama Mtume Paulo

alivyosema, *“Maana, sasa je! Ni wanadamu ninaowashawishi, au Mungu? Au nataka kuwapendeza wanadamu? Kama ningekuwa hata sasa nawapendeza wanadamu, singekuwa mtumwa wa Kristo” (Wagalatia 1:10).*

Kwa hiyo tuna sababu zaidi kuiachilia mbali imani ya kidunia na kisha kuifuata injili ya maji na Roho inayotuongoza kwenda katika njia nyembamba ambayo inamfurahisha Bwana wetu. Ili kufanya hivyo ni lazima tuamini kuwa injili ya maji na Roho ni ukweli unaotuweka katika njia nyembamba na tunapaswa kuifuata njia hiyo nyembamba. Ili tuweze kuiweka imani yetu katika Neno hili la ukweli lililoandikwa basi tunapaswa sisi sote kuifuata njia hii. Ni lazima wafahamu ni kwa nini Bwana wetu alituaambia kuingia kwa kupitia mlango mwembamba na kisha waifuate njia nyembamba. Ni lazima watambue ni kwa nini Bwana alisema kuwa njia nyembamba iendayo kwenye uzima ni ngumu, na ni lazima waifuate na kuitumikia injili ya maji na Roho.

Sisi ambao tumezaliwa tena upya tumeshaingia katika mlango mwembamba kwa kuwa tunaamini katika injili ya maji na Roho. Pia sisi tunatembea katika njia nyembamba hali tukiwa na injili ya maji na Roho.

Wenye haki wanaoamini katika injili ya maji na Roho hawawezi kuingia katika njia pana kwa kuwa imeandikwa, *“Msiipende dunia, wala mambo yaliyomo katika dunia. Mtu akiipenda dunia, kumpenda Baba hakumo ndani yake. Maana kila kilichomo duniani, yaani, tamaa ya mwili, na tamaa za macho, na kiburi cha uzima havitokani na Baba, bali vyatokana na dunia. Na dunia inapita, pamoja na tamaa zake, bali yeye afanyanye mapenzi ya Mungu adumu hata milele” (1 Yohana 2:15-17).*

Ninatoa shukrani zote kwa Bwana wetu ambaye ametuweka katika njia nyembamba. ☒

Tutafanya Nini Ikiwa Tutaachwa na Bwana Siku ya Mwisho?

< Mathayo 7:21-23 >

“Si kila mtu aniambiaye, Bwana, Bwana, atakayeingia katika ufalme wa mbinguni; bali ni yeye ayafanyaye mapenzi ya Baba yangu aliye mbinguni. Wengi wataniambia siku ile, Bwana, Bwana, hatukufanya unabii kwa jina lako, na kwa jina lako kutoa pepo, na kwa jina lako kufanya miujiza mingi? Ndipo nitawaambia dhahiri, Sikuwajua ninyi kamwe; ondokeni kwangu, ninyi mtendao maovu.”

Kila mtu aliyezaliwa katika ulimwengu huu amefungwa kuangukia katika mapenzi angalau mara moja. Na hivi ndivyo mwanamke na mwanamume wanavyofikia kuwa wamoja katika ndoa. Lakini kwa watu wengi kuna aina ya upendo ambayo inaitwa upendo usiolipizwa. Kwa maneno mengine, kuna upendo wa upande mmoja ambao haujishughulishi kufahamu kuwa mwingine anajisikia vipi na kwamba nia yake ni nini hasa. Kwa kweli aina hiyo ya upendo inazaa matunda makamilifu mara chache; lakini mara zote, inaishia kuwa ni aina ya upendo wa upande mmoja ambayo inamnufaisha mtu mmoja peke yake. Katika mazingira kama hayo, upendo wa jinsi hiyo husahaulika baada ya muda fulani na hubakia kama kumbukumbu iliyopita ya muda mrefu, lakini kuna upendo

mwingine unaoitwa upendo wa kunyemelea ambao ni mbaya kuliko upendo usiolipizwa. Hawa ni watu ambao wamejazwa na suala la upendo wao binafsi bila kujalisha jinsi wanavyokataliwa mara kwa mara. Katika mazingira mbalimbali mtu wa jinsi hiyo anaweza kufikia hatua ya kumuua hata yule anayempenda.

Hawa wanyemeleaji huwa wanafikiri kuwa mtu mwingine anawapenda wao wakati ukweli si hivyo. Watu hawa wanaugua aina fulani ya ugonjwa wa akili.

Katika upendo, nia au mapenzi ya kila mmoja ni ya muhimu sana kama vile sauti ya kupiga makofi inavyotokea kwa mikono yote miwili kushiriki. Kumpenda mtu mmoja kwa nguvu sana lakini kwa ajili yake tu si upendo ulio sahihi. Ikiwa upendo usiolipizwa hauna maana kiasi hiki kati ya wanadamu, itakuwaje basi kwa ule upendo ambapo mwenye dhambi anajaribu kumpenda Mungu kiholela na kifedhuli?

Mungu alitueleza kuwa anampenda kila mtu sawasawa. Mungu anawapenda na kuwabariki wale wanaolielewa pendo lake kiusahihi na wanaoupokea upendo huo kwa shukrani na kwa imani. Mungu anawaletea wokovu toka katika dhambi bila masharti. Hata hivyo, kwa wale ambao wanashindwa katika hili, basi Mungu anawaletea ghadhabu yake na kuwakemea. Sababu ya Mungu kufanya hivi ni kwamba ule upendo wa mtu aliyeshindwa ni upendo wenye dosari mbele za Mungu. Katika Mathayo Mungu alisema kuwa hawafahamu watu wa namna hiyo.

Wakati watu walipomwambia, “Bwana, Bwana, je, hatukufanya unabii kwa jina lako, na kwa jina lako kutoa pepo, na kwa jina lako kufanya miujiza mingi?” Bwana aliwatangazia kuwa, “*Sikuwajua ninyi kamwe; ondokeni kwangu, ninyi mtendao maovu!*” (Mathayo 7:23).

Hebu tutafakari kwa muda kile ambacho kitatokea wakati

wale wasioamini katika injili ya maji na Roho watakapokwenda mbele za Mungu hali wakiwa na dhambi zao kamilifu. Watamweleza Bwana kana kwamba wanamweleza mwanadamu mwingine. Hebu tuyawazie mazungumzo yatakavyokuwa kati ya watu hao na Bwana Yesu katika kifungu kinachofuata.

“Bwana habari yako? Wakati nilipokuwa nikiishi duniani, mara zote nilifikiria kuwa wewe ni mzuri, lakini ni heshima sana kufikia hatua ya kukuona jinsi ulivyo. Asante sana Bwana. Umeniokoa kama hivi. Ingawa ninaweza kuwa na vijidhambi vidogo lakini kwa kuwa ninakuamini, basi mimi nina hakika kuwa nimeokolewa. Sasa, nitaelekea katika mahali pazuri ambapo umepaandaa kwa ajili yangu. Kwa heri tutaonana baadaye.” Basi mtu huyu atakapokuwa akijaribu kuondoka mbele ya uwepo wa Mungu, Mungu atamwita kwa kuwa ana maneno machache sana ya kumwambia.

“Subiri! Wale walio na dhambi hawawezi kwenda mahali pale pazuri!”

“Sawa, ni kweli kuwa bado nina dhambi, lakini nafikiri ninaweza kwenda pale kwa kuwa ninamwamini Yesu kuwa ni Mwokozi wangu.”

“Hapana, utaratibu hauko hivyo! Bado una dhambi ndani yako?”

“Ndiyo, bado nina dhambi.”

“Sasa unawezaje kudiriki kwenda mahali ambapo nimepaandaa kwa watu wasio na dhambi tu? Hima! Mtupeni mtu huyu katika moto usioisha ili ateseke milele! Kabla haujatupwa kwenye moto unapaswa kuzikiri dhambi zako kwanza.”

Kisha mtu huyo anaanza kuzikiri dhambi zake ambazo alizifanya hapo kabla kwa kinywa chake bila kusita akisema, “Ni kweli, nilipokuwa nikiishi katika ulimwengu uliopita nilitenda dhambi hizi na hizi...”

Ndipo Bwana anamwambia, “Sawa, inatosha. Kwa kweli unastahili kabisa kwenda kuzimu. Kwa kuwa una dhambi basi nenda kuzimu mahali ambapo panamfaa mtu kama wewe.”

“Kwa nini? Lakini kule ulimwenguni nilikuwa ninakuamini! Nilifanya unabii kwa jina lako! Niliwashuhudia watu wengi! Niliuza nyumba yangu ili niweze kukutumikia; niliwasaidia sana yatima; nilikwenda kila sala ya asubuhi kwa jitihada; niliwaponya wagonjwa wengi sana; nilifunga kwa ajili yako na kujitoa mhanga kwa ajili yako!” hadi kufikia hapa yule mtu hali akifikiri kuwa Mungu hajamfanyia haki atakuwa akiyasaga meno yake kwa hasira kana kwamba meno hayo yanabomoka na kuvunjika—tunaweza kuipata picha jinsi meno yanayosagwa yatakavyokuwa yakitoa sauti huko kuzimu! Lakini ukweli ni kuwa wenye dhambi wote bila kujalisha ikiwa wanamwamini Yesu au la, ikiwa hawatamwamini Yesu kwa kupitia ukweli wa injili ya maji na Roho, basi watu hao wote watatupwa katika moto wa milele.

Katika Yeremia 17:1, Mungu alisema, “*Dhambi ya Yuda imeandikwa kwa kalamu ya chuma, na kwa ncha ya Almasi; imechorwa katika kibao cha moyo wao, na katika pembe za madhabahu zenu.*” Jina Yuda lina maanisha kabila ya kifalme kati ya Waisraeli, na Mungu alitumia jina hili akimaanisha watu wote wa Israeli. Lakini pia jina hili lina maanisha kuwa ni wanadamu wote kama vile Biblia inavyosimama mwakilishi wa Kanuni; kwa mfano, Adamu anatajwa kuwa ni mwakilishi wa wanadamu (Warumi 5:18).

Almasi ni aina ya madini ambayo ni ngumu kuliko kitu chochote duniani. Hivyo inaposemwa kuwa dhambi za watu zimeandikwa katika vibao vya mioyo yao kwa ncha ya almasi, basi hiyo ina maanisha kuwa dhambi hizo haziwezi kufutwa hadi pale watakapooshwa dhambi zao zote kwa kuamini katika injili ya maji na Roho.

Hivyo, kwa wenye dhambi ambao bado hawajapokea ondoleo la dhambi zao, basi dhambi zao zote ambazo wamezifanya zimeandikwa katika vibao vya mioyo yao. Haijalishi jinsi wanavyoweza kuwa wanaifahamu elimu ya Mungu ya theolojia, au jinsi wanavyoifahamu theolojia ya Calvin, au wana shahada ya udaktari wa theolojia, au ikiwa ni profesa anayefundisha katika chuo, au ikiwa ana cheo kikubwa katika Kanisa, ukweli unabakia kuwa dhambi zilizoandikwa katika vibao vya mioyo yao haziwezi kutoweshewa mbali kwa kuamini kitu kingine chochote zaidi ya injili ya maji na Roho. Hii ndio sababu watu wa jinsi hiyo wanapomwomba Mungu, tunawasikia wakitubu kuwa wao ni wenye dhambi kwa kuwa vibao vya mioyo yao vimejawa na dhambi zao.

Kwa kuwa wenye dhambi hawawezi kuwa na ushirika mzuri na Mungu hata kama wakitaka kuwa nao, basi mara nyingi tunawaona wakienda katika milima ili kuomba, kufunga, kunena kwa lugha, na kuona maono ili waweze kuonana na Bwana kwa kupitia uzoefu huo wa kimaumbo. Lakini mwishowe mambo haya yote yanaishia katika utupu na wanachokuwa wamekifanya ni kuishi maisha ya kiudanganyifu ya kiimani ambayo yameidanganya mioyo yao.

Kifungu hicho hapo juu toka katika kitabu cha Yeremia pia kinasema kuwa dhambi ya Yuda imechorwa katika “pembe za madhabahu [zao]”. Pembe za madhabahu zina maanisha ni Vitabu vya Matendo. Kuna vitabu viwili katika Ufalme wa Mungu: Kitabu cha Uzima na Kitabu cha Matendo (Ufunuo 20:12). Katika Kitabu cha Matendo, Mungu ameandika kila uovu wa kila mwenye dhambi kwa kina.

Hivyo, ikiwa wenye dhambi hawa hawataiamini injili ya maji na Roho, basi hawataweza kuikwepa hali yao ya dhambi wanapokuwa hapa ulimwenguni. Wale wote wanaotaka kuzitoweshea mbali dhambi zao zote zilizoandikwa katika

vibao vya mioyo yao, wanapaswa kuamini katika injili ya maji na Roho kwamba Yesu amewaokoa kikamilifu na katika njia au namna inayofaa zaidi, yaani kwa kuzichukulia mbali dhambi zao zote kwa kupitia ubatizo alioupokea toka kwa Yohana na kwa damu aliyoimwaga Msalabani. Ndipo majina yao yanapoweza kuandikwa katika Kitabu cha Uzima na ndipo wanapoweza kufanyika kuwa watu wa Mungu.

Je, Majina Yenu Yameandikwa Katika Kitabu cha Uzima?

Kila mtu atatakiwa kusimama mbele ya kiti cha enzi cha hukumu cha Mungu. Hebu tufikirie kuwa mwamini anayeamini katika injili ya maji na Roho amesimama mbele za Mungu katika siku ile ya hukumu. Mungu anawaamuru malaika zake, “Hebu angalieni ikiwa jina lake limeandikwa katika Kitabu cha Uzima.” Hivyo malaika wanaangalia na wanaona kwa hakika kuwa jina lake limeandikwa katika kitabu hicho cha uzima.

Kisha Mungu anamwambia, “Mwanangu mpendwa, ulipokuwa duniani uliziosha dhambi zako kwa kuamini katika ukweli wa injili ya maji na Roho ambayo niliwapatia bure. Kisha ulifanya kazi kwa nguvu kwa ajili yangu, na pia ukamwaga machozi mengi kwa ajili yangu. Sasa nitahakikisha kuwa hakuna machozi tena yatakayotoka katika macho yako. Ninakuhakikishia kuwa hakutakuwa mateso kama hayo tena, na wala Shetani hatakusumbua tena. Safi sana mwanangu.”

Kisha Bwana atawaagiza malaika zake kumpatia taji.

“Asante sana Bwana hii ni heshima kubwa sana kwangu!”

“Leta taji na kisha iweke katika kichwa chake!”

“Ninamshukuru sana Bwana. Kitendo cha kuniokoa toka katika dhambi ni tendo pekee linalotosha kunifanya nijione

kuwa ni mdeni kwako, lakini sasa unanipatia taji kwa kazi ndogo ambayo niliifanya kwa ajili Yako? Asante sana Bwana. Inatosha kwa kuwa umeniokoa. Kule kuweza kuingia katika Ufalme wako na kuishi huko milele ni zawadi inayonitosha sana. Je, sasa ninaweza kuingia Mbinguni?”

“Hakika! Mlete Malaika! Msaidieni huyu mtoto wa Mungu wa namba ya milioni ili apande mgongoni kwake.”

Malaika aliyetajwa anajitokeza na kumwambia yule mtoto wa Mungu, “Nipo hapa Bwana wangu! Tafadhali panda mgongoni kwangu.”

“Ni raha sana. Hebu twende mahali pazuri.”

Mara yule malaika anaanza kupiga mbawa zake kwa uangalifu huku akipaa.

“Je, utapenda kwenda kuendesha gari Bwana wangu?”

“Safi! Hapa ni mahali pazuri sana! Hii mbingu ni nzuri sana?”

“Naam, nimekuwa nikipaa katika anga hizi kwa mabilioni ya miaka lakini bado sijawahi kuona mwisho wake.”

“Kweli? Sasa unaweza kunitua chini maana nisije kuelemea kwa uzito.”

“Bwana wangu, hapa Mbinguni hatupungukiwi na nguvu kamwe.”

“Ndivyo ilivyo? Asante. Hebu basi nikanyage hatua yangu kwanza katika ardhi hii ya Mbinguni. Sasa wako wapi basi wenye haki wote ambao walikuja hapa kabla yangu mimi?”

“Wapo pale.”

“Hebu twende pale tukawaone.”

Basi yule mwamini anakutana na wenye haki wote ambao walimtangulia kabla yake na kisha anapata faragha nzuri pamoja nao kadri moyo wake unavyopenda. Mambo haya yote yanaweza kuonekana kuwa ni kama ndoto, lakini hayo ndiyo yatakayotokea kwa wale wote wanaoamini katika injili ya maji

na Roho. Baraka kubwa ipo kwa wale ambao wameokolewa na kuamini katika injili ya maji na Roho!

Hata hivyo, kuna wanafiki wengi sana wa kiroho katika Ukristo wa leo ambao wana mioyo migumu na wasiotaka kuipokea karama ya Mungu ya bure ya injili ya maji na Roho. Watu wa jinsi hiyo, pamoja na kuwa wanamwamini Yesu, ukweli ni kuwa watu hawa wameamini vibaya kwa kuwa hawaifahamu injili ya maji na Roho. Ni jambo la kushangaza kuona jinsi wanavyoishikilia imani yao potofu wakati injili ya kweli imewekwa bayana kwao.

Ikiwa watu wanataka kweli kuokolewa toka katika dhambi zao, basi wanapaswa kuamini kwa mioyo yao katika ukweli wa injili ya maji na Roho ambao unatueleza kuwa Yesu alizipokea dhambi zote za ulimwengu kwa kubatizwa na Yohana Mbatizaji (Mathayo 3:13-17) na kisha akabeba kwa haki adhabu ya dhambi zetu kwa kuimwaga damu yake Msalabani kwa ajili yetu. Hatuwezi kujaribu kuingia Mbinguni kwa kuamini katika kitu chochote kinachokuja mbele yetu, hii ni kwa sababu Mungu ni wa haki, na inapofikia katika suala la dhambi na wokovu, Mungu hawi kama jirani yako anayeweza kuvumilia kila kitu na kila mtu.

Hebu nikueleza hadithi moja ya kufurahisha. Mtu fulani alikwenda Mbinguni, basi alichokiona kwenye kona moja ilikuwa ni lundo la masikio na midomo ikiwa imekusanywa pale. Basi mtu huyo alipomuuliza malaika kuhusu lundo lile, malaika alimwambia kuwa walikuwepo hapa mbinguni lakini kilichookolewa ni midomo na masiko tu. Tunapomwamini Bwana ni muhimu sana tuamini katika injili ya maji na Roho toka katika vina vya mioyo yetu, na kisha tutaokolewa kwa imani toka katika dhambi zetu zote mara moja na kwa wote.

Wakristo wengi ambao dhambi zao bado zipo kama zilivyokuwa mbele za Mungu wanadhani kuwa hawatapata shida

kuingia Mbinguni pamoja na dhambi walizonazo. Lakini Bwana wetu atawaambia, “Siwezi kuwafikiria kuwa hamna dhambi wakati bado mna dhambi. Nilikwisha ziondolea dhambi zetu zote kwa injili ya maji na Roho wakati mlipokuwa kule ulimwnguni, lakini bado mlikataa kuamini injili hiyo kwa mioyo yenu. Unaelewa ninachokimaanisha? Hima! Watupeni watu hawa ambao waliukataa upendo wangu katika moto wa milele!”

Ikiwa kuna dhambi katika moyo wako pamoja na kuwa unamwamini Yesu, basi hali ukiwa hapa duniani isikilize injili ya maji na Roho, iamini, na pokea ondoleo la dhambi zako, ondoleo ambalo Mungu amelitoa bure toka katika neema yake nyingi. Ni lazima utambue kuwa nafsi ambazo hazitafanya hivyo zitatupwa katika moto wa milele wa kuzimu katika ulimwengu ujao.

Wale wanaodai kuwa hawana dhambi pamoja na kuwa dhambi ipo katika mioyo yao, basi ni vema wafahamu kuwa hamna lolote wanalolifanya zaidi ya kumdhihaki Mungu na kujaribu kumdanganya. Wakati siku itakapowadia ya Mungu kuuhukumu ulimwengu huu ndipo watakapotambua jinsi tofauti ilivyo kati ya wenye dhambi na wasio na dhambi. Katika siku hii ndipo watakapotambua jinsi Bwana alivyowatia moyo kuamini katika injili ya maji na Roho na kisha kupokea ondoleo la dhambi. Ndipo wengine watakapo omboleza na kujuta kwa kutoiamini injili ya maji na Roho.

Kila Mkristo anaweza kumwamini Yesu kuwa ni Mwokozi wake, lakini kuna tofauti kubwa kati ya imani ya wale waliopokea ondoleo la dhambi na wale ambao hawajapata ondoleo la dhambi: wale walioondolewa dhambi zao watakaribishwa Mbinguni, lakini wale ambao hawajapokea ondoleo la dhambi watatupwa kuzimu. Ikiwa hutambui kuwa Neno la injili ya maji na Roho ni ukweli wa ondoleo la dhambi, basi hapo katika siku ya mwisho utakuwa umechelewa sana.

Je, kuna dhambi katika moyo wako hata pale unapomwamini Yesu kuwa ni Mwokozi? Ikiwa ndivyo, basi ni vema utambue kuwa hata wewe ni mwenye dhambi. Yesu ni Mwokozi anayewakemea wote wanaosema kuwa wana dhambi. Je, itakuwa busara ikiwa tutaendelea kukazia kuwa hatuna dhambi katika hali ya upofu? Kwa kweli si hivyo. Tunaweza kufanyika tusio na dhambi pale tunapoamini kwa kweli na kwa moyo wote katika injili ya maji na Roho na kisha kuoshelewa mbali dhambi zetu mara moja na kwa wote. Mbinguni ni mahali ambapo panaweza kufikiwa na wale tu ambao wanaamini katika injili ya maji na Roho ambayo imezindolea mbali dhambi zao zote.

Andaa imani ambayo inakuokoa toka katika dhambi zako *sasa* kwa injili ya maji na Roho. Ikiwa utaiacha injili hii hadi hapo baadaye basi utakuwa umechelewa. Hivyo kabla hujachelewa ni vema uamini katika injili ya maji na Roho na kisha uwe tayari! Ikiwa huipokei katika moyo wako injili ya maji na Roho, na ukweli wa ondoleo la dhambi, basi kwa hakika utafungwa huko kuzimu. Wenye dhambi wote watafungwa kuzimu, bali wenye haki wataishi Mbinguni.

Ni nani aliyefahamu kuwa kupokea ondoleo la dhambi kwa kuamini katika injili ya maji na Roho kungekuwa na thamani kiasi hiki? Kwa kweli wale ambao wameisikia injili ya maji na Roho na kisha wakaiamini katika ulimwengu huu wana bahati sana.

Ninamsifu Bwana wetu kwa injili hii. Ninamshukuru Bwana kwa mara nyingine kwa kutuokoa sisi ambao tulikuwa ni wenye dhambi toka katika dhambi zote za ulimwengu kwa kupitia injili ya maji na Roho mara moja na kwa wote. Wewe pia ni lazima uamini katika nguvu ya injili ya maji na Roho sasa! Ndipo ninyi nyote mtakapofanyika kuwa watoto wa Mungu milele. Halleluya! ☑

Imani Inayoweza Kuyafanya Mapenzi ya Mungu Baba

< Mathayo 7:20-27 >

“Ndiposa kwa matunda yao mtawatambua. Si kila mtu aniambiaye, Bwana, Bwana, atakayeingia katika ufalme wa mbinguni; bali ni yeye afanyaye mapenzi ya Baba yangu aliye mbinguni. Wengi wataniambia siku ile, Bwana, Bwana, hatukufanya unabii kwa jina lako; na kwa jina lako kutoa pepo, na kwa jina lako kufanya miujiza mingi? Ndipo nitawaambia dhahiri, sikuwajua ninyi kamwe; ondokeni kwangu, ninyi mtendao maovu. Basi kila asikiaye hayo maneno yangu, na kuyafanya, atafananishwa na mtu mwenye akili, aliyejenga nyumba yake juu ya mwamba; mvua ikanyesha, mafuriko yakaja, pepo zikavuma, zikaipiga nyumba ile isianguke; kwa maana misingi yake imewekwa juu ya mamba. Na kila asikiaye hayo maneno yangu asiyafanye, atafananishwa na mtu mpumbavu, aliyejenga nyumba yake juu ya mchanga; mvua ikanyesha, mafuriko yakaja, pepo zikavuma, zikaipiga nyumba ile, ikaanguka; nalo anguko lake likawa kubwa.”

Bwana wetu aliwambia wanafunzi wake kuwa, “mtawatambua kwa matunda yao.” Kwa wanafunzi wa Yesu, matunda yana maanisha ni hali ya mwisho ya kiimani. Kwa lugha rahisi, kuokolewa toka katika dhambi kama matokeo ya

kuamini katika injili ya maji na Roho ni tunda ambalo Mungu analikubali na kulithibitisha, na hivyo swali linalobakia ni kuwa je, sisi tuna tunda hilo au la. Njia ya kuweza kufanyika kuwa watakatifu wa kweli mbele za Mungu, wasio waongo, inapatikana katika imani inayoamini katika injili ya maji na Roho. Kwa maneno mengine, tunapoamini katika injili ya maji na Roho, basi tunaweza kufanyika kuwa watu wa kweli wa Mungu badala ya kuwa manabii wa uongo. Pia ili imani yeut iweze matunda halisi, na si makapi tu, basi mioyo yetu ni lazima iamini katika Neno la Mungu la injili ya maji na Roho.

Bwana wetu alisema, “kila mti mwema huzaa matunda mazuri, lakini mti mbaya huzaa matunda mabaya”—hivyo tunaweza kuwatambua kwa matunda yao.

Je, Tunaweza Kuokolewa Toka Katika Dhambi Zetu Zote na Kufanyika Kuwa Watoto wa Mungu Kwa Kuliitia Jina la Bwana Tu?

Leo hii, ninataka kuwashirikisheni aina ya imani inayoweza kuyafanya mapenzi ya Mungu. Katika Mathayo 7:21, Yesu mwenyewe alisema, *“Si kila mtu aniambiaye, Bwana, Bwana, atakayeingia katika ufalme wa mbinguni; bali ni yeye afanyaye mapenzi ya Baba yangu aliye mbinguni.”* Wale wanaoingia Ufalme wa Mbinguni kwa mapenzi ya Bwana ndio wale waliopokea ondoleo la dhambi zao kwa kuamini katika injili ya maji na Roho. Watakatifu ni wale wanaoamini katika injili ya maji na Roho. Matunda yanayozaliwa kutokana na kuamini katika injili ya maji na Roho ni kuondolewa dhambi zote na kufanyika wenye haki. Kwa hiyo, ni wale tu wanaoyafanya mapenzi ya Mungu Baba ndio wanaoweza kuingia Mbinguni. Ni lazima tutambue ni kwa

nini Bwana wetu alisema, *“Si kila mtu aniambiaye, Bwana, Bwana, atakayeingia katika ufalme wa mbinguni; bali ni yeye afanyaye mapenzi ya Baba yangu aliye mbinguni.”*

Katika kifungu hiki, Yesu anasema, *“Yeye ayafanyaye mapenzi ya Mungu Baba yangu anaweza kuingia Mbinguni.”* Sasa, hao watu wanaoyatenda mapenzi ya Mungu ni akina nani? Ni wale wanaoyatii mapenzi ya Mungu Baba. Biblia inasema, *“Na mapenzi yake aliyenipeleka ni haya, ya kwamba katika wote alionipa nisimpoteza hata mmoja, bali nimfufue siku ya mwisho. Kwa kuwa mapenzi yake Baba yangu ni haya, ya kwamba kila amtazamaye Mwana na kumwamini yeye, awe na uzima milele; nami nitamfufua siku ya mwisho”* (Yohana 6:39-40). Kwa kweli Mungu anataka kutokoa wenye dhambi wote toka katika dhambi.

Sasa, ni akina nani basi ambao wanayatii haya mapenzi ya Mungu Baba, yaani wale wanaoaminikatika injili ya maji na Roho? Kwanza kabisa, ni wake ambao wanaoamini kuwa Mungu Baba alimtuma Mwanawe pekee Yesu Kristo kuja hapa ulimwenguni, na kwamba kwa kumfanya abatizwe huyu Mwana abatizwe na Yohana Mbatizaji, basi Baba alimfanya Yesu kuzichukua katika mwili wake dhambi zote za ulimwengu mara moja na kwa wote. Pia ni wale wanaoamini kuwa Mungu Baba alimfanya Yesu kuzibeba dhambi zote za uimwengu katika mwili wake hadi Msalabani, kusulubiwa na kuimwaga damu yake hadi kifo, na kwa sababu hiyo Yesu ametuosha toka katika dhambi zote na ameibeba adhabu yetu ya dhambi.

Kuuamini huu ukweli wa wokovu ni imani inayoamini kwa mujibu wa mapenzi ya Baba aliye Mbinguni. Wale wanaoyafanya mapenzi ya Mungu Baba na kuamini hivyo basi hao wote wataweza kuingia Mbinguni, kwa kuwa wanaamini katika injili ya maji na Roho ambayo ni mapenzi halisi ya Baba. Haya ni majaliwa kamili ya Mungu Baba. Sisi sote ni

lazima tuwe na ufahamu mzuri juu ya hili, na ni lazima sisi sote tufanyike kuwa watakatifu wanaoamini katika injili hii ya wokovu, kwa sababu ni kwa kuamini katika injili hii ya maji na Roho ndipo tunapoweza kufanyika kuwa watoto wa Mungu, ndipo tunapoweza kuondolewa dhambi zetu zote, na hatimaye kuingia Mbinguni.

Bwana wetu alimaanisha nini wakati alipotuambia sisi sote kuwa, “Si kila mtu aniambiaye Bwana, Bwana atakayeingia katika ufalme wa mbinguni”? Maana ya kifungu hiki cha maandiko ni kuwa wale wanaojaribu kuingia Mbinguni pasipo kuwa na imani inayoamini katika ondoleo la dhambi lililowekwa na Mungu Baba—yaani kwa kupitia injili ya maji na Roho hawawezi kuingia Mbinguni. Kwa maneno mengine, Bwana wetu anatumfundisha kuwa watu wanaoliitia jina lake kwa upofu wakisema “Bwana, Bwana,” haimaanishi kuwa watu hao wana imani inayowawezesha kuingia Mbinguni, bali ni wale tu wanaoamini katika injili ya maji na Roho, na ambao wameokolewa toka katika dhambi zao zote, na hao ndio wanaofanya mapenzi ya Mungu Baba, na hao ndio wanaoweza kuingia katika Ufalme wa Baba.

Sababu inayowafanya Wakristo wengi pamoja nakuwa wanamwamini Yesu kuwa ni Mwkozi wao kutoingia Mbinguni ni kwa sababu hawana imani hii inayoamini katika Neno la injili ya maji na Roho ambayo inaweza kuwapatia ondoleo kamilifu la dhambi. Bwana wetu ametuwezesha kuingia Mbinguni kwa imani, kwa kutupatia Neno la injili ya maji na Roho na kutufanya tuiamini, na kwa kutufanya tuikubali injili hii kikamilifu. Ikiwa sisi sote tutakuwa na imani hii inayoamini katika Neno la injili ya maji na Roho, basi hakuna sababu inayoweza kumfanya mmoja wetu asiondolewe dhambi zake, na wala hakuna sababu inayoweza kutufanya tusiweze kuingia Mbinguni.

Ikiwa tutakuwa na imani katiak injili ya maji na Roho, basi hii ina maanisha kuwa sisi sote tuna imani inayotuwezesha kupokea ondoleo la dhambi na kuhesabiwa haki, na kisha kufanyika watoto wa Mungu mwenyewe, kuingia Mbinguni na kuishi pamoja naye. Kwa kifupi, wale walio na imani hii katiak injili ya maji na Roho wanaweza kuingia Mbinguni kwa sababu wameondolewa dhambi zao zote, lakini Wakristo wengi ambao hawana imani hii hawawezi hatimaye kuingia Mbinguni pamoja na kuwa wanamwamini Yesu kuwa ni Mwokozi, hii ni kwa sababu watakuwa wamebakiwa na dhambi kutokana na kutokuamini katika injili ya maji na Roho.

Bwana wetu alisema kuwa ili tuweze kuingia Mbinguni ni lazima tuyatende mapenzi ya Baba. Unapokuwa na aina hii ya imani inayoamini katika injili ya maji na Roho, basi inawezekana kwako kuyafanya mapenzi ya Baba. Pamoja na kuwa hatuwezi kukwepa na kwamba tutaendelea kutenda dhambi kwa asili yetu hadi tutakapokufa, ukweli unabakia kuwa tunaweza kuoshelewa mbali dhambi zetu zote mbele za Mungu wakati tunapoamini na kuitambua injili ya maji na Roho.

Kuyafanya mapenzi ya Mungu maana yake ni kuzifanya kazi zake njema, ambazo ni kuzipata nafsi kwa kuieneza injili ya maji na Roho. Kwa hiyo, ikiwa tunataka kuyafuata mapenzi ya Mungu Baba, basi kwanza kabisa, tunapaswa kuamini katika ukweli huu mkamilifu, ambao ni injili ya maji na Roho. Tusipofanya hivyo, basi hatutaweza kufanya iliyo sawa kwa kuwa dhambi zetu zitakuwa zimebakia kama zilivyo katika mioyo yetu. Kwa lugha nyingine, tunapaswa kuzaliwa tena upya kwanza ndipo tuweze kuzifanya kazi za Mungu (Waefeso 2:10).

Yeyote anayeamini katika injili ya maji na Roho ambayo tumeieneza anao uwezo wa kuyafanya mapenzi ya Mungu

Baba. Kwa hiyo, wale wanaoamini katika injili ya majina Roho na kuitambua wamefanyika kuwa ndio wale wanaoieneza injili hii ya maji na Roho kwa kwenye dhambi wote. Pamoja na kuwa wanaweza kuteswa na kukutana na magumu kutokana na kuuhubiri ukweli huu wa injili, basi ukweli ni kuwa hatimaye watafanyika kuwa watu wanaoyafanya mapenzi ya Mungu Baba. Tunapokuwa na imani hii inayoamini katika injili ya maji na Roho, basi tumefanyika watu wanaoyafanya mapenzi ya Mungu kwa mafanikio.

Kwa upande mwingine, ikiwa hatuiamini injili iliyotolewa na Mungu ya maji na Roho, basi ni hakika kuwa hatuwezi kuyafanya mapenzi ya Mungu Baba. Ikiwa hatuiamini injili ya maji na Roho na kwa sababu hiyo hatujaokolewa toka katika dhambi zetu, basi hata kama tutataka kuishi kwa kufuata mapenzi ya Baba aliye Mbinguni, ukweli ni kuwa hatutaweza bali tutaendelea kuishi katika utumwa wa dhambi. Lakini kwa kuwa tunaamini kwa mioyo yetu yote katika injili ya Mungu, ambayo ni injili ya maji na Roho, basi sisi sote tumefanyika kuwa wale wanaoyafanya mapenzi ya Baba kwa kumtumikia Mungu kwa kupitia injili ya maji na Roho.

Kaka zangu na akina dada, ni lini tulipofikia kuwa na ufahamu sahihi wa mapenzi ya Mungu? Ili kuwa ni wakati tulipoweza kuligundua Neno la injili la maji na Roho toka katika Neno la Mungu na kulihamini. Ikiwa hatuiamini Neno la Mungu, basi hatutaweza kuyafahamu mapenzi ya Mungu Baba wala hatutaweza kuyafanya mapenzi yake hapa ulimwenguni. Ni lazima tutambue kuwa hata kama tutawalisha wenye njaa, hata kama tutawaponya wagonjwa, na kuwatunza yatima, na kuwapenda jirani zetu kwa lengo la kuyafanya mapenzi ya Mungu Baba, basi tunapaswa tutambue kuwa kufanya hivyo ni tofauti kabisa na kuyafanya mapenzi ya Mungu Baba. Katika kuyafanya mapenzi ya Mungu, ni vema tufahamu kuwa

matendo yetu mema hayawezi kamwe kuwa mbadala wa imani inayoamini katika injili ya maji na Roho ambayo Bwana wetu ametupatia.

Hakuna tendo jema hapa ulimwenguni linaweza kuwa mbadala ya imani inayoamini katika injili ya maji na Roho, ambayo ni mapenzi ya Mungu yanayowakoa wenye dhambi. Ule ukweli kuwa tumeweza kuyafanya mapenzi ya Mungu Baba kwa kuiamini injili ya maji na Roho na kuieneza ulimwenguni mwote hauwezi kuwekwa mbadala na matendo yoyote mema ambayo tunaweza kuyafanya kwa miili yetu. Hali tukiutambua ukweli huu wa kushangaza mara moja na kwa wote, basi tunapaswa tusiiruhusu kamwe imani yetu kuchanganywa kuhusu mapenzi ya Baba.

Hata hivyo, kuna watu wengi sana katika ulimwengu huu ambao wanajaribu kuyawekea mbadala mapenzi ya Baba kwa kufanya matendo mema kwa miili yao. Lakini, sisi tumefanyika wale wanaoyafanya mapenzi ya mapenzi ya Baba na tumeweza kuitumikia injili ya maji na Roho ulimwenguni mwote kwa sababu tumepokea ondoleo la dhambi zetu kwa kuamini katika Neno la injili ya maji na Roho toka katika Neno la Mungu.

Inapofikia katika maisha yetu ya kiroho ya kiimani, basi ni lazima tuamini kuwa ni sahihi kwetu kuyafanya mapenzi ya baba kwa kuamini katika Neno la injili ya maji na Roho. Ili kufanya hivyo tunapaswa kwanza kuifahamu injili ya kweli. Inawezekanaje kwa mwenye dhambi kuyafanya mapenzi ya Mungu wakati hata hayafahamu mapenzi ya Mungu? Ikiwa hatuifahamu aina ya imani inayoturuhusu kuishi kwa mujibu wa mapenzi ya Mungu Baba, basi hapo hatuwezi kamwe kuwa na nguvu ya kuyafanya mapenzi ya Baba aliye Mbinguni.

Kwa hiyo, kwanza tunapaswa kupata uwezo wa kuyatenda mapenzi ya Mungu Baba kwa kuamini katika injili ambayo ina

haki ya Mungu. Kwa kifupi, ikiwa hatuna imani inayoamini katika injili ya maji na Roho, basi ni wazi kuwa hatimaye tutawekwa pembeni na Mungu kwa kuwa imani tutakayokuwa nayo itakuwa haina umuhimu wowote kuhusiana na mapenzi yake. Hii ndiyo sababu tunapaswa kujichunguza sisi wenyewe ili kuona kama ni kweli kuwa tunaamini katika Neno la Mungu, ili kuona kuwa kama tunaamini katika injili ya maji an Roho kwa mioyo yetu.

Wale wanaoishi kwa kutofuata mapenzi ya Mungu watajikuta hatimaye wakiliacha Kanisa la Mungu, hii ni kwa sababu hawawezi kuzishinda tamaa zao za mwili. Pia wanaweza hatimaye kuishia kama manabii wa uongo ambao wanayatafuta mapenzi yao binafsi kwa kutumia jina la Yesu Kristo hali wakijionyesha kuwa wamevaa ngozi ya kondoo. Lakini kwa kuwa injili ya maji na Roho ni mapenzi ya Mungu Baba aliye Mbinguni, basi wale wote wanaoamini katika injili hii wanaweza kupokea nguvu ya kuyafuata mapenzi ya Baba kwa nguvu za Roho Mtakatifu kadri wanavyoishi.

Ikiwa kweli tunataka kuyafahamu mapenzi mazuri ya Mungu kwetu sisi na kisha kuyafuta, basi ni lazima kwanza tuliadini Neno la injili ya maji na Roho. Ikiwa kweli tunaamini katika Neno la Mungu kuwa ni ukweli, na hata kama Biblia inaweza isionekana kuwa yenye kukubalika, basi sisi tunapaswa kuitangaza injili ya maji na Roho iliyofunuliwa katika Neno la Mungu. Ikiwa sisi sote tunayaamini mapenzi ya Mungu yaliyodhihirishwa katika Biblia, basi sisi sote tunaweza kumfurahisha Mungu kwa kuyafanya mapenzi yake, kwa kuwa imani za watu kama hao zimewekwa ili kuwa imara milele. Kama vile msonabari unavyosimama ukiwa umenyooka na kuelekea angani, basi wale wanaoamini katika Neno la Mungu wana ile nguvu isiyoshindwa ya kuweza kuyafuata mapenzi ya Mungu.

Ikiwa imani yako inategemea katika injili ya maji na Roho, ambalo ni Neno la Mungu, na ikiwa umeishapokea ondoleo la dhambi zako, basi imani hii yenye nguvu itakupatia nguvu halisi ya kuweza kuyafanya mapenzi ya Mungu Baba. Hata kama una mapungufu yanayoonekana wakati wengine wanapokuangalia, basi ikiwa una imai hii inayoamini katika injili ya maji na Roho, basi unaweza kuwa na imani ya kweli ambayo Ibrahimu alikuwa nayo. Kwa kuamini katika injili ya maji na Roho, sisi sote tunatakiwa kufikia hatua ya kuwa na imani hii inayoziondolea mbali dhambi zetu na inayotuwezesha kuingia Mbinguni. Sisi tutaishi maisha yetu hali tukiyatii na kuyafanya mapenzi ya Mungu Baba, hatimaye tutaingia katika Ufalme wa Mungu.

Hivyo, wewe na mimi ni lazima tuishikilie imani yetu katika injili ya maji na Roho kwa nguvu. Badala ya kuyashikilia mazingira yetu, sisi tunapaswa kuishika imani yetu katika Neno la injili ya maji na Roho na ni lazima tuieneza injili kwa uaminifu na kisha kumngonjea Bwana hadi siku ile atakapokuja.

Hata wenye haki ambao wamepokea ondoleo la dhambi kwa imani wanakutana na milima na mabonde. Kama kulivyo na majira manne tofauti ya masika, kiangazi, kipupwe, na vuli, basi vivyo hivyo wenye haki wanakutana na matukio mbalimbali katika nyakati fofauti—wakati mwingine wanakutana na mambo yanaweza kulinganishwa na joto kali na wakati mwingine wanakutana na mambo yanayoweza kufananishwa na baridi kali yenye kuleta maumivu, na pia kuna wakati ambapo inakuwa ni amani tu.

Hata hivyo, imani yetu inaweza kutofautiana kwa mujibu wa mazingira wakati wowote. Pamoja na kuwa mazingira yanaweza kubadilika sana, ukweli ni kuwa imani yetu katika injili ya maji na Roho haibadiliki kamwe katika mazingira

yoyote yale, imani hii inatulinda na kututunza dhidi ya laana. Ikiwa tunaliadini Neno la Mungu, basi kwa imani hii, hatuwezi kamwe kuoza au kunyauka kiroho wakati wa majira ya baridi, wala hatuwezi kunyauka na kufa kutokana na joto wakati wa kiangazi, wala hatuwezi kuangukia katika ukataaji wa imani wakati wa vuli, wala kuzamishwa katika ulimwengu wakati wa masika. Haijalishi jinsi tunavyoweza kupitia milima na mabonde, yaani magumu mbalimbali katika maisha yetu ya kiroho, ukweli ni kuwa sisi tunaweza kuyafanya mapenzi ya Mungu wakati wote. Ikiwa tuna imani inayoamini katika injili ya maji na Roho, basi tunaweza kuyashinda magumu yetu yote, na kwa imani hii tunaweza hatimaye kuishi maisha safi zaidi mbele za Mungu baba kwa kuyafanya mapenzi yake.

Injili ya maji na Roho inatosha kutubadilisha sisi sote kuwa wale wanaoishi kwa mujibu wa mapenzi ya Mungu baba. Hii ndiyo sababu wewe na mimi ni lazima tuilinde imani yetu katika injili ya maji na Roho, ambayo ni Neno la Mungu. Kwa kufanya hivyo, tunaweza kuishi kwa kuyatii mapenzi ya Mungu Baba. Je, sasa unadumu na kulishikilia Neno la Mungu? Au je, umefungwa na mazingira yako binafsi kiasi kuwa huwezi kuishi kwa kuliadini Neno la injili ya maji na Roho? Ikiwa unaangukia katika kundi la kujikuta umefungwa, basi jiulize mwenyewe ikiwa kweli unaamini katika nguvu ya injili ya maji na Roho au la. Sisi sote ni lazima tuamini katika injili ya maji na Roho iliyopatikana katika Neno la Munguliliyoandikwa, na ni lazima tuishi katika ile nguvu ambayo injili hii inatuletea. Kwa kweli, kwa kupokea nguvu ya Mungu kwa kupitia imani yetu katika injili ya maji na Roho, basi sisi sote tunapaswa kuishi maisha yenye matunda kwa furaha.

Ni Lazima Tuamini Katika Neno la Mungu Lenye Nguvu

Kitu kimoja ambacho kwa kweli ninapenda kukuomba ufanye ni kulishikilia Neno la Mungu lililoandikwa kwa imani, yaani kulishikilia katika vifungu vyake vyote. Kwa kweli sina nia njema nyingine zaidi ya wewe kuliadini Neno la injili ya maji na Roho, ambalo ni Neno la Mungu, maana usipofanya hivyo basi imani yako itaanguka kwa sababu ya dhambi zako unazozifanya, na hapo ndipo utakapokuwa umefungwa kuangamia kwa sababu ya dhambi zako. Sisi sote ni lazima tulishikilie Neno la Injili ya maji na Roho. Pasipo kufanya hivyo, hatuwezi kusimama imara na kwa usahihi hata kwa siku moja—na si kwamba hatuwezi tu kusimama, bali hatuwezi kuishi kabisa maana tutakuwa tumefungwa ili kutembea katika bonde la mauti.

Mara nyingi Mtume Paulo alikuwa akitaja juu ya *“kazi ya imani, taabu ya upendo, na saburi ya tumaini” (1 Wathessalonike 1:3)* kuwa ni vitu muhimu sana vya watakatifu waliozaliwa tena upya. Hata kama tuna tumaini la kuingia Mbinguni, na ule upendo ambao tumeupokea toka kwa Mungu, basi sisi hatuwezi kuwa lolote hadi pale tutakapokuwa na imani inayoamini katika injili ya maji na Roho, kwa kuwa ni injili hii ya maji na Roho ndiyo inayotupatia nguvu kuishi maisha mema kama hayo. Ikiwa huamini katika injili ya maji na Roho, basi Neno lote la baraka la unabii haliwezi kuwa lako bali litakuwa la mtu mwingine.

Unaweza kuamini kuwa ninyi nyote mtaingia Mbinguni hapo baadaye kidogo, lakini ni hadi utakapoamini katika injili ya maji na Roho na kuishikilia, hapo unapoweza kuingia mbinguni na maisha yako yatakuwa yamefikia hapo. Sisi hatuwezi kuendelea kuishi pasipo imani ya kweli inayoamini

katika Neno la injili ya maji na Roho. Ikiwa hatutapewa Neno la Mungu na ikiwa hatujilishi neno hilo kwa sasa, basi nafsi zetu zitakufa kwa njaa.

Je, imani ya kweli ni lazima ijengwe kwenye nini? Imani ya kweli ni lazima ijengwe katika Neno la Mungu lililoandikwa.

Wakati nilipokuwa sijazaliwa tena upya, nilizoea kufikiri kuwa nitakuja kuwa na imani ya kweli ikiwa tu nitatoa mali zangu zote kwa Mungu. Lakini nilihofia kuwa ikiwa nitaruhusu kila nilichonacho kuondoka halafu nikajikuta nimeishiwa baada ya kuwa nimempatia Mungu vitu vyote, basi nilifikiri kuwa ninaweza kuwa na wakati mgumu wa kupata tena mahitaji yangu katika ulimwengu huu wenye baridi na wenye ubinafsi. Hata hivyo, pamoja na kuwa sikuweza kutoa vitu vyangu vyote, ukweli ni kuwa maisha ya umaskini yamekuwa ndiyo sahihi kwa maisha ya Kikristo kwangu mimi.

Na kabla sijazaliwa tena upya, nilifikiri wakati wote kuwa kule kujazwa kwa hisia na mihemko yangu binafsi ndiyo imani yenyewe. Ili kuweza kuziinua hisia zangu za upendo na utakatifu, nilizoea kufanya kila kitu kama vile, kuhudhuria mikutano yote ya kanisa, kufunga, na kuwasaidia wenye shida, n.k. Lakini imani hiyo ya kisheria ilinifanya mimi kuchoka kiasi kuwa sikuweza kuishi tena kwa imani. Wakati mwingine nilipoona kuwa moyo wangu haujajawa na mihemko nilidhani kuwa hiyo ndiyo ishara ya kutokuwa na imani.

Je, ni lini basi nilipoweza kuipata imani yangu ya kweli ambao ni tofauti kabisa na ile imani niliyokuwa nayo hapo kabla? Niliipata katika Neno la injili ya maji na Roho lililoandikwa. Kwa kuwa Neno la kweli linaloishikilia injili ya maji na Roho lilikuwa limeandikwa katika Biblia, basi niliweza kuondolewa dhambi zangu zote kwa kuliadini hili Neno la Mungu, na kwa imani hii niliweza kumweleza kila mtu juu ya

ukuu wa injili ya maji na Roho. Kwa maneno mengine, kwa kuamini katika injili ya maji na Roho, niliweza kuyafanya mapenzi ya Mungu baba na kusimama kwa ujasiri mbele zake. Hadi leo hii, Neno la Mungu limeniwezesha kwa namna hii ili kwamba niweze kuishi ndani ya Yesu Kristo. Kama nisingelikuwa na aina hii ya imani katika Neno la injili ya maji na Roho, ambayo ni injili ya Mungu, basi nafsi yangu ingelikuwa bado imefungwa kuzimu.

Ndugu Wakristo wapendwa, kama hakuna Neno la Mungu katika mioyo yenu, basi sasa mnaamini nini? Hii itamaanisha kuwa mnaamini katika hisia zenu binafsi. Macho ya miili yetu hayamwoni Mungu wetu ambaye unakiri kuwa unamwamini. Sasa, utamwamini Mungu kwa misingi gani?

Utakuwa hauna chaguo lolote zaidi ya kuiweka imani yako katika uzoefu wa maombi, bila kujalisha ikiwa maombi yako yanajibiwa au la, lakini itakuwaje basi ikiwa Mungu haridhishwi na maombi yako na ikiwa hakujibu? Hebu tufikirie zaidi, inatokea kuwa Mungu hakujibu maombi yako unayomwomba katiak matukio machache; itawezekanaje basi kwa wewe kumwamini yeye? Unawezaje kumwamini Mungu na kumfuata kwa imani?

Ikiwa tutaweka msingi wetu katika kujitoa na katika hisia, basi ni hakika kuwa hatimaye tutaangukia katika matendo yetu ya kujitoa ambayo hatuwezi kuyafuata, na hatimaye kuangukia katika hali ya kutokuamini na kisha kuichezea imani yetu katika Mungu. Hii ndiyo sababu Mungu ametupatia sisi Neno lake lililoandikwa. Mungu, kwa kutupatia Neno lake lililoandikwa ametuwezesha sisi kukutana naye katika injili ya maji na Roho kwa kulishikilia Neno la Mungu; kwa kuwa na tumaini na kuamini katika ahadi zake; na kwa kuyafanya mapenzi ya Mungu hadi mwisho.

Ni lazima tulishikilie Neno la Mungu na kisha kuliadini.

Ni kwa kufanya hivyo ndipo tunapoweza kufanyika watoto wa Mungu kwa imani ambao wanaamini kwa kweli katika Neno lake na kisha kuwa na imani hata kama ndogo kama punje ya haradali; na kama Bwana wetu alivyosema kuwa tunaweza kuhamisha milima kwenda baharini ikiwa tutakuwa na imani kama punje ya haradali, na kwa sababu hiyo sisi sote tunaweza kufanyika watu wa imani ambao tunaweza kuuvuta ulimwengu mzima kwenda kwa Kristo. Hivyo, wewe na mimi tunatakiwa kulishikilia Neno la Mungu kwa nguvu, na ni lazima sisi sote tuliamini Neno lake kwa usahihi kama lilivyo. Kisha tunaweza kuwa ndio wale wanaoyafanya mapenzi ya Baba na kwa sababu hiyo tutaingia Mbinguni.

Yesu Kristo anatuwezesha sisi kuzaa matunda ya imani ya kweli. Kama vile mti hai na wenye afya ndio unaoweza kuzaa matunda, basi ni wale tu walio na uzima wa milele kwa kuamini katika Neno la Mungu na walio na mahusiano mazuri na Mungu ndio wanaoweza kuzaa matunda ya imani ya kweli. Wale wanaoamini katika Neno la Mungu ndio wanaoweza kuisha maisha yao kwa imani zao katika Mungu; hao ndio wanaoweza kuifanya kazi ya Mungu; hao ndio wanaoweza kufanya matendo mema; na hao ndio wanaoweza kumfuata Mungu kwa kuamini katiak injili bila kujalisha mapungufu yao.

Ikiwa hatuna imani hii inayoamini katika Neno la Mungu, basi ni wazi kuwa hatuwezi kuyafuta mapenzi yake. Ikiwa tutalishikilia Neno la Mungu, basi haya yote yanawezekana bila kujalisha mazingira tuliyonayo. Ikiwa hauna imani yoyote kuu, basi hebu shikilia hata kama ni pembezoni mwa Neno la Mungu kama alivyofanya yule mwanamke aliyekuwa akiugua ugonjwa wa kutoka damu kwa miaka kumi na mbili alivyoigusa ncha ya vazi la Yesu. Ikiwa mtu ana imani ndogo kama punje ya haradali ambayo imejengwa katika Neno, basi

mtu huyo ni mtu wa imani. Na kwa sababu ya imani hiyo, basi mtu huyo atakuwa akiyafanya mapenzi ya Baba. Sisi sote ni lazima tufanyike watu wa imani wanaoamini katika Neno la Mungu na tusiwe watu wasio na imani.

Ni Muhimu Sana Kwetu Sisi Kuamini Katika Nguvu ya Injili ya Maji na Roho

Ni akina nani wanaomwamini Mungu na wanaosimama katika mwamba imara wa imani? Ni wale wanaoamini katika Neno la Mungu lililoandikwa. Na ni akina nani wasioweza kufanya hivi? Ni wale ambao hawaamini katika Neno la Mungu lililoandikwa, na badala yake wanamsikiliza Ibilisi. Kama matokeo, watu wa jinsi hiyo wanafanywa kuwa watumwa wa Ibilisi na watumishi wake.

Hali akiwamaanisha waamini wa Neno lake, Yesu alisema, *“Basi kila asikiaye hayo maneno yangu, na kuyafanya, atafananishwa na mtu mwenye akili, aliyejenga nyumba yake juu ya mwamba; mvua ikanyesha, mafuriko yakaja, pepo zikavuma, zikaipiga nyumba ile isianguke; kwa maana misingi yake imewekwa juu ya mwamba.”*

Hapo zamani za kale, wakati watu walipojenga nyumba, walizoea kuweka miamba mikubwa minne katika kona zake nne kama mawe makuu ya pembeni. Miamba hii ilizikwa ardhini nusu kipimo na halafu sehemu nyingine ilijitokeza juu ya ardhi. Nguzo kubwa za miti ziliwekwa juu ya miamba hii hali nguzo nyingine zikiziunganisha zile nguzo kwa pamoja, hivyo katika msingi huu ndipo nyumba ilipoweza kujengwa kwa uimara wote.

Sasa, huu msingi imara ni nini? Msingi imara una maanisha ni imani ya mtu katika Neno la Mungu. Yesu alisema

kuwa yeye anayeyasikia na kuyafanya mapenzi ya Mungu atafanishwa na mtu mwenye hekima aliyejenga nyumba yake juu ya mwamba, kwa kuwa mtu huyo alijenga imani yake Neno la Mungu lililo kama mwamba. Imani ya kweli ni kuamini katika Neno la injili ya maji na Roho, ambalo ni Neno la Mungu.

Sisi tunajaribiwa kuuweka msingi wetu wa imani katika uzoefu wetu. Kwa mfano, Wakristo wengi wanapenda sana kusikia habari za ushuhuda wa mtu alichokiona katika maono alichokisikia katika maombi yake. Na wanatamani sana kupata au kuona kitu ambacho ni cha kimaufumbo kama vile muujiza. Na hii ndiyo sababu Ukristo wa kimaufumbo umekuja kutokea katika Ukristo wa leo. Lakini unapaswa kufahamu kuwa imani inayojengwa katika uzoefu huo wa mambo ya kimaufumbo inadumu hadi pale utakapotokea uzoefu mwingine, na kwamba kile ambacho macho yetu yanakiona kinakuwa si kitu cha kuaminika. Kwa nini? Kwa kuwa mambo hayo yanakuwa si ya kudumu, maana yanadumu kwa muda mfupi na mwishowe yanapotea na kwa ujumla wake mambo hayo yanafanya kusiwe na imani ya kweli.

Imani katika Mungu maana yake ni kuamini katika Neno la ukweli kamilifu na lisilobadilika milele, na kule kuliadini Neno hili la Mungu ndicho kitu muhimu kwa imani ya kiroho. Wale wanaokolewa kwa kuamini katika injili ya Mungu, yaani Neno la injili ya maji na Roho na ambao hatimaye wanayafanya mapenzi ya Baba, basi hao ndio wale walio na imani ya kweli. Tunaweza kumfahamu na kuwamini Mungu kwa usahihi pale tu tunapokuwa tukiiadini injili ya maji na Roho.

Injili ya maji an Roho ambayo Bwana wetu ametupatia haibadiliki kamwe. Hivyo kuamini kile ambacho Bwana wetu amekisema ndio imani yenyewe inayoamini katika injili hii ya

kweli. Hii ndiyo imani ambayo Mungu anaithibitisha. Na tunapoliamini Neno hili, bila kujalisha hisia zetu, mazingira, au kitu chochote kinachotaribu kututikisa, basi imani yetu inayolishikilia Neno hili haiwezi kamwe kutikisika, maana msingi wetu halisi wa imani hauwezi kutikisika. Hii ndi sababu wewe na mimi tunapaswa kuamini katiak Neno la Mungu. Kaka zangu na akina dada, je, mnaamini kweli katika Neno la Mungu? Je, mnataka kulishikilia Neno la Mungu? Kwa kweli ninawambea sana ili kwamba muweze kulishikilia Neno la Mungu katika maisha yenu yote.

Wale wote walioyafanya mapenzi ya Mungu waliamini wote katika injili ya Mungu ya maji na Roho. Watu wa imani kama vile Mtume Paulo, Petro na Yohana, ambao sisi sote tumewafuatia, mara nyingi walikuwa wakitoa mkazo toka katika Neno la Agano la Kale. Na wao walikuwa ndio watu wa imani ambao walimwamini Mwokozi kikamilifu, mwokozi aliyekuwa amedhihirishwa katika Agano la Kale. Katika zama zao hakukuwa na Agano Jipya. Lakini kadri walivyoliamini Neno la Mungu lililoandikwa la Agano la Kale na katika Yesu Kristo ambaye alikuja kwa maji na damu (1 Yohana 5:6), basi Roho Mtakatifu alikaa ndani yao na akafanya kazi katika maisha yao, na tangu siku ya kwanza walipokutana na Yesu, basi waliweza kumfuata Bwana.

Kwa kweli ni lazima tuamini katika Neno la Mungu lililoandikwa na ambalo halibadiliki. Sisi sote ni lazima tuyafuate mapenzi ya Mungu, tuishi maisha ambayo yanampendeza Mungu, na kisha tuwe wale ambao wanazaa matunda ya kiroho kwa kuamini. Wale wanaoliamini Neno la Mungu hawana mashaka hata pale mafuriko yanapokuja na pepo zinapovuma.

Lakini wale ambao hawaliamini Neno la Mungu, Neno la injili la maji na Roho, hao huanguka wakati mafuriko

yanapokuja na wakati pepo zinapovuma na anguko lao huwa kubwa. Sababu ya anguko hili ni kwa kuwa imani yao imejengwa katika mawazo yao binafsi. Katika Biblia, udongo au mchanga una maanisha ni mawazo ya kujitungia ya mwanadamu. Kwa mfano, Mwanzo inatueleza kuwa wakati watu wa kale walipojenga Mnara wa Babeli, walitumia matofali na lami katika kuujenga. Je, matofali yametengenezwa na nini? Matofali yametengenezwa kwa mchanga na udongo wa ardhi. Neno la Mungu hapa kuwa wale watu wa kale waliujenga mnara kwa mawazo yao binafsi ya kujitungia.

Katika ulimwengu wa sasa wapo pia wanaozijenga nyumba zao za imani kwa matofali kama hayo ambayo yametengenezwa kwa kuchanganya mchanga na saruji, ili kuweza kumpa Mungu changamoto, lakini ukweli ni kuwa wao wanapaswa kuzijenga nyumba zao za imani kw akuamin katika Neno la Mungu lilitolewa kwa uaminifu wote. Kitendo cha kuamini kwa mawazo misingi ya mawazo ya mwanadamu, na kuamini kwa msingi wa hekima ya mwanadamu, na kuamini kwa kutgemea uwezo wao binafsi na nguvu ni sawa na kujenga nyumba juu ya mchanga. Lakini ili kuliadini Neno la Injili ya maji na Roho, ambalo ni Neno la Mungu, ndiyo imani sahihi ambayo ni kama mwamba.

Kwa kuwa ili imani yetu iweze imara kama mwamba, basi tunapaswa kuirudia aina ya imani inayoamini katika kila kifungu cha maandiko kilichoandikwa katika Neno la Mungu. Tunapofanya hivyo, basi imani yetu itaimarishwa. Lakini kama tusipofanya hivyo na badala yake tukaendelea kuamini kwa mujibu wa mawazo yetu binafsi na katika mazingira yetu binafsi, basi ni hakika kuwa tutaanguka na anguko lake litakuwa kubwa kama Yesu mwenyewe alivyotueleza. Kwa maneno mengine, kuamini kwa mujibu wa mawaoz yetu binafsi kuna maanisha kuwa imani yetu itaanguka muda si

mrefu. Sasa ni vipi kuhusu wewe? Je, ni kweli kuwa unaamini katika Neno la Mungu lililoandikwa? Kama ndivyo, basi ninyi nyote ni watu wa imani kama alivyokuwa Ibrahimu.

Mungu alimwamuru Ibrahimu kuondoka na kuiacha nchi yake, toka kwa familia yake na nyumba ya baba yake kwenda katika nchi ambayo Mungu atamwonyesha. Je, Mungu alijitokeza mbele ya Ibrahimu? Hapana. Ilikuwa ni kwa kupitia Neno ambalo Mungu aliliongea kwa Ibrahimu. Kwa upande wake, Ibrahimu alilishikilia kile ambacho Mungu alimwambia na kisha akaenda mahali ambapo Mungu alimwelekeza. Pasipo Neno la Mungu bila shaka Ibrahimu angelijisikia kuwa amepotea. Hivyo Ibrahimu alijenga madhabau wakati wote akatoa sadaka ya kuteketezwa kwa Mungu na kisha akamwomba Mungu.

Katika moja ya matukio kama hayo wakati Ibrahimu alipomjengea Mungu madhabahu na kutoa sadaka yake ya imani kwa Mungu, Mungu alimtokea, hakumtokea kama mzuka bali alimtokea katika Neno. Je, si ingelikuwa rahisi sana kuamini ikiwa Mungu angelikuwa anajitokeza kama mzuka ulimtokea Hamrani? Basi ni wazi kuwa kila mtu angelimfahamu na kumwamini Mungu kwa urahisi. Lakini tunaona ni vigumu kumwamini Mungu kwa usahihi kwa sababu haonekani katika sura yake kamilifu, na kwamba tunaweza kumsikia Mungu akiongea katika mioyo yetu kwa kupitia Neno lake. Hata hivyo, Ibrahimu aliweza kusikia kile ambacho Mungu alimwambia. Hivyo, kama ilivyokuwa wakati huo, Mungu, bado hajionyeshi kwetu sisi katika sura yake, lakini anajidhihirisha kwetu kwa kupitia Neno lake lililoandikwa. Kama Mungu alivyozungumza na Ibrahimu kwa kupitia Neno lake, basi ndivyo Mungu anavyozungumza nasi kwa kupitia Neno lake lililoandikwa.

Hivyo, tendo la sisi kuliamini Neno la Mungu ndio imani

yenyewe. Ikiwa mtu ana imani katiak injili ya maji na Roho, basi mtu huyo ni mtu wa imani kuu. Mimi mwenyewe ninayeamini katika Neno la Mungu ni mtu wa imani kuu, na vivyo ndivyo ilivyo kwa kila mmoja wenu—sisi sote ni watu wa imani ambao tunaweza kuubadilisha ulimwengu mzima. Na kama Ibrahimu alivyobarikiwa na Mungu, wewe na mimi tunaweza pia kupokea baraka zile zile ambazo Ibrahimu alizipokea.

Hata hivyo, kama hatuliamini Neno la Mungu, basi imani yetu itakuwa kama ile ya Lutu. Wale ambao, pamoja na kuwa wanaamini kuwa wameokolewa toka katika dhambi zao kwa kuamini katika injili ya maji na Roho na halafu ambao bado wanafuata mazingira yao binafsi, basi ni hakika kuwa hao si watu wa imani. Wakati Ibrahimu alipolifuata Neno la Mungu kwa juhudi, Lutu alifuata kile ambacho mazingira yake binafsi yalimweleza kukifanya.

Lutu alikuwa tajiri wakati alipokuwa akiishi na mjomba wake Ibrahimu. Mwishowe akaanza kufikiria taratibu kuwa ikiwa angeliendelea kuishi na mjomba wake, basi bila shaka ataishia kupoteza ng'ombe wengi. Zaidi ya yote, wakati mjomba wake alikuwa ni wa msaada mkubwa kwa Lutu hapo kabla, sasa ule msaada wa Ibrahimu ulionekana kuwa ni maudhi kwake. Hivyo, Lutu akatafuta kisingizio cha kumwacha mjomba wake, na kama alivyotarajia, kisingizio hicho kikajitokeza: Kulitokea ugomvi kati ya wachungaji wa mifugo wa Ibrahimu na wale wa Lutu, kwa kuwa mifugo yao ilikuwa ni mingi sana kiasi kuwa hawakuweza kukaa pamoja.

Hivyo Ibrahimu akawaza, “Sasa ninaona kuwa Lutu anaamini mambo yake binafsi. Wakati alipoondoka Uru ya Wakaldayo huko kwetu alikuwa akinitegemea, alinifuata huku akimwamini Mungu ninayemwamini, lakini kwa kuwa sasa amekuwa tajiri anafanya kile anachotaka kukifanya kwa

matakwa yake binafsi.” Kisha Ibrahimu akamwambia Lutu, “Ukiona vema, naomba uwe huru kuniacha. Ikiwa utakwenda kulia mimi nitakwenda kushoto; au ikiwa utakwenda kushoto mimi nitakwenda kulia. Chagua mahali unapopataka; hapa au pale?” Kisha Lutu akachagua uwanda wa Yordani.

Eneo ambalo Lutu alilichagua lilikuwa ndio eneo hasa la Sodoma na Gomora miji ambayo baadaye ingelikutana na adhabu ya moto na kuangamizwa. Lakini kabla maangamizo haya hayajakuja, nchi hii ilikuwa ni nchi yenye rutuba sana kama ilivyokuwa Bustani ya Edeni. Ilionekana kuwa hapo ni mahali pazuri sana kwa mifugo. Kisha Ibrahimu akamwambia Lutu, “Kwa kuwa umepachagua mahali pale, basi mimi nitakaa upande mwingine mkabala na eneo ulilolichagua.” Basi Ibrahimu akachagua eneo mkabala na eneo ambalo Lutu alikuwa amelichagua akielekea katika eneo la milima badala ya kuelekea katika uwanda wenye rutuba wa Yordani. Kwa nini? Kwa kuwa Ibrahimu alifahamu kuwa moyo wa Lutu haukuwa sahihi.

Kisha Mungu akamttoa Ibrahimu na akamwambia, *“Inua sasa macho yako, ukatazame kutoka hapo ulipo, upande wa kaskazini, na wa kusini na wa mashariki na wa magharibi; maana nchi hi yote uionayo, nitakupa wewe na uzao wako hata milele”* (Mwanzo 13:14-15). Kwa kweli Mungu alimbariki Ibrahimu kama alivyomwahidi kwa kumpatia Nchi ya Ahadi.

Ibrahimu, ambaye ni baba wa taifa la Waebrania alifanyika kuwa zaidi ya mchuganji ambaye alikuwa ameondoka Uru, mji wa Wakaldayo kwenda katika nchi ya Kanaani. Neno “Ebrania” lina maanisha kuwa ni “mtu aliyeuvuka mto Yufirati.” Sababu iliyomfanya huyu Ibrahimu, ambaye alikuwa mgeni katika nchi ya Kanaani ambaye alitenganishwa, kuweza kuwa mtu wa imani, ni kwa sababu alikuwa amemwamini Mungu.

Wewe na mimi pia ni watu wa imani kwa sababu tunaamini katika Neno la Mungu lililoandikwa. Je, Neno hili la Mungu lililoandikwa linaweza kubadilika na kuyeyuka ati kwa sababu ni kipindi cha joto cha kiangazi? Je, Neno hilo linaoza na kuvunjika vunjika katika kipindi cha kipupwe? Mbingu na dunia vinaweza kubadilika, lakini Neno la Mungu haliwezi kubadilika kamwe, na tena wala joti moja au nukta moja ya maandiko haiwezi kutoweka hadi maandiko yatimie.

Mathayo 7:22 inasema, *“Wengi wataniambia siku ile, Bwana, Bwana, hatukufanya unabii kwa jina lako, na kwa jina lako kutoa pepo, na kwa jina lako kufanya miujiza mingi?”* Hivi ndivyo watakavyosema watu wengi wasio na imani, yaani wale wasio amini katika Neno la Mungu lililoandikwa. Ni Wakristo wangapi wanaoishi maisha ya kidini pasipo kuamini katika Neno la Mungu lililoandikwa? Siku ile wangi wao watasema, “Bwana, Bwana,” lakini ukweli ni kuwa walikuwa hawajamwamini Mungu bali waliamini kwa katika mazingira yao binafsi kama vile Lutu.

Kwa kweli Wakristo wengi hawaliamini Neno la injili ya maji na Rjoho. Badala yake wanaamini katika mawazo yao binafsi bure. Wengi wanayaamini mawazo yao binafsi, wanaziamini ishara zao za uongo, na wanaamini katika nguvu ya mapepo. Kuna wengi sana wanaoitwa “Wakristo vipofu” katika ulimwengu huu ambao wanaamini kwa kutozingatia Neno la Mungu bali wakizingatia mafundisho ya uongo yenye msingi katika nguvu za mapepo. Kati ya wale ambao hawajazaliwa tena upya, kuna watu wengi sana ambao wamepagawa na mapepo na bado wanadai kuwa wanamwamini Yesu hali wakiwa na msingi wa nguvu za mapepo walizozipokea. Je, haya uliyoyasoma hapo juu yanatokana na kifungu tulichokisoma leo hii? Kwa kweli hivi ndivyo kifungu cha Mathayo 7:22 kinavyosema: “Je,

hatukufanya unabii kwa jina lako, na kwa jina lako kutoa pepo, na kwa jina lako kufanya miujiza mingi?”

Watu waliopagawa na mapepo ni wazuri sana katika kuyatambua mapepo na hata kuyatoa. Pia wanaweza kutoa unabii vizuri. Je, si kuna hata wabashiri ambao wanaonyesha uwezo wa kutabiri mambo ya baadaye? Wale wanaotabiri katika jina la Bwana, wanaweza kutoa mapepo katika jina la Bwana, na wanafanya miujiza mingi kwa jina lake na wao ni kama hao waliopagawa na wapiga ramli. Kuna maeneo mengi ambapo watu kama hao wanapokuwa wamepagawa na mapepo wanasema maneno yote yasiyo na maana na yenye upuuzi mtupu.

Bila shaka utakuwa umesikia juu ya kuwepo kwa kikundi cha kizushi kinachoitwa “Ushirika wa Mzabibu.” Wanao wanasisitiza kuwa wakati ‘Roho Mtakatifu’ anapowajilia, basi wao hupata kifafa, au kusema kupata kicheko kisichoweza kusimamiwa vizuri, au kutoa sauti ya wanyama ka avile mbuzi, farasi, au hata simba anayeunguruma, na kwa sababu hiyo hudai kuwa wanaupata uzoefu unaojulikana kama “ulevi wa kiroho” ambapo hupoteza uwezo wa kiakili jambo linalosababisha kuwa na kicheko cha ajabu.

Kila mtu anayekwenda katika makusanyiko yao ni lazima apagawe na mapepo la sivyo hawezi kukaa muda mrefu katiak kikundi hicho. Wale ambao hawajazaliwa tena upya wanaona hakuna raha ya kumwamini Yesu hadi wanapokuwa wamepagawa na mapepo. Kwa maneno mengine, maisha yao ya kidini hayawapi furaha labda hadi wanapokuwa wamepagawa na mapepo.

Je, kabla hamjazaliwa tena upya, baadhi yenu hamkuwa ni Wakristo wenye dhambi ambao mliweza hata kunena kwa lugha? Kwa Wakristo wengi wa jinsi hiyo ambao hawana mwongozo, basi wao hawawezi kuona ni sawa hadi

wanapokuwa wamenena kwa lugha. Hivyo wao huendelea kusema maneno ambayo hayana maana tena na tena, na huamini kuwa hivyo ndivyo kunena kwa lugha kunavyopaswa kuwa.

Lakini kusema kweli, hali hiyo inaonyesh akuwa roho wachafu wamewaingia hali wakiwafanya kunena maneno yasiyokuwa na maana kabisa. Kwa maneno mengine, wao hujisikia vizuri kwa kuwa wanakuwa wamelewa ile nguvu ya mapepo. Wale wanaodai kuwa miili yao inaweza kufanya tofauti na nia zao kwa wakati fulani kwa nguvu isiyojulikana, kwamba visigino vyao vinaweza kuelea hewani kwa wala inchi kumi; wale wanaodai kuwa hawana hofu yoyote wanapokuwa wakienda msituni milimani kwa ajili ya kuomba; wale wanaosema kuwa nguvu zisizo za kawaida zinatoka ndani yao; wale wanaosema kuwa wanataka kumdaka mtu yeyote na kuiweka mikono yao juu yake na kuomba—basi watu wa jinsi hiyo ni wale waliopagawa na mapepo. Wakati watu wa jinsi hiyo wanapowaona wenzao waliopagawa na mapepo, wao husema, “Nenda nyuma yangu Shetani! Kwa jina la Yesu toka!” Wanasema hivi kwa kuwa wanafikiri kuwa hivi ndivyo mapepo yanavyofukuzwa, lakini kusema kweli yule pepo anayeondolewa na hawa wenye mapepo ni kwamba anakuwa mdogo kuliko yule aliyemo ndani ya yule anayefukuza mapepo.

Vivyo hivyo, wale wasioamini katika Neno la injili ya maji na Roho, basi hao wote wanatenda maovu. Hii ndiyo sababu mtu anapaswa kulishikilia Neno la Mungu kila siku. Tunapaswa kulishikilia Neno hadi Bwana atakaporudi. Tunapaswa kulishikilia Neno la Mungu nyakati zote, ni lazima tulishikilie Neno hili ambalo limetuletea wokovu. Neno hili lina nguvu ile ile sasa kama ilivyokuwa hapo kabla. Neno hili lina nguvu, upendo na wokovu wakati wote.

Hivyo, Neno hili linaibadilisha mioyo yetu. Na linatupatia nguvu na kutushikilia kwa pamoja katika imani. Kwa hiyo, ni kwa kuliambi Neno na kulishikilia ndipo tunapoweza kuwa na imani halisi, na ni kwa kuwa na imani kama hiyo ndipo tunapoweza kuihamisha hata milima kama Bwana alivyosema, na tukifikia hapo tunaweza kuyafanya mapenzi ya Bwana wetu na kumfuata hadi mwisho. Matokeo ya haya yote ni kufanyika watumishi wa Mungu mwenye haki, watumishi wa Ufalme wa Mungu.

Hivyo ni lazima sisi sote tuwe na ile imani inayoamini katika Neno la Mungu kwa kupitia injili ya maji na Roho. Ikiwa mnaamini katika Neno la Mungu na kulishikilia basi ninyi nyote mtafanyika kuwa watu wake. Pia mtafanyika kuwa wale wanaoweza kuyafanya mapenzi ya Mungu Baba. Ikiwa kweli mnaliambi Neno la Mungu, basi mnapaswa kufahamu kwa kina jinsi injili ya maji na Roho inavyojumuisha Biblia nzima.

Lakini hata kama umeihapokea ondoleo la dhambi zako kwa kuamini katika injili hii, basi wewe endelea kulishikilia Neno la Mungu lililoandikwa, maana kama ukishindwa kufanya hivyo, basi imani yako itapotea wakati wowote. Ikiwa hatutalishikilia Neno la Mungu basi tunaweza kujikuta tukiyafuata mawazo yetu machafu ambayo yanaweza kutufanya tusiweze kusimama kwa unyoofu mbele za Mungu. Lakini kwa kulisikia na kulisoma Neno la Mungu kwa kupitia Kanisa lake, basi tunaweza wakati wote kupata nguvu na kulipokea Neno la nguvu na kisha kumfuata Bwana kwa imani.

Amini sasa kuwa unaweza kuyafanya mapenzi ya Mungu Baba kwa kuamini katika nguvu ya injili ya maji na Roho! ☒

Tunaweza Kuingia Mbinguni Pale Tu Tunapoyafahamu Mapenzi ya Baba Na Kuyaamini

< Mathayo 7:21-27 >

“Si kila mtu aniambiaye, Bwana, Bwana, atakayeingia katika ufalme wa mbinguni; bali ni yeye afanyaye mapenzi ya Baba yangu aliye mbinguni. Wengi wataniambia siku ile, Bwana, Bwana, hatukufanya unabii kwa jina lako, na kwa jina lako kutoa pepo, na kwa jina lako kufanya miujiza mingi? Ndipo nitawaambia dhahiri, Sikuwajua ninyi kamwe; ondokeni kwangu, ninyi mtendao maovu. Basi kila asikiaye hayo maneno yangu, na kuyafanya, atafananishwa na mtu mwenye akili, aliyejenga nyumba yake juu ya mwamba; mvua ikanyesha, mafuriko yakaja, pepo zikavuma, zikaipiga nyumba ile, isianguke; kwa maana misingi yake imewekwa juu ya mwamba. Na kila asikiaye hayo maneno yangu asiyafanye, atafananishwa na mtu mpumbavu, aliyejenga nyumba yake juu ya mchanga; mvua ikanyesha, mafuriko yakaja, pepo zikavuma, zikaipiga nyumba ile ikaanguka; nalo anguko lake likawa kubwa.”

Katika kifungu hicho hapo juu cha maandiko, Bwana wetu alisema, *“Si kila mtu aniambiaye, Bwana, Bwana,*

atakayeingia katika ufalme wa mbinguni; bali ni yeye afanyaye mapenzi ya Baba yangu aliye mbinguni.” Bwana alisema hapa kuwa si kila mtu anayedai kuwa anamwamini Yeye anaweza kuingia Mbinguni mahali aliko, bali wale tu wanaoyafanya mapenzi ya Baba ndio wanaoweza kuingia Mbinguni. Katika siku ya mwisho ya hukumu, wakati watu wengi watakapokuwa wakimwambia Bwana, “Bwana, Bwana, hatukufanya unabii kwa jina lako, na kwa jina lako kutoa pepo, na kwa jina lako kufanya miujiza mingi?” Bwana wetu hataweza kusema lolote zaidi ya kuwaambia, “Sikuwajua ninyi kamwe; ondokeni kwangu, ninyi mtendao maovu!”

Bwana alituambia sisi sote kuwa, *“Basi kila asikiaye hayo maneno yangu, na kuyafanya, atafananishwa na mtu mwenye akili, aliyejenga nyumba yake juu ya mwamba; mvua ikanyesha, mafuriko yakaja, pepo zikavuma, zikaipiga nyumba ile, isianguke; kwa maana misingi yake imewekwa juu ya mwamba. Na kila asikiaye hayo maneno yangu asiyaifanye, atafananishwa na mtu mpumbavu, aliyejenga nyumba yake juu ya mchanga; mvua ikanyesha, mafuriko yakaja, pepo zikavuma, zikaipiga nyumba ile ikaanguka; nalo anguko lake likawa kubwa.”* (Mathayo 7:24-27). Vivyo hivyo, Yesu alisema hapa kuwa wale wanaolisikia Neno la Bwana wetu na kisha wakaliadini na kulitii, watafanishwa na mtu mwenye busara ambaye nyumba yake ya kiimani imejengwa katika mwamba, ilhali wale wasiofanya hivyo wataziona imani zao zikiporomoka na kuanguka.

Anachokisema hapa Bwana wetu ni kuwa wale waliobarikiwa ni wale wanaolisikia Neno lake kwa masikio yao na kisha wakaamini kwa mioyo yao, na kwa sababu wameokolewa toka katika dhambi zao zote na wanayafanya mapenzi ya Mungu Baba. Kwa upande mwingine, ikiwa mtu atalisikia Neno la Bwana na kisha asiliadini katika moyo wake,

basi maisha yake ya kiimani yatakuwa ni utupu.

Wale wanaolisikia Neno la Bwana wetu na wanaoishi maisha yao kwa imani ni kama yule mtu aliyejenga nyumba yake juu ya mwamba. Je, umeokolewa toka katika dhambi zako zote kwa kuamini katika Neno hili la Mungu, ambalo ni injili ya maji na Roho? Wale ambao wameondolewa dhambi zao zote mara moja na kwa wote kwa kuamini katika injili ya maji na Roho watafikia hatua ya kuyaishi maisha yao kwa kuyafanya mapenzi ya Baba kwa imani hii yenye mizizi katika Neno la Mungu. Watu wa jinsi hiyo si tu kwamba wanaieneza injili ya maji na Roho kwa kila mtu ulimwenguni, bali wanafikia hatua ya kuwapenda kaka na dada zao wa kiimani. Kwa maneno mengine, kwa kuwa wanaamini katika injili hii ya maji na Roho, ambalo ni Neno la Mungu, basi watu hao wanataka kuionyesha imani yao ya kweli kwa matendo yao.

Bwana wetu alituambia sisi sote kuwa, “Iweni waamini na watendaji wa Neno.” Pamoja na kuwa kuna Wakristo wengi katika ulimwengu huu wanaodai kumwamini Yesu, ukweli ni kuwa ni Wakristo wachache tu ambao ndio waliooshelewa mbali dhambi zao na kuwa nyeupe kama theluji, na kufanyika wenye haki kwa kuamini kwa kweli katika Neno la injili ya maji na Roho. Hata hivyo, bado kuna watu ambao wamepokea ondoleo la dhambi kwa kusikia na kuamini katika injili ya maji na Roho, na ambao wameilinda imani yao na kuiweka imani yao katika matendo halisi. Na kuna watu wengi sana ambao wanatambua kuwa injili ya maji na Roho ndiyo injili ya kweli.

Lakini ikiwa mtu anaamini katika injili hii ya maji na Roho kwa moyo wake, basi mtu huyo anapaswa kuihubiri injili hiyo kwa wengine—lakini wale ambao hawataieneza injili hii basi wataishuhudia imani yao ikivunjika na kuanguka. Lakini pia kuna watu wengi sana wanaosema kwa midomo yao kuwa wanaamini katika injili ya maji na Roho wakati hawaiamini

injili hiyo kwa mioyo yao na kwa sababu hiyo hawawezi kuionyesha imani yao kwa matendo.

Watu wa jinsi hiyo wanahubiri kuwa hata zile injili za uongo ni kweli. Watu wa jinsi hiyo hawawezi kufanya lolote zaidi ya kuhubiri kama hivyo kwa kuwa hawana imani inayoamini kwa kweli katika injili ya maji na Roho. Lakini hatuwezi kuhubiri injili nyingine yoyote zaidi ya injili ya maji na Roho, kwa kuwa injili hii ndiyo injili pekee iliyo ya kweli.

Ni Lazima Tuamini Katika Nguvu ya maji na Roho

Bwana wetu alisema, *“Si kila mtu aniambiaye, Bwana, Bwana, atakayeingia katika ufalme wa mbinguni; bali ni yeye afanyaye mapenzi ya Baba yangu aliye mbinguni.”* Kwa maneno mengine, wale wanaoamini kwa kweli kuwa injili ya maji na Roho kuwa ndiyo injili ya kweli wanawashuhudia wengine juu ya injili hiyo. Hivyo, wale wasioieneza injili ya maji na Roho kwa wengine hawana matendo yoyote ya haki na wala hawayafanyi mapenzi ya Mungu Baba, na kwa sababu hiyo watakataliwa na Bwana wetu. Mwishowe imani yao inakuwa ni ile inayotapatapa. Kwa kuwa dhambi za watu hao bado zipo katika mioyo yao, basi watu hao watabakia kuwa ni wenye dhambi hata kama wanadai kuwa wanamwamini Yesu. Haijalishi ni jinsi gani wameyaongoza maisha yao katika imani, ukweli unabaki kuwa wao ni wenye dhambi tu. Kwa kuwa hawaamini kwa hakika injili ya maji na Roho, basi watu hao hawawezi kuonyesha matendo ya kweli ya imani yao. Hivyo, hawataweza kukwepa kukataliwa na Bwana wetu katika ile siku ya mwisho.

Ni kitu gani kinachowasababishia wenye haki ambao

wameondolewa dhambi zao zote kuumwa mioyo? Mioyo yao inaumizwa wanawapowaona watu wanaodai kuwa wanaamini katika injili ya maji na Roho huku wakiwa hawaamini kwa kweli kuwa injili hiyo ndiyo kweli na huku wakiwa hawaienezi ipasavyo. Kwa nini? Kwa kuwa jambo hilo linaleta mashaka makubwa ikiwa watu hao wanaamini kwa kweli kwa mioyo yao katika injili ya maji na Roho kama wanavyodai. Sisi sote tunapaswa kufahamu na kuamini katika injili ya kweli ya maji na Roho kama ilivyo. Ni vema nikukumbushe tena kile ambacho Bwana wetu alikisema; wale wasioamini katika nguvu ya injili ya maji na Roho—yaani wale ambao hawayafanyi mapenzi ya Mungu Baba—hawawezi kuingia Mbinguni.

Hii ndio sababu Bwana atatangaza, “*Ondokeni kwangu, ninyi mtendao maovu,*” kwa wale wote wanaodai kumwamini Yesu kuwa ni mwokozi na halafu bado hawaamini katika injili ya maji na Roho na kuihubiri. Ikiwa kweli wangelikuwa wanaamini kuwa injili yote ya maji na Roho ndiyo injili ya kweli, basi bila shaka wangei hubiri kikamilifu kwa mujibu wa ukweli huo wa injili. Sababu inayowafanya wasiamini wala kuhubiri hivyo ni kwa sababu hawaiamini injili ya maji na Roho kuwa ni upendo wa milele wa Mungu.

Kwa kuwa hawamwamini kwa kweli Yesu kwa mujibu wa Neno la Mungu la wokovu na sheria yake ya wokovu, basi watu hao hawana tendo lolote linaloonyesha kuwa wameishi kufuata mapenzi ya Baba. Watu hao wanaweza kusema, “Hatukufanya unabii kwa jina lako, na kwa jina lako kutoa pepo, na kwa jina lako kufanya miujiza mingi” Lakini hatimaye watu hao hawakuamini katika injili ya maji na Roho na walikuwa wakifanya miujiza ya uongo.

Bwana wetu anawauliza watu hao ambao walitenda vibaya badala ya kuamini katika injili ya maji na Roho kama

hivi, “Umefanya nini kwa ajili yangu? Je, ulifanya ishara na miujiza? Mbali na haya, je uliamini kwa kweli katika injili ya maji na Roho ambayo nilikupatia, na je uliyaishi maisha yako kwa imani hii? Je, uliamini kwa kweli kuwa nilizibeba dhambi za ulimwengu kwa kubatizwa na Yohana Mbatizaji, na kwamba niliimwaga damu yangu Msalabani kwa ajili yako, na kwamba huu ndio wokovu pekee ambao ulizitoweshea mbali dhambi zote za ulimwengu? Na je uliuenza ukweli huu kwa wengine? Hukufanya hata moja kati ya haya halafu bado ukatenda uovu kwa kulitaja bure jina langu? Ninafahamu vizuri kuwa ulifanya miujiza ya uongo kwa jina langu huku ukinidhihaki. Hivyo ondoka kwangu!”

Hatupaswi Kudanganywa na Waongo

Ulimwenguni mwote, kuna wengi wanaofanya ishara na miujiza katika jina la Yesu. Katika makanisa yanayoongozwa na watu kama hao utakuta kuwa dhumuni lako kuu katika ibada zao ni kutenda miujiza. Kwa nini wanataka sana ishara katika kipindi hiki wakati Neno la injili ya maji na Roho ni lazima lihubiriwe kwao kwa kina, na wakati waumini wanapaswa kulipokea Neno hilo kwa imani? Tunachopaswa kukitambua hapa ni kuwa wale wanaotenda miujiza mingi ya uongo ni wale ambao wamekumbwa na mapepo. Kwa maneno mengine, wale waliokumbwa na roho mbaya wanawadanganya wafuasi wao wakijidai kutenda ishara na miujiza, na kwa sababu hiyo wanawaondolea ufahamu wao na kupata vitu vingi kama sadaka toka kwao. Kwa hakika hii ni kazi ya watumishi wa Shetani. Miujiza yote ya jinsi hiyo ni kama maonyesho ya kiini macho. Hii ndiyo sababu Yesu alisema kuwa wakati watu wa jinsi hiyo watakapomwambia, “Hatukutoa pepo kwa jina

lako?,” Ndipo Yesu atawatangazia kuwa hakuwajua wao. Katika siku hii ya mwisho, Bwana atawatupilia mbali wale wote walio na dhambi.

Maepo hayawezi kuonekana kwa macho ya waliozaliwa tena upya. Lakini wale ambao hawajazaliwa tena upya wanaweza kuyasikia maepo na kuziona sura zao. Hii ni kwa sababu kuna dhambi katika mioyo yao. Katika mioyo ya watu wenye dhambi kama hao, roho chafu zinaweza kuja na kufanya kazi ndani yao kwa uhuru. Na kwa sababu hiyo, mtu aliyepagawa na maepo anaweza kuwasiliana kwa urahisi na maepo. Maepo yanafanya kazi na kuzaa matunda ya uovu ndani ya wale ambao bado wana dhambi kamilifu.

Watu wanachotakiwa kufanya badala ya kuitafuta miujiza ya uongo ni kuamini kuwa Yesu alizichukua dhambi zao zote katika mwili wake kwa kubatizwa na Yohana Mbatizaji, na kwamba alibeba adhabu ya dhambi zao kwa kuimwaga damu yake. Badala ya kushiriki katika kazi ya maepo, ni lazima tuamini katika injili ya maji na Roho na kuzitoa nguvu zetu zote katika kuieneza injili hiyo. Sisi tumeokolewa toka katika dhambi zetu zote na kufanyika kuwa tusio na dhambi kwa imani kwa sababu Yesu alizichukua dhambi zote za ulimwengu katika mwili wake kwa kubatizwa na Yohana Mbatizaji na kisha akabeba adhabu ya dhambi pale Msalabani. Kwa kuwa Bwana wetu amezioshelea mbali dhambi zetu kwa injili ya maji na Roho, basi wale wote wanaoamini katika hili wamesafishwa dhambi zao, na hivyo roho chafu haziwezi kukaa katika mioyo yao. Hakuna kazi ya Shetani kabisa ndani ya waamini wa injili ya maji na Roho.

Hii ndiyo sababu Bwana wetu alisema, “Yeye afanyaye mapenzi ya Baba yangu aliye Mbinguni ndiye atakayeingia katika Ufalme wa Mbinguni.” Tunachopaswa kukizingatia hapa ni yale yaliyo mapenzi ya Baba. Mapenzi ya baba ni

kuona tukiokolewa kwa kuamini katika injili ya maji na Roho: Yesu Kristo, Mwokozi wetu, amezitoweshea mbali dhambi zetu zote kwa kubatizwa na Yohana Mbatizaji na kisha kusulubiwa Msalabani hadi kifo. Imani ya jinsi hiyo ndiyo inayoamini kwa mujibu wa mapenzi ya Baba. Kwa maneno mengine, Mungu Baba yetu amezioshelea mbali dhambi zetu zote kwa kumtuma Mwanawe, na kumfanya kuzipokea dhambi za ulimwengu kwa kumfanya abatizwe, na kwa kumfanya aimwage damu yake Msalabani.

Tunapouamini ukweli huu, tunaweza kuoshwa dhambi zetu zote na kisha kuingia katika Ufalme wa Mungu wa milele na kuishi kwa furaha milele. Sisi wenye haki tutaishi pale kwa pamoja na kwa furaha milele. Bwana ametuokoa toka katika dhambi zetu kwa injili ya maji na Roho. Kitendo cha sisi kumwamini Yesu kuwa ni Mwokozi wetu kwa kupitia injili ya maji na Roho ndiko kuamini kwa mujibu wa mapenzi ya Mungu Baba na kuyafanya mapenzi yake.

Lakini bado kuna wengi sana ambao kutokana na kushindwa kwao kuamini hawawezi kuzikwepa dhambi zao hata kama wanamwamini Yesu kuwa ni Mwokozi, na kwa sababu hiyo hatimaye watakataliwa kwa sababu ya dhambi zao. Kwa maneno mengine, wameachwa kwa sababu hawaamini katika injili ya maji na Roho kuwa ni ukweli halisi hadi mwisho. Kwa kuwa watu hao hawaamini katika injili ya maji na Roho, basi watu hao hawana uwezo wa kuyafanya mapenzi ya Baba kwa imani, hivyo siku ya mwisho itakapokuja, basi ile imani yao ambayo imetokana na mawazo yao binafsi itaanguka na kuvunjika. Siku ile ya mwisho, watu hao watakataliwa na Mungu kwa sababu hawaliamini Neno la injili ya Mungu ya maji na Roho. Hali itakuwa hivyo hivyo kwangu mimi na wewe—ikiwa utaikataa injili ya maji na Roho sasa, basi wewe nawe utakuja kukataliwa na Mungu hapo baadaye.

Bwana wetu alisema kuwa malaika watakuja hapo utakapotimia muda wa nyakati za mwisho, nao watawatenga waovu toka miongoni mwa wenye haki, na kisha watawatupa waovu hao katika tanuri ya moto (Mathayo 13:49-50). Kaka zangu na dada zangu, je hao waovu kati ya wenye haki ni akina nani? Bwana wetu ametuambia wazi na kwa uhakika kuwa ametuokoa sisi toka katika dhambi zetu zote kwa kupitia injili ya maji na Roho. Lakini pamoja na ukweli huu, bado kuna wale ambao hawaiamini injili hii, ambao wanafanya mapatano na ulimwengu huu na kujiunga upande wa ulimwengu huu. Kwa kweli watu wa jinsi hiyo ndio walio waovu.

Kaka zangu na dada zangu, hakuna injili mbili za kweli. Wala hakuna akina Yesu wawili, bali kuna Yesu mmoja tu. Hakuna njia nyingine inayoweza kutufanya kuingia Mbinguni bali ni kwa kuamini katika injili ya maji na Roho, injili ambayo kwa hiyo Yesu ameziondoleo mbali dhambi zetu zote. Injili hii ya maji na Roho imezitoweshea mbali dhambi zako zote.

Ni lazima utambue kuwa ikiwa utauamini ukweli huu, basi utafunuliwa njia ya namna ya kuishi kwa mujibu wa mapenzi ya Mungu Baba. Injili ya maji na Roho itakufanya uyatambue yaliyo mapenzi ya Mungu Baba jinsi yalivyo. ☒

Jihadharini na Manabii wa Uongo Ambao Lengo Lao ni Kupata Fedha Zenu Tu

< Mathayo 7:13-27 >

“Ingieni kwa kupitia mlango ulio mwembamba; maana mlango ni mpana na njia ni pana iendayo upotevuni, nao ni wengi waiingiao kwa mlango huo. Bali mlango ni mwembamba, na njia imesonga iendayo uzimani, nao waionao ni wachache. Jidhaharini na manabii wa uongo, watu wanaowajia wamevaa mavazi ya kondoo, lakini kwa ndani ni mbwa mwitu wakali. Mtawatambua kwa matunda yao. Je! Watu huchuma zabibu katika miiba, au tini katika mibaruti? Vivyo hivyo kila mti mwemwa huzaa matunda mazuri; na mti mwovu huzaa matunda mabaya. Mti mwema hauwezi kuzaa matunda mabaya, wala mti mwovu kuzaa matunda mazuri. Kila mti usiozaa tunda zuri hukatwa ukatupwa motoni. Ndiposa kwa matunda yao mtawatambua. Si kila mtu aniambiaye, Bwana, Bwana, atakayeingia katika ufalme wa mbinguni; bali ni yeye afanyaye mapenzi ya Baba yangu aliye mbinguni. Wengi wataniambia siku ile, Bwana, Bwana, hatukufanya unabii kwa jina lako, na kwa jina lako kutoa pepo, na kwa jina lako kufanya miujiza mingi? Ndipo nitawaambia dhahiri, Sikuwajua ninyi kwamwe; ondokeni kwangu, ninyi mtendao maovu. Basi kila asikiaye hayo maneno yangu, na ya kufanya, atafananishwa na mtu mwenye akili, aliyejenga nyumba yake juu ya mwamba,

mvua ikanyesha, mafuriko yakaja, pepo zikavuma, zikaipiga nyumba ile, isianguke; kwa maana misingi yake imewekwa juu ya mwamba. Na kila asikiaye hayo maneno yangu asiyafanye, atafanishwa na mtu mpumbavu, aliyejenga nyumba yake juu ya mchanga; mvua ikanyesha, mafuriko yakaja, pepo zikavuma, zikaipiga nyumba ile, ikaanguka; nalo anguko lake likawa kubwa.”

Bwana wetu ametupatia uwezo wa kuweza kuwatambua manabii wa kweli na wale wa uongo, na pia ametupa uwezo kwa kutambua Kanisa la kweli na makanisa ya uongo kwa kutumia imani inayoamini katika injili ya maji na Roho. Katika Mathayo 7:15-20, Yesu alisema, *“Jidhaharini na manabii wa uongo, watu wanaowajia wamevaa mavazi ya kondoo, lakini kwa ndani ni mbwa mwitu wakali. Mtawatambua kwa matunda yao. Je! Watu huchuma zabibu katika miiba, au tini katika mibaruti? Vivyo hivyo kila mti mwemwa huzaa matunda mazuri; na mti mwovu huzaa matunda mabaya. Mti mwema hauwezi kuzaa matunda mabaya, wala mti mwovu kuzaa matunda mazuri. Kila mti usiozaa tunda zuri hukatwa ukatupwa motoni. Ndiposa kwa matunda yao mtawatambua.”*

Bwana wetu alituambia kujihadhari na manabii wa uongo. Kama alivyotuonya, ni kweli kuwa tunapaswa kujihadhari na manabii wa uongo. Wakati mchungaji anaposhindwa kuihubiri injili ya maji na Roho, ambayo ni Neno la Mungu kwa waumini wake, basi mchungaji huyo atakuwa haitimizi huduma yake vizuri. Inawezekanaje basi kwa mchungaji kama huyo kujiita mtumishi wa kweli wa Mungu wakati hashughulikii tatizo la dhambi kwa waumini wake kwa injili ya maji na Roho ambayo ni Neno la Mungu?

Waongo wa jinsi hiyo wanafurahishwa tu jinsi

wanavyoonekana kwa hali ya nje, kwa unafiki wakijifanya kuwa wapo makini na watu watakatifu wanapokuwa wakihubiri, na hatimaye kile wanachokihubiri kwa waumini wao ni kuwasihi waumini wao kufuata taratibu na maadili ya ulimwengu. Kwa kweli utaratibu wa nidhamu na maadili haupaswi kudharauliwa. Lakini kile ambacho wachungaji ni lazima wakifanye si kule kusesitiza maisha ya kimaadili, bali wanapaswa kuihubiri injili ya maji na Roho. Hii ni kwa sababu watu wanahitaji kuoshwa dhambi zao na kuwa safi kwa kuamini katika injili ya maji na Roho kwa kuwa wanatenda dhambi kila siku.

‘Manabii wa uongo’ ni wale wanaosimama kinyume na ukweli. Wachungaji wenyewe ni lazima wawe wameondolewa dhambi zao zote kwa kuamini katika injili ya maji na Roho. Mtu yeyote anayehudumu kama mchungaji au mhubiri pasipo kuifahamu injili ya maji na Roho na pasipo kuzaliwa tena upya basi hao ndio manabii wa uongo. Biblia inawaita watu wa jinsi hiyo kuwa ni ‘manabii wa uongo.’

Bwana wetu alituaambia kuwa, *“Jihadharini na manabii wa uongo.”* Kwa kweli ni lazima tujihadhari na watu wa jinsi hiyo. Ninyi nyote mnapaswa kukaa mbali na waongo hawa katika ulimwengu huu ambao hawawezi kushughulikia tatizo la dhambi zako.

Katika Tito 3:10-11 Biblia inatueleza kuwa, *“Mtu aliye mzushi, baada ya kumwonya mara ya kwanza na mara ya pili, mkataa; ukijua ya kuwa mtu kama huyo amepotoka, tena atenda dhambi, maana amejihukumu hatia yeye mwenyewe.”* Kifungu hiki cha maandiko kinawazungumzia wale ambao bado wana dhambi zao kamilifu katika mioyo yao hata pale wanapodai kuwa wanamwamini Yesu. Imani yao inatetea kuwa ni sahihi kwao kubakia na dhambi pamoja na kuwa wanamwamini Yesu; kwa kweli watu hao wanatenda dhambi

ya mauti dhidi ya Bwana. Inawezekanaje wakabakia kuwa wenye dhambi huku wanadai kuwamini Yesu Kristo kuwa ni Mwokozi wao? Kwa kuikiri aina hii ya imani, basi kile wanachokifanya ni kutenda dhambi mbele za Mungu.

Wanaposema kuwa dhambi zao zipo ndani yao mbele za Mungu, basi hii inaonyesha wazi imani yenye makosa ambayo kwa hiyo watapaswa kuhukumiwa adhabu kwa sababu ya dhambi zao. Lakini wao bado wanafikiri kuwa kujihesabu wao wenyewe kuwa ni wenye dhambi mbele za Mungu ndio njia sahihi ya kuamini. Hata hivyo, waamini wa jinsi hiyo si watakatifu wa kweli mbele za Mungu, bali ni waongo tu. Yesu alitumbia kujihadhari na na manabii wa uongo kama hao na wafuasi wao.

Ni lazima tukumbuke kile ambacho Biblia inatuonya: kuwachunguza watu wa jinsi hiyo, yaani manabii wa uongo, wachungaji wa uongo, na wahubiri wa uongo.

Yesu Alisema Kuwa Tunaweza Kuwatambua Manabii wa Uongo Kwa Matunda Yao

Hali akiwazungumzia manabii wa uongo, Bwana wetu alisema, “Mtawatambua kwa matunda yao.” Tunaweza kuwatambua manabii wa uongo kwa matunda yao. Ni aina ipi ya matunda ambayo inawafunua au kuwaonyesha manabii wa uongo? Bwana wetu aliua, “Je, watu huchuma zabibu katika miiba?” Kama ambavyo miiba isivyoweza kuzaa matunda mazuri, basi wachungaji ambao hawajaondolewa dhambi zao na ambao bado wana dhambi ni hakika kuwa hawawezi kuwaongoza watu kuzaliwa tena upya. Wachungaji wa jinsi hiyo wanazaa Wakristo wenye dhambi ilhali watumishi waliozaliwa tena upya wanazaa watakatifu wasio na dhambi na

kisha wanawaimarisha kiimani. Ikiwa mchungaji hawezi kuwabadilisha wenye dhambi ili kuwa watakatifu wasio na dhambi kwa kupitia injili ya maji na Roho, basi mchungaji wa jinsi hiyo ni nabii wa uongo.

Kama Bwana alivyosema kuwa mti hujulikana kwa matunda yake, ikiwa matunda ya kiimani ya mchungaji yapo mbali kabisa na wale wenye haki ambao wamepokea ondoleo la dhambi, basi kwa hakika tutafahamu kuwa wao ni waongo na manabii wa uongo. Wachungaji wa uongo wanajivika mavazi ya kondoo na wanawapotosha wafuasi wao, huku wakiwadanganya kwa maneno yao laini. Kuna watu wengi sana wanaodanganywa na manabii hao wa uongo, kwa kuwa kwa hali ya nje wanaonekana kana kwamba ni watakatifu. Hivyo, Biblia inatuonya tusidanganywe na waongo kama hayo huku ikisema, *“Maana watu kama hao ni mitume wa uongo, watendao kazi kwa hila, wanaojigeuza wawe mfano wa mitume wa Kristo. Wala si ajabu, Maana Shetani mwenyewe hujigeuza awe mfano wa malaika wa nuru”* (2 Wakorintho 11:13-14).

Hali wakiwa waaminifu katika wito wao kama mitume wa uongo, basi wao wanawafundisha wafuasi wao kuishi maisha mazuri, kutofanya dhambi, na kuwa wema kwa watu wengine. Lakini kwa ndani ni kama mbwa mwitu wakali ambao wanawanyonya waumini wao kifedha. Mahubiri yao hufikia hitimisho lile lile la kuwataka waumini waishi vizuri, na kwamba wanachotakiwa kukifanya hasa ni kumletea Mungu fedha kanisani. Wao hutoa mahubiri mengi tofauti kwa waumini wao lakini mwishoni mahubiri yao huishia kwa kuwaasa wafuasi wao kuto afedha nyingi kwa Mungu. Wao hutoa mahubiri kama hayo kwa sababu iliyo wazi kabisa, kwa kuwa wao hupenda kulipwa fedha nyingi. Watumishi hao hawajali juu ya wokovu wa waumini wao. Hawajali kile ambacho kitatokea kwa waumini wao wenye dhambi na wao

wenyewe katika siku ya mwisho. Hawapendi kabisa kutusikiliza pamoja na kuwa tumejitahidi kwa nguvu sana kuwashirikisha habari za injili ya kweli ya maji na Roho. Kwa kweli ni dhahiri kuwa wachungaji wa jinsi hiyo ni manabii wa uongo kabisa.

Biblia inatueleza kuwa tunaweza kuwafahamu manabii wa uongo kwa matunda yao. Tunaweza kuwatambua ikiwa wanalihubiri au hawalihubiri Neno la kweli la injili ya maji na Roho, ambalo ni Neno la Mungu, na kuchunguza ikiwa kama kuna mfuasi wao yoyote ambaye anaamini katika injili ya maji na Roho na ikiwa amepokea ondoleo la dhambi. Ni kweli kuwa wanalihubiri Neno la Mungu kwa wazi, lakini hakuna kazi ya wokovu inayotokana na yale wanayoyahubiri. Kwa kuliamini Neno la injili ya maji na Roho, si tu kwamba tunaweza kufahamu kuwa wao ni manabii wa kweli au la kwa imani yao, bali pia hatuwezi kudanganywa na waongo kama hao. Injili ya maji na Roho ni kipimo kinachowaengua manabii wa uongo. Hivyo, sisi tuliozaliwa tena upya kwa maji na Roho (Yohana 3:1-10) ni watu wa Mungu mwenyewe na watumishi wake ambao tunaweza kupambanua kati ya miti myema na miti mibaya.

Hebu sasa tuchunguze tabia ya manabii wa uongo kwa kina. Tabia ya kwanza ya nabii wa uongo ni kuwa kila nabii wa jinsi hiyo ana dhambi mbele za Mungu. Hivyo, ikiwa mtumishi fulani ni mwenye dhambi mbele za Mungu, basi huyo mtumishi ndiye nabii wa uongo. Mtumishi wa jinsi hiyo anaweza kuwaeleza waumini wake kila siku kuwa wanapaswa kumletea Mungu fedha. Na mtumishi kama huyo anakuwa haipendelei kabisa injili ya maji na Roho, wala hawezi kuiamini. Mchungaji wa jinsi hiyo ni nabii wa uongo. Manabii kama hao wanawatazama waumini wao kama chanzo cha utajiri wao. Wao hawajali ikiwa waumini wao wamezaliwa

tena upya au la, wao wanachojali ni fedha.

Sina hakika kama umewahi kuyasikia mahubiri kama hayo hapo kabla, lakini kila mahubiri yanayotoelewa na hao manabii wa uongo ni lazima kwa namna moja au nyingine yawe na kitu fulani kinachohusiana na fedha. Mahubiri yao yanaweza kuwa kama haya yafuatayo: “Kaka na dada, tunapaswa kuishi kwa mujibu wa Neno la Mungu. Katika Kumbukumbu la Torati 28, Mungu alisema kuwa ikiwa utawaheshimu wazazi wako na kuishika Sheria, basi Mungu atakupatia baraka hizi na hizi.” Lakini hata pale wanapoanza mahubiri yao kwa namna hii lakini mwishoni husema kuwa baraka za Mungu zinategemeana na kiasi cha fedha tunazozitoa.

Lakini hii sio njia ya sisi kuweza kupokea baraka za mbinguni na duniani toka kwa Mungu. Kinyume chake, baraka zote zinatoka katika imani inayoamini katika injili ya maji na Roho, ambayo ni Neno la Mungu. Mungu anatoa baraka za duniani kwa wale wanaolisikia na kuliadini Neno la injili ya maji na Roho ambalo Mungu amelitoa. Hata hivyo, hitimisho la mahubiri ya nabii wa uongo huishia kuzungumzia fedha. Manabii hao wa uongo wanaweza kuzungumzia Sheria, lakini wanaposema, “Mtumikie Mungu vizuri, toa matoleo kwa kanisa lako; na mheshimu mchungaji wako,” basi ukweli ni kuwa kile wanachokimaanisha ni “Leta fedha nyingi; ikiwa utatoa fedha nyingi kwa Mungu basi utabarikiwa sana.” Hivi ndivyo wanavyojaribu kukudanganya. Na madhumuni yao yote katika huduma yapo katika fedha. Wanawafundisha watu hata kutoa matoleo makubwa huku wakisema, “Kadri unavyotoa matoleo mengi, ndivyo unavyozidi kubarikiwa na imani yako itakua kwa haraka.” Lakini wale wanaoiamini injili ya maji na Roho na kuulewa ujumbe wake hawawezi kudanganywa na waongo kama hao.

Ni Lazima Tuukwepe Udanganyifu wa Manabii wa Uongo

Yesu alisema, *“Jidhaharini na manabii wa uongo, watu wanaowajia wamevaa mavazi ya kondoo, lakini kwa ndani ni mbwa mwitu wakali.”* Manabii wa uongo ni kama mbwa mwitu. Wanasimama mbele ya kundi hali wakiwa wamevaa mavazi ya kondoo, lakini mioyo yao ni ile ya mbwa mwitu wakali ikiwa na meno makali tayari kwa kulirarua kundi kwa kuwa wao wametawaliwa na tamaa ya fedha. Kwa mujibu wa Biblia, manabii wote wa uongo ni kama mbwa mwitu. Badala ya kuieneza injili ya maisha mapya kwa makundi yao, wao wanawaongoza wafuasi wao kuamini kitu kingine kuliko injili ya maji na Roho. Na kwa kufanya hivyo, wao wanawanyonya waumini wao ambao wanakufa wakiwa wamefunikwa na dhambi katika mioyo yao. Wale wanaofanya mambo haya si wengine bali ndio hao manabii wa uongo.

Si kila mtu anatambua kuwa manabii wa uongo hawana wema au uzuri wowote. Lakini kwa sababu manabii wa uongo wa ulimwengu huu wana mbinu sana katika udanganyifu, na kwa sababu watu wameshaanguka ili kudanganywa kwa urahisi na manabii wa uongo wa jinsi hiyo, basi manabii hao wa uongo wanaweza kuwadanganya watu wengi kwenda katika imani potofu kwa ndimi zao nyepesi. Siku hizi, kuna mkanganyiko sana katika fikra za watu wengi, kwa kuwa kuna waongo wengi ambao wamewazunguka watakatifu halisi. Lakini ukweli wa mambo ni kuwa hawa waongo hawana lolote la kulitoa zaidi ya kuleta ushawishi mbaya kwa kila mtu.

Hata vitu vya ulimwengu huu vina ile hali ya kuigiza. Kwa mfano, baadhi ya maduka ya nyama huweka mfano plastiki yenye mfano wa nyama katika madirisha yao ya kutangazia. Ukiiona kwa mara ya kwanza unaweza kudhania

kuwa ni nyama halisi, kwa kuwa huonekana kama nyama halisi nzuri na huweza kukufanya usikie hamu ya kuila nyama hiyo. Lakini ikiwa utaiangalia kwa karibu zaidi, basi unaweza kutambua kuwa hiyo si nyama halisi bali ni mfano ulioigizwa tu. Unaweza kujisikia kuwa umedanganywa. Mfano huo huo unaweza kuonekana katika mkate: kama ulivyo mkate halisi ambao umetengenezwa kwa unga wa ngano, basi kuna mikate pia iliyoigizwa ambayo imetengenezwa kwa plastiki. Je, kuna yeyote kati yenu anayeweza kula mkate huu wa kuigiza? Kwa kweli haiwezekani. Kwa kweli mkate huo hauwezi kulika kwa sababu umetengenezwa kwa plastiki ili uonekane tu kama mkate halisi. Lakini hata kama mkate huo wa kuigiza unaonekana kuwa ni mzuri kiasi gani, ukweli unabaki kuwa kula plastiki ni kuleta matatizo makubwa kiafya au hata kusababisha kifo. Mkate huu wa uongo au wa kuigiza ni kama mafundisho yanayotolewa na manabii wa uongo.

Kaka na dada zangu, haijalishi jinsi viongozi wako wa kanisa walivyo, haijalishi jinsi wanavyowapenda ninyi, na haijalishi jinsi wanavyowafanyia kwa wema, ikiwa wanashindwa kuwahubiria Neno la injili la ondoleo la dhambi linalowawezesha ninyi kuzaliwa tena upya kwa maji na Roho, basi ni vema mtambue kuwa viongozi hao ni manabii wa uongo. Watu wa namna hiyo ni manabii wa uongo ambao ni kama wapataji tu wa mshahara. Biblia inatueleza wazi kujihadhari na watu kama hao.

Bwana wetu aliwataja manabii wa uongo kuwa ni mbwa mwitu wakali. Je, wewe bado upo chini ya manabii wa uongo kama hao? Watu hawa si tu kwamba wanazinyonya fedha zako, bali ni wazi kuwa wanaiiba nafsi yako. Wanachokitaka hao manabii wa uongo ni kupata fedha nyingi toka kwako kadri itakavyowezakana ili waweze kujenga makanisa makubwa na mazuri, hali wakiwa hawajali ikiwa nafsi yako inaelekea

kwenye moto wa kuzimu au la. Sasa ufanye nini? Ni lazima uutambue mti kwa matunda yake. Mtu yeyote anayezungumzia fedha tu kila anapokifungua kinywa chake, mtu ambaye maneno yake yanaonyesha tamaa ya fedha, basi mtu huyo ni kama mtafuta mshahara na nabii wa uongo.

Hivyo, tunaweza kuwafahamu manabii wa uongo kwa matunda yao. Sasa, haya matunda ya manabii wa uongo ni yapi? Ni matunda ya udanganyifu ambayo yanazinyonya na kuziharibu nafsi za watu. Kwa maneno mengine, matunda hayo ni mabaya. Manabii wa uongo wanaweza kusema kuwa hauna dhambi, na kwamba kila kitu ni safi ikiwa tu utawapatia fedha. Na pia wanaweza kukueleza kuwa mambo yote ni sawa ikiwa utatoa maombi yako ya toba, ukatakaswa, na kisha ukaleta fedha nyingi kanisani. Haya yote ni matunda ya manabii wa uongo.

Sasa hayo matunda yao mabaya yanaonekana vipi? Matunda ya watumishi waovu yanaonekana pale wanapotafuta kuongeza idadi ya waumini wao bila kukoma kana kwamba wanaendesha biashara fulani. Ni mambo gani wanayoyatumia katika kuwavuta watu katika makanisa yao? Moja ya mbinu inayotumika ni kutoa zawadi kwa waumini wao kwa lengo lwa kuwavuta waumini zaidi katika makanisa yao. Kwa mfano wanaweza kutoa zawadi ya friji kubwa kwa kila mtu anayeleta kwa mwaka waumini wapya 20 kanisani; yule atakayeleta waumini wapya 30 atapewa kiyoyozi cha hali ya juu; yule atakayeleta waumini wapya 50 atapewa gari dogo la milango mitatu; na yule atakeyeleta waumini wapya 200 kwa mwaka atapewa gari la kifamilia la aina ya Sedan. Basi kuwa kutoa zawadi kama hivi, hawa manabii wa uongo wamekuwa wakiwavutia sana wafuasi wao ili kuwaleta waumini wengi katika kundi lao. Unaweza kudhania kuwa hii haiwezekani au ni jambo lisilo la kuaminika, lakini ukweli ni kuwa sipo hapa

kutengeneza hadithi, bali haya ndiyo yanayotokea katika baadhi ya jumuiya za Kikristo ulimwenguni.

Jambo hili ni lenye uovu sana. Je, Kanisa la Mungu halifanywi kuwa kama duka la bidhaa au benki? Na baada ya kuwa wamewavuta waumini hao katika Kanisa, ni jambo gani basi wanalowafanyia? Mungu angeliweza kuwakubali ikiwa wangeliihubiri injili ya maji na Roho na kisha kuwasaidia waumini wao kupokea ondoleo la dhambi, lakini tunachokiona sisi sote kwao ni ile dhamira yao ya kupata fedha tu toka kwa waumini hao.

Kwa hiyo, sasa manabii wa uongo wamezivuta nafsi nyingi katika makanisa yao, je, wanawahubiriaje hao waumini? Bila shaka wanawahubiria hivi, “Yesu anakupenda. Kwa wale ambao wamekuja kwa mara ya kwanza hapa kanisani, basi tutawapatia zawadi nzuri, tutatoa zawadi nzuri ya mwanvuli wa jua kwa akina dada na tutatoa zawadi ya mwanvuli mkubwa kwa kila mwanamume ili waweze kutumia na marafiki zao wa kike.” Wao hufikiria kuwa ikiwa hawa waumini wapya watakuja katika makanisa yao kwa kufuata zawadi kama hizo, na kisha wakawa mashemasi na wazee wa kanisa—hata pale ambapo hawaifahamu injili ya maji na Roho—na kisha wakakijaza chombo cha kukusanyia sadaka kwa aina mbalimbali za matoleo—kama vile sadaka za shukrani, zaka, na aina mbalimbali zamatoleo hadi siku watakayokufa, basi hiyo itakuwa ni shughuli yenye faida kubwa.

Kwa manabii wa uongo kama hao, zile fedha ndogo wanazozitoa kwa ajili ya kuwekeza katika zawadi ndogondogo, zinaleta maana kubwa kwa uwekezaji na kwa faida ya kesho. Hii ndio sababu manabii wa uongo wanaendesha makusanyiko yao kwa zawadi. Kwa mfano, kati ya hao waumini wapya 500, basi hata kama asilimia 10% ya waumini hao itabakia katika makanisa yao, basi kwa itabakia kuwa ni faida kwa kuwa

waumini hawa 50 watakuwa wakiendelea kujaza vyombo vyao vya kukusanyia sadaka katika maisha yao yote. Kwa kweli haya ndiyo matunda ya manabii wa uongo.

Hali ya kuufanya Ukristo kuwa wa kibiashara imekuwa ni kubwa sana katika Korea kiasi kuwa hapo zamani kidogo kulikuwa na wimbo uliokuwa ukiicheka hali hiyo. Mistari ya wimbo huo ilikuwa inasema hivi: “Walituambia tuje katika kanisa lao; na wakatuambia tumwamini Yesu; kisha wakatuomba fedha, na wakazidi kutuomba fedha.” Kitu ambacho manabii wa uongo wanakiongelea wakati wote ni fedha, fedha, na fedha zaidi. Mtu mmoja wapo anaweza kusema, “Hebu na tulijenge hekalu takatifu na kisha tuliweke wakfu kwa Mungu wetu. Akina kaka na akina dada, Mungu anataka kutubariki hapa. Katika kitabu cha Hagai, Mungu alimwambia Nabii Hagai kulijenga Hekalu lake. Na pia Mungu alisema kuwa wale ambao hawakuunganisha juhudi zao katika kulijenga Hekalu hili watalaaniwa. Pia kifungu hicho cha maandiko kinatueleza kuwa kwa wale waliotoa zaidi katika kulijenga Hekalu Mungu aliwabariki sana. Unapaswa kuzingatia sana kifungu hiki cha maandiko toka katika Kitabu cha Hagai!” Kisha anakiandika kifungu cha maandiko toka kwa Hagai katika bendera na vipeperushi na kisha anaziweka mahali pa juu, kisha anamwita mhubiri mwenye uamsho ili kuziinua hisia za watu, na kisha anapitisha chombo cha kukusanyia matoleo. Kisha anawaambia mashemasi kuwa wanapaswa kila mtu kulipia kipande cha ardhi cha futi 300 za mraba; kisha anawaambia wazee wa kanisa kulipia kipande cha ardhi cha walau futi 1500 za mraba; na kisha anawaambia waumini wa kawaida kulipia matofali 5000 kila mmoja. Hali akiwa ameunda kamati ya ujenzi, mtumishi huyo atanza kuzivuta fedha toka kwa waumini kana kwamba kesho haipo.

Kaka zangu na dada zangu, ikiwa ni kweli kuwa jengo

kubwa la kanisa ni la muhimu mbele za Mungu, basi jengo hilo ni lazima lijengwe. Simaanishi kuwa kujenga kanisa kubwa ni dhambi. Lakini ikiwa hakuna hitaji hasa ajili ya jengo hili, na kama jengo la kanisa lililopo linatosha kuwahudumia waumini wote, je, kunahitajika kujenga jengo jingine la kanisa kubwa zaidi? Manabii wa uongo wapo makini sana kwenye fedha kiasi kuwa wanatafuta kila sababu ili waweze kupata fedha zaidi na zaidi toka kwa waumini wao. Pia huwasukumu waumini wao katika kupanua kengo la kanisa kitu ambacho si cha muhimu ikiwa jengo hilo linatosha kuhudumia waumini waliopo. Wao huendelea kusema kuwa ni lazima tuendeleo kutoa fedha nyingi ili tuweze kumtumikia Bwana vizuri, na kama mtu akitoa fedha hizo wakati huohuo basi mtu huyo atatanzwa pale pale kuwa imani yake ni kubwa. Baadhi yao wanaweka hata ile chati ya kutunzia kumbukumbu ili waweze kutunza kumbukumbu ya kila kitu, yaani kumbukumbu inayoonyesha jinsi kila shemasi alivyotoa kiasi cha sadaka na zaka zake. Wanasababisha hata wale wasio na fedha wasiweze kwenda katika makanisa yao. Kwa kweli hii ndiyo imani hasa ya manabii wa uongo na hayo ndiyo matunda yao.

Ni Lazima Tuyatende Mapenzi ya Mungu Baba

Sisi tunataka kuyafanya mapenzi ya Mungu Baba. Hivyo hatupaswi kuyabeba mapenzi yetu binafsi kwa ukaidi, bali tunapaswa kuifanya kila kazi iliyo njema kwa mapenzi ya Mungu Baba. Ni nani anayeweza kuyafanya mapenzi ya Mungu Baba? Ni watoto wa Mungu tu ndio wanaoweza. Ni nani aliye tayari kufanya mapenzi ya baba wa mwingine? Wale waliotayari kuyafuta mapenzi ya Baba yao ni watoto wake. Hivyo, Ni waamini tu katika injili ya maji na Roho ndio

wanaoweza kuyafuata mapenzi ya Baba. Na kwa kuwa tumepokea ondoleo la dhambi kwa kuamini, na kwa kufanyika watoto wa Mungu, basi ni hakika kuwa sisi tuyafuata mapenzi halisi ya Mungu Baba. Kitendo cha sisi kupokea ondoleo la dhambi, kuiamini injili ya maji na Roho, na kuwafanya watu wote wakombolewe toka katika dhambi zao, basi huko ndiko kuyafanya mapenzi ya Mungu. Na hivi ndivyo kulivyo ‘kuyafanya mapenzi ya Baba aliye Mbinguni’.

Hata hivyo, siku hizi kuna manabii wengi sana wa uongo katika jumuiya za Kikristo. Wanafanya maovu badala ya kufanya mapenzi ya Mungu. Kwa hakika Mungu atawakataa waongo kama hao katika ile siku ya mwisho. Kisha hawa manabii wa uongo watambishia Mungu pale atakapowakataa huku wakisema, “Lakini Bwana, kwa nini unatukataa wakati tulifanya kazi bila kuchoka kwa ajii yako? Je, hatukufanya sana unabii kwa ajili yako? Je, hatukufanya sana unabii ili kwamba kila mtu aweze kukuamini? Tulitoa mapepo kwa jina lako, tuliwaponya wagonjwa, na tulijenga na kuyatoa wakafu makanisa makubwa sana kwako! Pia tuliwatuma wamissionari wengi maelfu kwa maelfu toka katika dhehebu letu, na tulipanda maelfu ya makanisa katika ulimwengu mzima! Inawezekanaje sasa ukaniambia kuwa hunifahamu wakati nilifanya mambo haya yote kwa ajili yako? Je, hakuna tatizo hapa? Hii siyo haki kabisa! Je, haunifanyii kitu ambacho ni kibaya? Je, unaugua ugonjwa wa kusahau?” Huku wakisema kuwa “Je, hatukufanya unabii, hatukufukuza pepo, na kufanya miujiza mingi?”, watu hao watakuwa wakijitangaza wenyewe kuwa ni watumishi waaminifu wa Mungu na hivyo watambishia Mungu.

Lakini Bwana wetu atawaambia, “Ni nani aliyewaambia mnitumikie ninyi mliotenda uovu? Ni nani aliyewaambia kulieneza jina langu? Ni nani aliyewaambia kulifundisha

Neno? Je, niliwaambia mjenge makanisa? Je, niliwaambia mfukuze mapepo? Ni nani aliyewaambia kufanya kazi kwa kuliiba jina langu, ninyi mliotenda maovu? Ni nani aliyewaambia kufanya kazi? Ni nani aliyewaambia mjitoe kwa kazi hiyo? Ondokeni kwangu ninyi mtendao maovu, kwa sina chochote cha kushirikiana nanyi! Kama msingeyafanya mambo haya yote basi ingelikuwa rahisi kwa watumishi wangu wa kweli kuieneza injili ya maji na Roho, lakini mlichokifanya ni kuzuia jitihada zao. Mliishia kufanya kazi za Shetani kama watumishi wa Ibilisi. Sasa, ninyi pamoja na huyo Ibilisi tupweni katika moto wa milele wa kuzimu! Sikilizeni, enyi malaika, hebu watupeni hawa watumishi wa Shetani katika giza!”

Tunachopaswa kukitambua hapa ni kuwa hawa manabii wa uongo na wale ambao hawajazaliwa tena upya watakataliwa na kuachwa na Bwana. Hatima yao ni kutupwa katika ziwa la moto wa milele wa kuzimu. Pia tunapaswa kutambua kuwa kati ya watu wengi wa kidini katika zama zetu nao pia watatupwa katika ziwa hilo.

“Tutafahamu vizuri na kwa uhakika tutakapokuwa kuzimu! Lakini nilisikia kuwa kuzimu imekwisha jaa. Je, kutakuwa na nafasi yangu huko kuzimu? Pengine Mungu atanipeleka Mbinguni badala ya kuzimu kwa kuwa huko kuzimu hakuna nafasi!” Kuna watu wengi wanaosema maneno kama haya ya kipuuzi na kijinga. Watu kama hao hawapaswi kuwa na hofu maana ingawa kuna watu wengi waliofungwa kuzimu, kuzimu yenyewe bado ina nafasi kubwa ya kuwabeba wenye dhambi wote na bado kutakuwa na nafasi iliyobaki.

Hebu jaribu kuangalia nyota za angani. Inawezekana kuwa baadhi ya nyota tunazoziona leo hii zimekuwepo kwa mabilioni ya miaka yaliyopita. Je, unafahamu ulimwengu huo wa anga la nyota na sayari ulivyo mkubwa? Tunapoliangalia

anga nyakati za usiku, basi katika nyota hizo nyingi ilizigharimu mabilioni ya miaka ili kwa miaka yake kuweza kufika hapa duniani na sisi kuweza kuona mwanga wake kwa macho yetu. Na je kuna nyota ngapi katika anga lile? Je, ikiwa anga lina nafasi kiasi hicho, je, itakuwaje huko kuzimu, je hakutakuwa na nafasi ya kukupokea wewe huko kuzimu?

Mungu ni wa milele na uwepo wake wa kimungu upo mahali pote na hauna mipaka katika ulimwengu huu. Mungu wetu anajua yote, na mwenye nguvu, na yupo mahali pote. Hakuna mahali hapa ulimwenguni ambapo Mungu hayupo, na wala hakuna anachoweza kushindwa kukifanya. Je, unafikiri kuwa Bwana wetu atalazimishwa kuwaruhusu wenye dhambi kuingia Mbinguni ati kwa sababu hataweza kupata nafasi ya kutosha huko kuzimu kwa ajili ya kuwaweka wenye dhambi na manabii wa uongo? Ikiwa mtu atafikiria mara mbili kwa kuangalia uumbaji wa Mungu na hali ya asili ilivyo, basi bila shaka mtu huyo anaweza kuachana na imani yake potofu kwa kusema, “Ooh Mungu wangu, hakuna kitu kingine chochote bali ninapaswa kuamini.” Mungu alisema katika Neno lake kuwa, *“Kwa sababu mambo yake yasiyoonekana tangu kuumbwa ulimwengu yanaonekana, na kufahamika kwa kazi zake; yaani, uweza wake wa milele na Uungu wake; hata wasiwe na udhuru”* (Warumi 1:20).

Ni lazima tuwatambue manabii wa uongo, pamoja na uongo wao wanaoutumia kuwapotosha watu. Ikiwa tutawafuata manabii hao wa uongo kwa upofu, basi sisi sote tutaishia kuzimu. Bwana wetu alisema, *“Basi kila asikiaye hayo maneno yangu, na ya kufanya, atafananishwa na mtu mwenye akili, aliyejenga nyumba yake juu ya mwamba,”* Kama Yesu alivyosema kwamba yeyote anayelisikia Neno la Mungu na kulifanya basi ndiye aliyejenga nyumba yake katika mwamba, na hakuna mwingine anayelisikia na kulifanya Neno la Mungu

zaidi ya wale waliozaliwa tena upya. Ni wale tu ambao wameoshwa toka katika dhambi zao kwa kuamini katika injili ya maji na Roho ndio wanaoweza kufanya mapenzi ya Baba.

Ni wale waliozaliwa tena upya tu ndio wanaoweza kujenga nyumba ya imani katika Ufalme wa Mungu. Sisi sote tunaijenga nyumba ya imani kwa kuamini katika Neno la injili ya maji na Roho na kwa kusimama imara katika Neno. Nyumba ya jinsi hii iliyojengwa kwa imani haiwezi kuporomoja hata siku moja. Na hapo baadaye, hata kama mafuriko yataujilia ulimwengu huu, hata kama tufani ikija, na hata kama tutapigwa na mawimbi makubwa, basi nyumba yetu haitaweza kuanguka kamwe kwa kuwa tumeijenga nyumba yetu katika mwamba na kwa sababu hiyo huu mwamba unatukinga na dhoruba hizo zote. Kinyume na hayo, wale wanaomwamini Yesu pasipo kuzaliwa tena upya hao wamezijenga nyumba zao katika mchanga kwa mawazo yao binafsi, na kwa sababu hiyo siku ile ya hukumu itakapokuja, basi hizo nyumba zao zitaanguka na anguko lake litakuwa kubwa. Haijalishi jinsi watakavyokuwa wamezijenga nyumba zao, lakini kwa kuwa wamezijenga nyumba hizo katika mchanga, basi mafuriko yatakapokuja na maji yatakapoanza kuingia ndani, basi ile misingi yao itasombwa na anguko la nyumba zao litakuwa la kustaajabisha.

Kaka zangu na dada zangu, ninyi nyote mnapaswa kujihadhari na manabii wa uongo ambao hawalifahamu Neno la injili ya maji na Roho, na kwa sababu hiyo hawajazaliwa tena upya, na ambao wanawaongoza watu kwenda katika njia pana ya maangamizi.

Mti Mzuri Unazaa Matunda Mazuri

Mti mzuri wa kweli unazaa matunda mazuri. Kwa kuwa mti wenyewe ni mzuri, basi mti huo umefungwa ili kuzaa matunda mazuri. Wale waliozaliwa tena upya ni kama miti iliyopandwa kando kando ya mto wanaozaa matunda mema wakati wote kwa mujibu wa majira pasipo kujali mapungufu waliyonanyo. Ikiwa mti mzuri utatunzwa vizuri kwa maji na mbolea basi mti huo utazaa matunda vizuri bila shida. Wenye haki wanazaa matunda sana si kwa kuwa wanataka kufanya hivyo bali ni kwa sababu wanalisikia Neno la Mungu na kuliadini ndio maana wanazaa matunda ya haki. Matunda mazuri yanatoka kwa wenye haki tu.

Sasa ni vipi kuhusu? Je, wewe ni mti mzuri kiroho? Je, mmefanyika kuwa watu wa Mungu ambao mmepokea ondoleo la dhambi kwa kuamini katika injili ya maji na Roho? Je, mmeokolewa toka katika dhambi zetu kwa kuamini katika injili ya maji na Roho, na je mmefanyika wenye haki? Wenye haki ndio watakatifu wa kweli mbele za Mungu. Waamini wa injili ya maji na Roho ndio wanaoweza kufanyika kuwa watumishi wa Mungu.

Kama Yesu alivyosema kuwa mti hufahamika kwa matunda yake mazuri ya kiroho, basi wale wote wanapenda kuongelea fedha tu hao ni manabii wa uongo. Lakini wale wanaoihubiri injili ya maji na Roho na kuzaa matunda ya haki, basi hao ndio manabii wa kweli. Inapotokea kuwa wachungaji wamegubikwa na fedha tu huku wakibuni kila mbinu ili kuyajenga makanisa yao hata pale waumini wao wanapokuwa na hali mbali hali wakihangaikia maisha yao, tunawezaje basi kuwataja wao kama miti mizuri? Ni kweli kuwa Mungu anafurahishwa wanapokamilisha ujenzi wa makanisa yao makubwa yaliyo na tuhuma? Je, Mungu anafurahishwa na

Wakristo vipofu ambao wameyajaza makanisa yao makubwa?

Kaka zangu na akina dada, kwa kweli mnapaswa kuiamini injili ya maji na Roho na kisha muieneza kwa kila mtu. Maisha yetu hapa duniani ni ya kitambo tu na mara tutajikuta tukisimama mbele za Mungu. Maisha ya kuishi hali ukiieneza injili ya maji na Roho ili wengine waweze kupokea ondoleo la dhambi zao ndiyo maisha sahihi ya kuishi mbele za Mungu. Wale wanaowaongoza wengine ili waweze kuifikia haki ya Mungu kwa kuisikia injili ya maji na Roho kwa masikio yao, na ili waweze kuelewa kwa akili zao, na ili waweze kuamini kwa mioyo yao, na ili kwamba waweze kuokolewa toka katika dhambi zao kwa kuzikiri kwa vinywa vyao—basi hao si wengine bali ndio ile miti mizuri inayozaa matunda mazuri.

Katika nyakati hizi, sisi sote inatupasa kuieneza injili ya maji na Roho, ambalo ni Neno la Mungu kwa kila mtu ulimwenguni. Ni lazima tuwafundishe wengine ili wajue jinsi manabii wa uongo walivyo. Hivi karibuni tumekuwa tukiyasambaza magazeti yetu ya injili, na tumekuwa tukipokea simu toka kwa wasomaji wetu wakitaka tuwafundishe kuwatambua manabii wa uongo.

Kitendo cha sisi kuieneza injili ya maji na Roho ni kama kuwakomboa watu na kisha kuwapeleka kwa Mungu toka katika unyonyaji wa waongo. Ni lazima tumfundishe kila mtu ili aweze kuwatambua hao waongo na pia ili waifahamu injili ya kweli ya maji na Roho, na kisha tuwahubirie injili hiyo ya maji na Roho ili kwamba wote watakaoamini waokolewe toka katika dhambi zao.

Tunachopaswa kukifahamu hapa ni kuwa ile njia nyembamba, ambayo ni njia ngumu, ndiyo njia inayotuongoza kwenda katika uzima. Lakini hata hivyo hakuna watu wengi wanaobisha hodi katika lango la mlango mwembamba wa uzima. Hata hivyo, ni lazima tuendeleo kuueneza ukweli wa

injili kwa kila mtu. Na ni lazima tuwaonye wale wanaoelekea katika maangamizi yao kuwa sasa wanadanganywa na manabii wa uongo. Hivi ndivyo mimi na wewe tunaoamini katika injili ya maji na Roho tunavyopaswa kufanywa. Bwana wetu alisema, *“Mimi ni nuru ya ulimwengu. Yeye anifuataye hatakwenda gizani kamwe, bali atakuwa na nuru ya uzima.”* (Yohana 8:12). Na Bwana wetu alisema kuwa sisi wenye haki ndio nuru ya ulimwengu. Pia alisema, *“Hakuna mtu ambaye akiisha washa taa huiifunika kwa chombo, au kuiweka mvunguni, bali huiweka juu ya kiango, ili waingiao wapate kuiona nuru yake”* (Luka 8:16). Ni lazima tuuangaze mwanga wa imani inayoamini katika injili ya maji na Roho ili kwamba wote waweze kuuona mwanga wake, waufuate na ili wao pia waweze kuupata mwanga huo.

Kwa kuhitimisha, hebu nikazie mambo makuu ambayo nimeyazungumza kwenu nyote. Katika nyakati hizi za mwisho, ni lazima tulitimize jukumu letu la kuieneza injili ya maji na Roho. Ni lazima tuyafanye mapenzi ya Mungu Baba moja kwa moja bila kujalisha mazingira magumu tunayokutana nayo. Kadri ulimwengu huu unavyozidi kuwa na giza, ndivyo inavyotubidi kuieneza injili, kwa kuwa ni katika nyakati hizi ndipo watu wengi wanavyopaswa kukombolewa toka katika dhambi za ulimwengu na manabii wake wa uongo. Hebu sisi sote tuendeleo kupanda mbegu za injili ya maji na Roho kwa maamuzi makuu na kwa kujitoa. ☒

SURA YA

8



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Uponyaji wa Wakoma wa Kiroho

< Mathayo 8:1-4 >

“Naye aliposhuka mlimani, makutano mengi walimfuata. Na tazama, akaja mtu mwenye ukoma akamsujudia, akisema, Bwana ukitaka, waweza kunitakasa. Yesu akanyosha mkono, akamgusa akisema Nataka; takasika. Na mara ukoma wake ukatakasika. Yesu akamwambia, Angalia, usimwambie mtu; ila enenda zako, ukajionyeshe kwa kuhani, ukaitoe sadaka kama alivyoamuru Musa, iwe ushuhuda kwao.”

Wanasema kuwa mkoma hawezi kuzihisi dalili za ukoma hadi baada ya kupita kwa miaka mitatu tangu alipopata kirusi cha ukoma. Lakini tangu mwaka wa nne, basi kuna baadhi ya dalili zinaanza kujitokeza taratibu. Kisha inachukua miaka mingine mitatu zaidi ambapo mgonjwa wa ukoma hawezi tena kuzificha dalili alizonazo kwa watu wengine kwa kuwa dalili za ugonjwa huo zitaonekana kwa wazi. Hii ndiyo asili ya ukoma.

Kifungu cha maandiko cha leo kinaelezea Yesu juu ya uponyaji wa Yesu kwa mwenye ukoma. Tukio linaloelezwa katika kifungu hiki lilitokea kweli na kwa kupitia tukio hilo Mungu anaifunua asili ya dhambi, na pia Mungu anatueleza ukweli kuwa Mungu amekwisha lighulikia tatizo la dhambi zetu.

Mkoma anayeelezewa katika kifungu cha leo hakujificha

mbali alikuja mbele za Yesu na akamwomba ili amponye, kwa kuwa alikuwa akitamani sana kuponywa ugonjwa wake. Huyu mkoma alikuwa na imani kuwa Yesu angaliweza kuponya ugonjwa wowote, na kwamba hakuna yeyote ambaye angaliweza kumponya zaidi ya Yesu na kisha kumfanya kuwa safi. Yesu aliiona imani ya mkoma huyu na akamtimizia hitaji lake la uponyaji, jambo kama hilo lilitokea pia kwa yule akida baadaye. Hapa tunapaswa kukumbuka kuwa kile ambacho Yesu alitaka kukiponya kweli kweli haukuwa hasa ugonjwa wa kimwili, bali alitaka kuponya ugonjwa wa dhambi.

Ukoma unaonyesha kuwa katika mioyo na miili yetu kuna dhambi ambazo zipo kama ugonjwa huu. Tangu wakati ule tulipozaliwa toka katika matumbo ya mama zetu, sisi sote tulizaliwa na magonjwa 12 ya dhambi. Tulipokuwa watoto wachanga, hatukuweza kutambua kuwa tulikuwa ni viumbe waovu kiasi hicho, lakini baada ya kukua na kufikia umri fulani ndipo tulipofikia kuzitambua nafsi zetu na hatukuweza kuificha hiyo hali yetu mbele za Mungu. Kisha tukaja mbele za Yesu kwa imani, na kisha tukamwambia, “Ukitaka waweze kututakasa toka katika dhambi zetu.” Hivi ndivyo mimi na wewe tulivyopokea ondoleo la dhambi zetu. Tunapokuwa na imani kama hiyo kuwa Yesu anaweza kutuponya toka katika dhambi zetu basi ni wazi kuwa tunaweza kuvumilia manyanyaso yoyote.

Je, Yesu alimponya mkoma huyu mara moja, au alichukua muda zaidi kumponya mkoma huyu? Biblia inasema kuwa Yesu alimponya mkoma huyu mara moja. Hivyo ni lazima utambue kuwa Yesu hajakuponya toka katika dhambi zako kwa hatua kadhaa, bali amekuponya wewe mara moja na kwa wote kwa kupitia Neno la injili ya maji na Roho.

Yule mwanamke aliyekuwa akiugua ugonjwa wa kutoka damu aliponywa mara moja mara alipoligusa vazi la Yesu kwa

imani (Marko 5:25-34). Naamani, yule kamanda wa jeshi la mfalme wa Siria aliponywa pia ukoma mara moja wakati alipolitii Neno la Mungu kwa imani (2 Wafalme 5:1-14), na pia mkoma anayetajwa katika kifungu cha leo pia aliponywa mara moja mara mkono wa Yesu ulipomgusa. Ikiwa tutakuwa na imani katika Neno la Mungu, basi sisi sote tunaweza kufahamu na kuamini katika nguvu ya wokovu ambayo imezifanya dhambi zetu zote kutoweka, na kwa imani hii, basi sisi sote tunaweza kupokea ondoleo la dhambi la milele mara moja na kwa wote. Ugonjwa wa dhambi wa kila mtu hauwezi kuponywa hatua kwa hatua, bali unaponywa mara moja kwa imani katika Neno.

Tofauti Kati ya Imani ya Wanadini na ile ya Wale Wanaoamini Katika Nguvu ya Injili ya Kweli

Tofauti kati ya wanadini na watu wa imani ya kweli ni hii: kutokana na ujinga wao wa kutoifahamu kweli, basi wanadini wanafikiri kimakosa kuwa wanaweza kuondolewa dhambi zao kwa kuomba maombi ya toba kila siku hata pale wanapokuwa wakiendelea kuishi katika dhambi siku kwa siku, lakini kwa upande mwingine, waamini wa injili ya maji na Roho sasa wanaishi katikati ya baraka za Mungu kama watoto wa Mungu baada ya kuwa wameondolewa dhambi zao mara moja na kwa wote.

Biblia inatangaza wazi kuwa kila mtu anaweza kuokolewa toka katika dhambi zake zote kwa imani tu katika Neno la Mungu. Ikiwa tungeliweza kulitatua tatizo la dhambi za moyo kwa jitihada zetu wenyewe, yaani kwa kutumia nguvu zetu wenyewe, kazi zetu wenyewe, maombi yetu ya toba, na matendo yetu mema, basi ni hakika kuwa kusingekuwa na haja

ya Yesu kuja hapa duniani. Na kama tungelikuwa tumelitatua tatizo la dhambi kwa jitihada hizo, basi tusingeliweza kabisa kukutana na Yesu katika maisha yetu yote.

Hakuna anayeweza kutatua tatizo la dhambi kwa jitihada zake mwenyewe hata kama atajaribu kwa kiasi gani, suluhiso pekee la dhambi linapatikana kwa kuamini injili ya maji na Roho. Wanadamu ni viumbe ambao hawawezi kuikwepa dhambi bali wataitenda tu hata kama watajaribu kutofanya dhambi, na kwa sababu hiyo ni lazima waamini katika injili ya maji na Roho. Ikiwa mtu atatambua wazi kuwa maombi yake ya toba hayawezi kuziondoa dhambi zake, na kwamba yeye mwenyewe hawezi kulitatua tatizo la dhambi zake; bali ikiwa mwenye dhambi huyu atakuja mbele za Mungu na kukiri kuwa yeye ni mwenye dhambi mkubwa; na ikiwa mwenye dhambi huyu ataamini katika injili ya maji na Roho, basi hakuna dhambi yoyote ndani yake ambayo haiwezi kutooshelewa mbali. Wakati wenye dhambi wanapokuja mbele za Yesu na kumwomba rehema zake, basi ni hakika kuwa Yesu ataziondolea mbali dhambi zao mara moja na kwa wote kwa kupitia injili ya maji na Roho kama alivyomponya yule mkoma mara moja.

Ni hadi pale nafsi zetu zitakapokuwa zimefunuliwa kikamilifu mbele za Mungu kuwa sisi ni wenye dhambi na kwamba tunatamani kupokea wokovu wa Yesu ndipo Bwana atakapoziondolea mbali dhambi zetu zote kwa kutupatia injili ya maji na Roho. Unapaswa kutambua kuwa ni wale tu wanaoiomba rehema ya Mungu kwa kusema, “Bwana, naomba unirehemu mimi. Siwezi kufanya lolote zaidi ya kuelekea kuzimu kwa sababu ya dhambi zangu,” ndio wanaoweza kukombolewa toka katika dhambi zao zote na kufanyika kuwa watoto wa Mungu mwenyewe. Wenye dhambi wote wanapoiubali kimsingi hali yao ya dhambi na kumwomba

Bwana rehema zake, basi Mungu atawapatia ondoleo la dhambi la milele ambalo amekwisha kulitimiza kwa kupitia injili ya maji na Roho.

Warumi 3:10 inasema, *“Hakuna mwenye haki hata mmoja.”* Kwa mujibu wa kifungu hiki cha maandiko, Mtume Paulo alikuwa akizungumzia juu ya wale ambao bado hawajapokea ondoleo la dhambi za. Yesu alikuja hapa duniani ili kuwafanya wenye dhambi kuwa wasio na dhambi na kuwageuza kuwa watoto wa Mungu. Lakini kwa bahati mbaya, Wakristo wengi bado wanaonekana kuwa ni wenye dhambi nusu. Ingawa katika ulimwengu huu kunaweza kuwa na wenye dhambi nusu au wenye haki nusu, lakini ukweli ni kuwa katika Ufalme wa Mungu hakuna wenye haki nusu wala wenye dhambi nusu. Wenye dhambi nusu ni akina nani? Ni wale wanaojaribu kusamehewa dhambi zao kwa kusali sala za toba kila siku. Dhambi zetu haziwezi kutoweshewa mbali kwa kutoa sala kama hizo za toba, bali dhambi zetu zinatoweshewa mbali kwa kuamini katika injili ya maji na Roho.

Yesu ndiye aliyewaponya wanadamu kikamilifu toka katika ugonjwa wao wa dhambi kwa ukweli wa injili ya maji na Roho. Yesu alipokuwa akizungumzia dhambi hakutofautisha kati ya dhambi ya asili na dhambi binafsi, na pia haikubali na kuithibitisha imani ya wale wanaoamini kuwa ingawa Yesu aliichukua dhambi yao ya asili, basi wao wanapaswa kusamehewa dhambi zao binafsi kwa sala za toba. Wale wanaoamini hivyo wanauumiza moyo wa Mungu na wataangamizwa, kwa kuwa watabakia na kuishi maisha yao yote kama wenye dhambi.

Mungu haikubali imani kama hiyo. Ikiwa mtu anamwamini Yesu, basi anapaswa kumwamini Yesu asilimia 100%; lakini kama hamwamini Yesu basi ni kuwa hamwamini kwa asilimia zote 100%. Kwa maneno mengine, hakuna imani

ya asilimia 50%. “Fundisho la kiimani la kuhesabiwa haki kwa imani” ni kitu gani? Ni ‘ukiri wa imani wa kuhesabiwa haki kwa imani’—hii ni kusema kwamba, Wakristo wanaweza kuitwa kuwa wenye haki kwa sababu ya imani yao katika Yesu hata kama bado wana dhambi katika mioyo yao. Kwa kweli fundisho hili halina maana! Bwana wetu hamkubali mtu mwenye dhambi kuwa hana dhambi ati kwa sababu tu anamwamini Yesu. Tunapofikia kuifahamu injili ya maji na Roho toka katika Maandiko, tunafahamu kuwa Biblia inatueleza kuwa wakati Bwana wetu anapokuwa ametuondolea dhambi zetu na kuzitoweshea mbali kikamilifu, basi dhambi za kila mtu zinakuwa zimetoweka. Hivyo kinachokuwa kimezioshelea mbali dhambi zetu ni ule ubatizo wa Yesu alioupokea (1 Petro 3:21).

Kwa ujumla, viongozi wengi wa Kikristo siku hizi wanasema kuwa Yesu aliichukua dhambi ya asili, na kwamba tunapaswa kuondolewa dhambi zetu binafsi kwa kutoa sala za toba. Hata hivyo Biblia haitofautishi kati ya ‘Dhambi’ na ‘madhambi’, kwa maneno mengine Biblia haitofautishi kati ya dhambi ya asili na dhambi binafsi. Mbele za Yesu, dhambi zote kwamba ni kubwa au ndogo, kwamba ni za asili au binafsi, zinatambulika zote kuwa ni ‘dhambi za ulimwengu’ (Yohana 1:29). Kama maji machafu, maji ya bombani, na maji yanayopita korongoni yanavyojulikana kuwa yote ni maji tu, basi vivyo hivyo dhambi zote ni dhambi zilezile za ulimwengu. Kama ilivyoandikwa katika Biblia, *“Hao ni viongozi vipofu wa vipofu. Na kipofu akimwongoza kipofu mwenzake, watatumbukia shimoni wote wawili”* (Mathayo 15:14), kwa kuwa viongozi wao wenyewe hawajazaliwa tena upya, basi ni wazi kuwa hawafahamu namna ya kulishughulikia tatizo la dhambi, na hii ndiyo sababu wanaamini katika fundisho la kiimani lisilo na msingi kibiblia hali wakiwaambia Wakristo

wao kuwa Mungu atazisamehe dhambi zao ikiwa watatoa sala za toba.

Kila Mtu Ni Lazima Aamini Katika Nguvu ya Injili ya Maji na Roho

Sasa, toba la kweli la ondoleo la dhambi ni nini? Ni kugeuka toka katika ufahamu mbaya na imani potofu na kisha kuamini kile kilicho sahihi. Dhambi za mwanadamu haziwezi kusamehewa kwa kumwomba Mungu ili awasamehe kila siku.

Bwana anasema, *“Maana nataka fadhili wala si sadaka; Na kumjua Mungu kuliko sadaka za kuteketezwa”* (Hosea 6:6). Bwana wetu Yesu alikuja hapa duniani kwa kuzihurumia nafsi zote zilizokuwa zimefungwa kuzimu kwa ajili ya dhambi. Mungu, kwa mapenzi yake alitaka kuwafanya wenye dhambi kuwa wasio na dhambi kwa kupitia Yesu Kristo, na kuwatakasu, na hivyo kuwawezesha kushiriki katika Ufalme wa Mungu. Hii ndiyo sababu Bwana wetu alikuja hapa duniani na akayatimiza mapenzi ya Baba kikamilifu kwa kupitia injili ya maji na Roho.

Warumi 6:23 inasema, *“Kwa maana mshahara wa dhambi ni mauti; bali karama ya Mungu ni uzima wa milele katika Kristo Yesu Bwana wetu.”* Pamoja na kuwa Mungu wetu ni Mungu wa upendo, ukweli unabakia kuwa Mungu hatakwepa kuwapeleka wale wote walio na dhambi kuzimu, na upendo wa Mungu ni wa kule kuwapatia waamini wa injili ya maji na Roho ondoleo la dhambi, ili kwamba Mungu aweze kukaa ndani yao milele katika Ufalme wake. Kwa maneno mengine, Mungu ametupatia karama ya ondoleo la dhambi ambalo limetufanya sisi kuwa tusio na dhambi.

Siku hizi kuna Wakristo wengi sana ambao wanaamini

katika Yesu kwa namna yao binafsi, na katika namna yoyote wanayoipenda hali wakifanya hayo yote kwa kuyafuata mawazo yao binafsi. Huku wakisema kuwa mtu fulani sasa anasimama mbele za Mungu kwa utakatifu kwa kutoa zaka, kwa kujitoa kidini, kwa kuchangia fedha nyingi, kwa kuhudhiria vipindi vya maombi asubuhi, na kadhalika. Mtu wa jinsi hiyo anaweza usema hivi mbele za Bwana, “Bwana, mimi nipo hapa. Mimi ni mwenye dhambi mwenye maovu mengi na sasa nasimama mbele ya uwepo wako!” Je, unafikiri Bwana atamwambia nini?

Katika Mathayo 7, Yesu alisema, *“Si kila mtu aniambiaye, Bwana, Bwana, atakayeingia katika ufalme wa mbinguni; bali ni yeye afanyae mapenzi ya Baba yangu aliye mbinguni. Wengi wataniambia siku ile, Bwana, Bwana, hatukufanya unabii kwa jina lako, na kwa jina lako kutoa pepo, na kwa jina lako kufanya miujiza mingi? Ndipo nitawaambia dhahiri, Sikuwajua ninyi kamwe; ondokeni kwangu, ninyi mtendao maovu.”* Hivi ndivyo Bwana atakavyomwambia mwenye yule mwenye dhambi. Mungu wetu si Baba wala si Bwana wa wenye dhambi, bali ni Baba wa wenye haki na Bwana wa wale waliozaliwa tena upya na ambao wamepokea ondoleo la dhambi zao. Hata kama mtu huyu mweney dhambi atamwambia Bwana, “Bwana, hunifahamu? Kwa kuwa nilijitoa maisha yangu yote kwa ajili ya kulishuhudia jina lako,” Mungu atamwambia, “Unadirikije kujifanya kuwa ni mtoto wangu wakati una dhambi. Kinachokungojea wewe ni kuzimu, wewe uliyetenda maovu!”

Kwa hiyo, kitu ambacho wenye dhambi wanatakiwa kukifanya kwanza ni kuamini katika Neno la injili ya maji na Roho sasa hivi na kisha kupokea ondoleo la dhambi kwa imani. Kwa kweli hii ndiyo imani iliyo bora kuliko zote. Viongozi wa uongo wa Kikristo wanaweza kuwakusanya wenye dhambi wote ambao hawajapokea ondoleo la dhambi katika makanisa

yao. Lakini kuna mtu anayeweza kuwaita watu hao kuwa ni watakatifu? Inawezekanaje kukawa na watakatifu wenye dhambi? Yeyote aliye na dhambi si mtakatifu bali ni mwenye dhambi tu. Mtu anaweza kuitwa mtakatifu asiye na dhambi pale tu anapokuwa amepokea ondoleo la dhambi kwa kuamini injili ya maji na Roho.

Katika kitabu cha Hosea 4:6 imeandikwa kuwa, *“Watu wangu wanaangamizwa kwa sababu ya kukosa maarifa; Kwa kuwa wewe umeyakataa maarifa, mimi nami nitakukataa wewe, usiwe kuhani kwangu mimi; Kwa kuwa umeisahau sheria ya Mungu wako, mimi nami nitawasahau watoto wako.”*

Mwanzo wa maarifa ni kumfahamu Mungu, lakini kuna watu wengi sana ambao wanashindwa kuyaachilia mbali mawazo yao mabaya na wanaishi kama wanafiki. Na hivi ndivyo Bwana wetu atakavyowaambia watu kama hao siku ya mwisho, “Sikuwajua ninyi.”

Njia pekee kwa mwenye dhambi kufanyika asiye na dhambi ni kwa kuamini katika Neno la ondoleo la dhambi. Ni lazima tuwe na imani katika Uungu wa Yesu pamoja na imani yetu katika ijili ya maji na Roho. Lakini bado kuna watu wengi ambao wameidharau nguvu ya injili ya ubatizo wa Yesu na Msalaba wake hali wakiyaharibu maisha yao kwa kufuata fundisho la kiimani la utakaso unaozidi kwa msingi wa imani potofu kuwa wanaweza kuzisafisha dhambi zao hatua kwa hatua.

Ukristo si dini ambayo mtu anaweza kuufikia wokovu wake kwa jitihada zake na nidhamu yake kama Wabudha wanavyokazia kuwa mtu ni lazima ajitahidi kuwa mwema na mwenye rehema. Lakini ukweli ni kuwa haiwezekani mwanadamu akawa hana dhambi kabisa hata kama atajitahidi kiasi gani kuwa mwema. Imani ya kweli ya Kikristo ya kweli ni ile inayoamini katika wokovu wa neema ya injili ya maji na Roho, ambayo inatiririka kutoka juu pasipo jitihada zozote za

kibinadamu—maana yake ni kuwa ni imani inayoamini katika upendo wa Mungu ambao umetukomboia toka katika kuzama. Kama yule mkoma alivyoponywa mara moja ule ugonjwa wake kwa upendo wa Yesu na nguvu ya kweli, basi sisi nasi tunaweza pia kuokolewa toka katika dhambi zote za mioyo yetu kadri tunavyoamini katika nguvu ya injili ya maji na Roho na kisha kuutambua upendo wa Bwana kwetu sisi.

Katika Agano la Kale, Mungu Alionyesha Wokovu Wake Kwa Kupitia Musa

Kitu ambacho Bwana alimwambia yule mkoma baada ya uponyaji ni hiki: *“Angalia, usimwambie mtu; ila enenda zako, ukajionyeshe kwa kuhani, ukaitoe sadaka kama alivyokuamuru Musa, iwe ushuhuda kwao.”* Sadaka ambayo Musa aliamuru i mwanakondoo, yaani mnyama wa sadaka ya kuteketezwa.

“BWANA akamwita Musa, na kusema naye kutoka katika hema ya kukutania, akamwambia, Nena na wana wa Israeli, uwaambie, Mtu wa kwenu atakapomtolea BWANA matoleo, mtatoa matoleo yenu katika wanyama wa mifugo, katika ng’ombe na katika kondoo. Matoleo yake kwamba ni sadaka ya kuteketezwa ya ng’ombe, atatoa ng’ombe mume mkamilifu; ataleta mlangoni pa hema ya kukutania, ili akubaliwe mbele ya BWANA. Kisha ataweka mkono wake juu ya kichwa cha hiyo sadaka ya kuteketezwa; nayo itakubaliwa kwa ajili yake, ili kufanya upatanisho kwa ajili yake.” (Mambo ya Walawi 1:1-4).

Kuhusiana na sadaka ya Musa aliyoiamuru, aya ya 2 inasema, *“mtatoa matoleo yenu katika wanyama wa mifugo, katika ng’ombe na katika kondoo.”* Mungu aliwawezesha wanadamu kujitambua kuwa ni wenye dhambi kwa kuwapatia sheria, na kisha kwa kupitia utaratibu wa sadaka ya

kuteketezwa wa Hema Takatifu la Kukutania, Mungu aliwapatia watu wa Israeli kitu ambacho kwa hicho wataweza kuondolewa dhambi zao kwa kuzipitisha dhambi zao juu ya wanyama hao wa sadaka ya kuteketezwa. Mungu alitupenda sana na akataka kutuokoa toka katika dhambi zetu na akaanzisha utaratibu wa sadaka ya kuteketezwa kama kondoo na ng'ombe ambao walipaswa kufa kwa niaba yetu.

Katika utaratibu huu wa sadaka ya kuteketezwa, “kule kuwekea mikono” kulikuwa ni tendo la muhimu sana. Kitendo hiki kilimaanisha kuwa ni “kuipitisha kwenda” au “kuhamishia.” Wakati mtu anapokuwa amepagawa na mapepo basi ikiwa mtu huyo ataweka mikono yake juu ya mtu mwingine, basi mtu huyo naye pia atapagawa na mapepo pia, kwa kuwa kule kuiweka mikono juu yao kuna maanisha ni “kuipitisha kwenda.” Kwa hiyo wakati mwenye dhambi wa Agano la Kale alipoiweka mikon yake juu ya kichwa cha mwanakondoo sadaka ya kuteketezwa, basi dhambi zote katika moyo wake zilipitishwa na kuhamishiwa juu ya mnyama yule (Mambo ya Walawi 16:21). Baada ya hayo, yule mwenye dhambi alipaswa kumchinja yule mnyama wa sadaka ya kuteketezwa na kuikinga damu yake, kisha kuhani aliichukua baadhi ya damu ile kwa kidole chake akaiweka katika pembe za madhabahu ya sadaka ya kuteketezwa, na kisha akaimwaga damu yote iliyosalia chini ya madhabahu. Kisha kuhani alipaswa kumchoma yule mnyama katika madhabau ya uvumba kwa Bwana. Hivi ndivyo Waisraeli walivyoweza kupokea ondoleo la dhambi katika kipindi cha Agano Jipya (Mambo ya Walawi 4:27-31).

Damu iliyowekwa chini ya madhabahu ulikuwa ni uhai kwa ajili ya mshahara wa dhambi. Biblia inasema kuwa uhai wa mwili umo ndani ya damu, na kwamba ni damu ndiyo inayofanya upatanisho kwa ajili ya nafsi (Mambo ya Walawi

17:11). Pembe za madhabahu ya sadaka ya kuteketezwa zina maanisha ni Kitabu cha Hukumu (Ufunuo 20:12). Kila dhambi inapaswa kuandikwa katika vitabu. Na wenye dhambi watahukumiwa kwa mujibu wa kazi zao, kwa mambo yale yaliyoandikwa katika vitabu. Hii ndio sababu tunapaswa kupokea ondoleo la dhambi kamilifu la dhambi zetu tunapokuwa tukiishi katika ulimwengu huu.

Je, sisi, katika kipindi hiki cha Agano Jipya, tunapokea ondoleo la dhambi kwa aina ipi ya imani? Ni wapi tunapoweza kupata uthibitisho kuwa tumeokolewa toka katika dhambi zetu? Uthibitisho wa wokovu wetu toka katika dhambi zetu zote unaweza kuonekana tu katika imani yetu katika injili ya maji na Roho; na wala si kwa kupitia maono, uvuvio, au kwa kunena kwa lugha. Tunaweza kujitambua kuwa sisi ni wenye dhambi kwa kutumia Neno la Mungu tu, na kisha tunaweza kuthibitisha jinsi ambavyo tumeokolewa toka katika dhambi zetu zote. Neno hili la ushuhuda ni Neno la injili la maji na Roho.

“Kwa maana jinsi hii Mungu aliupenda ulimwengu hata akamtoa Mwanawe pekee, ili kila amwaminiye asipotee bali awe na uzima wa milele” (Yohana 3:16). Mungu Baba alimtoa Mwanawe pekee Yesu ili kutuokoa toka katika dhambi zetu zote za ulimwengu. Je, Yesu alituokoa vipi toka katika dhambi zetu? Yesu aliitimiza haki yote ya Mungu kwa kuja hapa duniani, na kwa kufanyika sadaka yetu ya kuteketezwa kama vile wanakondoo wa sadaka ya kuteketezwa na mbuzi wa Agano la Kale, hali akiyapokea maovu ya wenye dhambi katika mwili wake kwa ubatizo wake na kisha akazitoweshea mbali dhambi za ulimwengu. Ukweli huu ulionyeshwa kwa kupitia sadaka ya kila siku ya Agano la Kale. Ni lazima tutambue kuwa wakati Yesu alipokuja hapa duniani alizipokea dhambi zetu zote tunazozifanya kila siku. Ni kwa kutambua hivyo tu ndipo tunapoweza kuwa huru toka katika dhambi zote za ulimwengu.

Sadaka ya Upatanisho ya Agano la Kale

Hebu tugeukie Mambo ya Walawi 16:29-34. *“Amri hii itakuwa amri ya milele kwenu; katika mwezi wa saba, siku ya kumi ya mwezi, mtajitaabisha roho zenu, msifanye kazi ya namna yoyote, mzalia na mgeni akaaye kati yenu. Kwa maana siku hiyo upatatanisho utafanywa kwa ajili yenu, ili kuwatakaswa; nanyi mtatakaswa na dhambi zenu zote mbele za BWANA. Ni Sabato ya raha ya makini kwenu nanyi mtajitaabisha roho zenu; ni amri ya milele. Na kuhani atakayetiwa mafuta na kuwekwa wakfu badala ya baba yake, ataufanya huo upatanisho, naye atayavaa mavazi ya kitani, yaani yale mavazi matakatifu. Naye atafanya upatanisho kwa ajili ya patakatifu, naye atafanya upatanisho kwa ajili ya Hema Takatifu la Kukutania, na kwa ajili ya madhabahu; naye atafanya upatanisho kwa ajili ya makuhani, na kwa ajili ya watu wote wa kusanyiko. Na amri hii itakuwa amri ya milele kwenu, ili kufanya upatanisho kwa ajili ya wana wa Israeli kwa sababu ya dhambi zao zote, mara moja kila mwaka.”*

Kifungu hiki cha maandiko kinaelezea juu ya sadaka ya Siku ya Upatanisho ambayo Mungu aliiruhusu kwa Waisraeli kwa ajili ya wale ambao hawakuweza kutoa sadaka kila siku, ambapo Kuhani Mkuu aliweza kutoa sadaka za kuteketezwa mara moja kwa mwaka kwa ajili ya watu wote wa Israeli. Kwa kupitia sadaka hii ya kuteketezwa ya mwaka, Mungu aliitoa baraka ya ondoleo la dhambi la mwaka mzima kwa watu wa Israeli.

Mambo ya Walawi 16:6-10 inasema kuwa, *“Na Haruni atamtoa yule ng’ombe wa sadaka ya dhambi, aliye kwa ajili ya nafsi yake, na kufanya upatanisho kwa ajili ya nafisi yake mwenyewe, na kwa ajili ya nyumba yake. Kisha atawatwaa wale mbuzi wawili na kuwaweka mbele za BWANA mlangoni pa hema ya kukutania. Na Haruni atapiga kura juu ya wale*

mbuzi wawili; kura moja kwa jili ya BWANA; na kura ya pili kwa ajili ya Azazeli. Na Haruni atamleta yule mbuzi aliyeangukiwa na kura kwa ajili ya BWANA, na kumtoa awe sadaka ya dhambi. Bali yule mbuzi aliyeangukiwa na kura kwa ajili ya Azazeli atawekwa hai mbele za BWANA ili kumfanyia upatanisho, ili kumpeleka jangwani kwa ajili ya Azazeli.”

Kwa maneno mengine, Mungu alikuwa ametoa utaratibu wa sadaka ya kuteketezwa ambao uliwaruhusu Waisraeli kupokea ondoleo la dhambi zao kwa kupitia imani yao kwa kuzipitisha sio tu dhambi zao za kila siku, bali dhambi zote za mwaka mzima katika mwanasadaka wa kuteketezwa. Haruni alikuwa ni ndugu yake Musa, na pia alikuwa ni Kuhani Mkuu. Haruni alimleta mmoja kati ya wale mbuzi wawili katika ua wa Hema Takatifu la Kukutania na kisha alizipitisha dhambi na uovu wote wa watu wa Israeli juu ya mbuzi yule kwa kuiweka mikono yake juu ya kichwa cha mbuzi yule. Baada ya kuwa amezipitisha dhambi za Waisraeli juu ya mbuzi yule wa sadaka ya kuteketezwa, basi Kuhani Mkuu alimchinja yule mbuzi, akaichukua damu yake ndani ya chombo kwenda katika Patakatifu pa Patakatifu na kisha akainyunyizia damu ile juu ya kiti cha rehema na upande wa mashariki wa kiti cha rehema mara saba. Hata Kuhani Mkuu hakuweza kuingia kwa kupita lile pazia hadi pale atakapokuwa amepatanishwa kwa kuiweka mikono yake juu ya mnyama wa sadaka ya kuteketezwa na kisha kuingia na ile damu katika Patakatifu pa Patakatifu.

Hema Takatifu la Kukutania liligawanyika katika Mahali Patakatifu na Patakatifu pa Patakatifu, na Kuhani Mkuu aliweza kuingia mahali ambapo Sanduku la Ushuhuda la Mungu lilipokuwepo pale tu alipokuwa na damu ya mnyama wa sadaka ya kuteketezwa ambaye amepokea kule kuwekewa mikono. Mungu aliweza kumruhusu Haruni kupaingia Patakatifu pa Patakatifu wakati alipoiona ile damu ya mnyama wa sadaka ya

kuteketezwa aliyekwisha kuwekewa mikono. Hivyo Haruni alimchinja yule mbuzi wa sadaka ya kuteketezwa ambaye alikuwa amezipokea dhambi za wana wa Israeli kwa kule kuwekewa mikono, kisha akaichukua damu ya mbuzi yhule kwenda nayo Mahali Patakatifu, kisha akainyunyizia juu ya Sanduku la Ushuhuda mara saba. Kwa kuwa kengele za dhahabu zilikuwa zimeambatanishwa katika upindo wa lile joho la Kuhani Mkuu, basi kila alipokuwa akinyunyuzia ile damu zile kengele zilitoa mlio, kwa hiyo watu wa Israeli walipozikia zile Kengele zikilia walifahamu na kuthibitisha kuwa damu ya mnyama wa sadaka ya kuteketezwa ambaye alikuwa amezipokea dhambi zao ili kuwa sasa ikinyunyizwa na kwa sababu hiyo waliweza kuthibitishiwa kuwa ondoleo la dhambi lilikuwa limefanyika katika mioyo ya waamini.

“Naye akiisha kufanya upatanisho kwa ajili ya mahali patakatifu, na Hema Takatifu la Kukutania, na madhabahu, atamleta yule mbuzi aliye hai. Na Haruni ataweka mikono yake miwili juu ya kichwa cha yule mbuzi aliye hai, na kuungama juu yake uovu wote wa wana wa Israeli, na makosa yao, naam, dhambi zao zote; naye ataziweka juu ya kichwa chake yule mbuzi, kisha atampeleka aende jangwani kwa mkono wa mtu aliye tayari. Na yule mbuzi atachukua juu yake uovu wao wote, mpaka nchi isiyo watu, naye atamwacha mbuzi jangwani” (Mambo ya Walawi 16:20-22).

Yule mbuzi mmoja ambaye alikuwa ni kwa ajili ya “Yehova” alitolewa kama sadaka ya dhambi, ambayo kwa hiyo upatanisho ulifanyika. Lakini dhambi za Waisraeli zilipaswa pia kuondolewa toka ndani yao, na kwa sababu hiyo Kuhani Mkuu pia alipaswa kuiweka mikono yake juu ya yule mbuzi mwingine na kisha kuungama dhambi zote za mwaka mzima za Waisraeli na kisha “akamfanya aende kwa ajili ya Azazeli” huko jangwani. (Tazama Mambo ya Walawi 16:8-10 Toleo la

Kimarekani la Kiwango Maalum [American Standard Version]). Kwa kiebrania neno ‘*azazel*’ linapotumika kumtaja yule mbuzi lina maanisha ni ‘wa kuachiwa ili kwenda mbali’ kwa ajili ya utenganisho maalum wa dhambi.

Hali akiwa amemchukua mmoja kati ya wale mbuzi wa makosa, Kuhani Mkuu aliweka mikono yake juu ya kichwa cha huyo mbuzi na kisha akazipitisha dhambi zote juu yake kwa kukiri makosa na uovu wa watu wa Israeli hali wote wakiwa wanaangalia nje ya ua wa Hema Takatifu la Kukutania. Kisha yule mbuzi aliachiliwa ili aende jangwani chini ya mkono wa mtu aliye tayari ili akafe. Kwa maneno mengine, mbuzi wa sadaka ya kuteketezwa, alizibeba dhambi zote za Waisraeli ambazo alikuwa amezipokea kwa kuwekewa mikono na mikono ya Kuhani Mkuu, na mbuzi huyo alipaswa kufa jangwani kwa uhakika. Kwa kitendo cha kumwachia yule mbuzi wa makosa kwenda katika jangwa, Mungu alikuwa amewaweka huru watu wote wa Israeli toka katika dhambi zao. Hii ndiyo sadaka ambayo Mungu alimwamuru Musa ili kuitoa. Mungu aliwawezesha watu wote wa Israeli kupokea ondoleo la dhambi kwa kule kuwekea mikono na kuimwaga damu yao.

Utaratibu wa sadaka ya kuteketezwa ya Agano la Kale ulikuwa ndio ule uliofundisha ukweli kuwa Mungu atamtuma Yesu ili awe kama Mwanakondoo, maana yake kuwa Yesu atazipokea na kuzibeba dhambi zote za kila mwenye dhambi anayeishi katika ulimwengu huu kwa kupitia ubatizo wake, na kwamba kwa sababu hiyo Yesu atazioshelea mbali dhambi zote za wanadamu, yaani dhambi zote za kila siku na dhambi zote za maisha yao yote. Watu wote wa Agano la Kale waliamini kuwa kwa kupitia utaratibu wa sadaka ya kuteketezwa ya Hema Takatifu la Kukutania hapo ndipo ondoleo la dhambi lilipoletwa kwao. Sasa, watu wa Agano Jipya pia wana dhambi zisizohesabika bila kujalisha kuwa dhambi hizo zinafanywa kwa

makusudi au kwa bahati mbaya, na kwa sababu hiyo watu wa Agano Jipya wanahitaji kutafuta namna ya kulitatua tatizo la dhambi hizi na jinsi wanavyoweza kuondolewa dhambi hizo zote.

Sadaka ya Agano Jipya Ya Upatanisho Mkuu

Agano la Kale na Agano Jipya yanakubaliana sana (Isaya 34:16). Je, ni kifungu gani cha Agano Jipya kinachokubaliana na sadaka ya Siku ya Upatanisho ya Agano la Kale? Hebu tuangalie kile ambacho Yesu alikifanya kwanza ili kuzitoweshea mbali dhambi zetu zote.

“Wakati huo Yesu akaja kutoka Galilaya mpaka Yordani kwa Yohana ili abatizwe. Lakini Yohana alitaka kumzuia, akisema, mimi nahitaji kubatizwa na wewe, nawe waja kwangu? Yesu akajibu akamwambia, Kubali hivi sasa; kwa kuwa ndivyo itupasavyo kuitimiza haki yote. Basi akamkubali. Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwaona Roho wa Mungu akishuka kama hua, akija juu yake; na tazama, sauti kutoka mbinguni ikisema, Huyu ni Mwanangu, mpendwa wangu, ninayependezwa naye” (Mathayo 3:13-17).

Mungu alimtuma Mwana wake Yesu kuwa ndiye *“atakawawaokoa watu wake na dhambi zao” (Matthew 1:21)*. Kwa maneno mengine, Yeye aliyeuumba ulimwengu alikuja hapa ulimwenguni kwa kupitia Bikira Mariam akafanyika mwili wa mwanadamu kama Mwanakondoo wa sadaka ya kuteketezwa. Huduma ya Yesu ilianza kwa ubatizo. Kifungu hicho hapo juu kinazungumzia wakati ambapo Yesu alikuwa amefikisha miaka 30. Huu ulikuwa ndio mwaka ambao Yesu alibatizwa na Yohana Mbatizaji.

Je, Yohana Mbatizaji ni nani? *“Amin, nawaambieni,*

Hajaondokea mtu katika wazao wa wanawake aliye mkuu kuliko Yohana Mbatizaji; walakini aliye mdogo katika ufalme wa mbinguni ni mkuu kuliko yeye. Tangu siku za Yohana Mbatizaji hata sasa ufalme wa mbinguni hupatikana kwa nguvu, nao wenye nguvu wauteka. Kwa maana manabii wote na totrati walitabiri mpaka wakati wa Yohana” (Mathayo 11:11-13).

Kama kifungu hicho hapo juu cha maandiko kinavyotueleza, Yesu alisema kuwa “miongoni mwa wale waliozaliwa na wanawake hakuna aliyeinukia na kuwa mkuu kuliko Yohana Mbatizaji.” Yaani yeye ambaye ni mkuu kuliko wote hapa duniani, yaani mkuu kuliko Isaya, Ezeieli, na Eliya, na mkuu kuliko hata Musa ni Yohana Mbatizaji ambaye ni mwakilishi wa wanadamu wote.

Katika Agano la Kale ukuhani mkuu ulikuwa ukirithiwa na mmoja wa watoto wa kiume katika ukoo wa Haruni alipokuwa amefikisha umri wa miaka 30. Kama ambavyo Kuhani Mkuu alivyozipitisha dhambi za Waisraeli wote juu ya mbuzi wao wa sadaka ya kuteketezwa kwa kuiweka mikono yake juu ya kichwa chake, basi vivyo hivyo Mungu alimwinua mwakilishi wa wanadamu aliyeitwa Yohana Mbatizaji ili kuzipitisha dhambi za wanadamu kwenda kwa Yesu, ili kwamba Mungu aweze kuzitoweshea mbali dhambi zetu zote za kila mwanadamu anayeishi katika dunia hii. Kwa maneno mengine, Mungu alikuwa amemtuma Yohana Mbatizaji kuja hapa duniani kama nabii wa mwisho. Kuhani Mkuu wa mwisho hakuwa mwingine zaidi ya Yohana Mbatizaji ambaye anatoka katika ukoo wa Haruni.

“Zamani za Herode, mfalme wa Uyahudi, palikuwa na kuhani mmoja jina laye Zakaria, wa zamu ya Abiya, na mkewe alikuwa mmojawapo wa uzao wa Haruni, jina lake Elizabeti. Na wote wawili walikuwa wenye haki mbele za Mungu,

wakiendelea katika amri zote za Bwana na maagizo yake bila lawama... Naye atatangulia mbele zake katika roho ya Eliya, na nguvu zake ili kuigeuza mioyo ya baba iwaelekee watoto, na kuwatilia waasi akili za wenye haki, na kumwekea Bwana tayari watu waliotengenezwa” (Luka 1:5-17).

Mungu alizipitisha dhambi zote za watu wa Israeli katika Siku ile ya Upatanisho tu kwa kupitia Kuhani Mkuu, ambaye alikuwa ni wa ukoo wa Haruni katika Agano la Kale. Sasa, kifungu hicho hapo juu kinaonyesha kuwa Mungu alimchagua mtu wa ukoo wa Haruni katika siku za Herode aliyekuwa mfale wa Yudea, ili kuzipitisha dhambi zote za kila mtu katika ulimwengu huu kama alivyoahidi. Hii ndiyo sababu Mungu alimtuma Yohana Mbatizaji kuja hapa ulimwengu miezi sita kabla ya Yesu ili kuzibadilisha hekima za wenye haki na kisha kumtayarishia Bwana watu waliotengenezwa kwa ajili ya Bwana (Luka 1:17). Kwa maneno mengine, Yohana Mbatizaji alikuwa ndiye mkuu kuliko wote waliozaliwa kwa mwanamke.

Vivyo hivyo, Mungu alimwinua Yohana Mbatizaji kama mwakilishi wa wanadamu, na kwa kupitia yeye Mungu alizipitisha dhambi za wanadamu kwa Yesu. Pia Yohana Mbatizaji alikuja kabla ya Yesu kama shahidi; pia tunahitaji kuchunguza toka katika Neno jinsi Yohana Mbatizaji alivyomshuhudia Yesu. Watu wa Israeli waliweza kuona ushahidi kuwa Haruni alikuwa amezipitisha dhambi zao kutokana ule ushahidi wa sauti za kengele. Vivyo hivyo, ule ukweli kuwa Yohana Mbatizaji alizipitisha dhambi zetu zote kwenda kwa Yesu ni ushahidi halisi unaoonyesha jinsi dhambi zetu zilivyotoweshewa mbali.

Kama ilivyokwishaajwa hapo kabla na kama inavyoonyeshwa katika Mathayo 3:13-17, kuwa Yesu alibatizwa na Yohana Mbatizaji. Ubatizo huu ni wa muhimu sana kwa kila Mkristo. Kwa kawaida, Wakristo wanabatizwa

na maji. Hata hivyo, Wakristo hao wamekuwa wakipokea ubatizo huo bila hata ya kufahamu maana yake. Hivyo ubatizo unatolewa kwa yeyote anayeahidi kuzifuata Amri Kumi, na kuhudhuria kwa uaminifu ibada za Jumapili, na kumtambua Bwana kuwa ni Mwokozi. Katika ulimwengu huu, ni vigumu kuwapata Wakristo ambao wanafahamu maana ya ubatizo wao.

Yesu alikuja hapa duiani na alibatizwa na Yohana Mbatizaji; tunachopaswa kukitambua hapa ni kuwa ni kwa nini ilimpasa Yesu kubatizwa. Kila Mkristo anayekiri kuwa anamwamini Yesu ni lazima ajiulize swali hili, “Kwa nini Yesu alipaswa kubatiza wakati hakuwa na dhambi?” Lakini wale ambao bado hawajapokea ondoleo la dhambi hawafahamu lolote kuhusu swali hili hata kama watakuwa wanamwamini Yesu kiasi gani. Ni wale tu waliopokea ondoleo la dhambi ndio wanaoweza kutoa jibu sahihi la swali hili.

Yesu ndiye Kuhani Mkuu wa mbinguni wakati Yohana Mbatizaji ni mwakilishi wa wanadamu, yaani Kuhani Mkuu wa hapa duniani. Yohana Mbatizaji alikuwa na mamlaka ya kuzipitisha dhambi zote za wanadamu kwenda kwa Mwanakondoo Yesu, na Yesu, kama Kuhani Mkuu wa Ufalme wa Mungu alipewa jukumu la kuzitoweshea mbali dhambi zote za wanadamu kwa kuutoa mwili wake binafsi—yaani kwa kuzipokea dhambi zote za wanadamu na kwa kuutoa mwili wake kwa Mungu kama sadaka yao. Kuhani Mkuu wa Ufalme wa Mbinguni ni Yesu (Waebrania 5:10, 6:20, 10:9-14).

Katika Mathayo 3:15, *“Yesu akajibu akamwambia, Kubali hivi sasa; kwa kuwa ndivyo itupasavyo kuitimiza haki yote. Basi akamkubali.”* Yesu alibatizwa katika Mto Yordani ambao ni mto wa kifo. Neno la Kiyunani *‘baptizo’* yaani batiza, lina maanisha ni kulowanisha, kuzamisha chini ya maji, kusafisha kwa kuchovya, kuosha, au kusafisha kwa kuuondoa uchafu. Hivyo, ubatizo una maana sawa na kule *“kuwekea mikono’*

katika Agano la Kale. Kama ambavyo dhambi zilivyopitishwa kwa kule kuwekea mikono, basi dhambi zetu zote za wanadamu zilipitishwa kwa Yesu wakati Yohana Mbatizaji alipombatiza. Yesu alihukumiwa kwa niaba yetu na akafanyika kama sadaka yetu ya kuteketezwa kwa sababu dhambi zote za wanadamu zilikuwa zimepitishwa katika mwili wa Yesu. Yesu alizipokea dhambi zote za wanadamu toka kwa Yohana Mbatizaji kwa sababu ya ubatizo wake.

Yesu alikuja hapa duniani na akabatizwa ili kuitimiza haki ya Mungu na kwa ajili ya kila mmoja wetu, na kisha kuzitoweshea mbali dhambi zote za kila mwanadamu. Je, unafikiri kuwa Yesu alibatizwa ati kwa sababu tu alikuwa ni mnyenyekevu? Kwa kweli si hivyo kabisa! Yesu alimwambia Yohana Mbatizaji kwa mkazo, *“Kubali hivi sasa.”* Wakati Yesu alipokuwa akisema haya alimaanisha kuwa *“Utazipitisha dhambi za wanadamu juu yangu nami nitazibeba; ni lazima niziondolee mbali dhambi zote za wanadamu kwa kufanyika kuwa mbuzi wa makosa mbele za macho yako,”* kuwa kuwa Yesu alikuja hapa ulimwenguni ili kuzichukua dhambi za ulimwengu.

Watu wamefungwa kuzimu kwa sababu ya dhambi zao. Wanaugulia kwa mashaka kwa sababu ya dhambi zao na wamedanganywa na Shetani kwa sababu ya dhambi zao. Yesu ndiye aliyekuja hapa duniani ili kuwaokoa watu kama sisi toka katika dhambi zetu, kutufanya sisi wenye haki, na kutugeuza sisi ili tuwe watoto wa Mungu. Wakati Yesu alipobatizwa na Yohana Mbatizaji na kutoka kwenye maji, Roho Mtakatifu alimshukia kama hua toka Mbinguni na akashuhudia Yesu alikuwa ni Mwana wa Mungu. Roho Mtakatifu ndiye anayeishuhudia ile Kweli. Mungu Baba alishuhudia mwenyewe kuwa Mwanawe Yesu alizipokea dhambi zote za wanadamu mara moja na kwa wote kwa kule kubatizwa kwake.

“Kwa maana jinsi hii Mungu aliupenda ulimwengu, hata akamtoa Mwanawe pekee, ili kil amtu amwaminiye asipotee, bali awe na uzima wa milele.” Umuhimu wa ubatizo wa Yesu unatokana na ukweli kuwa Mungu alimtuma Yesu kuja hap aduniani, akazipitisha dhambi zote za mwanadamu juu ya Mwanawe, na kisha akamtoa Mwanawe kama sadaka ili kutupatia uzima wa milele na kutufanya sisi tusio na dhambi. Yesu alizipokea dhambi zetu kwa kupitia ubatizo alioupokea toka kwa Yohana Mbatizaji ambaye ni mwakilishi wa wanadamu na Kuhani Mkuu wa mwisho, akazamishwa katika maji (tendo linalomaanisha kifo chake), na kisha akatoka ndani ya maji (tendo linalomaanisha ufufuo wake). Kwa kupitia ubatizo huu, ambao ni mfano wa kuwekea mikono, Yohana Mbatizaji alizipitisha dhambi zetu kwa Yesu. Kwa maneno mengine, dhambi za ulimwengu ziliondolewa toka kwa mwanadamu na kwenda kwa Mungu mwenyewe.

Mungu alituambia kuwa sisi hatuna dhambi kwa sababu dhambi zetu zote zilikuwa zimepitishwa kwenda kwa Yesu. Ikiwa Yesu angelikuwa hajazichukulia mbali dhambi zetu zote wakati alipokuwa amekuja hapa ulimwenguni, basi ni hakika kuwa hata kama tunamwamini Yesu kiasi gani bado tusingekuwa na chaguo lolote zaidi ya kubakia wenye dhambi. Baada ya kuwa amezitoweshea mbali dhambi zetu zote kwa ubatizo wake na kwa kuimwaga damu yake, basi hapo ndipo Mungu anapotukubali na kututia moyo, *“Mwamini Bwana Yesu, nawe utaokoka pamoja na nyumba yako”* (Matendo 16:31). Kwa kuuamini ubatizo na damu ya Yesu ni lazima dhambi zetu zioshelewe mbali mara moja na kwa wote.

“Siku ya pili yake amwona Yesu anakuja kwake, akasema, Tazama. Mwana-kondoo wa Mungu, aichukuaye dhambi ya ulimwengu!” (Yohana 1:29) Yohana Mbatizaji aliendelea kuwajulisha watu kuwa dhambi zote za wanadamu zilipelekwa

ka Yesu kwa kupitia ubatizo wake. Yeye aliyewajulisha watu kuwa “Yesu ni Mwana halisi wa Mungu, Mwanakondoo wa Mungu azichukuaye dhambi za ulimwengu,” si mwingine bali ni Yohana Mbatizaji.

Yesu alizibeba dhambi za ulimwengu kwa kubatizwa na kisha akazipeleka dhambi hizo Msalabani. Ni takribani miaka 1,975 imepita tangu Yesu alipozichukulia mbali dhambi za ulimwengu. Yesu ambaye alikuwa amezichukua dhambi za wanadamu alipaswa kufa Msalabani. Yesu alizichukua dhambi zote za ulimwengu. Kwa kupitia ubatizo wake, Yesu alizichukua dhambi za baba zetu na mama zetu pia kwa kuwa hata wao ni watu wa ulimwengu. Dhambi zote tunazozifanya kwa kufahamu au kwa kutofahamu tangu tunapozaliwa hadi kifo zote hizo ni dhambi za ulimwengu. Dhambi hizi pia zilipitishwa kwenda kwa Yesu kwa kule kuwekewa mikono na Yohana Mbatizaji. Dhambi ambazo tumezifanya kwa miaka kumi iliyopita pia ni dhambi za ulimwengu, na kwa sababu hiyo hata dhambi hizo pia zilipitishwa katika mwili wa Yesu. Kwa maneno mengine, sio kwamba Yesu alizichukua dhambi za baadhi ya watu maalum tu, bali kwa kupitia ubatizo wake na damu yake aliyoimwaga, Yesu alizichukulia mbali dhambi zote za kila mtu hapa ulimwengu ambazo anazifanya katika kipindi chote cha maisha yake hadi kifo chake na kisha akazisafishilia mbali dhambi hizo zote.

Hata hivyo, ni wale tu wanaoamini katika ukweli wa injili ya maji na Roho, kuwa Yesu alizipokea dhambi zetu kwa kupitia Yohana Mbatizaji na kwamba Yesu ameziondolea mbali dhambi hizo zote, ndio wanaoweza kupokea ondoleo la dhambi kwa imani. Hao ndio wale wanaoweza kuokolewa toka katika dhambi zao zote kwa imani. Lakini, kwa bahati mbaya, kuna watu wengi sana ambao bado wamefungwa kwa dhambi zao kwa sababu hawaamini katika injili ya maji na Roho. Mlango

wa Mungu ulikwishafunguliwa tangu zamani, lakini bado kuna watu wengi ambao wamefungwa ili kuangamia kwa sababu milango ya mioyo yao haijafunguliwa bado na kwa sababu hawaamini katika Neno la injili ya maji na Roho.

Dhambi ambazo tulizifanya tangu tulipozaliwa hadi miaka 20 na tangu tulipokuwa na miaka 21-30 pia ni “dhambi za ulimwengu,” na kwa sababu hiyo dhambi hizo zote zilipitishwa kwa Yesu, na dhambi tulizozifanya tulipokuwa na miaka 31-40 pia ni “dhambi za ulimwengu” na pia dhambi hizo zilipitishwa kwa Yesu. Yesu ni Mwana wa Mungu ambaye alizichukua dhambi zote za kila mtu. Je, dhambi zinazofanywa kuanzia miaka 41-100 si dhambi za ulimwengu? Ukweli ni kuwa Yesu alizichukua dhambi hizo zote kwa kupitia ubatizo wake, kwa kuwa hizo nazo ni dhambi za ulimwengu. Hii ni kwa sababu upendo wa Yesu ni wa milele na hauna mipaka, Yesu hazigawi dhambi zetu katika makundi ya dhambi ya asili na dhambi binafsi, lakini Yesu alizipokea dhambi zetu zote kwa kupitia ubatizo wake na kisha akaimwaga damu yake Msalabani hadi kifo.

Kama Yesu asingelikuja hapa duniani, na kama asingelibatizwa, na kam asingeliimwaga damu yake, basi imani yetu ya ondoleo la dhambi ingekuwa haina maana, na kifo cha Yesu Kristo kisingekuwa na maana, na ile imani yetu ya kumwamini Bwana na kuteseka kwa ajili yake ingelikuwa ni bure kabisa.

Je, dhambi za watoto wenu zilipitishwa kwa Yesu kwa kupitia ubatizo wake? Hebu tuthibitishe hili. Je, watoto wenu hawaishi katika ulimwengu huu? Ikiwa watoto wenu wanaishi katika ulimwengu huu, basi hiyo ni dhahiri kuwa dhambi zao nao zilipitishwa kwenda Yesu. Uthibitisho wa hili ni ule ubatizo ambao Yesu aliupokea toka kwa Yohana Mbatizaji, na ile damu ambayo Yesu aliimwaga Msabalani kwa ajili ya kufidia adhabu ya dhambi (Yohana 19:30-34). Dhambi za wajuu zako na uzao

wao ambao hata bado haujazaliwa zilipitishwa pia kwa Yesu kwa kupitia ubatizo wake, na kisha Yesu akazibeba dhamnbi zeto na akaziondolea mbali dhambi hizo zote pale Msalabani. Pamoja na kuwa tunatenda dhambi kila siku kwa sababu ya udhaifu wetu, basi hizo dhambi tunazozifanya pia ni dhambi za ulimwengu, na kwa sababu hiyo hata dhambi hizo Yesu alizichukua pia kwa kupitia ubatizo na damu yake.

Yohana 8:31-32 inasema, *“Ninyi mkikaa katika neno langu, mmekuwa wanafunzi wangu kweli kweli; tena mtaifahamu kweli, nayo hiyo kweli itawaweka huru.”* Kweli inayozungumziwa hapa si kitu kingine bali ni tendo la haki la Yesu ambalo alilitimiza kwa Neno lake. Kwa kweli ni jambo la kuhuzunisha sana kuona kuwa Wakristo wengi bado wanaamini katika mafundisho potofu ya kiimani na mafundisho ya kimadhehebu kuwa wanapaswa kuishikilia sabato na kutoa sala za toba kila siku ili waweze kusamehewa dhambi zao. Wao wanaamini kuwa Yesu aliichukua dhambi yao ya asili lakini hakuzichukua dhambi zao binafsi. Hii ndiyo sababu hawana chaguo lolote zaidi ya kuwa wenye dhambi zaidi kadri muda unavyozidi kwenda. Juhudi zao zinaweza kuwa za kutamaniwa, lakini kwa mujibu wa wokovu wao, hawakupaswa kufany juhudi hizo binafsi.

Tunachopaswa kukifanya ni kuamini katika injili ya maji na Roho, na kisha kupokea ondoleo la dhambi. Haya ndiyo mapenzi ya Mungu kwetu. Kadri tunavyojaribu kuitunza na kuifuata Sheria, ndivyo inavyozidi kutuwia vigumu kuitunza na kuifuata, na hatimaye tunaishia kujitambua wenyewe kuwa sisi ni wenye dhambi mbele za Mungu. Lakini kwa kuamini katika injili ya maji na Roho ambayo Bwana alitupatia, basi ni wazi kuwa sisi sote tunaweza kuokolewa toka katika dhambi zote za ulimwengu. Halleluya! ☒

“Sema Neno Tu”

< Mathayo 8:5-10 >

“Hata alipoingia Kapernaumu, akida mmoja alimjia, akamsihi, akisema, Bwana, mtumishi wangu amelala nyumbani, mgonjwa wa kupooza, anaumwa sana. Yesu akamwambia, Nitakuja nimponye. Yule akida akamjibu, akaema, Bwana mimi sistahili wewe uingie chini ya dari yangu; lakini sema neno tu, na mtumishi wangu atapona. Kwa maana mimi nami ni mtu niliyewekwa chini ya mamlaka, mwenye askari chini yangu; nikimwambia huyu, Nenda, huenda; na huyu, Njoo huja; na mtumwa wangu, Fanya hivi, hufanya. Yesu aliposikia hayo, alistaajabu, akawaambia wale waliomfuata, Amin, nawaambieni Sijaona imani kubwa namna hii, kwa yeyote katika Israeli!”

Kina inapotokea kuwa waamini wa injili ya maji na Roho wamekusanyika pamoja, basi kwetu sisi inakuwa ni siku ya kusherehekea. Tunapofikiri jinsi ambavyo Mungu amezitoweshea mbali dhambi zetu na tunapotafakari juu ya injili ya maji na Roho kwa mara nyingine tena, basi tunajikuta sisi sote tukicheka kwa furaha.

Kama ambavyo yule akida alivyoikiri imani yake yenye nguvu mbele za Yesu huku akisema, *“lakini sema neno tu, na mtumishi wangu atapona,”* basi pia kuna watu katika Biblia ambao waliamini katika Neno la Mungu tu na kisha wakamfuata Bwana. Heri wale walio na imani ya kweli katika Neno la Mungu. Imani ya huyu akida ni sawa na imani ya wale

wanaoamini katika injili ya maji na Roho katika zama zetu.

Yule akida alikuwa akimwonea huruma mmoja wa watumishi wake aliyekuwa akiumwa, na akawa akimtafuta Yesu ili amponye mtumishi wake. Yesu alilijibu ombi lake. Tunapokichunguza kifungu hiki cha maandiko toka katika Biblia, tunaweza kufahamu kuwa imani ya huyu akida ilikuwa ni ile inayoamini kuwa Yesu ni Mwana wa Mungu, na kwamba ni ndiye Mungu mwenyewe. Tunaweza kuona kuwa yule akida alikuwa akimwamini Yesu kuwa ni Mungu mwenyewe aliyewafufua wafu wakawa hai na aliyeumba ulimwengu kwa Neno lake. Kwa kweli tunaweza kushuhudia ukubwa wa imani ya huyu akida.

Yule akida akamwambia Yesu, *“Bwana mimi sistahili wewe uingie chini ya dari yangu; lakini sema neno tu, na mtumishi wangu atapona.”* Kwa nini huyu akida alisema hivi? Yule akida hakusema vile ati kwa sababu alikuwa akimwogopa Yesu kuja katika nyumba yake, bali ni kwa sababu aliuamini ukuu wa Mungu, utakatifu wake, na uwepo wake mahali pote. Ikiwa kila mtu angelikuwa na akili ya namna hii ya kumnyenyekea na kumheshimu Mungu, basi mtu huyo angeliweza kupokea baraka zilezile ambao yule akida alizipata toka kwa Mungu. Je, baraka hizi za Mungu ni zipi? Hizo ni baraka za ondoleo la dhambi na ile imani ya kuishi katika dunia hii kwa ajili ya kazi ya Mungu ya haki. Na haya yote yanatoka katika imani yetu katika Neno. Hii ndio iliyokuwa imani ya yule akida. Ingawa tunaweza tusiwe na kitu cha kujionyesha mbele za Mungu, lakini ikiwa tutakuwa na imani tu katika Neno la Mungu, basi baraka nyingi za imani zitakuja kwetu kama vile ilivyotokea kwa yule akida.

Kifungu cha maandiko kuhusiana na huyu akida kinatueleza sisi sote kuwa imani katika Neno la Mungu ndio imani kamilifu mbele za Mungu, na kwamba Mungu

anafurahishwa na imani ya jinsi hiyo. Imani hii inakuja tunapo mwamini Mungu anayefanya kila kitu kwa Neno. Kwa maneno mengine, Neno la Mungu ndilo msingi pekee wa imani yetu kamilifu. Ikiwa tunalitambua Neno la Mungu na ikiwa tuna imani katika Neno hili, basi sisi sote tutapokea baraka za kutosha katika maisha yetu kama yule akida alivyopokea.

Kule kusema tu kuwa yule akida alikuwa na imani kubwa ni kunamfanya yule akida kuwa na baraka. Wale ambao wanamheshimu Mungu wanaifahamu pia nguvu ya Neno Mungu, na kwa kuliadini Neno hili la Mungu wanaweza kuokolewa toka katika dhambi zao zote na kisha kupokea uzima wa milele. Sisi tunaokolewa toka katika dhambi za ulimwengu, tunapokea ondoleo la dhambi na uzima wa mille, na tunaifuata haki ya Mungu kwa imani kwa kupitia Neno lake. Imani hii katika Neno la Mungu inaleta maisha mazuri na yenye baraka kwa kila mmoja wetu bila kushindwa.

Bwana wetu alisema, “*Tena mtaifahamu kweli, nayo hiyo kweli itawaweka huru*” (Yohana 8:32). Tunaweza tusilifahamu Neno lote la Mungu kwa upana wake, lakini kama tunaliadini hili Neno la Mungu lililoandikwa, basi hilo Neno litafanya kazi katika mioyo yetu kwa uhakika, litazibadilisha akili na nafsi zetu, na kisha litatuongza kuifahamu na kuiaadini injili ya maji na Roho; ili kwamba nafsi ambazo wakati fulani zilikuwa zimefungwa kuzimu ziweze kufika na kuingia Mbinguni.

Ikiwa hatuna imani hii katika Neno la Mungu, basi hakuna maana kabisa ya sisi kumwamini Yesu kuwa ni Mwokozi. Aina hii ya imani si kumwamini Yesu kwa kutegemea mawazo ya mtu binafsi, kitu ambacho kinaweza kuwa sawa na dini ya kujiundia mwenyewe ambapo mtu anaishi kwa kutegemeaana na taratibu zake binafsi. Lakini imani ya yule akida ilikuwa ni ile inayoamini katika Neno la Mungu.

Imani ya yule akida ilikuwa ni kama imani ya Ibrahimu.

Baba zetu za imani wote waliamini katika Neno la Mungu ambalo Mungu aliliongea. Ibrahimu alilifuata Neno la Mungu, na Isaka alikuwa na imani ile ile ambayo Isaka alikuwa nayo. Ibrahimu aliliamini Neno la Mungu la ahadi kama lilivyokuwa, kwamba Mungu atawapatia uzao wake ardhi ya Kanaani, na pia akayapitisha maneno haya haya ya ahadi kwa Isaka. Na ni kweli kuwa Mungu amewapatia wazawa wake ardhi hiyo ambayo ndiyo leo inayoitwa Israeli. Ibrahimu alifanyika kuwa Baba wa imani kwa kuamini Neno lililozungumzwa na Mungu kwa imani.

Kazi ya kubwa ya kustaajibisha ambayo Mungu ameifanya kwetu sisi ni ile iliyo katika Neno lake, yaani ya kuwageuza wenye dhambi kuwa wenye haki. Je, ni neno gani la Mungu linalowafanya wenye dhambi kuwa wenye haki? Inawezekanaje kwa wenye dhambi wakageuka kuwa wenye haki? Je, watu wanapokea imani yenye nguvu na kufanyika wenye haki kwa kuhudhuria kanisani, na kwa kutoa sala ndefu, na kwa kunena kwa lugha, na au kwa kuamini katika nguvu ya miujiza katika uponyaji? Wakati watu wanaposema kuwa wanamtambua Yesu kuwa ni Mwokozi, je, hii ni sawa na kumpokea Yesu? Mtu hawezi kuamini katika Neno la Mungu kwa kutegemea hisia zake binafsi, kwa kujitoa kwake yeye mwenyewe, au kwa kutegemea mawazo yake binafsi.

Mtu anafikia hatua ya kuwa na imani katika Neno la Mungu kwa kuamini katika injili ya maji na Roho, ambayo inaeleza kuwa Yesu Kristo Mwana wa Mungu alikuja hapa duniani ili kuwaokoa wenye dhambi, alibatizwa na Yohana Mbatizaji na akaimwaga damu yake, na kwa hiyo amewakomboa watu toka katika dhambi zao zote. Lakini pamoja na hili, bado tunawaona watu wengi wanaodai kuwa wamefanyika kuwa watoto wa Mungu kwa sala zao za kuomba kwa sauti na kwa kutubu dhambi zao huku wakilia kwa

machizi. Mara nyingi tunaona kuwa miongoni mwa Wakristo ambao wamekuwa wakihudhuria kanisani kwa kipindi fulani, basi wale wanaomwaga machizi wanapokuwa wakiomba kwa Mungu wamekuwa wakithibitishwa kuwa ndio waamini wa kweli wa Mungu hata pale ambapo hawaonyeshi kuvutiwa na ukweli wa injili ya maji na Roho. Katika nyakati hizi Ukristo umekuwa ni kama dini nyingine za ulimwengu ambazo zinajishughulisha katika kuwalinda waamini wao kwa mafundisho yao ya kidini.

Ukristo wa Leo Una Aina ya Imani Ambayo Haina Jibu Sahihi

Ukristo wa leo unavutwa kuelekea katika mkondo tofauti. Ukweli unaohuzunisha ni kuwa kwa sasa kuna Wakristo wengi wanaofuata imani potofu ya wale wanaojiita mtandao wa kiroho, walio na imani ya mafumbo, na walio na mtazamo wa mali. Imani za kipagani kama hizo sasa zimekuwa ni nyingi sana katika jamii za Kikristo. Wakristo hawa sasa wanaweza kupata faraja na kuridhika kwa kule kujiona kuwa wamo ndani ya jumuiya za kidini kama hizo, lakini wanaporudi katika nyumba zao na katika jamii, basi hawawezi kufanya lolote bali wanarudia nafsi zao za kale na kisha wanaendelea kuishi maisha yenye utupu na yaliyokanganyika kwa kuwa Roho Mtakatifu na Neno la Mungu halimo ndani ya mioyo yao. Pamoja na kudai kuwa wanamwamini Yesu, ukweli ni kuwa wao hawaufahamu ukweli wa injili ya maji na Roho, na kwa sababu hiyo hawajapokea ondoleo la dhambi katika mioyo yao. Kama matokeo ya jambo hilo, basi watu hao wanakuwa hawajampokea Roho Mtakatifu wala hawaliamini Neno la Mungu, na hii ndio sababu wanashindwa kuzing'oa nafsi zao

za kale.

Kumwamini Mungu ndiko kulihamini Neno lake. Yesu alisema kuwa imani ya yule akida aliyelihamini Neno la Mungu ilikuwa ni kubwa. Wale wasiolihamini Neno la Mungu hawawezi kuifahamu imani ya wale wanaolihamini Neno la Mungu na kulifuata. Kimsingi, watu wanaofuata mtandao wa wanakiroho wanadai kuwa watu wasioweza kunena kwa lugha bado hawajapokea Roho Mtakatifu, wanadai kuwa, “Je, upo wapi ushahidi unaweza kuthibitisha kuwa mtu amepokea Roho Mtakatifu? Na huko kufanyika watoto wa Mungu kuna maanisha nini? Je, uthibitisho wa wokovu ni upi? Kwa kweli kuongea kwa lugha mpya za mbinguni ndio uthibitisho wa kuzaliwa tena upya na kuwa na Roho Mtakatifu.” Lakini ukweli ni kuwa mafundisho haya si kweli kabisa.

Watu wa jinsi hiyo wanatembea kwa nguvu sana wanapokuwa wakiomba. Lakini inaelezwa kuwa, zaidi ya asilimia 99 ya watu wanaoongea hivyo huwa wanaongea vitu visivyoeleweka na visivyo na maana. Kwa maneno mengine, tabia zao za ajabu kwa hakika zinatoka kwa Shetani na wala si kwa Mungu. Kinachofanya jambo hili lilete shida ni ule uhakika walioa nao kuwa wamepokea Roho Mtakatifu, na kwamba wanauendelea huo mkanganyiko wa Shetani katika jina la Roho Mtakatifu.

Mtu anapokea Roho Mtakatifu kwa kupokea ondoleo la dhambi kwa kupitia imani katika Neno la injili ya maji na Roho. Kunena kwa lugha si karama ya msingi kiasi kuwa kila aliyepokea Roho Mtakatifu anaweza kuonyesha. Kunena kwa lugha kuna maanisha ni kuongea kwa lugha tofauti za makabila mbalimbali ya baraka fulani au eneo fulani (Matendo 2:8). Katika kipindi cha mitume, wanafunzi wa Yesu walinena kwa lugha ili kuishuhudia injili (Matendo 2:11), na kuwa na uhusiano wa karibu sana na Mungu (1 Wakorintho 14:2).

Lakini katika kipindi hiki ambapo Maandiko yamekwisha kamilika, basi hakuna sababu ya sisi kuongea kwa lugha tofauti toka katika maeneo tofauti ya dunia (1 Wakorintho 13:8-10). Hivyo, hata wale ambao hawaneni kwa lugha sasa wamewezeshwa kuuongea ukweli wa wokovu kwa kuamini katika injili ya maji na Roho.

Wakati Wakristo wa leo wanaponena kwa lugha, basi hii haimaanishi kuwa wamepokea ondoleo la dhambi, na wala haimaanishi kuwa wameshafanyika kuwa watoto wa Mungu. Kunena kwa lugha na kuona maono havimaanishi kuwa mtu huyo amezaliwa tena upya, wala kule kuwa na karama ya kuponya pia hakumaanishi kuwa mtu huyo ana imani katika Neno la injili ya maji na Roho. Kwa ufupi, watu wa jinsi hiyo wanashikilia ishara za kimaumbo kamahizo kama wokovu wao kwa sababu hawafahamu jinsi wanavyoweza kuzaliwa tena upya.

Haya ndiyo yale ambayo Shetani anawapatia wale wenye dhambi. Imani ya kimaumbo inaweza kudumu kwa miaka michache tu. Inapotokea kuwa wameipoteza ile ‘nguvu,’ basi watafanya kila juhudi kuipata nguvu hiyo. Hivyo wataanza kuwatafuta mahali popote walipo watu hao wanaojulikana kama ‘watu wa nguvu’ ili wawekewe mikono na watu hao. Lakini kwa kuwa imani yao ipo katika utupu, basi hatimaye wanaishia kuwa watumishi wa Shetani. Ule ukweli kuwa watu hao wanafuatilia sana ishara na miujiza ni uthibitisho kuwa watu hao hawana imani katika injili ya maji na Roho ndani ya mioyo yao.

Kuna tofauti kubwa sana kati ya imani ya wale wanaoamini maono na nguvu za kimiujiza na imani ya wale wanaoamini na kulifuata Neno la Mungu. Ukiilinganisha imani ya yule akida na imani ya siku hizi ya wale wanaotafuta miujiza, basi tutaweza kuona wazi kuwa imani hii ya watafuta

miujiza inawapotosha Wakristo na haiwezi hata kuugusa unyayo wa imani ya yule akida. Imani ya hawa wa miujiza ni tofauti kabisa na imani ya yule akida ambaye aliliamini na kulifuata Neno la Mungu.

Imani ya yule akida ni imani ambayo ilisema, *“lakini sema neno tu, na mtumishi wangu atapona.”* Kwa maneno mengine, imani yake ilikuwa ni ile inayoamini katika Neno la Mungu—yaani kile ambacho Yesu Kristo alikisema kwetu. Hii inaonyesha kuwa imani katika Neno la Mungu ndio imani ya kweli. Basi imani ya kweli ni kuamini kuwa kila kitu kitatimizwa sawasawa na Neno la Yesu, bila kujalisha hicho alichokisema Yesu kwetu. Kwa maneno mengine, imani inayoamini kikamilifu katika Neno la Mungu ndiyo imani ya yule akida.

Sisi ambao tuna imani katika Neno la Mungu na kwa sababu hiyo tumepokea ondole la dhambi kwa kuamini katika injili ya maji na Roho, hatuwezi kuangukia katika aina hii ya imani ambayo inahitaji ishara na miujiza. Zaidi ya yote, aina hiyo ya imani ya miujiza haikubaliani na imani tuliyonayo, kwa kuwa tunatoka katika mbegu tofauti kabisa na ile ya wale wanaotafuta miujiza. Hivyo, hatuwezi kutembea na watu kama hao katika kuieneza injili. Imani ya yule akida ni sawa na imani yetu ambayo inaamini katika injili ya maji na Roho. Tunapoishi maisha yetu hali tukiwa tunaongozwa na Neno la Mungu, basi tunafikia hatua ya kuishi maisha ya manabii waliotutangulia. Roho Mtakatifu alifanya kazi katika maisha ya manabii hawa na pia Roho huyo Mtakatifu anafanya kazi ndani yetu.

Kwa kweli ninapofikiria jinsi Mungu alivyotupatia hiyo neema kuu ya wokovu kwa kupitia injili ya maji na Roho, na jinsi alivyotuwezesha, si kama wale wanaofuata ishara na miujiza, kama alivyotuwezesha kuliadini Neno lake na kulifuata, basi binafsi nashindwa kufanya lolote zaidi ya

kumshukuru Mungu kwa hilo. Imani yetu imeweza ya kweli na tumeweza kufanyika wenye haki kwa sababu tunaamini katika Neno la injili ya maji na Roho, ambalo ni Neno la Mungu. Yeyote anayekana mawazo yake binafsi, anayesikiliza kwa unyenyekevu yale ambayo Neno la Mungu linasema kwake, na anayeamini katika injili ya kweli ambayo ni Neno la Mungu, basi mtu huyo anaweza kugeuka na kuwa mtu mwenye haki. Hii ni nguvu ya Mungu, na hii ni nguvu ya Neno la injili ya maji na Roho. Sisi sote tunaweza kufanyika kuwa watoto wa Mungu mwenyewe, tunaweza kuingia Ufalme wa Mbinguni, na kisha kuishi maisha ya furaha na yenye baraka kwa kuliamini Neno la injili ya maji na Roho.

Sisi waamini wa kweli pia tunamwambia Bwana, “Sema neno tu.” Kwa kuwa Bwana wetu ametuambia juu ya Neno la Injili ya maji na Roho kwetu sisi, basi ondoleo la dhambi zetu zote limetimizwa kwa Neno la Mungu, kwa kuwa huu ndio ukweli hasa wa maji na Roho.

Baada ya kuiona imani ya yule akida, Yesu alisema, *“Amin, nawaambieni Sijaona imani kubwa namna hii, kwa yeyote katika Israeli!”* Hakuna kitu chochote anachoweza kukifanya mtu aliyepooza. Wala hakuna mtu aliyepooza kiroho anayeweza kuzifanya dhambi zake kutoweshwa kwa mataakwa yake katika maombi. Hii ndiyo sababu Mungu aliizungumzia imani ambayo inamwezesha mtu kupokea ondoleo kamilifu la dhambi kwa Neno la Mungu.

Sisi tumepokea karama ya ondoleo la dhambi kwa kuamini katika injili ya maji na Roho katika Neno lake lililoandikwa. Dhambi za watu wote zinaweza kuoshelewa mbali kwa kuamini katika Neno la Mungu. Yule akida alimwambia Yesu *“lakini sema neno tu, na mtumishi wangu atapona,”* kwa sababu alikuwa analiamini Neno la Yesu na ndio maana Yesu aaliithibitisha imani yake.

Hakuna jitihada yetu binafsi inayoweza kuzitoweshea mbali dhambi zetu zote. Ni kwa kuamini tu katika Neno la injili ya maji na Roho iliyoandikwa katika Neno la Mungu ndipo tunapoweza kuoshelewa mbali dhambi zetu. Ni kwa kuamini tu katika hili Neno la Mungu, ambalo ni injili ya maji na Roho, ndipo tunapoweza kuokolewa toka katika dhambi zetu zote. Hakuna kitu chochote kinachoweza kutufanya tuupate wokovu toka katika dhambi zetu zote. Hatuwezi kamwe kupokea ondoleo la dhambi na kisha kuzaliwa tena upya nje ya Neno la injili lililoandikwa la maji na Roho. wokovu unaopokelewa katika ndoto na maono huo si wokvu kamwe.

Hata hivyo, bado kuna Wakristo wengi ambao wanafanyika kuwa wenye dhambi wakuu baada ya kuwa wamemwamini Yesu. Je, ni kawaida kuwa mwamini katika Yesu anapaswa kuwa mwenye dhambi zaidi kadri muda unavyozidi? Biblia inasema kuwa Bwana ameziondoa dhambi zetu kwa Neno la nguvu zake (Waebrania 1:3). Sasa, Neno la nguvu zake ni lipi? Si jingine bali ni injili ya maji na Roho. Hivyo, wale wanaolidharau Neno la nguvu zake hawawezi lolote zaidi ya kuwa Wakristo wenye dhambi hata kama wanamwamini Yesu kiasi gani. Yale yote ambayo Yesu ameyafanya kwa ajili yetu yameandikwa katika Neno la Mungu kwa kina, hivyo ni kwa kuamini katika Neno la Mungu ndio maana tumefanyika kuwa wenye haki, na ni kwa imani hii katika Neno la Mungu ndipo tunapoweza kuwa wenye haki, na ni kwa imani hii katika Neno la Mungu ndipo wenye haki wanapoweza kuishi chini ya baraka za Mungu.

Kwa wale wasioamini katika ukweli wa ondoleo la dhambi uliomo katika injili ya maji na Roho, basi uzoefu wao wowote unakuwa ni wa uongo. Yesu ni njia, ni kweli, na uzima kwa waamini wote wa kweli. Haijalishi mtu anavyoweza kuomba sala zake za toba kwa juhudi katika ibada ya kuabudu,

ikiwa mtu huyu ataliacha Neno la nguvu za Mungu, basi dhambi za mtu huyo haziwezi kuoshelewa mbali. Mtu hawezi kupokea ondoleo la dhambi na kuingia Mbinguni kwa sala za toba, hii ni kwa sababu kujitoa kwetu, na juhudi, na mtendo haviwezi kuzitoweshea mbali dhambi zetu. Imani yoyote ambayo haijajengwa katika Neno la Mungu ni ya Shetani. Hakuna fundisho lolote la dini ambalo halijajengwa katika msingi Neno la Mungu linaloweza kuzioshelea mbali dhambi zetu. Hakuna nafsi inayoweza kuokolewa toka katika dhambi pasipo Neno la Mungu, hata kama nafsi hiyo ina nguvu ya kufukuza mapepo, au hata kama nafsi hiyo imeuawa kwa ajili ya imani, ukweli unabakia kuwa pasipo Neno la Mungu dhambi haiwezi kutoweshwa. Ondoleo la dhambi ambalo tunalipokea kwa jitihada zetu wenyewe na kwa mawazo yetu binafsi linaweza kubadilika, kwa kuwa ondoleo hilo halina msingi katika imani ya kweli.

Pia Biblia inasema kuwa hatuwezi kuzaliwa tena upya kwa damu, wala kwa matakwa ya mwili, wala kwa matakwa ya mwanadamu (Yohana 1:13). Baadhi ya watu wanajidai juu ya desturi za imani yao huku wakisema, “Nimekuwa nikimwamini Yesu tangu nilipokuwa tangu katika tumbo la mama yangu.” Wengine wanaweza kusema, “Familia yangu imekuwa ikimwamini Yesu kwa karne 5.” Je, watu hawa wanaweza kuzaliwa tena upya hali wakiwa na kiburi cha majivuno kama hicho? Hapana, watu hawa hawawezi kufanyika kuwa watu wa Mungu mwenyewe.

Bwana anatueleza kuwa atazijaribu imani za watu wa jinsi hiyo, na kisha atawatupa nje kwa sababu ya dhambi zao. Majivuno yao yasingeliweza kuwa ni tatizo ikiwa tu wangelikuwa wanaamini kwa mujibu wa Neno la Mungu. Bali Mungu atawatupilia mbali kwa sababu watu hao wanamwamini Yesu kwa mujibu wa mawazo yao binafsi

badala ya kumwamini kwa Neno lake la Kweli; na hii ndio sababu Mungu atawatupa katika giza huku akisema, *“Ondokeni kwangu, ninyi mtendao maovu!”* (Mathayo 7:23) Je, neno “maovu” lina maanisha nini hapa? Lina maanisha ni juu ya matendo maovu ya wale wanaodai kumwamini Yesu kuwa ni Mwokozi wao na kuzitumia nguvu za Mungu hata wakati ambapo hawaiamini injili ya maji na Roho.

Kanisa la Mungu ni kusanyiko la wale waliozaliwa tena upya kwa injili ya maji na Roho. Kwa maneno mengine, ni kusanyiko la wasio na dhambi ambao wameitwa kuwa watakatifu wa Mungu (1 Wakorintho 1:2). Kanisa la Mungu ni mahali panapowawezesha watu kuyaweka kando mawazo yao binafsi, na kisha kuwafanya watu hao kuliadini Neno la Mungu, na kisha kupokea ondoleo la dhambi. Kwenda Kanisani hakumaanishi nikwenda katika Ufalme wa Mbinguni. Lakini kuna watu wanaosema kuwa kwa sababu wanamwamini Yesu na kwa kuwa ni waumini wa kanisa linaloitwa ‘othodoksi’, basi wanaweza kuingia katika Ufalme wa Mungu hata kama bado wana dhambi. Wale wanaojivunia madhehebu yanayojiita ya kiothodoksi katika ulimwengu huu, mara nyinyi wanajitambulisha wenyewe kuwa ni wenye dhambi waliokombolewa.

Kila mtu anadai kuwa dhehebu lake ni la kiothodoksi. Lakini je, Mungu alisema kuwa atampeleka kila mtu Mbinguni hata kama mtu huyo hana imani sahihi katika moyo wake? Hoja hii haijaandikwa mahali popote katika Biblia. Pia unaweza wewe mwenyewe kuangalia katika Maandiko ili uone kama imeandikwa hivyo. Kwa hakika utagundua kuwa hakuna mahali popote palipoandikwa hivyo.

Mbele za Mungu, wenye haki ni wale wasio na dhambi; yaani wale waliofanyika kuwa ni wenye haki. Watu wanaojivunia kuhusu hali ya kuwa waothodoksi katika madhehebu yao wanasema hivi, “Sisi ni wenye dhambi, lakini kwa sababu tunamwamini Yesu, basi

Mungu anatuona kuwa ni wenye haki. Hivyo hii ndio sababu tunaamini. Kumwamini Yesu hakumaanishi kuwa sisi hatuna dhambi. Tunawezaje kusema kuwa hatuna dhambi wakati tunatenda dhambi kila siku? Lakini kwa kuwa tunamwamini Yesu kuwa ni Mwokozi wetu, basi Mungu anatuchukulia sisi kuwa hatuna dhambi. Hii haimaanishi kuwa tumeokolewa ati kwa sababu hatuna dhambi. Pamoja na kuwa tuna dhambi hata baada ya kumwamini Yesu, basi tunamshukuru Yesu kwa imani yetu kwake, sisi tumeitwa kuwa watoto wa Mungu na kwa sababu hiyo tunaweza kuingia Ufalme wa Mungu.”

Wale walio na aina hii ya imani wanaamini kwa kufuata mawazo yao binafsi; kile walicho nacho si wokovu unaopatikana kwa kuamini katika injili ya maji na Roho. Kwa hiyo, kwa hiyo kile wanachokisema kwa Mungu ni kuukiri upendo usiolipizwa kwake. Watu wa jinsi hiyo hawajaokolewa toka katika dhambi zao zote. Wale ambao hawajaokolewa toka katika dhambi zao wanashuhudia wao wenyewe kuwa mioyo yao bado ina dhambi. Huu ni uthibitisho wa wazi kuwa wana dhambi. Hata kama wanamwamini Yesu kuwa ni Mwokozi, ukweli ni kuwa mtu yeyote kama ana dhambi katika moyo wake basi mtu huyo amefungwa ili kwenda kuzimu.

Akiisha kuzitoweshea mbali dhambi zote za ulimwengu huu kwa injili ya maji na Roho, Yesu alituambia sisi kulipokea ondoleo la dhambi zetu kwa kuamini katika injili ya kweli. Mungu anafurahishwa na wale ambao wamesamehewa dhambi zao zote na waliofanyika kuwa wenye haki kwa kumwamini Yeye kuwa ni Mwokozi wao. Hii ndio sababu Mungu ameandaa Mbingu kwa ajili ya watu hawa wenye haki. Lakini watu wa kidini ambao hawajafanyika kuwa wenye haki hawawezi kumpendeza Mungu. Wao wanakiri kuwa, “Bwana, Ninaamini kuwa ulizichukulia mbali dhambi zangu zote. Lakin tafadhali nisafishe dhambi zangu zote binafsi ninazoendelea

kuzifanya kila siku. Tafadhali samehe dhambi hizi.” Ikiwa hivi ndivyo imani yako ilivyo, basi wewe ni yule ambaye huifahamu injili ya Mungu ya maji na Roho, na wala huiamini injili hiyo, na kwa sababu hiyo wewe ni mtu unayefanya dhambi ya kumfanya Mungu kuwa mwongo.

Wakristo Katika Ulimwengu Mzima Ni Lazima Wasujudu Mbele ya Injili ya Maji na Roho

Kuna watu ambao wanawalaumu waamini wa injili ya maji na Roho kuwa ni wazushi. Ni kweli kuwa imani ya wale wasio na dhambi inaweza kuonekana kuwa ni ya kustaajabisha katika macho yao. Lakini kwa mujibu wa ukweli wa injili ya maji na Roho, ni hao wasioamini katika injili ya maji na Roho, But according to the gospel truth of the water and the Spirit, na wale ambao mioyo yao inabaki kuwa na dhambi, basi hao ndio wazushi ambao hatimaye wataangamia. Wazushi ni wale ambao bado wamefunikwa na dhambi na wanaojihukumu wenyewe mbele za Mungu (Tito 3:11). Wale Wakristo wanaosema mbele za Mungu kuwa bado wana dhambi ni hakika kuwa wanafanya dhambi mbele za Mungu. Ikiwa bado hujapokea ondoleo la dhambi kwa sababu ya kutoifahamu kwako injili ya maji na Roho, basi utubu sasa na uamini katika injili ya maji na Roho. Bado hujachedlewa. Toba ya kweli maana yake ni kugeuka toka katika njia mbaya na kisha kuwa na imani katika kweli, ambayo ni injili ya maji na Roho.

Wale wanaojihukumu wenyewe hata pale wanapokuwa wakimwamini Yesu basi hao ndio wazushi. Hakuna hukumu ya adhabu katika Yesu Kristo (Warumi 8:1). Ni lazima tufikie uelewa sahihi wa ukweli huu kwa kuamini katika injili ya maji na Roho. Wale walio na dhambi mbele za Mungu hawawezi kuziongoza

nafsi nyingine zenye dhambi kwenda katika Neno la Mungu, wanachoweza kukizaa ni wenye dhambi wengine ambao wanaamini katika utupi kwa mujibu wa mawazo ya mwanadamu.

Lakini wale waliopokea ondoleo la dhambi zao kwa kuamini katika injili ya maji na Roho wanaweza kuwasaidia wengine ambao bado wamebakia wenye dhambi ili waweze kutokuwa na dhambi kwa kutumia Neno la Mungu lililoandikwa, kwa kuwa wameweza kupokea ondoleo la dhambi zao kwa imani. Hivyo, wale wanaokutana na wenye haki ambao wameondolewa dhambi zao kwa kuamini katika injili ya maji na Roho, basi anaweza kulisikia Neno la kuzaliwa tena upya toka kwao, kisha wakafikia hatua ya kumwamini Yesu, kisha na wao pia wakaweza kubadilishwa na kuwa wenye haki.

Wale waliofanyika kuwa wenye haki kwa kuamini katika injili ya maji na Roho si wazushi, bali hao ndio waamini wa kweli. Wao ndio wale waliobarikiwa na ambao wamezaliwa tena upya kwa kuamini katika injili ya maji na Roho. Njia pekee iliyobarikiwa kwa waliozaliwa tena upya ni kuwafuata na kuungana na viongozi wa Kanisa la Mungu, na kisha kuihubiri injili ya maji na Roho kwa wenye dhambi ulimwenguni. Wakristo wanabakia kama wenye dhambi wanapaswa kuja mbele ya wenye haki ambao wamepokea ondoleo la dhambi kwa kuamini katika injili ya maji na Roho, ili watushutumu hadharani kwamba sisi wenye haki ni wazushi. Kitendo cha wao kututupia mashutumuu nyuma yetu pasipo kuonana na sisi ni kitendo cha kijinga.

Je, ni aina ipi ya imani ambayo ni imaini sahihi? Yule akida alikuwa ni Mmataifa, lakini aliliamini Neno la Mungu kama lilivyokuwa. Kwa kuwa aliliamini Neno la Yesu, basi imani yake iliweza kuthibitishwa. Lakini wale ambao walijidai kwa sababu ya imani yao kiothodoksi, yaani wale waliokuwa wafuasi mahiri wa Uyahudi, walikataliwa wote. Mafarisayo

walikuwa ni wenye dhambi, kwa kuwa walishindwa kumtambua Yesu vizuri kuwa ni Mwokozi.

Imani katika Neno la Mungu inatuongoza sisi kwenda katika imani inayotuokoa toka katika dhambi zetu zote, na ni kwa kuamini katika Neno lote la Mungu ndipo maisha yetu yanapoweza kubarikiwa. Imani ya kweli ni kuamini katika Neno la Mungu na kulitii. Na kwa wale waamini wa kweli, Neno la Mungu linatimizwa kwao kadri wanavyoamini. Mungu alisema kuwa imani ya yule akida ilikuwa ni kubwa kwa sababu yule akida alikuwa na imani katika Neno la Mungu.

Mungu ametupatia sisi imani hii kwa neema ya injili ya maji na Roho. Sisi pia tumethibitisha kuwa Neno la Mungu lilitimizwa kwa mujibu wa Neno lililoandikwa. Lakini kwa kweli inatuhuzunisha tunapooona kuwa ni watu wachache tu ndio wenye imani kama ile aliyokuwa nayo yule akida. Hivyo ni lazima watu waamini katika injili ya maji na Roho. Wanapoamini katika Neno la injili ya maji na Roho, ambalo ni Neno la Mungu, basi watu hao wataponywa mara moja toka katika ugonjwa wao wa ukoma wa kiroho kwa mujibu wa imani hii. Imani inayokubaliwa na Mungu ni imani inayoamini katika injili ya maji na Roho ambayo Mungu aliizungumza kama ilivyo.

Imani inayoamini katika Neno la injili ya maji na Roho ambayo imetufanya sisi kuwa tusio na dhambi ndiyo imai ya yule akida ambayo ilitibitishwa. Kwa wenye haki ambao wanaliamini Neno hili, Mungu amewapatia baraka ya ondoleo la dhambi na baraka ya kufanyika watoto wake mwenyewe, na kwa kweli ninamshukuru sana Mungu kwa hilo. Tukiisha kufanywa tusio na dhambi kwa kuamini katika injili ya maji na Roho, basi sasa tumepitishwa na kukubaliwa kuzifanya kazi za haki kwa wengine. Kama Bwana wetu alivyosema kuwa wenye haki wataishi kwa imani, basi hebu tumwamini Mungu katika maisha yetu yote.

Mungu na akuongoze na wewe pia. Amina. Halleluya! ☒

Kwanza Mfuate Bwana

< Mathayo 8:18-22 >

“Naye Yesu alipoona makutano mengi wakimzunguka, aliamuru kuvuka kwenda ng’ambo. Mwandishi mmoja akamwendea, akamwambia, Mwalimu, nitakufuata kokote uendako. Yesu akamwambia, Mbweha wana pango, na ndege wa angani wana viota; lakini Mwana wa Adamu hana pa kulaza kichwa chake. Mwingine katika mwanafunzi wake akamwambia, Bwana, nipe ruhusa kwanza, niende nikamzike baba yangu. Lakini Yesu akamwambia, Nifuate; waache wafu wazike wafu wao.”

Imeandikwa, *“Mwandishi mmoja akamwendea, akamwambia, Mwalimu, nitakufuata kokote uendako.”* Kisha Yesu akamwambia yule mwandishi, *“Mbweha wana pango, na ndege wa angani wana viota; lakini Mwana wa Adamu hana pa kulaza kichwa chake.”* Kwa jinsi ya kiulimwengu, mtu huyu aliyeitwa mwandishi, alikuwa ni mtu mwenye cheo cha juu katika jamii. Mtu huyu aliyekuwa na cheo kikubwa aliamua kumfuata Yesu huku akisema, “Mwalimu, nitakufuata popote uendako.” Mtu huyu alikuwa akimheshimu sana Yesu na kwa kweli alipenda kumfuata Yesu. Bila shaka alikuwa amemtambua Yesu kuwa ni nani, na bila shaka alikwisha waza kuwa hakuna yeyote katika ulimwengu huu anayeweza kuwa mkuu kama Yesu.

Lakini Yesu alimwambia, *“Mbweha wana pango, na ndege wa angani wana viota; lakini Mwana wa Adamu hana pa kulaza kichwa chake.”* Baada ya kusikia maneno haya, bila

shaka yule mwandishi alikata tamaa. Pamoja na kuwa alimheshimu sana Yesu, mwandishi yule alikata tamaa baada ya kuona kuwa hakuna atakachopata kwa kumfuata Yesu. Mwandishi alitegemea kuwa angeweza kupata kitu fulani toka kwa Yesu akiwa kama mmoja wa wanafunzi wake. Lakini Yesu alimwambia Mwana wa Adamu hana mahali pa kukilaza kichwa chake. Baada ya kusikia haya, kwamba Yesu hana hata kiwanja cha ardhi, wala hana nyumba yake binafsi, wala hana chochote hapa duniani, basi yule mwandishi akakata tamaa.

Wakati mmoja mwanafunzi wa Yesu aliposema, “Bwana, nipe ruhusa kwanza, niende nikamzike baba yangu,” Yesu akamwambia, “Nifuate; waache wafu wazike wafu wao.”

Mwanafunzi ni yule anayemfuta mwalimu wake. Inapofikia hatua ya sisi kumfuata Bwana, basi kile ambacho Yesu amekisema hapa kwa kweli kinatisha. Yesu anatuambia hapa kuwa watu wa kidunia hawawezi kumfuata Bwana hata kama wanataka kufanya hivyo, hii ni kwa sababu wanafahamu kuwa hakuna kitu wanachoweza kukipata kwa kumfuata Yesu. Kwa kweli, ni kitu gani ambacho mtu anaweza kupata kwa kumfuata Bwana? Kama Yesu alivyosema kuwa Mwana wa Adamu hana mahali pa kulaza kichwa chake, basi watu wa kidunia wanakuwa hawana sababu ya kumfuata Bwana.

Ukitaka Kumfuata Bwana, Ni Lazima Uipende Injili

Mmoja wa wanafunzi wa Yesu alimwomba Yesu ili amruhusu aende kumzika baba yake kisha ndipo amfuate. Kwa kuwa baba yake alikuwa amekufa, je haikuwa sawa kwa yeye kwenda kwanza kumzika baba yake na kisha kurudi kumfuata Yesu? Jambo hili lingelikuwa ni sahihi kabisa ikiwa kama

lingetazamwa kwa mujibu wa maadili ya ulimwengu huu. Lakini katika Biblia, Yesu alisema, *“Nifuate; waache wafu wazike wafu wao.”* Kwa maneno mengine, inawezekanaje kwa mtu kujiita kuwa ni mwanafunzi wa Yesu kumfuata Bwana baada ya kuwa ameshughulikia mambo yake ya kimwili? Ikiwa mtu anataka kwa kweli kumfuata Bwana, basi mtu huyo ni sharti ajikane mwenyewe, ajitwike msalaba wake, na kisha amfuata Bwana (Marko 8:34). Biblia inatueleza sisi kuwa ikiwa kweli tunatamani kumfuata Yesu Kristo, basi ni vema tutambue kuwa tunaweza kufanya hivyo ikiwa tutawaruhusu watu wa kidunia kushughulikia mambo yao ya kidunia.

Hebu tufikirie juu ya jambo hili kwa makini. Unapojaribu kumfuata Bwana kunakuwa na vizuizi vingi vya kimwili vinavyokuzuia usidumu kuwa mwanafunzi mwaminifu. Wakati mtu fulani anapokuwa na Bwana na akataka kumfuata, basi kizuizi cha kwanza mbele yake ni suala la familia yake. Ikiwa mtu huyo hataitunza familia yake basi anajisikia vibaya, na anafikiri kuwa anapaswa kuitunza familia yake na kuwasaidia.

Baada ya kuwa nimezaliwa tena upya, kulikuwa na nyakati ambazo nilikutana na tatizo kama hilohilo. Kaka yangu mkubwa alifariki mapema na akaacha mjane na watoto wawili wa kike na mabinti wawili, yaani jumla ya watoto wanne ambao nilipaswa kuwatunza mimi mwenyewe. Kwa kweli niliwapenda na kuwatunza sana hawa watoto tangu wakati walipozaliwa. Lakini badiliko kuu lilitokea wakati yule kaka yangu alipofariki maana ndio wakati nilipozaliwa tena upya. Hivyo nikawa na jukumu la kuzifikiria nafsi zilizopotea, na kisha nikajisikia hamu kubwa sana ya kumfuata Bwana. Moyo wangu ulitaka kuieneza injili hata kwa mtu mmoja ili kumsaidia aweze kupokea ondoleo la dhambi zake.

Lakini kulikuwa na kitu ambacho kilikuwa kikinishikiria na kunivuta nyumba. Kitu kilichonivuta nyuma kifikra

walikuwa ni wale watoto wa marehemu kaka yangu ambapo niliona wazi kuwa nilipaswa kutafuta fedha ili kuwatunza. Hakukuwa na kifungu maalumu cha kanuni ambacho kilinilazimisha mimi kufanya hivyo, bali nilikuwa na nia hiyo ndani ya moyo wangu. Basi hapo nikaanza kuhuzunika juu ya kile nitakachokifanya. Watu wakubwa wanaweza kujitunza wenyewe, lakini kwa kuwa wale watoto wa marehemu kaka yangu walikuwa ni wadogo huku wakiishi na mama yao aliyekuwa amevunjika moyo pasipo kuwa na baba yao, kwa kweli nilijiona wazi kuwa nilikuwa ninapaswa kuwaonyesha wema wangu na kuwatunza. Na ili niweze kuwatunza basi ilinipasa kutafuta fedha. Suala la kutafuta fedha za kutosha kuwasaidia wote watano akiwemo shemeji yangu halikuwa jambo rahisi kwangu. Kwa kweli kiwango kikubwa cha fedha kilihitajika ili kuwawezesha watoto hao kwa chakula, mavazi na gharama za shuleni. Lakini pia nilipaswa kuihubiri injili. Ikiwa ningeliitumikia injili basi kwa hakika ningelikosa muda wa kuwatunza, na kama ningeliwatunza wao, basi nisingeliweza kuihubiri injili. Basi niliendelea kufikiria na kuhuzunika juu ya kile nilichopaswa kukifanya.

Hatimaye baada ya muda fulani nikafanya uamuzi. Hitimisho nililolifikia lilikuwa ni hili: ingawa ilikuwa ni muhimu sana kwangu kuwatunza watoto wa marehemu kaka yangu, basi nitawasaidia hapo baadaye nitakapoweza kufanya hivyo, lakini kazi ya Mungu ni lazima ifanyike na sintaweza kuiacha, kwa kuwa kama sintaihubiri injili, basi nafsi nyingi katika ulimwengu huu zitakufa katika dhambi. Basi ile hofu ya kutotambua kuwa nifanye nini ikawa imetatuliwa. Ikiwa ningeliendelea kutafuta fedha ili kuwatunza wale ndugu zangu watano na kisha nikaacha kuihubiri injili, basi ni dhahiri kuwa ningelikuwa nimeitafuta furaha ya kimwili kwa ajili ya hao watu watano tu. Lakini kama ningeliitumikia injili na kumfuata

Bwana, basi jukumu hilo lingeliwaleta watu wengi kwenye uzima na hivyo kuwafanya watu wengi wawe na furaha ya kweli. Hivyo baada ya kufikiri kwa kina, basi hapo nikafikia uamuzi wa mwisho kuwa, “Samahani sana enyi watoto wa kaka zangu, kwa sasa siwezi tena kufanya jambo hili. Si kwa sababu siwapendi. Kwa kweli nawapenda. Ninawapenda kwa hakika, lakini kwa sasa naweza kuwasaidia kidogo. Binafsi nilitumaini kuwa wanaweza kufanya kazi kwa bidii na kisha wataweza kuyashinda mapito yao, na kwamba Mungu atawabariki na kuwasaidia.” Kisha nikasimama na kumfuata Bwana.

Mambo mengi kama hayo yanajitokeza kwetu sisi tunapoishi katika ulimwengu huu. Baada ya kuzaliwa tena upya, tumejiuliza mara ngapi, “Hebu kwanza nikamzike baba yangu”? Ingawa tumezaliwa tena upya kwa kumwamini Yesu, je, hakuna mambo mengi ya kimwili ambayo tunahitaji kuyafanya? Je, tuna watu wangapi ambao wanahitaji msaada wetu? Katika kifungu cha leo cha maandiko, yule mwanafunzi alisema, “Nipe ruhusa kwanza, niende nikamzike baba yangu,” lakini kama angelishughulikia mambo yake ya kimwili, angelipata wapi muda wa kuifanya kazi ya Mungu? Je, ni lini ambapo angepata muda wa kutosha? Hii ndio sababu Yesu alimwambia, “Nifuate; waache wafu wazike wafu wao” Yesu aliyasema haya kwa kuwa ndio ukweli.

Hakuna mtu anayeweza kufanya mambo mawili vizuri kwa wakati mmoja. Ingawa tunapenda kuyashughulikia mambo yetu ya kimwili pamoja na yale ya kiroho, ukweli unabaki kuwa hatutaweza kuyafanikisha mambo haya yote kwa wakati mmoja. Hata kama mtu ana kipawa kikubwa cha kuweza kushughulikia mambo mawili kwa wakati mmoja, basi mtu huyo anapokuwa ameshikilia jambo moja basi anakuwa hawezi kufanya kwa uaminifu kwa jambo jingine lililosalia.

Hii ni kwa sababu hata kama mtu ana karama kiasi gani ukweli unabaki kuwa kuna ukomo wa uwezo katika kila jambo. Hebu nikuonyeshe mfano. Hapo zamani tulipokuwa bado tupo shuleni tukijisomea kwa ajili ya mtihamu, mara nyingi tulilenga katika masomo kadhaa. Tuliwekea uzito katika somo fulani na kisha tuliutoa muda wetu mwingi kwa ajili ya kulisoma somo hilo, na kwa sababu hiyo tulishindwa kuyasoma masomo mengine kwa nguvu ile ile. Hii ni kwa sababu sisi ni viumbe ambao si wakamilifu.

Hivyo tunapaswa kukifikiria kifungu hiki mbele za Mungu kuwa ni kitu halisi: “Nifuate; waache wafu wazike wafu wao” Tunapaswa kuitambua maana ya kifungu hiki na kuifuata. Mtu kumzika baba yake ni jambo sahihi. Ni kitu ambacho sisi sote tunapaswa kukifanya. Je, kuna mmoja wetu hapa kati yetu sisi tuliozaliwa tena upya ambaye hawezi kuhudhuria mazishi ya mmoja kati ya wanafamilia wake ambaye amefariki? Kila mtu anafanya hivyo. Lakini Bwana alizungumza kwa mmoja wa wanafunzi wake juu ya kile ambacho wanatakiwa kukifanya kwanza.

Je, wenye haki wanatakiwa kufanya nini kwanza? Kwanza wanatakiwa kuifanya kazi ya Mungu, kumfuata Mungu, kuitumikia injili, kufanya yale ambayo Bwana anataka wayafanye, na kisha kwenda kokote ambako Mungu anawaongoza kwenda. Kumfuata Bwana ndiyo maisha ya ufuasi. Baada ya kuzaliwa tena upya, basi kule kuwa mfuasi wa ulimwengu au mfuasi wa Bwana kutajulikana kutokana na uamuzi wetu ikiwa tunamfuata Bwana au ulimwengu na vigezo vyake vya kidunia. Watu wa ulimwengu huu wanafikiri kuwa wanafunzi wa Yesu ni kama watoto, na wa kimwili, kana kwamba si kitu. Wao wanafikiria hivyo kutokana na vigezo vyao vya kidunia. Wafuasi wa Yesu wanafikiria zaidi, yaani kwa mtazamo wa juu zaidi kuliko wafuasi wa ulimwengu huu,

malengo yao ni ya kifalme, na mioyo yao ni mikubwa kama bahari. Hali tukiwa tumezaliwa katika ulimwengu huu mara moja, basi tunapaswa kuishi maisha yenye maana, na kuyaishi maisha hayo ndiko kuishi maisha ya ufuasi.

Wewe ni Mfuasi wa Nani?

Je, wewe ni mfuasi wa Yesu, au wewe ni mfuasi wa ulimwengu? Hebu tuseme kwa lugha nyingine, je, unafuata ulimwengu, au unamfuata Yesu? Wale wanaomfuata Yesu wanaacha kila kitu cha ulimwengu huu na wanataka kuitumikia injili ya Bwana. Basi wale wanaoishi kama hivi ndio wafuasi wa Bwana. Katika Kanisa la Mungu kuna baadhi ya waaamini walei ambao wanamtumikia Bwana hali wakiishi maisha yao ya kijamii, wakizitunza familia zao, huku wakiendelea na ajira na biashara zao kwa juhudi. Maisha ya jinsi hii pia ni maisha ya ufuasi wa Bwana. Pia wapo wale wanaoitumikia injili ya Bwana kikamilifu na kipekee. Wao ni wafuasi wa kweli wa Yesu na wanaishi maisha mazuri ya kiufuasi.

Haijalishi jinsi mfuasi anavyozifuata hatua za mwalimu wake. Wafuasi wa Yesu wanafanya yale ambayo Yesu anataka wayafanye. Hivyo, wale walioamua kumwamini na kumfuata Yesu ni lazima wamfuata Bwana daima. Yesu alisema hapa kuwa, “Nifuate,” kwa kweli ni furaha sana kumfuata Yesu. Kwa kweli Yesu ni mwalimu mkuu sana na aliye mwema. Ikiwa tutamfuata kweli Bwana, basi kwa hakika hatutaweza kujuta.

Ikiwa tutamfuata Bwana, basi ni dhahiri kuwa hataweza kututupa nje kamwe, na wala hatatusaliti. Kumfuata Bwana hakuwezi kamwe kuishia kwenye utupu. Hii ndiyo sababu Bwana Yesu aliwaambia wafuasi wake, “*Basi, enendeni,*

mkawafanye mataifa yote kuwa wanafunzi, mkiwabatiza kwa jina la Baba, na Mwana, na Roho Mtakatifu; na kuwafundisha kuyashika yote niliyowaamuru ninyi; na tazama, mimi nipo pamoja nanyi siku zote, hata ukamilifu wa dahari” (Mathayo 28:19-20). Yesu, bado anatueleza wafuasi wa leo kuwafanya wengine kuwa wanafunzi wake toka katika mataifa yote.

Tunapaswa kufikiria juu ya ufuasi wa kweli ulivyo, kisha tukajichunguza ikiwa kweli tunaishi maisha ya ufuasi. Tunapaswa kulifikiria jambo hili kwa kina huku tukiacha ratiba zetu zinazotutinga. Ni lazima tuzitafakari kwa upya akili zetu mbele za Mungu ikiwa kweli tunafurahishwa na uamuzi wetu wa kuwa wafuasi, na kama tupo tayari kumfurahisha Kamanda ambaye ametuorodhesha kuwa ni askari wake (2 Timotheo 2:4). Ni lazima tuthibitishe kuwa maisha ya ufuasi wa Yesu ndiyo yenye thamani sana kwetu sisi. Pia tunapaswa kuiweka mioyo yetu kama wafuasi wema wa Yesu kwa mara nyingine tena.

Wapendwa ndugu Wakristo, mwandishi alitaka kumfuata Bwana, lakini hakuweza kufanya hivyo. Mwandishi alishindwa kufanya hivyo kwa kuwa Bwana alimwambia wazi kuwa hakuna atakachopata kwa kumfuata Yeye. Yesu alisema, “sina kitu, lakini kama unataka kunifuata basi nifuate. Sina mali katika ulimwengu huu. Lakini kwa kweli, mimi ndiye mkuu katika Ufalme wa Mbinguni, Bwana wa mabwana na Mfalme wa wafalme. Lakini pamoja na hayo sina kitu chochote katika ulimwengu huu. Mbweha wana mapango na ndege wa angani wana viota, lakini mimi sina mahali pa kukilaza kichwa changu. Hivyo ikiwa unataka kunifuata huku ukiwa na tamaa zako za kidunia, basi fanya hivyo hali ukitambua kuwa huwezi kupata chochote katika ulimwengu huu. Ikiwa unataka kunifuata pamoja na kuwa unatambua hivi, basi nifuate.”

Lakini Yesu alisema kwa wanafunzi wake, “Nifuate; waache wafu wazike wafu wao, na unifuata” Je, hawa wafu ni

watu gani? Je, si wale ambao hawajazaliwa tena upya? Ni wale ambao hawamwamini Yesu na injili yake ya kweli ya maji na Roho. Ulimwengu unaweza kuwa umejaa vizuizi vingi, na inaweza kuwa ni vigumu sana kwetu kumfuata Bwana, lakini kadri unavyoyaishi maisha yako, basi ni vema ukumbuke kuwa Bwana wetu alisema kuwa “Nifuate”

Ni matumaini yangu na maombi yangu kuwa mtakumbuka daima katika mioyo yenu kuwa Bwana wetu alituambia kumfuata Yeye, na kwamba kwa hakika mtafanya hivyo. ☒

PAKUA

Vitabu na vitabu vya sauti vya Mchungaji Paul C. Jong kwenye simu yako mahiri, kompyuta kibao au PC kwenye wavuti yetu. Unaweza kusoma na kusikiliza mahali popote, hata wakati hauna muunganisho wa mtandao.

 www.bjnewlife.org



Ukurasa wa nyumbani



vitabu

vya

Vitabu pepe





Rev. PAUL C. JONG

Mwandishi amekuwa akihubiri injili ya maji na Roho kwa nafsi zilizopotea katika ulimwengu huu kwa takribani miongo miwili hadi sasa.

Kama mwanzilishi wa Huduma ya Utume wa Maisha Mapya (The New Life Mission), kwa sasa anawaelekeza na kuwatia moyo wanafunzi wengi wa Yesu katika shule ya kimissionari ya Utume wa Maisha Mapya (The New Life Mission School).

Baada ya kuanzisha makanisa ya kimissionari katika maeneo mbalimbali duniani, kwa sasa anaeneza injili kupitia kazi zake za kiuandishi.

Kwa sasa vitabu vyake vimekuwa vikitafsiriwa na vinasomwa katika zaidi ya lugha kuu 96 ulimwenguni.

Maneno machache toka kwa Mwandishi



Ni lazima tuwe na imani ambayo Mitume walikuwa nayo na kisha tuamini kama wao walivyoamini kwa kuwa imani yao ilitoka kwa Roho Mtakatifu. Mitume walimwamini Yesu Kristo, Baba yake, na Roho Mtakatifu kuwa ni Mungu wao.

Mtume Paulo alikiri kuwa alikufa pamoja na Kristo na alkaishi pamoja na Kristo. Paulo alifanyika kuwa chombo cha Mungu kwa kuamini kuwa alibatizwa katika Yesu Kristo (Wagalatia 3:27). Katika injili ya Mungu kumapatikana ubatizo ambao Yesu aliupokea toka kwa Yohana Mbatizaji, damu ambayo aliimwaga alipokuwa alikwa Msalabani, na karama ya Roho Mtakatifu ambayo amoitoa kwa mtu yeyote anayeamini katika injili hii ya maji na Roho.

Ninaomba na kuamini kuwa kila mtu katika ulimwengu huu ataamini katika injili hii ya asili ya maji na Roho na kuishi maisha ya haki mbele za Mungu kwa kuwa mwenye haki ataishi kwa imani (Wachemia 10:38). Hii ndio sababu mliamua kuendelea kuandika mfululizo huu wa ulujaji wa kiroho. Nina hakika kuwa mfululizo huu utaimarisha imani yako katika injili ya kweli ambayo kwa asili ilifuatwa na kuhubiriwa na Mitume na kukuongoza kumfuata Bwana kama mfuasi wake.

- Paul C. Jong -